

林蕙堂全集

吴绮

文硕阁

wenshuoge.com

目录

关于我们	3
提要	5
卷一	6
卷二	24
卷三	37
卷四	54
卷五	69
卷六	77
卷七	89
卷八	98
卷九	113
卷十	126
卷十一	135
卷十二	146
卷十三	156
卷十四	166
卷十五	177
卷十六	214
卷十七	241
卷十八	269
卷十九	296
卷二十	326
卷二十一	348
卷二十二	357
卷二十三	390
卷二十四	431
卷二十五	442
卷二十六	461

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部七

林蕙堂全集 别集类六 【国朝】

提要

【臣】等谨案林蕙堂全集二十六卷

国朝吴绮撰绮有岭南风物记已着录王方岐作绮小传称所著有亭臯集艺香词林蕙堂文集诸编绮没之後其子壽潜蒐访遗稿合而编之此本一卷至十二卷为四六即所谓林蕙堂集也十三卷至二十二卷为诗即所谓亭臯集也二十三卷至二十五卷为诗余即所谓艺香词也二十六卷则以所作南曲附焉

国初以四六名者推绮及宜兴陈维崧二人均原出徐庾维崧泛滥于初唐四杰以雄博见长绮则出入于樊南诸集以秀逸擅胜章藻功与友人论四六书曰吴园次班香宋艳接仅短兵陈其年陆海潘江未犹强弩其论颇公然异曲同工未易定其甲乙其诗则才华富艳瓣香在玉溪樊川之间诗余亦颇擅名有红豆词人之号以所作有把酒嘱东风种出双红豆句也所作院本如啸秋风绣平原之类当时多被管弦以各有别本单行故仅以散曲九阕缀之集未统而观之鸿篇钜制固未足抗迹古人而跌宕风流亦可谓一时才士矣乾隆四十六年十月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

林蕙堂全集卷一

湖州府知府吴绮撰

赋

康山读书赋

惟余生之寡偶伫遐览於中区承延陵之遗绪绍左台之令图既少孤兮偃蹇值世难兮为儒耻捷径以窘步矢贞固而弗渝漱翰林之芳润入艺圃而勤劬于是畋渔百代怀抱一编终弃繻兮早岁机入洛兮妙年慨赤乌之颠覆逢青犢之蔓延火照啼乌之苑尘飞渡马之川琼树摧于断磧垂柳化为荒烟管幼安去之长白扬子云守其太玄若夫通子未生少君初嫁寄櫓兮堂中赁舂兮庑下佣马磨以心伤泣牛衣而泪泻频遭魑魅之揶揄屡受路人之推骂岁有秋而靡春时在晨而非夜鲜故交而问焉哀王孙而饭者尔乃抱影荒凉携孥踟躅野寻不藪之丘巷就无人之谷雪结苇以对窗风卷茅而败屋饥鹤啄于空庭悲?号于古木徒听古院之钟莫借邻家之烛则有襄汉逸妻伏川良偶鋤挥野外之金裘典市中之酒爰辞楚以同心亦入秦而携手良人岂其长贫君子居之何陋偕东方而不絶出北门兮奚诟则有匡鼎谈诗侯芭问字萤死囊中鱼生篋里案就雪而长欹牀随陰而独徙书淫酷似于刘生传癖或同于杜氏夏侯倚柱而忘雷高凤持竿而及水嗟风雨其如晦维鸡鸣而不已莫不逍遥丛薄啸傲长林虽九迁而奚慕乃五噫之偕吟对青山兮扣白石引浊醪兮弹素琴彼处堂之燕雀亦何足知鸿鹄之心哉

区室赋

洲比鱼梁湖称鴈翅江醴陵梦锦之川李供奉含毫之地偃翠屿于中央渺沧波而无际信幽旷之灵壤足高深之遐契乃有东园耆旧南国英华桥真百口里自千家指玉潭而作墅环锦石以分沙仲长统心耽白水孙子荆癖染青霞于是独辟菟裘别开羊径洞拟避秦斋题宝晋石仓堆曹氏之书酒库积焦公之醞疏绿水以相通对青山而取正尔乃草栽玄鹿树种金鹅杨低碧软藤老红多鹤性闲而识字鸥态懒而凌波有檐前之睨睨无庭下之婆娑加以千帆送雨并入窗间四岭吹岚俱来枕上农赛鼓而秋登渔收罾而夜唱稚子则徵税于鱼田先生则横经于鹤帐莫不闲吹楚蕙饱饭山薇醉邀月入坐閱花飞考遗文于锦帙振逸响于瑶徽归去来兮自守老庄之止足区以别矣宁言魏晋之是非

米山堂赋

乃有阳陵公子秋浦先生蚤投簪于衡岭遽还辙于臯亭搴芙蓉而作屋结薜荔以为纓漆园则仿之蒙叟竹径则启乎元卿于是林通复道坐引清澜疏轩就燠辟馆辞寒图蓬瀛于檻内画云气于楣间厥堂肯构号曰米山其前则岫引长松其後则峰环翠筱左抗桂花之幽岩右带莲花之曲沼既柳密而宜蝉亦花深而足鸟盍堪荐酒是垂藟子之藤带欲抽书用蒔康成之草况复琴名白博枕字红蕤帖宝昭陵之赐书留邨架之貽朱墨黄则史分数页金银斑则管列三枝南垞含毫尚忆右丞之画东山着屐未忘太傅之棋尔其庭有五龙窠名羣凤人则淮海八公客则求羊二仲秣供陶令之田酒足步兵之瓮仇香无美于鸞栖和靖可资夫鹤俸故能乐志穷年见几终日曼倩以玩物而取容长统则养和而不出事在拙而弥尊道用柔而益直言同僊尉入梅市以难寻恐似渔郎访桃源而已塞

鬪蟋蟀赋

露老梧桐之月云深酒色之天五雉翻盆卢看擲帽双犀出塹马笑投钱刘寄奴之豪情未已贾秋壑之逸兴重騫爰徵威於羽国遂选勇于虫兵黄金铸秤紫玉雕罍既曹分其种色次部伍其重轻弱足之与强头谱前论系一青之及五白删外存经于是此号蜘蛛彼夸蝴蝶翅翅梅花腰腰薤叶气一鼓而不衰勇三登而未竭其未合也如木鸡之不见其既鬪也俨鍊骑之相接尔乃金字琵琶香称狮子戴我头来饱卿拳矣或始伏而终搏或初生而後死淮陰之渡齐水轻骑潜行钜鹿之鬪秦军呼声乱起义戟银须怒鋸鍊齿必甘心于乱人将报声于知己若夫巧在伐谋鬪非专力见垒满而气生听穀鸣而义激笑薄技于螳川羞覆师于蚁国宜乎博纵千金采陈双壁出垒升塹寒敌军之心胆收缶论功飧主人之黎粟也

爽阁赋【为钱葆汾舍人作】

视草名家采花胜蹟才高大历之年地近平原之宅乌府彰其汉纓青峰韵于湘瑟江山得助蹲小凤之九苞湖海知豪坐元龙之百尺则有阑干玳瑁帘押真珠刻灵芝于绣拱拾瑶草于琼除锦贮郗郎之管香薰曹氏之书南斗垂杓旷朗固仙人所好西山挂笏高明信君子之居于是振舄遐临揽衣长眺塔碧春云楼红晚照龙湫斜带而孤澄鹿苑遥分于衆造鱼鳞万瓦青杨带雨而参差雉堞千门白苧横霞而缭绕尔乃水如衣带山似屏风泖遥连而月映峰环峙而烟笼备四时於檻内收百里于窗中月皎兮其可怀惟凭来去风冷然而称善何辨雌雄则可以集嘉宾延胜侣送目八区抗情千古携荀氏之熏炉横晋人之谈麈浮金屈卮歌谢朓之诗挥玉如意作王戎之舞况乎鹤成一顶鲈有四腮张掾归时蓴容客饱吴王猎处花向人开召太白以填词君须且住听小红而度曲我待重来也

黄金台赋

登平原以一望惟蔓草而已矣问古道於行人云金台之故址唏噓乎荒湑来耄吟死在子平之新立将招贤而雪耻视其可者请从隗始则斯地也固有崇基碍日杰构凌云升堦论武辟馆摛文悬千金以买骏仿遗术於涓人於是衍自临缙辛由上党有昌国之雄才亦怀奇而遄往皆骋足於瑶衢并奋翎於珊网临斯台以骋眎见山川之泱泱收形胜於目中玩敌人於股

掌乃展妙略出奇兵罢诸侯而不属驱鋏骑以长征凡数战而至济上历五载而下七十有余城设齐器於宁台陈大吕於元英洗前人之积愤扬海内之鸿称信人国之成败以贤者为重轻何历世之未几弃喆士而弗庸好图中之绿耳忽在廐之飞龙置兰筋而不驾策弩步以求工曾牝牡之未识任颠倒於意中遂使黄金日重白璧长埋晨风兮远引汗血兮不来瀦遗宫於薮泽没旧馆於蒿莱传虚名於古册重过客之徘徊唏嘘乎草萧萧兮泣寒露瓦粼粼兮窜狐兔思昔人兮不见访遗踪兮无处怀长铗兮空归耿余怀兮终古

燕子赋

参差送远下上于飞岁有期而必至主虽贫而亦归惟玄裳之羽族与春风而不违若夫临秋暂去候社俱来海外有留郎之国燕中有别友之台五色朱丝曳仙人之广袖一双白璧化神女之轻钗艳争传於雒种灵岂侈於商祿尔乃喃喃絮月故故袞风轻衫一两细剪双封杨柳枝高笑微翎之染碧桃花影重看小喙之黏红加以苻丝绿浅杏子黄初石氏歌台裹雕梁以玳瑁王家酒榭缀帘押以真珠雏学飞而未远巢试暖而堪居莫不来回两两去住双双留莺学语共蜨争香颤钗梁之碧玉长迷下蔡舞掌中之白苎薄醉昭阳遂使春事兴衰夕阳今古玉京冢上叹彩线於黄昏盼盼楼中恨白杨之夜雨记六朝之巷名是乌衣入百姓之家梦谁朱户

焚香赋

花净春棂月吹秋帐迟美人兮不来拥薰笼兮谁望采艾蒨兮山中间都夷兮海上云衣暂擘石叶双安鸂鶒卸粉鹧鸪留斑近愁烟剧远讶灰寒心中字苦眉下痕慳白凤翔於晓幕绿龙焚於夜山经旬似暖半笑疑温长垂髻影细乱衣魂腻衾花而入绣透衫纈而栖痕见鄂君兮何夕坐贾午兮黄昏悬青绡兮不寐结翠绶兮谁分乱曰辟寒宝障流苏长火山十里金凤皇期君待君君不至直须还我绣香囊

瓶庵赋【并叙】

家雨岑早具才情长修行谊原孝先京兆之俊然诺无侵马少游关陇之贤楷模不苟门前车辙长者频来坐上盘觴高人长在得百斤于楚国岂重黄金下一矢於聊城非凭白羽赠惟君子或拜下风利出仁人有如皦日固患其无语耳遑虑乎多言哉尔乃老至弥冲德高益劭退而自号命曰瓶庵盖取郑公守口之箴用惕诗人扞舌之义也夫瓶之为器受小而容多瓶之为能出艰而施博雨岑之取以自况不已然乎昔万石传家庭中之马必数七旬受赐室内之树不言古之名贤类多如此苟无忘于玉汝之义其尚念乎金人之铭乃为之赋曰

美矣吾宗修能特起少奉教于哲人早聆音於君子绍谦德於延陵继清风於角里既有孚而缶盈庶无讥于罍耻爰标斗室取义富公守予衷而靡失鉴维口以兴戎恐一出之莫返冀三缄之可终象山雷之在颐秉心惟慎悼水泽之为困尚口乃穷於是寓目以形见道於器用守约而施博遂先难而後易出必期其可归始则求乎能继其中有蓄宁如石鼎之彭亨厥用维

难聊法开瓿于有繁所以挈原非智羸或无危能有容而不溢亦为器而非欹仿抑戒于卫武法寡尤於仲尼或指子之口惟酒可饮用卷尔之舌匪驷能追邹长倩宁见讥於扑满扬子云可无笑於夷岂止朱提见称楞伽是仿周则蟠以螭文汉则错其麟象惟此径寸之图庶无二三之爽居之何陋信瓮牖之常安言矣非夸同尊彝而足尚也

画舫闻歌赋

乃有海上名豪汉东逸侣生从羣玉山头来自衆香国土本凤凰池上之仙作鸳鸯社中之主柳枝结带以相从桃叶横桡而唤渡青帘锦缆望为天上之楼船金管玉箫岂是人间之歌舞访二分之明月人尽霓裳杭万顷之清波舟皆云母爰停芳桂特系垂杨命词英以授简召胜客以飞觴文举之豪情莫匹公瑾之雅度非常高致则来元卿于竹迳博识则见朱异之缥囊人似子康乃共羣贤而至我非季重亦偕七子之行主人命红粉之虞侯咸徵歌而奏伎羣姬乞彩毫於学士能刻羽而移商则有玉爰其清金求其艳芳姿掩袖以回眸宠姐披帷而露面静闻素素调弦娇靚红红整钗飞琼按节以瑶簪丽英含情于纨扇朱家淑质小令不号断肠殷女昌容柔颜独能怡念避人幕里或为鸾鬓之郗超窥客窗前亦有蛾眉之曼倩莫不情随声转态逐情调音以柔而取媚字欲吐而还娇或前扬而後抑或始下而终高或激昂而屡变或婉约而频摇或溜亮而圆如明珠之一串或引伸不断如弱缕之三縑或如振木之凉风凄然以思或如洒窗之密霰戛矣难销遂觉忽然而悲胡然而喜靡竟其端莫能自己恂兮恍兮高矣美矣绿腰以之结声红牙于焉合指信可遏乎行云岂必闻乎变徵游鱼因而出听翔鸟皆为戾止于斯时也不其乐哉四座之声俱寂诸宾之意云谐既停杯而刻烛亦错履而遗钗金谷之游未已玉山之醉方颓两岸秋声枫叶与芦花并舞一江月影流波与征鴈俱来君若聆郢雪之音曲将阑而未倦吾则听钧天之奏梦欲寤而还猜

家云逸观颐堂赋

尔乃黄岳峙其西临澄溪环而左绕山叠翠而难分水浮青而不了松菊多傲俗之花鸥鹭是忘机之鸟商山之芝草可飡武陵之桃花不扫信有同于灵境亦何殊于仙岛地如彭泽南村多素心之人岭似洛川东园有皓眉之老则有延陵俊彦歛浦英豪因宁亲而荐旨为侍养而诛茅导潘舆而左右辟蒋径以周遭高深得性情所近爽垲亦风土所饶既肯堂而肯构可以燕而以敖拟以宴乐之需无取于云上之象况以饮食之渐略同乎磐吉之爻若夫时值鹄飞人多燕喜吸荷露于晨曦聽松涛之夜起华峯之枕初推亭林之杯伊始守黄老之庚申历繇人之甲子葆德者于以存真养志者因而?灑其为体也既外实而内虚其为义也则下动而上止於是进杜孝之脰烹季伟之鸡子路负米而在廩曾子芸瓜而满畦羊有跪乳之礼鴈为祝噎之仪几与杖而可适寝与食而有时常徐行而扞腹或侍坐而搜奇英流用以引年聊于焉而奉老识者许其养正遂字之曰观颐颐之义大矣哉观之上有庆也况侣避世之禽鱼兼少入尘之车马拥万卷而优游历四时而潇洒养体及养志而偕康履险与履危而益寡乐泉石之萧疎备古今之风雅自足于己既匪猛虎之可耽无求于人岂复灵龟之用舍则有不惟其声而惟其意不惟其事而惟其诚察之常存於未动视之或在於无形或酱或醋而备其物为饗为飧而遂其情将心目之偕畅胥志气之交宁积善乃能余庆久视可以长生倘申公有蒲

轮之徵大烹以养若石氏赐上樽之酒明德惟馨

瑞栢赋

考仙经之嘉植美栢栌之亭亭得九秋之正聚五木之精产汝南之邃谷出新甫之高陵枝参天而上指根蟠地而西行田鸞啖之而得号赤松食之而延龄常磊砢而宿凤或偃蹇以骑鲸虽时序之代谢曾不叹夫凋零则有桓桓而荣童童而茂云气美于秦皇岱岳传于汉后蔚香叶以霄蒙匝霜皮而雨溜材虽任乎栋梁质岂堪于缔构受乌兔之精英与玄黄其并久岂斤斧之可施茁溪山而非偶神仙每取以为餐元正亦采而献酒是宜号为苍官殊有资于黄耆若乃伊川华裔安定名家品实高而莫及德则溥而无涯考灵图于绿籍得仙诀于黄芽火伏轩皇之鼎炉存葛令之砂方培根于瑶砌或夺秀而成葩锺乾坤之清淑当春夏之芳华味则同于绛雪品则醲乎流霞历千春其独茂等八极以犹矜尔其碧叶森森金英簇簇色以进而愈深味以甘而更沃初则比之岩桂既则炜于庭菊甘则如饴嗅而益馥比槐棘以菁菁照芝兰之郁郁树可繫乎青牛蕊可饲乎白鹿神人见以徘徊仙老来于信宿兆夫奕叶是曰公辅之祥知其後天厥应神仙之籙况夫月逢赤骑岁御金羊方将荣于拜甲正献壽以跻堂吕尚见梦於渭水宋纖驰誉于炖煌

天子闻之而赐杖密戚届此而称觴见奇英之满目咸抚干以徜徉美九如之未艾卜五世之其昌祜适符於鹤荷庆更衍于龙章则有济阳之公子击节而惊为罕有於是延陵之逋叟染翰而颂其无疆也

杏花春雨楼赋

于鼎文治两汪子世居歙之松明山杏花深处新构一小楼兄弟读书其上曹实庵使君取宋人杏花春雨江南句顏之曰杏花春雨楼友人吴听翁登而乐之援笔而为之赋赋曰

揽人间之山水何处蓬瀛问江左之楼台几多烟雨则有虎观英流龙溪胜侣承玩鵷之遗址自是青门籍司马之高名犹存朱户同居参佐聯牀有陆云之兄世列高平与砚是范乔之祖于是丹梯独耸直上三层乌榻横陈恒居百尺推窗而羣峯列嶂山欲拖蓝凭檻而画舫当门波皆泛碧高低窗户收灝气於初澄宛转栏杆倚斜阳於将夕景随境设既无候而非佳胜逐年来最何时而堪忆若夫青阳御辰白沙应节柳垂缕而将烟梅谢琼而无雪时当人醉之天岁值参昏之月纪韶华於荆楚家始闻莺访风俗於洛阳人皆扑蝶尔乃欲霁非晴犹寒渐暖笼翠陌兮烟轻弄青帘兮风软霏霏欲湿脂遂凝于千丝的的能鲜霞似蒸於万点坊开碎锦既若淡而若浓彩染生绡仍半深而半浅至於千林墙下争来鬧午之蜂一色江头或冒寻春之马巷中闻雨向佳人而卖焉花底停驂报先生之归也景物适值夫融和性情益因而潇洒旷怀远寄岂遑歆美金张高调无隣独爱咏歌虞夏斯则据榻遐观凭轩长慨俯仰极夫千秋眺览周乎四海惊心时序怅飞兔之难留触目云霄询卧龙而安在圃农未学何妨并耦而耕闻达不求要可席珍以待是则悠哉游哉高矣美矣气何意乎凌云赋有声而擲地着书终岁世将拟之景迂生挂笏移时人或指曰巢居子吾正游於方外樊川当绿叶之陰君胡为乎山

中安石为苍生而起

栗亭赋【为汪扶晨作】

献玉王之妙品循曹阮之仙都傍紫霞而开径倚丹竈而结庐地则秦人种树之洞山乃宣平采药之区陶徵君爱而卜宅李供奉过而停车尘虽飞而不到水至洁而堪渔此岂俗人之径是为高士之居於是饰之华桷繚以雕楹高堂疎豁而独启文轩磊落而交承爱夕阳而挂笏挹爽气於西成古人求安於幽邃君子乐处於高明盼绿陰之无际揽翠靄而长吟则子美之所谓佳者岂能更胜于栗亭其左则曲巷逶迤闲房窈窕照吾檻兮扶桑有晨光之朗曜乃藏书而建仓或煮茶而安竈鸿妻倚竹以将迎鹤子争花而欢笑蒙庄独坐以养生长统闲游而学道应须暮史而朝经宁独山樵而水钓其右则云横玉几水带金堤见芳林於旁舍寻仙蹟於清溪灌灵均之蕙晦筑邵平之瓜畦鸥有沙而皆宿鹤无松而不栖槐方春而拂檻菊将秋而满篱戴顓之尊未竭刘伶之锺可携若乃丹梯前起佳径横开荷香曲沼芰绕崇台芳流环映广榭崔嵬可映芙蓉之镜还倾芍药之盃绿淇园而皆竹芬孤山而尽梅常对之而爱玩尤朔滨之异材至若高柳在後交让可匹既梳烟而带雨复干云而蔽日感琅琊之十围美渤海之百尺莺啼春而自娇蛭吟秋而转急时即霁而恒陰衣虽素而咸碧遂枝映於比隣长花飞於满室於是偃仰匡牀参差极望水送绿於门边峯横青於云上斜川时断而时连别墅或幽而或旷渔郎带笠而羣游樵叟行歌而互唱既兴逸而情移亦神清而目漾信无美於巩洛将何期於蓬阆况乃花发彩毫云生铁砚赋频答於龙墀名耻通於狗监天九重而听卑日五色而目眩声早重於一时遇偶嗟于三献江山共助其文章天地长留於诗卷笑王根之第与樊重之馆曾何足当先生之所愿乎

瑞石赋【有序】

江子郢上中庭有石察而视之日有加焉夫石本静体动而日生则有异矣名之曰瑞固其宜也遂为之赋

惟中庭之奇石分山岳之灵姿既独全其幽素乃永谢夫磷缁卧莓苔而似傲披薜荔而还欹李赞皇踞而醒焉到茂灌玩而爱之尔乃崿崿瑶峰峩峩仙的秉良德而匪转运坤灵而不息方遥见而未殊殆谛观而罕匹如人累善惟不觉而常增似物迎年非有培而自益若乃初如陨宿倏似凝霜方时移而岁易遂日就而月将恍惚兮其未已累积兮其难方遇射思腾欲跃将军之虎叱而即起还来道士之羊盖其秀擷嵩华奇分泰岱本以静而动生遂因形而象改尊曰君而益崇呼之丈而可拜用之丘垤已难测于寸壤介彼冈陵复奚穷于千载也

表

拟

上以董其昌字帖赐内院诸臣谢表【顺治十三年】伏以紫极昭文大启琅函之秘黄扉渥

宠弘敷宝笈之华闾异代之幽光成熙朝之盛典辉腾东壁泽贲西清臣等诚惶诚恐稽首顿首上言窃惟河洛呈图始代结绳之政嶙峋作篆用垂勒石之文苍颉之列三家象犹蝌蚪宣尼之题十字体创麒麟增减通及八分神妙各传三品然枕中得诀只传习於专家几上挥毫未称奇於秘阁昭陵玉匣二百几十纸修禊亭不落人间长壽珍函三百十七篇文选楼仅存天上用拙毫而自免几同庭草春悲补戈法以逼真未见笔花宵灿古肥今瘦争爱鹜以忘鸡晋画唐摹半紫蛇而绾蚓坐鲁公之池畔谁怜正气於钗痕刻蔡氏之楼中但悯遗踪於瓦砾米颠振袖仅闻夸异於一时刘洎登牀反致貽讥於千载未有异代还叨夫真赏同官共被乎隆恩如今日者也兹盖伏遇

皇帝陛下道契昭符勲高镂玉虞廷受籙得十六字以传心周室迎丹抚亿万年而立极崕峒访学探妙绪於西山姑射凝神动文思於甲帐偶因万几之清暇旁求六艺之遗文惟先臣董其昌者地拟陆机少登翰苑遇同苏轼老践容台当庆历之时雍振鍾王之风雅墨池波濺早窥大令十三行笔阵云横自得长史十二述驾米芾以独上掩文祝而前驱西蜀玄亭久下门生之泪终南紫石仍留故老之踪开卷宛然嘉叹屡闻於枫簾披函烂若恩荣遂及於槐厅字珍琬琰出秘府而愈奇轴等缥緲得宸章而益焕携来芸阁未损松铅归映藜窗独高油素昔李斯云邈历汉代而方珍逸少虽传遇唐宗而始重以今方古宁夸飞白之颁自上及卑益重渥丹之感臣等穷非荐福博愧雕虫慕笔谏於公权久勒正心之训仿遗箴於太史慙无运掌之功幸际昌期恭逢雅贐荣因稽古敢比柳直顏忠遇忝同时窃附皋扬益赞伏愿文放乎奎决取诸夬镂鼎继夏禹之业铭毫扬周武之心以惜墨者惜才而无朋不正以画沙者画法而有印皆同则永愍金瓯四海奉十华之帙长熙玉烛千秋炳八会之篇矣臣等无任瞻天仰圣激切屏营之至谨奉表称谢以闻

记

岷山逸老会记

苕城南五里有逸老堂焉云飞画栋踞岷岭之一峯水近朱栏瞰碧湖之千顷昔为高风堂之遗址今则逸老会之胜游会始于唐一庵诸公凡八举而人皆硕果堂建于汤楚东别驾不数传而地有寒榛予于丙午之春承乏出守将谋更始且暂葺焉李君夏器慨然旧蹟之难湮蔚矣嘉招之再复时维九月实聚羣英亭开荐菊之辰坐满采芝之客酒浮上若偏宜鹤髮以临觴城绕下菰并拂鳩形而作杖世非炎汉讶四皓之何多岁异永和喜羣贤之毕至予方罢郡适遇聚星猥以白玉之中龄特用兼谟之故事时则广州归政浦号沈香莱子弄雏庭盈舞彩谓予同姓迨及嘉宾函谷真人独望临关之气洛阳女子曾知卖药之名先生而两见织帘处士而尝闻让畔茂名看奕而逢仙履祥着书而守道并泛南山之舸同开北海之樽三爵油油四筵济济麻姑擘脯言羞丹水之麟彭祖调羹来驾瑶山之鹿是可志也顾而乐之爰属不文以为之记而予则维香山一集炳焕中唐洛社诸卿於昭南宋迨兹以後继者寥寥兹则始创于明世庙癸卯之年复兴于今

皇帝庚戌之岁虽盛衰不定多寡有殊然举往固可以诏来而由今亦可以抗古昔则史家六

叟尚取数于闺中唐室九耆亦待员於方外未闻继体并列同心今则东阳两支延陵二世天龙岁月还继美以犹龙海鹤丰姿又教雏而成鹤同为父子并致耄耋况乎资圣推贤至道尚齿未登上壽已属旷闻今则河间遗民碧岩耆德龄同罗结渐方都水之瞳矜过张苍不待妇人之乳惟须兄事于元爽直欲儿命夫少君尔乃青藤紫袷并若神人赤舄朱纓多为贵客登楼授简无烦金谷三升据几挥毫总善栢梁七字斯又不足以光照前哲貽美来兹也乎而余也与老人期从大夫後河阳两鬓早徵蒲柳之衰绛县六身幸仰松乔之茂壽由德致信黄发之允宜文以年加叹白头之匪易爰为濡墨用待编年时则康熙壬子嘉平上浣之七日是集也金吾李君夏器实倡其事太学韩君昌箕明经潘君贞【阙】

沈君【阙】皆在焉其自雉邑者为明经金君镜【阙】朱君升文学沈君【阙】而主人则方伯吴君时亮令嗣仪部景亶而予则前太守江都吴绮也先是四举与会者姓氏详李君记中兹不并及

休园记

休园者余年伯士介郑先生所营之菟裘也先生雅慕仲连尚怀元亮官原水部不妨例作诗人论表山栖遂自称为处士开蒋家之三径未出城中得晏子之一区正当屋後迎门种柳几年手植春风绕舍栽梅竟岁头蒙香雪楼中晴翠从江上以飞来杖底寒泉向阶前而流出余以潘杨之睦曾见围棋复缘孔李之交频来问字会心非远何殊濠濮之间适意为多不知晋魏以後俄而谬婴世网久玷尘纓鄙人既涉海而恒忧先生遂凌云而独笑十年荏苒已作鸠巢五亩荒凉几同马廐慨琴亡于两世痛箠折以数椽而文孙懋嘉聿新遗构卫家识字重开六鹤之堂卢氏呼名别筑五鱼之堰既储花而待酒亦叠石以移云甘菊成田有金英之的的芙蓉被沼列锦障以重重於是近眺唐昌若见玉鈎之洞远瞻隋苑如临绮岫之宫月有二分还能入室波涵九曲拟欲流觴则可以坐拥书城闲披诗卷舞王郎之如意气致殊豪凭晋氏之隐囊风流自赏园名衆乐披襟而时过求羊馆号忘忧授简而频分枚马樵山渔水类盘谷之幽踪修竹茂林兼兰亭之胜槩於以休也洵不乐乎而况赋拟广平吟同茂叔方澄怀以揽胜将踵事而增华也哉夫盛必有衰美难为继玉山既废不闻复有玉山金谷云荒岂得更金谷而懋嘉心伤留研意在肯堂见曲水之烟云咸为念祖爱平泉之树石不以与人匪直美乎游观实有当于仁孝矣爰由停车之暇遂为濡笔而书俾後之君子有所观感也

张鹿牀画像记

夫玉树瑶林自是风尘外物高冠奇服久为羲皇上人彼奚为乎来哉而不改此度也审而视之是为张子鹿牀忆与张子交盖当入洛即快班荆迨及过江频同藉卉春筇共把曾看紫阜之云秋被长携偕醉青溪之月桃花潭上踏歌独爱汪伦修竹园中作赋还邀曹植奇文欣赏探锦字于诗囊密义相参落麈毛于食案高吟入市每骇路人狂叫摊书尝惊妻子君谓伯喈之似凤我呼东野以为龙尔乃出则更衣行惟曳屣马卿涤器只对修眉季伟供餐犹存皓首彼佣马磨此困牛衣然而鹤立难羣龙鸣自合樵苏莫爨应休琰不废清谈桑柘频移龐德公犹闻雅论荒鸡夜半起舞何堪霖雨终朝弹琴不已既主宾之莫辨亦形影而靡违若将终焉是亦可矣岂期尘飞海立人境都非洵愧林惭世途多阻渊明之求彭泽徒悔折腰翁子之入

会稽空传露綬鲈鱼江畔几处秋风白鹤桥边今宵旧雨对青山而说梦指白水以论心爰出是图命为之记生绡展看眉目犹存彩笔临摹鬓毛先改过监湖之一曲客是知章上庐岳之三峯人称慧远苏家红袖亦解参禅李氏霓裳会闻乞药良有以也岂徒然哉嗟乎张子文擅二京书综十乘少期用世长慕逢年而大业弗终雅怀罔遂政同即墨无左右而难封学似东方较侏儒而未饱袍拖凤尾姓名空满于人间笔倩虎头寄托暂逃于方外子之为是也似快而实悲矣虽然学仙成佛叹壮士之何归饮酒读骚或妇人而可近颇同斯感宁可见遗愿着我于图中长遇君于卷内千古之後庶或知有两人六代以还不复传为三笑耳

棣友堂记

青山绿水曾为风月主人长剑高冠时有诸侯客子忆在丁未余侄去文来寻于湖山遽蒙忧于霜露茂陵不起但有遗书羸博空归徒悲挂劒兹当昭阳之岁丁鹤重来言访西豪之庐荀龙再覲其长君元式以特起之才振中衰之绪权奇骥种倜傥鸾姿陶地四通独善朱公之策楚人一诺长轻季布之金而重以修能泽诸大雅事其母汪太孺人爱切弄雏诚通跃鲤而抚厥昆季备极友于簠内一经既无殊於韦相门中七叶曾何异于刘殷百口同烟三宗待饔予方闻而异之乃元式则进而请曰楷不佞奉遗训于先人冀藐孤之有立今于豫矣而惧其渝焉请锡名于吾堂用永怀于弗贰嗟乎文昭武穆始于一人之身木本水源衍为万家之族古人谊笃葛藟庇其本根末世风漓荆花分其条干揆其立异略有三端及乎相尤金由二衅尔乃家为一父之子国无旅进之臣陰庆升朝印难分佩丁鸿拜爵位不并侯嗟盛德之难居徒萌心于非望斯其大者不可言也复有蜀龙魏狗誉或相形维短缙长才非竞爽周顗难全其雅量扬干不悔于乱行爱靡克终又其次也至于诗咏乾餱谣生斗粟訾汝道之牀下独受金珠李光顏之室中先司管钥莫让薛包之产致登延壽之廷言阅于墙风斯下矣然而太丘雍肃始自闺门鍾氏风规先由娣姒倘复乘其醉酒频诉射牛抑或嫉彼纵游微讥食核莫思闭阁之愆但记颉羹之怨家之索矣职此之由况夫女自有家咸分姻娅男方就傅别昵友朋岑文昭之所交不无轻薄刘伯升之结客或有异同木将蠹而风摇堤有蚁而川溃以致诗人感慨起刺駢弓史笔流传貽讥马磨忘天显之义昧明发之文良可痛心为之浩叹今也兄歌既翕弟诵克恭集号聯珠人皆拟璧金昆玉友方鹄起于一堂骥子熊儿将燕诒于百世是可志也爰取窈仪之语题曰棣友以昭其美且示劝也使元式与其诸弟鉴兴戎之有自矢急于匪他字效张公常书百忍谣同马氏恒美五常则芝兰坐隅兰芬庭侧由是而清河八院共闻鸣鼓之声岂止参佐三间独有吹埙之乐使阮咸之复起叹季子之未亡而予也友麋鹿于山中钓鲈鱼于江上传兹盛事侈为美谈过通德之里门咸高推宅之谊考延陵之谱牒犹存让国之风亦曰懋哉是为之记

邓尉山游记

丙辰仲春上浣四日瑶如发孟公之兴禹存具邓尉之装时予偶有微羈二客请为先导凡越再宿始果一行虽同卢子之愁霖愿学骆丞之冒雨乃买蜻蜓之棹同寻鸥鹭之盟泛横塘泝木渎望灵岩寺过善人桥两岸空蒙尚自黛笼晓雾一篷淅沥偏宜睡重春江数叹迷津空横野渡迨闻钟而就泊及入寺而已扁呼山僧再启禅扉询游踪已归别馆复循樵岭特访渔村

灯火无人絕似承天道上犬声如豹略如华子冈头而乱雪迷离暗香遥袭则此夜较为胜而前游之所未经也云抵王庄时当丙夜倦客穿林而扣户酒人持烛以下堂把袂欢呼衔杯谑浪饮惟文字都无石尉之苛坐列典型并有彦先之後千杯不醉宁知黍别低昂百尺同眠那问牀分上下昔苏家兄弟记听雨於彭城谢氏宾朋偕赌棋於东墅斯时之乐不更然乎既而溜止茅檐曙开松牖起呼童子速具晨炊促命輿人先登古刹藉草于香花桥上啜茗于梵天阁中山则跨晋踰唐碧嶂孤撑六代寺亦临湖背壑香岩独压万峯瞰震泽之波光青摇足下收洞庭之岚气翠入眉间此则郁泰玄之所栖真顾野王之所独往者矣尔乃冰悬万千霜被千林树古多苔枝寒未叶香清翠羽长如不月而明色淨珠胎乃欲与云俱淡则虽封姨善妬不堪夜葬夷光犹喜徐姬多情尚可春留和靖急趋旧径徧选寒丛老干纷披乱点?檐之雪幽芬馥郁全薰衣袖之风由听松堂至董公墓墓旁双栢近可千年如怪兽之相挈毳毳欲动若怒龙之并舞鳞鬣尽张方倚石以婆娑遂登楼而眺览千香竞入疑栏檻而俱芬一白无余望川原而尽缟但原阡莫守鲁殿空存恐其怆石马于寒烟不暇问玉鳞于春雪耳下朝元阁陟马家山輿行鸣涧之中裾罽丛篁之内可二里许得千顷陂山有远情花无匿态如入衆香之国此为大都譬游多宝之林斯称奥府而梅之能事于是毕焉遂返棹于费河暂停烧於光福天方舒霁客亦固留爰倾北海之樽更下南州之榻春才见月何辞饮吸长鲸醉岂无人不觉路惊宿鸟因而达旦遂及解维二君方回茂苑之舟而余更理梁溪之棹也

泝仙堂记

岁在上章时当仲吕听翁方暂归于隋苑茅子适见访于萧楼贯酒为欢醉歌明月分灯共语细数巴山而茅子忽为庄舄之吟欲返王猷之棹爰诘其故遂吐厥情乃言先人之庐向托回仙之地收书釀酒沈东老久结芳邻却聘耽诗顾徵君犹存旧里当年栢沐仅得数椽此日弓裘已经七世曾祖南公让畔东皋带经南亩坪可种金不读朱公之策烛堪焚券非求薛县之租谓陰德有似耳鸣惟令器乃能身荷而王父绍公早闻遗训益广前猷独取图书每念孝肥而礼瘦靡求田宅何妨南富而北贫卒也荆断旋枯岂意棣开偏茂囊倾犹子婚嫁反类于尚平阁纵家姬旷达还同于处仲斯则偕登上壽并着懿修者矣迨及先君仰承慈继心同卧鲤常怀方进之诚躬访眠牛欲问景纯之术而山川不易宁知路失金柯风露无情遂叹尘埋玉树藐兹孤胤甫及四龄雏未能成食任虎狼之择梟方欲徙忧生燕雀之惊乃今则炎炎者已付春冰而昭昭者重收宿雾虽高槐犹在敢同王佑堂前然修竹难忘尚忆元卿径内用是浩然长想忺乎有怀非独恋此故都实欲绳其祖武惟先生有以志也俾後世得而传焉吴子于是正襟而起曰大哉言乎夫人事何常盛衰时有天伦所重源本难忘故海必先河义崇前代堂而勿构责在後人子之高致迈于倪黄逸韵超于王孟凝之有妇命薄笨以同乘靖节多儿荷簪輿而自适而犹眷兹遗绪复彼弘图使燕子之重来斜阳不恨即渔郎之再至流水非遥则泝彼仙溪乐于盘涧岂止范乔捧砚王度受书有当于仁孝之情忠厚之旨哉嗟乎十年残梦犹忆罨画之游一卷新诗谁问浣花之筑为君率尔益我恍然也

桓山堂藏书记

盖闻负迈俗之志其好尚必有所甚殊具超世之怀其见闻必有所自广是以永和拥卷其乐

过於百城扬子持编其荣比乎三事良有以也难其人哉乃吾宅相之贤是为江夏之俊则燕思黄子殆其人乎黄子孝以诚生敬由爱发远猷克绍有叔度之汪洋内行弥修若文强之恺悌处繁华之境而志意偏高在纷扰之场而心神独旷确乎有得卓尔不羣遂废产以营编用捐资而置典得一本之善宝若隋珠遇一卷之奇珍同赵璧求而不获皇皇然或至忘食见则必收汲汲焉宁知倾橐竭其耳目虽难侔乎四库之多积以岁年已略备乎五车之半敢云兰台之秘典溢满其中但觉芸阁之薰炉芬芳其外而列朝贤士每爱聚书昭代文人常能好古故邨侯置架朱白分籤曹氏为仓丹黄充栋放翁碍足集枝遂以名巢麟士殫心写竹恒为累篋乃兹抗怀古昔适意典文极其志于一时娱其情于千载苟非琼林瑶树自出尘埃璞玉浑金都忘美好亦乌能游神物表驾学区中也哉爰拟君山实逾猗顿高人原非玩物识者或谓知言矣抑且燕思雅工诗格怀达夫之猛志究子美之微言则共陟斯堂用求其胜不独羡熊岩之积遐想风前且将闻牛渚之吟频过月下也

管孝子入粤记

徒步行泥欧阳詹为之作传鞠躬负土张子壽因以知名况以孱弱之孤踪历艰危之远道卒全遗骸用返故邱此管子方至之不可及也方至为?所生嗣勲之後武侯继侄本在幼龄德秀乳儿倍加慈爱而勲有怀投笔王粲於以从军仅得分隳郑?还为独冷归猿洞里泪徒下於闻猿驾鹤山前魂莫期于返鹤时无范式空埋户外之屍家少女嫠谁剪屋头之纸乃方至闻而呕血哭则拊膺遂力疾以长征爰捐躯而独往茫茫铁瓮指江水以言愁叠叠香炉望庐山而堆恨云迷湖影渺如白马之津雷吼滩声险甚黄牛之峡章波木落带夜月以扬舲庾岭花开履严冰而策杖载经寒暑始入东甌屢跋山川言寻西水荒榛何处得之故老之言宿草谁披似有神人之感一抔黄土蝇不吊而谁来万里青山鹃自啼而莫返途穷异国哀动行人遂使太守闻而脱骖贤侯因之赠襚崎岖只影谁云蜀道青天汗漫惊波漫道蛮溪黑浪身归旧里隣父讶其重生魂返家阡故鬼疑为非是而卒使狐邱不恨鹤陇长安妥窀穸以居庐蔽松楸而负土董生墓下还来浇酒之人原氏阡旁更筑题碑之路盖惟天知纯孝故能陟险而如夷人鉴至诚乃得安生而送死也夫民俗之敝孝道日亏或惑溺于陰阳或回翔於事势地非羸博乌头有不返之魂事异南阳马鬣多未封之骨使尽人而如管子者则遗骸犹恋况当堂上之春晖异地难忘肯弃舍旁之先冢人总敦乎式谷世共厚于维桑矣用劝其来遂为之记

鹤客亭记

岁之庚申月为乙酉东莱姜仲子葬其母王太夫人於吴郡之双松里既筑佳城实当胜地千峯环翠尽绕榛关万壑行青独开松径而仲子於其墓側别构小亭爰乞鸿名题曰鹤客盖取长沙之事用占天水之祥也夫湛母流慈名闻剡荐士行定乱功着建旌所以芝晦仙人显灵徵于宿草蓬山羽士示异兆以生刍今大母之贤无慙于湛而仲子之器未逊于陶以斯表之固其宜也况夫地崇龙耳山竦牛头铜井玄丘亘於子卯之位茶山芝岭峙乎离兑之方明镜一泓光分笠泽浮觞九曲胜拟兰亭既无美以不收亦多奇之毕献斯则仙踪为之遐憩而灵魄于以神游者矣尔乃树古罗浮花繁大庾春山万叠都为羣玉之峯晓雪千林并作衆香之国时而秋仲蕊粲金鸞迨及冬初卵悬丹鹄虽游人藉卉爰乐志于春秋而孝子攀条每动怀

于霜露则其建亭之意宁非陟岵之思耶昔处默哀号而缟衣为之助泣吟参仁孝而玄羽用以酬恩物以感而斯灵事因诚而多异其又何疑乎吾亭也哉遂为之记

倚山阁听雨记

予寻幽有癖梦中每到名山路胜无缘身外惟耽佳境岁在辛未序值丙申索处丰溪长望古松于岭际漫游孤屿时来春草之池边而予友于鼎汪君独念丰南羁客频为扫径每共衔杯一日偶来终朝静对时为秋也觉爽气之初澄或值雨焉喜微陰之暂合听檐声之淅沥尽入波间见水气之溟蒙惟存隔岸若谢皋羽之忆国涕陨鹿田如元微之之怀人梦残猿峡汪子既推窗而望远听翁亦凭檻以遐观水静天空都非常境山连岸转大有殊观松被云遮不见微茫之松火竹经日映犹闻点滴于竹林杨柳则若离人神伤冷翠芙蓉亦如倩女影瘦斜红千亩纓锄馐妇停踪于垄上一川蓑笠农夫低影于田间鸦尽归林鱼还吐沫风吹山带似淡还浓点皱波纹方成即散无多萧寂此中偏觉怡情偶尔凄清是处翻为得意有会心而不远鱼鸟狎以亲人方注目而久之鸡虫忘夫得失乃忆少陵旧句用顏康乐幽居题曰倚山阁更为序之

蔬圃记

家葆承寓迹寰中神游物外南冷可饮乃栖心于太武江边东郭堪依遂卜筑于梓潼墩畔开元卿之径径欲成三营幼輿之丘丘真得一轩庭济楚颇足适于药栏松菊幽深乃独题为蔬圃岂不足於是乃有歉於兹乎盖杰士不逢每寄情于锄菜而幽人知命亦浑迹于灌园是皆有托而然要其无心而处余常至其地而门巷萧闲登其堂而轩窗爽豁长廊带月杖曳足而堪行小阁瞻云笏支颐而可眺池如灵运草色常入梦中石有米颠云影时横砌下屋无雕绘可生白於自然垣不崇高时送青於天际信足登高而望远固已背山而临流况复花随四时藤多千岁先生则称曰五柳处士则号以七松岩间而树集金鷲檻外而卉生玄鹿可以养性可以娱神枚马过以论文求羊来而授简人如鸿渐侵晨而共品山泉客有许询竟日而惟谈书画倾焦家之釀盘觴时吸云光咏陶令之篇茵席恒铺花片何必玉山峯下始为奇丽之观金谷园中更着繁华之迹哉况真州据南北之胜而銓江当水陆之冲岂但传写于一时实可昭垂於千载矣仆频逢胜赏辄读鸿篇幸际良辰快同佳士与兰亭之讌媿无紫輶堪书听柳泉之吟聊用乌丝以记尔

娑罗园记

读屈子之骚怀故都而久矣作仲宣之赋望吾土而慨焉况情系竹林何能不忆乃身留茗水惟有相思迨今辛未之秋获返东南之棹见杨柳而遥知门处穿芙蓉而始达庭前衣匪香熏有润芳之暗袭屐因花拥讶小鸟之争迎额曰娑罗园盖王青羊之旧题而汪司马所常至也陶渊明之里即号柴桑孔稚珪之家独称桐柳皆此志也信可乐乎闻故老之相传夸为胜事而羣贤之遥集尚有余风三起三留美班荆之欢讌一觴一咏因藉卉以盘桓树植庭中干分檐上种乃来于梵国质不类于凡材枝?隣家隔巷俱为借绿菓生冬序他山犹见垂红再进则

为虬山草堂虬山者潜虬山也境以此镇神功或取于渊蟠人藉斯名壮志终期于雷奋乃此堂中閤百武元龙分上下之牀旁列两轩士衡有东西之廨丹梯可躋紫阁旋登楼曰横川阁取三十六峰横一川之意也棖开八面面面而烟拥青莲景备四时时而岚吹碧笋右则摩天灵鹫献阿育之金轮左则饮涧长虹偃罗浮之宝渡遥览于数百里若见秋毫近眺乎十万家皆同春雨乃望谢庭之月更陟崇台复披楚国之风还闻广树斯则仙人所宿好而豪士之奇观矣况夫柳覆长堤堪驰玉勒草生断岸直接瑶峯仰激清流力开古壁狮蹲象伏披薜荔者数寻鹭往鸥来洗莓苔之千片可以舟横桃叶舫载柳枝金管玉箫供奉于焉而容与绿蓑青笠玄真至此而徜徉斯则练水之名区而新都之胜览也若夫三珠秀爽刘孝仪之镂管同传八座起居潘安仁之板舆常到则又有梅庄之记而非同梓泽之观矣

比竹记

比竹者洪子待臣偕弟任臣读书之室也可并士衡自足同居廨内不殊遵彦雅堪别构园中画檻葳蕤都装玳瑁文窗掩映尽种琅玕堦下成丛有唐宫之密叶林中聚气见刘氏之连枝竞秀猗猗方争高而未已联陰郁郁遂得偶以成形梢欲摩云美上疎而下合枝将拂汉总外直而中虚承清露之交流既左宜而右有摇和风而共响无後轻而前轩得彼美以同心声如环佩遇此君而携手响并埵篴洪子云其人籁欤吾家凡屡见矣听翁曰此地灵也是物岂易生乎夫连理长于东宫摯虞谓之瑞应合欢生于西内柳子以为殊祥洛如兆文士之生华萃为圣朝而见文章得江山之助草木在气机之先苟有见焉无复爽矣况夫竹为华草比属骈枝既为龙而为虬理无忧于蟠屈可栖鸾而栖凤道足备乎羽仪匡之直之辅之翼之当仁弗让翕也纯也皦也绎也惟德不孤而况仪部铨曹首发轍而偕膺懋爵宪司经库继振軌而并典文衡物现双徵人方三遇安见昶顗两孟独让前驱轼轍二苏难为後起者哉吾友汪子于鼎每谓二洪待臣则学类康成允称通德任臣亦才同叔宝行且知名祖有武而孙绳兄先鸣而弟和洵有当于竹里之兆而永协乎棣友之祲矣是为之记

壽硯齋记

乃有瑶华别室旁开令裕之堂玉照幽居遥对依云之舍丹毫弘启三径接而相通朱牖斜开一尘飞而不到是曰仙人之馆可号输寥此为君子之居宜名清閤鲤趋庭下昔时会自闻诗豹隐山中此日还宜蓄彩岂直欧公而有七尺乃如【阙】之得三楹是以胜地可处胜流乃有奇物堪贻奇士於是汪君思白好敦同学既齐誉于二龙巧受他山乃选奇于八骏爰劖云骨蒐黄圃之珍妙制星泓擷苍岩之秀以德人而兼俊人之品自堪价重百朋用贞士而收文士之功良可称为四友由是研麋丸而作赋遂以抽麟角而着书润色特重乎先生虚中尽收于刺史风鬚雾鬣宛如先後以出河月目霜蹄竟似驰驱而走坂或长鸣而昂首或争齧而垂头或声嘶之若应或体奋而还留或回眸而自啗或鼻足而相蹂或滚尘而似喜或浴浪而仍浮莫不同流赭汗竞响瑶珂若遇孙阳长千金于一顾如驂穆满馭八极于片时可以拂几临池凭栏染翰况胡子枢巢学考亭之学以主静为先行顔子之行有如愚之德动也静以为之本銳也钝以养其锋此唐子西所以为铭而汪太史用以称壽也况乎籤悬甲乙将齐孙氏之楼帙拥癸辛欲满李侯之架文轩棐几客每过而问奇清簟疎帘人频来而看奕商彝周鼎尽

日摩娑玉轴瑶函随时展玩元龙之榻坐百尺而犹低司马之琴抚五弦而尽妙窗开闪电总属琉璃屏列虹霓都成翡翠加以图成张藻若舞苍虬遂使壁似长康时来白鹤雕栏数转绕湘竹以扶疎碧甃一方列踈英而绰约至于登楼四眺前临问政多峯倚檻周观後有斗山列翠平临万户当半空烟雨之间环眺千门在一郡楼台之上大哉观矣洵不乐乎然汪君既簪笔以登朝岂胡子终韬光而键户留此一片石聊为当代紫府之藏行同五色毫足备他日玉堂之用尔

玉荷小记

李子箕山以玉荷小笔洗见遗其质既精厥工特妙剖荆山之宝洁似凝霜状楚泽之华鲜如承露絶无鱼戏不卷香心取伴龙宾犹沾墨渾见为雅人之玩知非俗士所珍也乃箕山则谓得自比丘传于宫禁昔者灵芸被幸合德承恩朱鸟窗前晓妆成而染翰青鸾镜畔夜漏下而抽毫则有珊瑚插架艳泼修眉翡翠横牀花生素手此时得意定知翠的将成若在多情必且红衣欲尽鸳鸯何处宁知盖得团圆??相将自谓生无瑕類信此连城之物永宜倾国之人又岂识钗化鸾台袜留马嵬宫车零落戚畹流传问真本之兰亭还归智永写孤山之梅萼独伴华光收藏古锦之囊来置素绉之几

姚大家绣像记

景元写照惟能神彩攸分中立披图自谓丹青莫状至若三毛在颊仅见裴郎一目传神惟闻殷仲虽形之笔墨尚以为难若传以组紃罕闻其巧兹则澄江之女士是为颍水之大家本出名门曾闻懿训桃花霙雪每擅妍词柳絮从风常多雅韵静生鸿庀能偕君子以同心慧出鸾台曾向神人而得爪绿窗压线久号针神金斗熨香争传丝絶乃复因兹好友遂得惠及鄙人侠殊愧于平原或得丝分五色道不同于弥勒何堪粲以三英彩缕频穿如能续命金鍼密度竟忽分形盖其巧在于指先指到而皆能成巧是以身生于意外意至而即可为身且也写庭际之梅花暗香若动兼之对瓶中之竹叶微醉将潮稚子摊书如闻授读老人凭几似欲成吟遂使丘壑之姿宛覩幼輿于岩畔粉墨之事无烦顾恺之壁间岂若窦氏之妻独擅回文之妙赵家之妹偏称缀锦之能哉猥以尘容获劳仙腕敢吝珊瑚之管用酬琬琰之贻况寒意初深呵冻频频翠袖旅情若失消愁已在青衫感也何如宝之无斲矣女士姚姓小字景淑江上陈孝廉甸臣之内子也时丁卯长至前十日

书

荅友人书

令弟临莅伏承远讯美人采葛益厪遐思见仲智而念伯仁风期如覩因惠连而询康乐云谊时殷但境犹共於三吴情已睽于两地江横衣带茫茫未足言愁山拟剑鋐历历何堪割恨忆昔南冠受谤北寺忧谗先生既无损於激昂弟子亦共殷于匍匐王咸慕义因救鲍以举幡伟节持危为抒陈而命驾然而剑能吐气时用作歌酒可消冤频为就饮幸风雷之见异致天日

以为昭邪正之辩既明荣辱之关立转夷吾出檻仍拜上卿杜牧乞麾还分下郡各缘国事?相縻莫遂私情而获覩王程千里世态万端每捧北雪之篇益动南云之感然而田文食客屡有盈虚翟尉故人尝分贵贱所当处以大度付以浮埃正须矜其可怜勿复视为足怪耳悠悠之口窃有所闻荡荡之怀谅无不可共处患难之後或无同异之殊惟先生择而听焉

迎家梅村先生书

鸿使西来鱼函下贲贲之雅供比十赉于华阳宠以名篇得百朋于洛水兼之情深鴈序谊笃鵠原獎慰纏綿至于累幅憫其尘劳莫浣静以山水之音许其志意可嘉助以风云之势遂使珠倾百斛海客望而心惊锦树千枝神人游而目眩惠连春草遇康乐而得名供奉仙根就阳水而结好仆非其类何足当兹至若浮雪夜之船能游剡水命春风之驾为至永嘉亦既有期云何不远然而桃开西塞鱼羹独美花时竹茂南漪莺语偏宜笋候春深顾渚刘梦得尝忆采茶月照洼尊顏鲁公曾为命酒凡兹胜概伫待清游吊古而还访下菰买醉而重寻上若爱山明月相见何时震泽春波宁嗟远道堂开六客伫闻嘉客之谈石过千人即望真人之气惠而好我跂以待君

答宋荔裳臬宪书

廉吏中衰优孟因而起叹遗孤零落刘峻以之絶交先生笃念旧游附存弱胤诚足挽兹薄俗抗彼前贤若某与友沂者谊结三生契联两世道南推宅慷慨为多江左衔觴流连既久子禽闻礼频过孔鲤庭前文举通家又出李膺门下朝游东观同开紫绶之书夜直西清共卧青绡之被而斜阳吹笛顿异河山异国飘蓬还惊风雨既遥闻而泪泻复目见而心伤召厥孤儿字之弱息荆吴作合宁有美於乘龙家世清贫遂自忘其牵犬岂敢仰希千载上比古人直欲再起九原无惭亡友耳乃远烦惠问过赐褒嘉观先生赏善之深识君子处心之厚聊因鸿便辄布萤私

上龚大宗伯书

某死罪死罪谨献书于宗伯相公阁下某自登龙?水仰承元礼之知选驥燕台滥被士衡之誉从此邺台飞盖屡奉嘉招梁苑清游恒陪胜赏既相期以国土颇自托于正人遂致十载水曹叹子云之执戟一朝水国效杜牧之乞麾自笑三人独当卑下曾无千里未足盘旋而时值纷纠俗成刁犷门开告密狱起同文一二奸渠缘上书而肆志百千丑类借投匭以宣威巨室屏息以寒心当途望尘而摇手兼以营丁毒虐比户凋残刑拷视为常闻炮烙骇其未有一家受阱姻党为之啼号匹妇言逋井里因而惊窜兵缘棍线男女行鬻于昏途棍藉兵威魍魎横行于白昼某当受命誓不与俱迨及下车义无反顾既微行以得其实爰大创以尽其辜职匪埋轮欲殄九头之蜮威同破柱宁知百足之虫除奸而务得根株去暴而先严线索遂使兔惊迷窟鸟丧焚巢宵人偕遁以求生戎帅相期以勿犯千夫并沮难消口内之衔一日何容欲快眼中之拔流言用布薄命无援某之受祸此其一也至于中朝显宦隣郡要人始则美环不与己逢怒于尝鼃继则覆瓿空将复兴戎於误鼠无鲁连以排难有马申以肆谗市虎堪疑何烦意

苴营蝇可畏顿化荃茅待之者已疎中之者甚巧某之受祸又其一也泊乎石重难移霾陰莫解初以细人之言激怒上官旋因密戚之威挟持大吏转喉触忌兼多冯坦之谬言强项招尤又乏任延之善事而鸡惊鹿骇同遭不测之机雷击霜飞竟有难全之势某之受祸于此烈矣嗟乎半生劳吏无计剜疮三载岩疆仅成立骨当莅官之际不免子馁妻寒及解任之余尚有民悲士泣而素丝被染终古难湔全璧遭瑕百身莫赎余生已矣夫复何言而最可痛者留棠拔薤凡古人循吏之能瘢索毛吹皆此日小臣之罪祇悔信书之误益怜解事之迟不有大贤谁能隐曲伏惟阁下诚孚上帝道济下民身为四岳之云言作三时之雨圣人无党敢仰托于门墙大道为公愿俯询于道路苟平衡乎功罪可立辨其是非悯受毁之太深而谅以求全之毁鉴好名之特甚而雪其已玷之名必能无媿于君师始得自安于天地起已枯之骨薰以神香召既去之魂饵之仙药衔花黄雀恩深于弹射之余拥树白麈感切于放归之後矣

与内子江夏君书

仆幼值门衰早踈时务见高柔爱贤之志愿学终焉闻於陵辞相之风心希贞尔而粗成卷轴薄有交游遂为当路之所知聊以专城而见寄五湖秋水并坐弹琴千亩渭川聊供举案虽少酬其馥佩究自絀干网罗有集都愁我方尤于咏桧无珠可卖卿不憚于牵萝伏省来书益增遥念悯其辞之多慙以勸王章戒其性之太刚而箴文举诚如卿语何待人言然萋菲无端不必由於身致而桂姜难改要须出於性成吾自甲午入都以来见摧轅者不少已酉解官而後复墮甑者相寻戕人者或致自戕笑我者更为人笑扰其才智岂可万年极其弥缝非无三窟而索琴无及据鼎空号或始作鸱张终成腐鼠或朝同虎视夕伴鲍鱼岂尽属於迂疎亦何烦于计较耶南山种豆半落为箕东海成桑惟堪擲米世途匪易人事何常惟须携手白云匿形丹岭效陶公之偕翟氏播後锄前比德曜之侶梁生歌予和汝青山十亩笑辞碌碌之尘红烛三更醉听乌乌之曲也

与徐健庵同年书

邗江舫棹一送鵷鸾真水浮家久踈鸿鴈所念者梦寻无路逢时辄忆许询所叹者知己何人举世谁为刘表耳兹以袁君士旦来赴长安附一緘以通候望八座而驰情此君宛水英流敬亭夙好论交湖海分尚阻于识荆仰望云霄情独殷于御李惟长者高为品目力与獎成俾刘颯雕龙遇隐侯而始重太冲附驥得皇甫而斯传则士之荣也君实贐之矣

答茆楚畹编修书

廿载相知敢附故人之谊一朝自奋终成国土之期在道维荣于人何与乃蒙齿及祇益心慙耳某自解组多年牵船少地桑榆之景凉垂照以无多沟壑之嗟恐劳生而不免未有貽谋翼子已教失学从儿复荷高怀言存旧讲自合录之家训诚可勉彼後图也袁君卧雪清标轩霞逸品幸班荆于藉手得折芰而论心敬因独鹿之游特奉双鱼之讯

与云间太守鲁谦庵同寅书

偶返故乡翻同作客欲归旧旅复叹无家坐此迁延徒深怀想乃隆情远被一寒犹念故人而古道维殷数问未忘孤子【指赵壻念昔也】闻而陨涕念之抚膺盖小壻自舍人易箠以来迨尚书捐馆而後斜阳燕子华屋委之他人往日蟬鱼遗经归于别姓长兄视如陌路分产岂有薛包嫡母弃之异乡舖乳初无李善童子不因人热笑尘甑以何炊越公空有家风鲜故书之可读苟非假之钜力必致惜其俊才何期我公念及故交迨兹遗胤助隐之以牵犬既遂其室家之情效杨宝以饲禽又许以羽毛之助鬼神不远共鉴斯言天地何时获闻此举真可挽江河于既下薄云日而重光者矣盖人事日非视荣枯而为厚薄交情不古因贵贱以为盛衰公子不朝频见诸宾之散将军既免宁辞醉尉之呵弹铗无鱼其何求于涸辙衔环有雀已更集于高枝社子美叹乞食以无从陶靖节嗟扣门而已拙轻薄何堪以洗眼炎凉每至于伤心而况彦升既没犹怜衣葛之儿叔敖不存尚念负薪之子也哉用是效长平之步担仰元礼以登门出彼泥涂固本由于盛意假之温燠复何待夫鄙言独是弟之况味难堪穷愁益甚浮踪异地既无分以依刘息影余年徒有怀於用赵飞鸟已倦空思旧陇而栖秣马将归当诣崇壻以别尔

代门人钱玺上丁藩台书

窃闻雀逢杨宝难忘巾笥之恩马遇孙阳益重盐车之感无君子者珠岂肯于暗投有大人焉璞何辞夫仰献伏念玺质原鲁钝家更单寒望朱户以无门且不留夫四壁知黄金为何物聊自守其一经小人本出于泥涂孺子久甘于贫贱冒五铢之族姓祇愧无兄有一面之符章何曾是宝加以颡愚难改迂拙可羞古道孤行耻置身于狙侏幽窗独坐惟砥志于圣贤持故纸而长吟几忘漂麦执枯毫而自写或至燃糠蠹老难仙终日惟甘食字蜚乾欲死穷年只解耽书妻子同讥盥栉都如介甫乡隣咸讶庆吊罕覩仲宣惟期一效于清时岂意屡摧於薄命致身无策已叹艰辛取士有程偏逢令甲名如第五即骠骑而何庸刑已再三虽昭华而不敢輿台推骂刺久灭于正平鬼魅讥呵灯已残于叔夜逢当年之同学衆中常自嫌身遇良夜而孤眠暗里频堪下泪挿天仙桂时时常在梦中满径寒蓬岁岁如生心上所恨者有百年之父母饱少于饥可怜者对四座之亲朋懼仍是戚青云有路嗟予岂不犹人白日无穷笑我何由得主恐賁苦志遂至终焉不遇大贤岂有幸也兹逢某公虎观大儒鹤城华胄十年公辅早符腹上生松一代文章自应掌中抽草北门覆锦枫宸犹叹奇才南省司纶槐院恒咨大事轺车被路所至无冤宪节临郊由来不怒狱中春树如常袞之按八州道畔甘棠若召奭之分二陕清标壁立一身独砥狂澜惠泽旁流四国咸瞻膏雨而尤殫心朴棫广圣人格外之仁加意李桃作多士穀中之气怜才有泪务沾实惠于孤寒种德无方特以深仁为爱育将见三千泗水尽入门墙何啻八百崖州同归鑪冶玺受天独蹇赋命不犹室未入于雕虫宫但同夫磨蝎穷鳞挂网繆当拔十之知逸羽惊弧竟乏叠双之巧秦裘已敝其何望于下机齐瑟虽工究频逢乎按剑於人何怨惟有负於栽培在已多慚敢更期于剪拂但念既邀天鉴难俟河清倘苏子瞻之门人进身无计则李方叔之母氏絶望堪怜是用腆颜更为翘首伏冀恩施不报润沾四岳之云照及无私暖被三冬之日悯其翀霄之有志而假以羽毛怜伊致远之无因而开其道路东华帝子更延将进之年南极真人重起已枯之骨则酬无疆之德必有白玉四环而感莫报之慈宁只明珠一寸矣

泊舟蓉湖贻人书

留而无益忍更徘徊去即相思还成踟躅方辞郭外仍滞湖干风有孟婆似解美人之意月为羿妇难明荡子之心共笑苦于含啼长悲形为短梦身如落絮随风那辨去来心似萦丝作茧宁知首尾遂使屈平中酒不为衔觞阮籍沾衣非关失路良以世无知己抱龙颌而谁怜事在关心有蛾眉而不恨我犹若此卿复何如彼名士之悦倾城事非他日若才人之嫁厮养耻在吾侪矣

林蕙堂全集卷一

卷二

钦定四库全书

林蕙堂全集卷二

湖州府知府吴绮撰

啓

谢宗鹤问赠李北海大照碑啓

西京扞字久失奇观北海挥毫新分妙蹟盖法传仙李系本犹龙而刻自灵芝力真如象况兹大照文丽三乘尤属旧摹品高六絶神姿英异如逢巷陌之观意态纵横似得干戈之气展看道上应教快目于百花宝置函中不待追魂于一叶

谢黄于升内叔惠程孟阳画册啓

艺苑分华情移林壑墨庄选胜兴惬云泉惟高人凤号松圆有妙笔尝踰梅老盖诗心远同摩诘故于法外能精而高致絶似倪迂遂致品中称圣久怀雅覲忽奉珍贻展帙而万里非遥宁须着屐开卷而一丘自足即似买山始知红豆村中应多胜赏岂令青藤馆内独有兼长

谢汪舟次太史以雪携旧选见还啓

迂癖难忘老去犹耽黄卷流离不免乱中宁问青箱每思手录一编久已心伤十载从前避俗曾賁斗酒同携向後知音忆共囊琴俱断但只付焚书之炬未致涂泥若教覆瓿之瓿谁怜冰雪何幸存邺侯之架遂能返孟氏之珠传奇字以与奇人宁非快事逢故人而得故物更为苦心捧卷如狂开緘欲涕看当年之画迹似隔前生览旧日之封题犹疑短梦从此拜良朋之赐何殊仙遇龙威便当付稚子以藏益欲秘同鸿宝

孙汲山饷石首鱼啓

歌类冯生方思弹铗梦非吕叟欲效垂纶蒙惠鲜鳞犹含香饵每逢夏至视则有光亦号春来烹而得石与三牙而形似较四腮而味殊用作金羹范少伯宁求鰕菜将同玉鱠张季鹰岂忆鲈蓴即化为鳧首犹戴德谁堪比 腹不怀芒

答江青园为子闾求婚啓

伏以天上灵辰旭日叶凤凰之兆人间佳侣春风应鸾鸞之祥谊重丝萝荣依乔木恭惟某文

章华胄孝友清风江左驰声种德无殊万石瑕丘问业传家惟裕一经令嗣壮志鹏骞英年豹蔚由斗野而发参野【以乡荐於新贵也】不减终军弃繻之奇易济阳以成晋阳未改文通梦花之秀张祿行将作相【以寄姓也】嵇康已是显名某栖托金门浮沈粉署溯潘杨之睦虽有自来念齐郑之交实慚非偶弱息才乏颂椒海疎采苡贫家操作固同鲍守之儿陋室形容略似黄公之女乃赤绳系於万里遂白璧订乎三生既協蓍占敬从鸾信荣承筐实筐中杂剪彩之花远荷币将几上得探官之茧【时人日也】吴广川之牵犬愿效清操越北海之乘龙自传佳话殊慚报李窃比依葭伏冀尊慈俯申崇照谨啓

约武林同宗文会啓

浙水是文章之藪延陵为礼乐之宗季重凤观名高邳苑少微鹄起誉美唐都簪纓自古以称隆文笔於兹而特盛某幸膺胜地得揽雄风展韦氏列宿之诗长忆德星雅聚诵李家花萼之集恒思荣木新篇僭卜中澣之八朝共聆大章之五色丰溪濯锦发光西子湖头练水涵珠耀采伍公涛上将见天策之一十八士聯步瀛州不数孝仪之二十七人传麻中垒也谨啓

谢黄孝昭送名章石研啓

花间送笋酒醉玻璃烛下挥毫词慚鸚鵡乃蒙隆惠用锡殊珍篆仿秦斯几同鸟迹宝如卫国宁让鹄睛况语本于西京老此笑白云之癖且制摹乎东井得之同青铁之华藏以琅函名曰珉欸陈之斐几比以石交倘渍以红桂之膏绸缪可记若染以黑松之液温润不磨将楼上樊川益稳扬州之梦而亭中李白堪书唐苑之词不须别制玉麟已司花印何待再求铜雀始赉草贤

谢汪学先送绿石研山啓

竹筒横陈欲倦毛生之穎桐圭戏剪难成管子之封几欲酬以中山未得贞于介石何期珍贖获遂雅怀攫之米芾携来犹带苔痕伴此陶泓洗後尚留蕉影遂使绿沉朝染堪吟么凤之词青绡宵分欲梦神龟之字江殊斑竹常看钱起之数峯潭似桃花未及汪伦之千尺

答乡先生迎还湖州啓

恭惟诸位老先生台台道存三代品重一时云起苍岩即有为霖之望风清岷岭尝多偃草之功秉德无阿毁誉恒持乎国是处心不竞是非悉当于人情顾念解组之孤踪谬辱飞书之厚谊挽其已去之辙而冀以重来招其既殒之魂而呼之复起何能得此无德以堪谨百顿以辞恩聊一言而致感伏念某生而少贱质本多疎读书而误信古人用世而罕通时务十年索米饱少于饥三载专城甘仍是苦栽棠种柳宁知好且难为破柱埋轮总是愚而自用转喉犯忌致遭大吏之嗔螯手成冤又触狂童之怒违山十里闻蟋蟀而犹惊泛宅五湖见禽鱼而亦畏幸而梅州呕血暂賒铁汉之身敢望桃洞回头再托渔郎之足乃蒙折简鉴我非辜勉谕旋车寬其多难皇天后土实闻长者之言远水高山永志故人之德但某去为失路归亦无家文有

愧于苏公而官同磨蝎道或殊于扬子而岐类亡羊听彼妇之讥谗殊堪入耳遇醉人而推骂良已甘心虽顾渚煎茶频形旧梦程村买酒未隔余怀功过相权或见原于父老性情自得尚未忘于江湖并土重归空有故乡之恋玄都再到恐贻他日之羞若乃系画舫于雪中频来访戴命青樽于花下暂且留髡则苕霅可以一苇而平原无妨十日矣谨谢

吴门诗会啓

茂苑名都横塘艷曲山留剑古气成才子云霞水泛脂香流作酒人烟月风清鹤市主持藉韦白刘王星暎鲈乡唱和聚吴罗皮陆嗣後而高杨继响独称洪永四家于中则文沈齐驱尤见嘉隆多士斯文未坠吾道庶几爰订名流共襄大业入孝王之馆并解篇章过石尉之园无烦丝竹千年胜地雅宜藉卉班荆四序良辰是用分兰折芰畴能结驷请观鲁国之风不待刑牲始订越人之好倘登筵而有弘度直须纸染桃花若入社而得远公亦可香参栢子务使振兹大雅鼠须重写于兰亭莫令笑彼小巫鹄尾偏浮于梓泽则同心逸唱争传乎沧浪之亭而曦发浮踪特附于月泉之社矣谨啓艺圃诗成谢姜学在送名牋斑管吴草庐研马湘兰画兰啓

月泉入社羨清翁七丈之罗雪苑分题怕石尉三升之酒吟成艺圃篇章未半青莲賚及文房珍异有踰苍谷韦贯乏晓寒之句乃赠衍波江淹无夜梦之花徒闻画日有田是石得旧物于吾家待女成香见遗芳于絶代从此学书井畔复何取于种蕉将见研露窻前还可吟夫树蕙永以为好陆敬游何以当之必得其名顾阿瑛不能及也

请独任和尚住支硎山古报恩寺啓

伏以白象天高大法待奇人而始显青鸳地古名流非胜境而不居跂杯渡之非遥望锡飞而可止恭惟大和尚建智慧幢作慈悲筏岩前问道曾经白雪埋身座上提宗久向丹霞着脚拈花一笑参妙谛于西来击竹三声振灵音而东下本豸岭鲤湖之胜涤荡玄风收龙湫鴈宕之奇宏开法海闻钟灵隐悟与身俱执拂径山迷随指破说文字法法超文字之前具山水心心在山水之外蜂王台上乃有灵一皎然狮子座中总是次宗元亮羨黑白之缘俱尽信缁素之仰非虚况此支硎乃道林鹤鸣之地在斯赵墅尤凡夫鸿渐之区以高士而处名僧契合三生之石将今贤以续古德允传五叶之灯前因岂属偶然大道终成卓尔伏愿不遗贫瘠大展钧陶分甘露之余波普灌三千蓍卜移雨花之密?还成十二芙蕖则紫竹林开鹤苑聿兴于鹤市而白莲社啓虎丘不异於虎溪福在诸天欢生十地矣

徵广陵诗会啓

书驰铁马陈记室檄可愈风制草金鸾徐学士香堪伴月巨源对策才比长沙少游着书集称淮海吾乡夙号名区此日复多住士而名流修禊仅见柳泉胜侣抽毫祇传兰里窃恐花开芍药反欲笑人树长垂杨惟堪赠客者矣绮僭约同心共襄执耳修月泉之故事缔云山之雅盟谈诗而争致刘生作赋而还邀枚叔华轮蜡屐并望惠临红袖缁袍无妨杂坐务使奔涛九曲尽将彩笔收来莫令明月二分顿使玉箫吹断况此会惟谈文酒岂当年竞长坛塲客过玉山

职顾瑛之好事人游金谷遇潘岳以论交吾侪用是有怀诸君岂能无意

谢江秋水惠小石研山启

毛穎论交偏宜石友陶泓结伴自足山情但九华罕遇於壶中似三岛难寻於海畔何期珍玩乃出雅贻异状玲珑得自襄阳之袖奇姿磊砢来从博望之槎直欲唤以龙精遂可酬吾兔管中书脱幘小憩芙蓉都尉横牀权辞翡翠乌皮几上宁夸华岳千寻紫玉潭前长对湘云一片谨啓

与江郢上徵刻宋元诗啓

夏鼎商彝代异而同为宝器隋珠卞玉人殊而悉具瓊姿总之各有本源未可狃于闻见乃谓三唐以後遂无一语可传岂知风雅本于性情抑且声律关乎气运唐原取士世难再返三唐宋且无诗身又通经几宋则论古固为甚隘而处今不更太卑乎仆务破拘挛不辞固陋合三朝之歌咏历数载以编摩菁华各取其时何碍菊松之前後格调必裁于古无分黍麦之低昂幸见许于吟坛将太公之艺苑枣梨略具赖江郎颇有同心蒲柳难成冀诸公广为垂手始徵资以成卷终计卷以偿资名列无涯与编年而俱永惠施不费可刻日以先收酬知我之诚良同徵管呼将伯之助是在济阳

同宗雅集啓

延陵奕叶各在天涯茂苑飘萍俱来江上苏舜钦就沧浪以寄迹因为失意之时黄鲁直溯婺郡以延宾正合戴宗之谊僭为雅会通作嘉招月必一轮坐无期于北海席惟五器例有仿于东坡论古还以论心卜昼兼之卜夜听琵琶而洒泪总是青衫借丝竹以娱情何妨红袖游须秉烛请看匝地烽烟兴可挥毫莫阻满城风雨谨啓

募古渡桥赤栏啓

界有三千共说扬州独胜桥名廿四或云古渡居先地本南郊而兼通乎西郭赏宜秋月而最妙者春波诸行人向仅架以板梁大长者近始加之石甃鰲身耸峙掩映以垂柳垂杨鴈齿横斜绵亘于江花江草旗亭近接常多高李寻诗梵刹比连不少宗雷问法星临河上何须乌鹊飞来日在花梢便有紫骝嘶过可称茂举足快冶游然而锦陌才通尚有雕栏未备夕阳可倚难教词客捻须昏夜堪虞恐有醉人失足僭为短语共结胜缘请解金错之五铢用缔银梁之十丈则秦鞭不恐马柱堪题解苏子之鞍何妨欹枕奏隋皇之曲可任吹箫矣

家伯成先生为陈集生赎居啓

陈子集生誉满通都家居委巷祝融不毁久为厚德之遗造物难期尚少高门之报有数椽而仅存风雨在一家而分处弟昆七夕门庭仲容独称南阮三间参佐士龙仅住东头何期值此

难兄仍欲售之他姓母论种分鸬鹚将无取于同巢亦恐性异薰莸势实难于共器信何安于一日必有恃于二天允赖大贤庇九州于广厦常俾寒士辑百室以宁居特向于頔以求钱共为马卿而赎壁庶卧侧无忧鼾睡而门前常听商歌纵水流牀下皆为雨露之膏而灯借邻家即是光明之烛矣

送陈其年衣緞啓

遥忆十年殊乖赠缟相逢一日窃附同袍君比古人是子难为衣食我思往事此缣出自机杼兽锦慙华祇免王生之织鸟毛非暖宁同范叔之寒

梁溪诗社谢伯成送墨啓

良辰共赋幸逃金谷三升珍贖分貽遂获铜台一瓮藏之豹棗字以麋丸可染鱼茧三千不减龙宾十二金壶洒出皆为篆籀之文玉管诗成即有楼台之气岂若授一丸于女子注易能精竟如得盈袖於神人为文可进受而有媿恐至磨人持以相夸还须报弟

为张谐石回禄後谋居啓

谐石张子伏鸾高品吐凤奇才无力居城甘就菰芦以处有怀负米聊为蓬藁而行弟兄无一日之余父母皆八旬之外贫缘守已惟守已而长贫热不因人忽因人而太热炎飈翻海吴仙君无青鸟之衔烈焰焚林介子推乏白鸦之救咸阳坑内凡触炬而皆灰巴蜀市中即倾杯而莫雨扶牀白发幸惊絶而重苏排户红颜赖狂奔而获免奇书亦有乃尽取于六丁长物原无况全收于一丙焦头烂额叹荒刹之难栖破壁颓垣问敝庐而安在谁无岷岵老人之藉藁何辜未有室家少妇之飞蓬足悯致柳州之贺殊不近情兴栗里之嗟真为拂意势难少缓谊赖共成图已再三始得城东片席费须半百爰安巷北一椽但灰烬之无存宁能卒办即饥寒之未贍何暇求安凡我懿亲暨诸良士祈鉴燃眉之急共谋容膝之资念我辈高厦重檐尚偃仰之未足乃斯人儿啼妇叹独寢息之何从或如于頔之解囊或为尧夫而折券施能当厄感切扶伤因其祸而救其人实一时之义举合胜友而完胜事亦千古之美谈是用恳之同心岂必定为识面

代元士侄聘继室汪氏啓

伏以附葛为荣卜凤欣传于累叶荐榴呈喜鸣鸠伫咏夫连枝特修玉镜之缘用献瑶筐之悃星期是订冰语非遥恭惟某官环谷名宗玉山华胄河东凤德绣羽同推冀北龙文白眉尤重芹宫起誉应更圣錫之名莲照分辉待草彦章之诏家声既腾于列棨闺训更着于遗经谢太傅之佳儿词高快雪鲍参军之女弟名蔚大雷既藉王母之余恩复念伯姒之旧戚眷兹季暇字以孟光一诺黄金幸无辞于贄鴈双生白璧实有望于歌螽联新欢于秦晋申世好于潘杨得骐驎于东邻即是当年犹子合燕莺于南国遂为累世懿亲序卜林鍾时当载魄来温风于席上不障鸾纱写初月于天边即成螺黛辰而出辰而入巧合乘龙宜尔室宜尔家欢迎秣马

伏愿电从愚请海茹戈仪乌鹊桥边用渡天孙之驾凤皇台上还闻帝子之箫

谢蔡少君画凤啓

车飞汉殿不乐人间箫引秦台徒闻天外何意彩毫之点染因成神羽之和鸣岂有桐枝方知六象非关竹实忽致九苞借丹穴之灵毛图成比翼用红窗之偶影绘作双栖足堪惊彼超宗岂但方于凿齿地殊扈阁倏来天姥之观人异颍川长奉星娥之制矣

金少君画洛神啓

金缕遗魂梦感陈王之枕采旄含态香生王令之书人但赏其弘词世罕传于妙蹟何期藻管近出兰闺花欲言情波如动影依稀莲袜凌千顷而姗姗彷彿桂旗望三秋而眇眇想见临池染翰原借照于当身定知拂镜穿衫必含情于微步呼之欲出不堪褰捉留仙念此如狂敢冀笔摹乘雾倘点仲姬之墨朱鸟晨开便来甄女之车青鸾夜下

约友邓尉山看梅啓

春来陌上仅得三分风到人间初传一信吴五旧国长留未断之香邓尉名山犹剩不残之雪梦回绿凤三更难醒梨云行扑紫骝百里尽迷花雾何年玉树足乱春愁此日铜坑偏宜野兴况何郎东阁看来絶似乡人而逋叟西泠种就有同妻子谁使山中之寂寂空怜陇上之垂垂爰约素心共舒青眼篮舆竹杖不须豪客相夸浊酒素琴无令美人俗吟高明月尽翠羽之啁嘈字染寒香见黄昏之浮动从此青鞋踏徧楼开夫七十二峯免教玉笛吹残屐冷于一百五日矣

请澹归大和尚住黄山啓

伏以大法三千年而始振待啓金轮名山五百岁而重开遥飞锡杖绀龙夜仰白象秋高恭惟某慧解弥天慈恩洽日刘安世之直节曾居铁汉楼中苏子瞻之奇才再入金仙坐上辞器得悟早知静扫云烟为法寻幽已识饱尝山水丹霞密印普闻狮子之音白雪重参直接蜂王之乳曹溪滴水偶然流到香溪庾岭飞花忽尔经过吴岭虽三宿频迁圣哲不留情于桑野而四禅均利人天胥有望于旃林惟此黄山昔存丹竈轩皇受籙赤龙始辟金坛娲后赐书青鸞爰传宝相林皆薈卜自有余香峯是莲花生法座倘能惠然竹杖不惜渡以木杯则云停四鹤何殊迦叶重来地涌千猊共见维摩示现虽流沙泉畔或无长者黄金而洗钵池边又点生公白石矣

斂吴紫三夫妇助葬啓

兹者亡友吴子紫三早岁能文夙擅雕龙之誉英才不偶未舒展骥之心破镜先伤慨符融之弃野碎琴旋恸叹张劭之无年泪尽山阳空悲残笛哀生蒿里莫掩遗棺虽继妻独矢栢舟宛

颈徒怜寡鹄而嗣孙犹嗟葛帔资身只类穷鸟况两枢纵横多年暴露非有桓魋之石既速朽以堪虞难求尼父之车必重封而不易计欲安其窀穸惟有赖乎知交昔城下余魂尚沾恩于陈宠路旁游子亦蒙惠于王饨矧我故人实存旧谊幸为後死敢忘一日之知愿以微资共妥九原之魄双埋广柳宁云塚结鸳鸯并剪荒榛但冀穴除蝼蚁呜呼子期既谢惟余长恨于鸣琴许国重来岂不齐芳于赠麦谨啓谢崔莲生转运取还宋元诗永镂板啓

十数载之林泉几同麋鹿六十年之灯火竟作蠹鱼偶因风雅之衰遂有宋元之选知者罪者未敢秘之枕中簸之扬之乃致疎于楮外何来某甲妄窥一甲之藏本不识丁竟作五丁之取以奇书而辱于狙侏酷已甚于秦灰非仙篆之遇神人耻难辞于汉溺惟我莲生先生熙朝硕辅开代真儒圣主识其清操大臣推其治行方之广川子而功德已遍於民生绍乎庐陵公而文章式行於士类心存扬善不遗彤管之编力任化顽遂探青箱之录谓此辈腹惟堪鼓宁用贮书且多年手熟持筹何容执卷神机巧用毋烦雷电於青衣雅籍重归复覩日星於丹简盖威严可慑不敢倒乱其篇章且恩德所沾亦可略明其镂刻行见豕鱼不混桓君山不待重钞梨枣如新和鲁公宁须再订词坛鼓舞艺苑流传信风人必属正人有快事乃称能事独回风雅感非一已之私共矢咏歌泽及三朝而後言而匪佞颂已无谖

谢丁鴈水惠佳綸珍茗啓

余薰弄暑疏凉絶爱冰丝衆病归秋消渴偏宜雪枕忆含风之细葛天上空传采骑火之仙英雨前稀有何来隆惠并系珍贻既霜越之遥颁复云腴之俯锡光生白叠五铢蛮女之花香泛紫茸一串清人之树练开叠幅织成必自蛟宫印啓斜封送到如来鹤岭见陆閤之单制已知美过会稽共李泌以亲尝不复奇夸阳美服之无斲不沾洛下之尘味此靡佳已愈茂陵之疾感盈千缕宠异六班谨啓

珠江诗会啓

城开五穗名区久肇仙羊田种万花胜地尤传宝鸭赵佗西拜尚闻车马之雄郭璞南来大有衣冠之气是以珠江浩渺古今不乏才人琼岭嵯峨来往更多奇士文高区册卓然立就千言才蔚国仪宛若飞流百尺梦得海阳之咏韵写溪山昌黎广利之碑藻浮星日昔云盛矣今偶缺如兹值文运广敷庆鲸涛之甫靖更当韶光早换喜莺谷之方迁游子善怀每关心于令序幽人多暇岂无意于曩时僭约如兰爰谋藉卉木棉林下咸倾鹦鹉之杯卢橘花间并染凤凰之管则争裁丽句其何美于兰亭而各得胜情可有同于栗里鹤舒台上尽看硕彦偕游燕喜亭前却羨耆英再见至于东林禅侣何妨共着红楼若教南国佳人亦可遥传玉镜人来金谷皆可论交客过玉山俱能赌酒诸君共成胜举吾辈同慙雅怀谨啓

澄江诗会啓

延陵故里犹传君子之风申浦澄波尚有名侯之迹山名覆酒游人常欲饮醇迺可采香野老还闻留馥岭分南国接胜气于盘龙水似西陵挹流泉于跑虎况乎郭景纯之博雅信是神人

李嘉佑之宽和正称词客风雅久传于二岛文章历重于千秋矧今仙令之才已同入洛嗟我
羈人之况颇类游梁僭约同心共谋携手登高作赋聊为寻菊之盟望远兴思共遂班荆之愿
仰祈凭轼俯慰束橐

谢阎牛叟贻唐伯虎十美人卷及唐镜啓

鄙文未就雅贶先颁披明月而在函如逢照胆识春风于开卷得见捧心双手频抄想花中之
倚风十眉争艷感波上之惊鸿唤以约黄或临妆而欲出观之束素咸敛笑而不言好我实多
顾影形而俱丽铭君良厚矢心目以无谖敢不抽彼兔毫更拂珊瑚之架独是慙无鸿藻难充
琬琰之长

谢汪扶晨送画扇古砚啓

炎凉互变感在风人追琢为章端由石友况笥篋之爱在山水而弥殷若笔墨所资历岁时而
成寿何期一日获贶兼珍幸拜下风庾元规尘将自远长研晓露李卫公交且益坚

束懋叔侄索橘酒啓

法异中山难逢白堕睦殊西市罕得黄娇忽蒙家酿之倾似饫仙厨之酝露沾荷叶莫比其芳
雨润椒花宁同其劲酣而竟日岂复问其低昂浇此芳春幸得同乎欢畅况滋分楚颂适有合
于放臣而趣等周醇更有侔于良友以兹神往用写心劳分余?于油囊言斟翠物得全神于金
罍不美乌程颂德赞功将见讴歌之满座除忧来乐应知福喜之入门

谢家东岩惠西洋兰香娑罗子河清酒啓

种奇芬于南土兰亦名珠结异馥于西溟树皆成宝美美人之记曲字字红儿爱达士之忘忧
时时翠物方在旅中而多忆实感门内之深情从衆香国来香应非一是相思种子思岂无端
况原酿自灏波并得贻于丰水花开鱼缬早知金粟前生烟吐龙涎似得蘅芜半夜何须架笔
看来色比珊瑚但得浮觞最喜光如琥珀沾身而馥郁奚但三朝入骨以玲珑宁堪一掷信醉
心之雅不复同人而饮醇之深有踰中圣矣

洪雨平惠茶米蜜匏花啓

离居寂寞忽见宠颁厚意殷懃还承远贶丹心叠用甜何论于中边苦叶都无涉宁疑于深浅
消相如之渴殊胜紫茸济方朔之饥堪称白粲遂使泉得烹于陆子竟欲成经粥不食于鲁公
无烦作帖离离朱实自可服之如神累累琼英焉能系而不食将遗通子非梨栗之能同归语
家人有饗殮之可代信堪饱德匪待獐牙良足蠲疴无烦凤髓报而无物有心但切于萧琛谢
恐难言无口独惭于李亢

家鸣夏惠佛手柑啓

蒙惠奇苞实为精品种本分于平蒂名则号为飞瓊虽有頼而有黄欲指天而指地多伸直节单拳独证禅机略似柔荑一指爰成善果得旃檀味居然相好黄金探摩尼珠竟若光舒素手通于鼻观汝不闻乎嗅彼芳香吾无隐尔设之座上宁须荀令熏衣供在龕前便似瞿昙说法包以黄罗之帕应如爪落霜痕携同蜜盃之尊何必酿成春色铭德惟当合十言谢岂憚再三

答家梅庄惠古铜水注啓

捐惠珍贻实称清玩用资挹注何来百鍊之精体赖虚容遂有千年之质金为土蚀土蚀而金色愈章水藉金盛金盛而水痕易润斑凝古翠雅足承云点杂灵砂元堪滴露是以置之几几能成博士之名伴以宝泓不愧中丞之号杨公写梵无烦灵鸽御波李主填词岂待神螭吐水绮方慚才尽自叹文穷忽蒙银鹿持来似得玉蟾颁出喜应倍昔行将报以素心感实殊常切愿铭诸丹腑

答洪待臣送鸳鸯锁鹧鸪香啓

碧澜抛綬久释累于北门紫陌含毫独销魂于南国笑张吏部之行处响动一时美荀令君之座间馥留三日何乃惠分珍贶并皆品重文房鱼钥葳蕤各种炫黄金之彩龙涎 一函聚绿结之芬美慧匠之巧心无形不肖感词人之芬泽有佩皆馨宝笋交聯解難开情中韩妇翠鬟婉转行不得影里湘娥虽则门少兽环不烦扃闭然而牀留鵲尾颇爱薰燎固却实恐违心拜嘉聊以志德漫道昌黎洞口不倩云封最喜徐铉斋头还将月伴惟忧性拙覓玄品以谁通敢谓文成享瑞烟而无忝玉匙金锁黄庭且自完坚宝鸭银猊紫栈时闻馥郁若在陆浑山水何妨关键长闲但觉楚泽蕙兰亦复佩纫如烈矣谨谢

放生啓

盖惟人之有殊於物以其能具慈仁而物之不若於人以其常多苦恼盖皆有情性则皆乐便安同具形骸则同知痛痒故人之身家性命多忧水火兵戈岂物之血肉肺腸甘受刀砧鼎鑊贪生而恶死合灵蠢而皆然避祸而求安即蜎微而不异鱼忧网罟闻柅响而深潛鸟护卵雏处巢低而不落蚁知没水负叶能浮羊惧遭屠闻刀即跪同有父子麋被获而鹿已断腸尽见夫妻雌被笼而雄为系颈苟充其类良有不殊幸处其灵何为独忍所以鵲知乞命褐衣见梦於蔡襄雀得全生黄花乃酬於杨宝蛇因药傳乃矢衔珠龟免渔封还能铸印何因口腹致任烹熬一筋之甘而冤生衆苦一羹之美而惨聚多生我虽暂肆肥甘彼已横遭屠割况入口之後乐亦何存而断体之余冤难不报所以吴唐射鹿天激其儿赵甲屠牲刃割其腹故古人治礼有三不杀之文而哲士推恩立七不食之戒他若鲁公作沼恩及蜎螺苏子临流德施鱗蛤羝求免戮忠猷特为悬牌猿解乳孤潘怪因之折弩皆以勉行惻隐自保天和非但强抑贪饕共全物命也雅闻前辈每切陰行及岁久而人离遂迹湮而事远某谬思继武用广推仁共破慳囊赎羣生于汤火长詹吉日纵余息于江湖鵲出笼中非巩卿之献佞鳞归水际效子产以

施恩岂曰无情情已存于高厚宁云不报报必在于神明但免烹煎固吾心之已尽若怀知觉岂此德之能忘耶

张公蔚生徵言啓

盖闻德至如神凡所过而即化恩流丕泽每有感而必深麦秀棠陰此歌謠之自始月临日照乃祝颂所难谖也蔚生张公南越鳌攀北溟鹏奋须眉出衆咸惊惠恕英姿气度兼人共服齐贤雅量研二京而作赋汉重弘才得十乘以赐书晋推博物螭头射策文章高华国之名骥足骋才经术裕济时之略三千直上名贯斗而彻九重百二遥临福为星而占一路长才无嫌于短驭暂试烹鲜鉅量不弃于细流还闻驯雉濯缨亭上返流亡于洪水之余得剑湖边留子遗于燠阳之後昭阳鼓舞千年而重遇仲淹延令讴歌两境而共争杜衍允文允武得多士以作周桢不竞不絀抚兆庶而襄汉礼吏在冰而民在镜既所到之皆然春有风而夏有雨爰无施而不可一垣分炤幸叨穴壁之光九里沾恩遂获代庖之泽在上台之倚重久知靡润脂膏幸瘠土之依仁共喜同瞻覆载念军储之是赖隆其体乃以得其心计国赋之维艰用其才因以惜其力屏桁杨而不事宁须更试蒲鞭化魑魅而咸藏不待再施桃茆追呼絶响石濠之吏靡闻疾苦常询卖菜之佣安问礼贤辟館惟广察其訐谟引客同车要常咨其利弊疏河济运而飞挽不匮于坚冰煮海宣劳而斥卤尽同於沃壤此则善政而兼之善教宋人传快活之条仁闻而本之仁心汉守着循良之化矣若乃操坚蹇鹿却属吏之馈遗节凜悬鱼谢部民之供亿破从前之积例何问赢余减额内之输将并严需索此又洁清本之天授廉介出于性成方之古人惟食吴水同于前哲自运家粮者矣是以万竈怀恩千屯待饱课不徵而自足知疲困之皆苏鹵匪溢而

<集部,别集类,清代,林蕙堂全集,卷二>加多识凋残之尽起关中运饷功欲比于鄴侯郡内兴謠思已深于何武某等情殷庇厦分属授?陶地四通谬学朱公之策義爻三倍幸依贾父之仁惧借寇以未能愧颂猷而罔嫺谨陈懿行用乞宠章垂之无穷可列孟坚之传作之不愧斯为有道之碑为朝廷而得人名公卿可交章而奏绩庆风云于梦弼圣天子将赐玺以徵贤矣
谨啓

姚东只五十徵诗啓

东老姚年翁歙浦英流瀛洲华胤名不殊于第五品独擅其无双赋体高华信是扬雄之匹史才妙丽知为姚察之儿乃笔敏八义人同文虎而楼登百尺客自元龙感重片言事急堪酬赤剑交深斗酒家贫不爱黄金苟有意以相投长倾肝胆问不平为何事辄动须眉诚哉国土之风允矣才人之致绮等雅締兰言恒同卉藉与幼安而共席效叔夜以登堂听德操之谈频忘执爨看刘琨之舞爱着先鞭兹为季夏之三朝适值大年之五十高达夫日有篇章朱翁子时当富贵相看半百宁无置酒之欢共羨八千可少引年之祝君能学易将为松菊主人吾欲言诗是颂台莱君子

汪扶晨六十徵言啓

栗亭汪子玩鸥华胄吐凤奇才文章本自性成孝友原于天直数龄能赋对已善于杨梅早岁着书词更华于菡萏星前刳股愈母疾而惟诚海内论心与人言而不负名卿赠紵时来韩愈之居多士盈门日满孔融之座獎成不吝後进恒缘以立名推解无私素交每因而受德虽数奇多有嗟猿臂以难封而才大不官覲龙顔而未遇兹当建午之月适逢周甲之期从此而孙弘上书终须开阁及兹而龚明按籍已合寄觴况在同心宁无藉手愿抽珊瑚之管开五色之花光庶得琬琰之镌祝千年之椿算谨啓

家希虞八十徵诗啓

盖闻万年之颂首先举其令仪五福之徵究必称其好德爰考诸礼式存几杖之文长发其祥乃着钟鼓之实则家希虞公盖有之矣公幼多至性长负隼才里传曾闵之称家有融褒之誉志存慷慨常思珥笔而游运值纷更遂乃弃觚而叹风高万里愿乘宗慤之船地处四通聊挟计然之策初游汉水物望咸归继寓章江家声益振躬严三省同钦白璧之光诺始片言可比黄金之重焚券非关于市义造车恒望以借人辍食而行原孝先多因急难射书即下鲁仲连最善解围时遇盜崧翻欲奉身而避偶逢认履不妨徒步而归陰德有若耳鸣盛事难为指屈至若蒲圻设渡永息喧争车埠成梁恒称利涉伐戴滩之怪木扬帆无覆溺之忧平牛岭之危途行路免崎岖之叹坚持杀戒全物命于金刀恪奉格言济民生以宝诰斯又义声驰于荆豫仁德着于山川者矣兹者单阏逢年终陬在月当春王之四日为硕老之八旬三凤呈毛若友声等雅能梓敬九龙遶膝如大章辈并着兰芬兆贵显于杨家已经四世效传呼于萧氏更庆双曾彩衣曾舞于亭前白发为欢于堂上才如尚父不美垂纶龄拟潞公方期结社某等谊关亲族喜见耆英敢陈笃行之百篇用悬华章之九锡

蒋公暨李太君双寿乞言啓

盖闻易着严君内外列乾坤之卦诗歌君子升恒献日月之篇是以金姥木公传诸黄老而六身二首算在缘人福有所徵理无不协矣如蒋公者乐安华胄邗水名贤自宠锡于铜符家传彩笔迨班齐乎玉笋世驾朱轩衍三迳之清风种五都之妙誉少能怀橘雅知陆绩性成长更推梨早识孔融身让乃以食繁析箸遂尔业废投觚王安丰之持筹何嫌达识端木赐之结驷益见名儒诺比於金何千金之足重洁同於璧虽百璧而不渝若樊重之分财里皆怀惠如彦方之守正盜恐知名鲁仲连之解围射书必下原孝先之急难啜食而行既衾影之无慙复帟而有礼暨乎李氏太君肇仙踪于指树直慧性于颂椒入司隶之家何辞挽鹿居处宗之室更警鸣鷄夜绩堂前时作逸劳之训宵吟灯下长陈礼让之篇百口乃致以名桥三党咸因而举火何无何有解杂佩以相将乃积乃仓费餽粮而不厌用承先者而即以啓後以教子者而即以貽孙是以兰桂相继以争芳乃见椿萱并荣而益茂万石君之家声更广五世卜之祚业弥昌今者岁在骑羊庆宜酌兕当西池诞龄之际悬锦帨于秋初随南斗授籙之先舞彩衣于寒孟忆前此之十载宾筵曾叨宠于设樽矧今此之一时盛典复膺荣于锡杖黄眉白发既携手以俱仙骥种龙儿复同心于肯构历乎甲子皆余四百之龄守厥庚申亦满三千之行故一门之内或弹琴或制锦而诸昆皆效力于皇图三世之间若鼓篴若鸣弦而长孙早驰名于文苑猗欤盛矣宁有量哉某等谊忝登堂分宜捧竿敢乞灵于燕许藻发珊瑚庶阐德于陈荀芳

流琬琰则饮千日之酒可庆无疆而封万岁之乡争传不匮矣谨啓

家孺立暨余太君双寿啓

盖闻青裾迈世拜金母以成真绦节朝元偕瑶姬而证道斯为尚已莫可几焉何若懿德弘宣徽仪朗映流芳彤管衍庆祚于一门着美青箱贻芳名于百世齐眉偕隐循内则而无愆携手相庄卜女贞之终吉闺仪是赖家道克昌如吴母余太君者也太君为孺立公之淑配而诸昆季之慈亲也裔出富山门高歛浦秦邦受姓家传四谏之声楚国分支胄衍一元之秀性生淑质不待染于朱蓝天赋柔仪匪借华于粉墨入谢家之墅常闻咏絮才情得王国之风雅具采苹德性盖自其曾大母栢舟励节久着冰操萱寝贻行常多霜节而太君承颜堂上受训闺中静婉有所自来温恭由于师事实称佳妇归我寒宗祥女登堂俾百年而偕老名姝入室致九族之同钦鷄黍维?力任苹蘩之重鹿车共挽躬亲并臼之劳振家声于中落之余豆区釜锺之必谨相壮业于方刚之际内外上下而咸周念夫子以躬耕而养其亲垂十余年而不倦迨大父以耄耄而捐乎馆?四五省而未归为健妇以持门赖硕人而当户耕问奴而织问婢宁藉苍头左或圆而右或方惟凭赤手遂使长女服其身教既絶粒以殉夫诸子奉为心仪皆勤修而象父盖孺立信义行于列郡九州多慕义之人齿德重于诸侯三事修礼贤之典皆闾仪之内助硕德润于本根致道誉之日隆骈祉施于来叶兹者岁当逢酉迨夫春始建寅为上浣之十朝介纯禧于百福宣文君之绦纱犹在崔太母之丹轂还来虽鹤发同心庄椿较余六载而龙文绕膝窦桂已茂五枝舞彩堂前兰生未已衆香国内芝秀非常岂不盛欤是可颂也敢乞江毫之五色用褒鲁袞之一言则文重鼎彝永赖仁人之赠而词高琬琰弘瞻君子之光矣谨啓

家赞公暨徐太孺人六十双寿徵诗启

盖闻家有严君配两仪之位妃为德偶储百世之祥第好德重于箕畴而德莫先於孝义独行原于周礼而行尤始于睦嫺歌麟庆于未央卜鸿禧而方大则赞公偕徐太孺人实惟其人用当斯庆矣公少多至性长懋懿修怀橘岂待六龄让枣宁辞七岁博窥经籍废书于陟岵之辰雅好交游投笔在登堂之际家虽中落晨昏必膳双鱼志切先谟江汉时将驷马一成一旅兴厥祚于既衰三缩三盈缵前功而弗替德施宗党咸称长者之风义着寰区动以古人为法忆在甲寅之岁乱生戊巳之屯赴义临川首壶浆而先倡论交泮水矢金石於後雕诺重片言遂能全其妻子名存一邑卒无愧于死生迨乎楚戍操戈郢人沸鼎十五年後重闻风鹤之惊百万军前不损元龙之气受故人之重托有同季布黄金出巨寇之凶锋竟返相如白璧不遑寝食惟思窀穸未安每减餼粮冀卜陇阡之吉他若完婚毁券皆为陰德全功至如恤寡怀孤尚属平居细事而徐太孺人族高东海好缔南溪婉娈本于性成贤淑原于天授既鸣鷄而推枕或弋鴈以由房厨下尝羹独谙姑性堂前进服每为时寒李光进之家不私管龠张孟仁之室迭乳婴儿常脱珥以易书用资闻见每具觞以延客冀广切磋相夫既已为龙训子还能似鹤汉若成家有道已看名振一时鸣夏华国能文行且誉腾千里兹值建申之岁并逢周甲之期月在清和四日先悬锦幌时方仲冬中浣即设瑶弧兰以春桂以秋两世见鹏抃之盛椿以冬萱以夏一門歌燕喜之祥献其觥筹绕塔前而舞彩铭诸钟鼎登座上以抽毫伏愿锡类推仁竚待赐之华袞引年致颂必将镂以丹彝谨啓

罗母吴太君六十徵诗啓

长沙纪绩爰传白雀之祥渤海成仙每属彩鸾之异盖殊休必生于华胄而灵迹要出于淑媛理有相需福无或爽於斯为盛雅足称奇则如萃洲罗先生元配吴太君是其人矣先生世履朱纓家承黄甲高祖父闻野公荣膺秉钺壮锁钥于北门曾大父虚舟公职属司衡重干城于南部虽当末运值文学而中微然亶弘才有节推而继起世皆称为国士谓当配以淑人太君承遥胄于延陵受家风于内翰才高咏絮早擅鸣鸪德裕采苹终当秣马既称佳妇用事良人尽夜披衣每焚膏而助读中宵推枕常伸纸以候书虽劝学无待于吕荣乃赠镜有同于徐淑成名之後操益警于鸣鷄服官之余廉更箴于瘞鹿持毫对泣为刑状之非轻执烛相规励观贞于不败既而天倾莫补海涸难填寡鹄悬帷经三秋之风雨孤鸾舞监历屡岁之雪霜却赙赠以名廉不为清白之累束诗书以成教无忘忠孝之模丸柳氏之熊宁知异出养乐家之豹行见大成兹者岁在壬申期适逢乎周甲月当癸丑庆用协于长庚恐母德之不传用希鼎吕述阃仪于既备仰藉球琳伏冀推锡类之仁流芳斑管斯乃作传家之宝振彩彤编矣谨啓

张母卢太君六十寿啓

刘子政着列女之篇惟传令范鲁僖斯作寿母之颂允尚芳规况得配于文人信足彰之彤管且赞成乎循吏尤足显以青编如张母卢太君者早毓韶姿生传慧质本出范阳之胄门第高华复鍾淮右之灵帷帟肃穆兰芬幽谷孝友亶於性成芝茂崇堦诗礼闻於世习爰师古烈鸣鸪而夙慕梁鸿耻事庸流挽鹿而终归司隶我词臣先生蜚声桂籍停船曾覓孝廉从政花封绘像共传仙尹恩流鄴上洵堪为表百城字写屏间遂乃受知三辅承尘下鵬贾谊乃不永年庭屋啼乌荀采遂甘孤宿心坚茹蘖宁知身是孤鸾教苦丸参乃致雏成大鹤嗣君天秩雅负时名以终贾之妙龄文坛独步具荆关之能事艺府兼游兹值庚午之岁爰当己卯之辰节距中和时方午日筵开燕喜襄后六旬堂上萱花鹤发欣逢周甲堦前芝草鸾章伫庆长庚宣文君之耳目未衰犹褰绦帐邴夫人之神明特茂已授紫绂用悬赐以瑶篇传徽音於奕世必且镌之宝鼎介蕃祉于名宗谨啓

林蕙堂全集卷二

卷三

钦定四库全书

林蕙堂全集卷三

湖州府知府吴绮撰

序

游丰台诗序

时当豕渡之年序值螭鸣之月青阳既谢而媚景犹妍朱律初调而鲜云未燠言邀胜侣用访名葩结轸青门覩晨霞之映袖连鑣紫郭讶微雨以吹衣始则巾垫林宗布席於襄阳池畔既而觴倾叔夜闻笙於侯氏峯头银竹萧森泛红泉而递响金柯晦靄笼碧岫以成陰仙人多好楼居况湖海足元龙之气上客何妨末坐更江山助司马之文于时茅屋鷄翁应斋钟而破午竹篱鳩媿随野屐以呼晴还思溱水之游益鼓剡溪之兴连翩宝络竞踏香泥宛转吟鞭争穿宿莽方追踪于锦市乃流睇于花田香共一风色分千亩娇红髮 并夸金线之姿膩白逍遙咸看玉盂之樣盛则杨家之春队粉乱花繁丽则汉殿之晨粧烟啼露笑搜刘攽之谱尚觉未详吟谢眺之诗犹疑不尽岂止四枝插帽奇见广陵十叶承盘糴云东武而已哉况乎一日之间候交春夏移时之顷景备暄凄聚六地之词英成终朝之胜赏同心卜昼宁无纪事之篇焚尾留春可少缘情之作各拈三韵共奏四声庶北馆清游继华风于鹤盖西园雅集传逸韵于兔毫也

瑞阳阿集序

瑞阳阿者明金都御史长信江公之文集也公生居歙浦系本瑕丘诚意正心方童幼而名如曾子先忧後乐为诸生而志比范公释褐登朝霜厉弹冠之日单车受命风清负弩之尘乌草陈艰献谏言于端宸朱衣辟恶取弱卵于危巢于是清流咸许为正人

圣主尚嘉其直节参差露栢首简乌台凜冽霜条先巡赤县横穿豹尾五色棒碎贵戚之车直叩螭头三尺堦借尚方之剑直声震世本无意于沽名慧语惊天曾何心于忌器譬除鵩鸟铄其翼而不患飞扬若剪神丛去其枝而无劳斤斧遂使大奸距脱密禁炔销壮怀益矢于有为毅色更严于无礼铁冠捧牍刘整为之心寒绣节行边李愬因而胆落殆有过矣岂不伟哉既而法曜移星卿辉比月张堪之为光禄白马重来潘尼之领乘輿黄骠不爽而忠谋益奋雅志弗酬虽疏傅乞归欲勉留于盛世而贾生不见终失意于贵臣于是息影岩阿逃踪烟市蓴香野水思归宁为鲈鱼楸拱寒阡助祭长来乌鸟乡人罕覩其面土室独闭者八年天子忽念其言银信惊传乎一日辰溪建帜秋清浮竹之波沅水褰帷春满采菱之野爰由佐臬晋陟祥刑

得定国而狱鲜冤民见有功而囚无死法判终不改诚难显夺其权官为量移实则陰钳其口
维时山危铜鼓伏莽潜滋地阻石门弄兵多有谋猷克壮于方叔威信兼用于武侯仗钺渡泸
百足失乘墉之险挥戈入箐九头息吐雾之妖乃任者之难不及乎议者之易而邪人之巧偏
中于正人之疎大用不竟于朝廷长才遂终于道路赵清猷家惟琴鹤岂有余财寇平仲地少
楼台空留正气嗟乎时当万历运际六符庙谟方肃于委裘庶绩咸熙于鼓瑟而公也当不讳
之朝展无私之学攀裾高论折檻危言其抗奏于中台也则豸遇邪而必触其对扬于列署也
则凤览德而长鸣其镇外而陈言也则所至铭沉碑之德其居家而纪事也则随时怀恋阙之
忠盖古栢长松不足以方其劲直惊雷疾电亦无以写其激扬虽蒙赐筇之知不救含沙之射
既屡伸而屡蹶亦转炼而转莹遂致遇似屈原满卷是离骚之字才如贾谊一生皆痛哭之时
直道难容于兹信矣谗夫可畏抑至是乎余本放臣适逢归里述旧德而动嵩高之仰览遗书
而兴湘累之悲爰草数言弁诸首简噫嘻已矣久而始定难再问之斯人後必可传尚有期于
当代也

怀旧诗序

顏延年作五君之咏意本怀贤杜子美赋七哀之篇心存悼往予生也晚及少而孤霜野饭牛
徒作歌于早岁天衢附驥曾奉教於伟人忆橐笔以游吴迨驱车而入洛才非杞梓谬辱品题
家本菰芦长逢獎藉仙同荆楚奉文酒於朱轩客过苻离听音声于绦帐始平问业菁葱槐树
之街安定谈兵灿烂莲花之府他若拜张华於冀北世号龙门或者望仁杰于斗南家传牛炙
莫不恩深说项感重识韩景杲日之常中仰高山其未艾然而缅怀知遇尽属贤豪略计平生
亦多零落燕郊伏枥马已失於孙阳蜀道携琴鹤早辞乎赵忭江东坐上无复饮醇钜野台边
徒传挂剑或情殷适馆或谊切趋庭或交深于患难之中或契合于文章之内咸蒙恩于国士
将传美于後人而弹指十年伤心两世平原已往谁买绣丝孺子长贫难賁絮酒奉文仲事君
之教但有哀伤念张堪知我之言何胜感慨梦中得句聊写怨于麟毫醉後过门实衔悲于马
箠尔

【按此後原本载怀长沙赵尚书开心河南周侍郎亮工太仓吴学士伟业江都孙廷评鼎七
言律诗各一首并略注其交游之旧於各诗下但考四诗备载後第十七卷七言律诗类中今
删此存彼以免复出】

宗鹤问咏古蹟诗序

春风锦缆吹尽扬花子夜琼箫弄残明月李太白于此伤心鲍明远尝为作赋予友宗子鹤问
少长崑冈曾逢沧海词章敏贍本陈琳之乡人寄托遥深信少文之宗子笔开五色隋宫不落
之花琴响四山嵇氏未传之曲而生平慷慨时时欲近酒徒身世悲凉夜夜惟看剑气况复身
逢五代眼见六朝海水羣飞天星昼见兔葵燕麦生於弹指之时春草江花即是按歌之地子
山归国萧瑟奚辞袁虎泊舟凄清何已慨赏心之不再恐胜迹之终湮于是拂草寻幽披荆问
古吊旧垒于秋风之下访残灰于劫火之余或苔长经幢无从问偈或云迷药市何处逢仙或
灯火销况欲醒青楼之梦或池台堙没徒嗟紫阁之辉莫不把笔低徊停车太息写奇怀于鱼

蜚骋逸思于兔毫义取风规可识兴亡之故词兼哀艷多由衰盛之间实舆志之所未详亦词林之所罕有岂独禹王碑碣致太史之留连丞相祠堂动拾遗之感慨而已哉嗟乎登广武而叹时少英雄望梁甫而吟谁为管乐百端交集千古如斯问结柳之里娘谁为是者听庭花於商女我始欲愁矣

空翠阁雅集序

宿耀丹鹑风清黄雀披襟可赋楚宋玉以之登高载酒为欢欧阳詹因而玩月维此时也信可乐乎而余友江子秋水以终贾之英年具曹刘之逸韵觴飞北海四筵鸚鵡之盃榻据南楼百尺芙蓉之席火珠不热反号招凉玉镜恒圆自能忘暑而盖倾千里琴响四山邀作赋之兴公遇吟诗之秘监桃花潭上踏歌惟许汪伦修竹径中策杖还来蒋诩况吕安命驾远拏茗水之舟邓郁怀经来泛吴陵之楫咸气临于函谷共星聚乎颍川而且赵家合德自具奇香张氏丽英长持纨扇惟参军之好客絶少倦容致漫叟之多情浑忘羁思昔者延酒人於河朔半是英雄聚名士于邺城尽皆文学以今方古迨为过之仆本放人逢兹盛事听吹箫于桥上无负月明望却扇于楼中有同花并含毫独咏聊成平子之词击鉢同赓可少陈王之作爰题诸简以纪其时

和周太史梦郑侍御诗序

侍御郑君晦中与予生同维梓学共编蒲鸚荐一经并入扶风之帐鱣飞六馆偕看洛下之碑予以柔兆之年获含毫于凤沼君当屠维之岁亦射策于龙墀东阁吹藜曾分青砚西台列栢独佩阜囊既立仗而常鸣亦伏溜而屡进年如贾谊偏多痛哭之书气等朱云欲请尚方之剑都人为之斂手

天子因而动容方谓聚号兰台伟望自腾金马岂意歌传蒿里灵符遽下玉鱼朝野咸痛哲人岁月有同隔世山阳横笛夕照凄然流水弹琴春风渺矣慨灵光之犹在谁念三同怀远志之无成徒嗟一出兹解淮阳之绶还停下泽之车拜德操于牀前重披云雾过黄公之鱣畔已隔山河其尊人休园先生出新诗以属和则好友恕庵太史纪异梦以衔哀读未数行泪零双袖人天迴别凭文字而犹通生死悬殊赖精诚而若遇理原灵契事属旷闻方在迁延未遑赓报乃素屏支枕庄周偶适於于徐而玄冕垂纓元伯疑来于髣髴班荆论旧如看梁月之顔属草陈辞欲写江云之作是可异也能不悲乎爰呼银鹿以篝灯遂滴玉蜍而走笔寿陵顾影浑忘学步之非邨岭望坟不禁拊心之切况乎先亡践约祇一见于人间远涉寻歌不再逢于石上而频传影响略似平生白马素车方待巨卿执紼长杨修竹旋期越国抽毫眷恋莺鸣留连鱼素岂非名贤谢世终结习于修文才子生天难忘情于慧业谁其似者望虎贲而不来我所思兮作驴鸣而竟去辞依四韵恻极千春

玉京啓手暂相留转眼俄伤逝水流七载未完君父恨两宵分送友朋愁灯前起草传遗事石畔闻歌忆旧游我欲招魂空剪纸他生应傍鄂君舟

金焦纪游诗序

山拟戴鳌碑传瘞鹤据中冷之上树影钟声迨北固而东天风海雾青浮两点久欲擎舟翠挹三峯犹虚着屐而馨闻吴子独具幽情言偕胜侣浮玄真之孤棹夜宿苹花携仲若之双柑秋寻桂树停桡月下醉唤鱼龙布席岩前坐分猿鸟既而杯酣兴起曲罢情生问处士之遗踪茫茫水国寻仙人之旧业渺渺山云留连乎江海之交惆怅於古今之会扣舷长啸何年明月南徐振舄高吟此夜大江东去爰书乐事用纪新篇比枚子之观潮思雄七发若梁生之陟岭声激五噫思其中怀良多寄托者矣若乃赋湘灵之鼓瑟调似仲文咏羸女之吹箫词如子美荷裳菱屋根本灵均霞散波澄源流谢眺则非仅江山之助而得於性情之微也既美先鞭遂题首简岂终付之卧游聊自抒其神往耳

黄玄龙先生诗序

盖闻昌黎大道得李汉而方传供奉豪吟依阳冰而益重古人腐毫作赋几至忘年落齿成诗尝为废食而不遇表章遂多湮没扬子云之著述徒付醤瓿鲍明远之文章长嗟萧艾古今同慨可胜道哉予稚齿受书髫龄负笈缀幡道上早见甘公避雨林中曾逢郭泰盖於语溪官舍得见玄龙黄先生焉先生长爪通眉有同昌谷千彙万状絶似少陵偶停候岭之车暂驻临邛之驾维时予内父堂上鸣琴先大夫山中命履松园处士倾盖来游檀圃高贤临关欲度并入西园之坐同衔北海之觞而先生每听狂歌偏知李泌时来染翰独爱羊欣曾几经时俄成隔世芸瓜何处长怀风树之嗟叩策空归但积山丘之泪典型凋谢心赏都非而先生亦从皋羽以登台徒效鲁连之蹈海玄经零落谁访扬亭黄石凄凉难寻汉圯兹值菰城之解绶适来梓里以停车而内叔于升先生授此一编俾之重订言寻旧诺无忘易簣之辰为广遗书不憚寿梨之役如斯古道足示来兹至先生之藻思掣霞朗怀拟月河梁赠答李都尉赋比鸳鸯文酒纵横祢正平词高鸚鵡澧兰湘茝入字俱香火茧冰丝装书是锦篋中断简皆成安石之金坐上微谈欲夺王戎之麈使其得逢李洞应教佛事阇仙若令获遇庭坚定欲堂名大雅者矣嗟乎茂陵已往还传司马遗文徐国重过不愧延陵挂剑是刻也非直垂久于吟坛实用隐裨於世教也哉

同岑集序

盖闻百年之运藉声气为盛衰一人之身视交游为进退故尚稽列国名卿传赠答之章下及累朝君子赋燕歌之什一时聚散千古污隆此其所关非偶然也予友冒子巢民英年振藻蔚豹上京中岁辞荣伏鸞南国驱车海内见玉帛于汉唐赠紵人间历盘敦于邹鲁所纪同岑一集何啻名山万言然而考厥姓名叙土风者凡十五国稽其岁月换霜雪者迨六十年其间世事之递迁以及人情之迭异览其始终之数不无今古之怀矣盖世值河清人当霞蔚菁华未竭朝修振鹭之容风义相师户守雕龙之业士龙入洛首谒茂先文举登门曾通元礼於是置郑庄之驿雅爱琴樽开谢傅之堂惟谈书画先进之遇後进岂待识韩今人之似古人偏能说项但有弹冠之望多无按剑之嫌当斯之时亦云盛矣泊乎金刀匿耀玉弩斜芒时号三君人分两部顾厨竞长宁非角上争蜗蜀洛连衡何异穴中鬪鼠然而爱名如癖争摹郭泰之巾养

誉为高并伏王咸之阙奔车塞路入太学以看碑举袂连云聚华陰而成市昧危机于白马愿学清流申明信以丹鷄耻非鉤党此一时也识者忧之至于物变人销时移事改鲁殿空留其硕果玄都已净于桃花知己晨星叹辽阳之归鹤天涯夜月听白下之啼乌然而皂帽相逢青樽无恙南山种豆堪为杨惲之歌东海成桑且饮信陵之酒公子登台而作赋美人刻烛以催诗于此为欢嗟其晚也乃观所载悉采其华或授简梁园寄幽情于草木或飞书衡岳写别绪于山川或感时世之艰危而勉存忠孝或言性情之敦厚而并及篇章则有陈董王曹引邳侯为小友文姚倪范许苏轼以奇才漳浦见而倾心机部闻之捧手此皆正人之望同膺国土之知继而西铭倡羣彦于吴中伯宗聚多贤于江左泖湖三子争驾舒章蠡水四家齐鑣士业姜郎伯仲领泰岱之英侯氏弟昆擷汝嵩之秀朱子鸿翔于西蜀黎生凤翥于东甌莫不接席交欢登堂展拜兄袁弟灌合气谊于班荆大孔小杨结心知于佩带并属一时之快事宁堪千载之伤心若乃天水司农最後合纪羣而缔好庐江宗伯于兹集嵇阮以论交彩笔红笺叙欢娱于乱离之後银箏玉管杂慷慨于歌舞之间老子牀前时同看月舍人池上常共挥毫宾客尽于东南词赋传于中外又岂知风流雨散意气灰颓玉树长埋锺子下闻琴之泪金门静掩羊昙兴击箠之哀如今日者哉嗟乎离鸿身世暮雪难归杜宇河山斜阳自老白头似我怅旧事之都非青眼逢君问故人而有几流传简牘遐想平生又未尝不心伤其晚而神往其盛也

黄大宗催粧诗序

花开东阁轸接龙鸾月照西园杯浮鸚鵡乃有淮南仙客江夏才人重联凤喙之胶再结麟文之绶小乔初嫁果然今日周郎二薛连婚仍是当年永叔以旧壻而为新壻应知玉润无双问小姨何似大姨忽讶琼华有两前时窃看曾疑美极难同此夜相怜定说後來居上琴弹绿绮调已惯于求凰车障青油桥待成于驾鹄云浓巫峡美人早办牵红雪满梁园上客皆为浮白况景纯幼女本是神仙而叔度名流雅工词赋可少琉璃而作砚爰镌琬琰以抽毫郎咏林兰本是同心之树儿名芍药原为并蒂之花镜里双栖自信人行暮雨屏前一笑何妨婢唤春风带萱草以宜男荐石榴而多子云英有约莫教龙脑频添京兆多情留取蛾眉待画

汪蛟门舍人十二研斋诗文序

盖名文难于富贵得之必有前因才子少於公卿生也定多灵赋故少瑜镂管一束不自人传王勃麋丸盈袖有因神与宁无因而致将有感而通耶予友汪子蛟门道不虚行才真间出李学士生由金粟徐骑省家本玉勾论美粲花传自玩鸥亭上名高视草栖当集凤池边暖护青绫宫漏方传花外神游紫府佩声若在云间国有华胥欲听钧天之乐地非蓬岛还堆元圃之珍所得而无非夜光有获而不殊鼃采石卿引类数符禹截之山川即墨为朋象协周天之辰次陈之雕几荐以宝函或环号辟雍或船名太乙或拟苍龙而横沼或比玉兔之朝元或红丝金线之殊形或莲叶松皮之异制或马蹄之与凤喙或绿雪之与彤霞端德人而歛俊人温润实同于良友水青色而土紫色精华尽产於名山咸用守以神人乃共贻之君子承之蕉影堪抽虎仆之毫试以松烟各吐龙宾之气汪子蓬蓬而觉已悟万物之归虚栩栩而思若覩羣珍之宛在爰题所处聊纪异于漆园并绘为图乃徵奇于墨苑历左思之一纪可岁岁以研都竟刘穆之终朝足时时而染翰倘景文之修唐史直须分捧金钗若清真之订大晟早已环生玉

瑄高唐作赋还登巫峡之峯阆苑讐书俨坐层城之阁信文家之快事诚艺苑之嘉徵也昔轩帝好奇惟闻墨海卫公多嗜仅见结邻鼉矶但重于眉山雀瓦难求於漳水晕殊徐氏谁能与月盈亏池匪王家罕见有云浮动山骨何曾有对岩花未易多求而取于一夕之寝兴尤见多奇之璀璨信朝廷之制作不在异时将海宇之文章定推斯手行见于闾青铁书成特赐张华岂只唐苑玻璃赋就惟酬李白而已哉诸君子传之歌咏纪以篇章为想为因未测绶笥之兆载言载笑尝过画舫之居但能滴仙露于蟾蜍争挥丽藻是即泛舫云于鸕鶿已应奇逢矣

闰五月二日山塘泛舟序

着策归奇初增桐叶蕤宾应律再吐蓂枝虽凄如屈子之骚不堪更读而胜似骆丞之序可拟重游爰泛兰舟同搴桂楫地称虎阜是泰伯之山川人有乌衣尽王家之兄弟葡萄百斛稳载中流杨柳千行分披两岸水环花市绿波时泛幽香风飏酒旗翠幔偏多妖丽玉箫金管宫袍迥出人间锦缆青帘画舫浑疑天上披襟长啸云开黄雀之风倚楫高吟霞照翠鸳之水昔子桓叙往仅传沉李浮瓜李白言欢但谓坐花醉月兹则极山川之盛穷文酒之娱方之古人殆过之矣况乎能讴车子喉声絶似哀笳并坐王郎手色难分玉麈饮惟文字朱无瑕雅解行觞望若神仙许飞琼还为拏幔谁为腸乱遇诸昆总在苏州曾见水嬉笑此客刚来湖郡此又逢欢塲于意表得韵事于情中传之近今未易有也嗟乎百年旦暮弹指无多四海烟尘伤心特甚少闲人之似我兹行不减子瞻此何时而不歌是语恒思游道

古重九平山堂讌集诗序

蜀岭斜分是陆子煎茶之井平山右峙有欧公种柳之堂万字千锤尚记春风长在十年三过忽教明月虚悬幸逢七叶以锤贤用乞一麾而守郡棠堦敷政何殊召父重来莲幕论文无异醉翁再出五百年而复建信有前因二三子以克襄爰成旧蹟朱薨杰阁还看栏倚晴空皂帽扁舟顿许笏支秋爽于是伊阳高士首振灵筵文正名孙同携蛮榼赋有天台杰作诗传长庆新篇广平得意于梅花文畅摛情于木叶王夷甫高出风尘周伯仁偏多节概斯擅风流于江左并高月旦于淮南者也若乃名重湖山咸推季重才雄湘汉独许胡威清平调美于粲花阁阅名推于大树太冲则纸贵三都茂先则书连十乘或称钓鳌之客本在山东或收买骏之金同来冀北聚衣冠于五地总属英流开樽垒于三秋偏多胜赏时维访古何言露冷黄花节展兼旬正见霜凝绦叶窻中画障收两地之山川檻外云帆带六朝之烟雨玉鉤何处香土空留彩树当年斜阳不尽乌啼满地吊帝子于空陂鹤驾三山眺仙人于别馆既凭高而极目遂望古以多怀义取同时题分集事吹箫桥上长吟杜牧之篇授简樽前各奏江淹之赋对青峯于故国烟花殊胜他郷聚彩笔于名流风雅宁夸隔代欧苏复出惊看壁上龙蛇高李相逢醉唤岩前猿鸟登斯堂也洵不乐乎至于辽鹤成仙还矜严藻汉龙在首本擅弘才登玩鸥之亭谁非妙选入射雉之里尤有清风梦笔再见于少瑜观灯复推于仲衍望伟太丘之胄名雄高密之支题曹碑而弥见色丝和郢曲而仍飞白雪斯则名贤倍于邺苑胜事迈于梁园者矣况乎子美分题少文飞札元卿振拊节之音叔度极观成之美也哉爰濡鼠毫用题鱼茧相如後至何辞梓泽飞觞逸少先书实媿兰亭梁翰也

何云壑转运集字诗序

鹤郡重来夜月吹箫之路龙门新陟春风倾盖之交十载相思人逢水部三秋共对曲听山香北海瑶樽杯底隋堤柳色西园金管槛前空阁梅花爰出集字一编命为弁言数语夫诗缘至性实本别才聚腋成裘裘合而宁知是腋将花酿蜜蜜成而无复为花此岂属乎人能良亦关乎天巧若乃五音迭奏并合宫商杂彩相宣自成机杼相其体制风华不让齐梁揽厥篇章大雅无伤李杜斯则王夷甫之玉立自具神姿宁独谢安石之碎金徒夸宝屑而已哉置之笥内应函云母之封付以筵前可协雪儿之奏矣

宋武葵沧洲集序

岁当渊献月在则阳言寻新浦欲泛太湖访霜信于吴枫问山香于楚橘过宋子武葵之居而憩焉门庭萧閒图史晏闲居然东晋名流遂作西园雅会留连徐榻还闻苏涣之高吟整顿吴檣更理王猷之逸兴陶家通子解荷篮舆荀氏慈明能持杯笋菰芦内住此中大自有人桑柘闲谈不知何者是客于是同将双屐并曳孤筇鼓枻沧波直探金鳌之窟振衣絕巘平临宝鷺之宫水是三万六千琉璃作镜峯则七十有二翡翠开屏高深异趣而齐妍晴晦同时而迭变菊宜冒雨何妨角垫乌巾叶始从波不觉毫飞彩管乃宋子赏心冰壑奋力云泉推後挽前济胜每从康乐倡予和汝惊人独爱玄晖岂非鹤羽出尘霞姿超俗者哉尔乃文园给札意倦游梁平原驾车兴思入洛龙精照耀发张华宅内之书骏骨低昂问郭隗台边之价黄衣入梦赋许凌云紫绋装褫篇名繁露此固南琛之所以入庙而东箭之所以登朝然而指北道以僦装将游虎观涉东皋而成趣犹想鸥波藉卉何时千里暮云之句班荆此夕十年秋水之言字欲呕心都盛古锦文堪浣手尽染名香托藻思于蒹葭寄幽情于菡萏题所着稿命曰沧洲斯其寄托实为深远矣若夫东都车马争看槐市之碑南国盘敦狎主芝廬之会过两京而曾逢郭泰来六馆而竞识何蕃翠岭黄河览神皋之钜丽金仪石鼓探天府之珍奇贯酒旗亭王李下闻歌之拜停车燕市荆高醉击筑之声则穆然而思慷当以慨其所得也不既多乎昔顾况之叹香山居宁不易韩愈之见昌谷轩为频过当今不乏龙门此世宁无狗监何待长安市上碎正字之胡琴而向会稽亭前羨中郎之椽筵也哉

翁苍牙见山楼诗集序

时维乙卯序属嘉平予方息驾蓉湖掩关松岭而翁子苍牙将献书于阙下特停棹于山中言寻点易之台共坐听泉之阁河山眺览连宵扪虱之谈风雨留连半夜闻鷄之舞命小红而倚笛浮大白以挥觞爰出一编俾为数语夫律吕之合先以气机华实所分由于识量翁子留心当世肆力古人比贾谊之弘才羞同绦灌如东方之博览兼读孙吴既学剑而学书亦能经而能史予尝与之盱衡往昔筹画近今凡所指陈皆当切要信管敬仲称天下之才岂陆士龙擅云间之誉乃开卷独得闭户自甘方予承乏于苕川诸客咸依于荆土翁子超然远引持正无阿耻言毛遂之处囊略似陶潜之度履迨乎谗兴解组鬼见张弧罗无雀而谁来壁有蝇而空点乃独举幡汉阙慷慨而明司隶之冤射矢聊城宛转而救齐人之困此其品诣自属悬殊更览诸篇悉称名作或悲凉对酒抗如击筑之奇或绰约寻花婉似鸣琴之奏或奔腾迅烈同万

马之嘶风或淡荡凄清若孤鸿之叫月莫不含任吐谢轶孟凌王縵以绣丝炫目蒲桃之锦薰之^廿木移情兰茝之香诗之不易知固如是矣人之未可量又何若耶冰雪各天烽烟四海时乎不再勉为万里之行去矣毋忘酌此二泉而别

宗定九新柳堂诗集序

成双美誉早传於参佐厅前第五高名不减于骠骑省内乃有方城之硕裔是为淮海之俊人琴响四山身能入画风乘万里志不须舟美平舆而鳞跃双龙在扶风而眉先五马盖广陵有二宗子而定九其首称也定九与余生同样里雅闻兄事袁丝长并芸窗未敢儿称德祖眠当共被夜舞司州出必同车朝游洛市曲江虎视一时雄长诸侯文树鸾骞四海羣推六子时而登筵授简彼独探珠或且共席挥毫我为焚砚乃半生作吏徒教小草伤心而十载着书益觉芳兰竞体兹复来归故土乃获快读新篇香出行间如搴石叶花生字里似握金荃杜樊川之夜月琼箫写凄清而未尽韩君平之轻烟蜡烛比华婉而犹多疎雨梧桐清而更丽秋风落叶壮不伤豪号才子於西崑擬佳人於南国宜当沉香禁苑横施七宝之牀岂只卖酒旗亭独下双鬟之拜而已哉嗟乎宗子张思曼杨柳一枝谢康乐芙蓉十亩相如妙曲对操花前杨恹新声悲歌酒後何当息于六月而况假以百城乎

汪石西先生诗集序

余尝上稽往帙历览闕文漱芳泽於艺林振华风於学圃其间英蕤所结可昭着於必传胥赖来叶之贤能表扬于勿替所以浔阳处士遡往烈以称先康乐名侯赋高言以述祖而吾於石西先生之集重有感焉先生韞奇志而未彰秉潜修而弗耀南阳抱膝望梁父以长謡北岷移家仿少陵而独啸击酒余之缶长听歌乌棹花下之舟时看放鹤无义熙之情事而赋本於经非天宝之乱离而诗堪作史计沉酣於韵府凡五周星迨灭没于尘羣又三甲子其玄孙天如谓奉先君之遗训委在棘人乃以高祖之藏书授诸枣氏借文章之力用展孝思任编辑之劳仰承前烈又得叔定蛟门两君子精心选订极意校讐俾一代之弘章偕栢庵而媲美百年之文泽与环谷而俱传岂不懋哉曰观止矣独是先生当昭代之极盛值七子之方兴俗尚华扈时工顰绣先生抗无求之节欲继襄阳振独秀之音仍标正始其气静故词博而昌其致高故调清而越英华收于六代格律本自三唐倘非蒐辑於汲冢之余掇拾于秦灰之後则鲁碑奇字将尽失于蜗涎而孔壁遗文且难全其蠹简将见百八十篇不闻雅颂之声岂止三十余年尚多残缺之恨也哉

家岱观大令西塞诗序

萧关夜月悲凉生壮士之心榆谷黄云慷慨动英雄之色短箫别部乐奏白狼铙吹新声曲翻朱鹭此则王侍中之念国五咏从军杜拾遗之忧时重吟出塞者矣而况地当陇右险历重关人在河西雄瞻四郡嵯峨铁岭有秦皇未筑之城迢迢玉门是汉使难归之路其为兴会何可胜言也哉兹我家昆为时国士名如阍泽常在月中才似徐陵本来天上起文人于圣水两河光绕凤凰作仙令于仇池百里语分鸚鵡沉香有浦犹存酌水之清风赋句为唐重续浣花之

胜事折腰自懒俄闻处士辞官抵掌相欢乃见将军揖客碧油啓帐聚米雄谈白氎登筵挥觞独啸邹从事之参陪岷岭共睇山河杜舍人之管记扬州非夸烟月于是有心怀古横目问天振衣葱岭之峯顿轡蒲昌之海经先零之故垒遐想营平历疏勒之遗屯长怀定远尔乃月氏空属日逐难迎买骏金多偏驼紫橐落鵬弓劲或射黄羊中行说久自多端呼韩邪时方竞长旗翻乌垒犹传都护之营阵列龙堆徒献郎中之策此其边算是在庙谟况乎横笛频吹哀笳互动蒲桃竟夜不醉离心杨柳无春还惊客眼惊沙似雪虽苏武而难餐冷月低空有明妃而不照则复情因境发忧为时生磨盾疾书据鞍高唱将王公之扞虱谱以四声用刘子之雕龙传之七字安危目系岂徒自诩文豪忠爱情多未敢便夸诗史然而吐音激越似隆中抱膝之声抗节沉雄有广武登城之意若杯酣于夜读酒合频浇倘剑冷于宵吟壶应自碎旗亭画壁彼双鬟不堪再唱黄河词苑探珠当四坐已自争推白雪也

周隐求自怡草序

盖有彭泽之高风而後饮酒移居见其旷具襄阳之逸致而後微云疎雨见其清固自别才实由雅韵古之论者或未详也吴门周子隐求鹤市英流鷄林妙选刘公干之在邺本文学以知名丘灵鞠之入梁由茂才而起誉而少轻世网早濯尘纓爰能有托而逃罔美无因之获偶然卖药不从女子求钱终日下帘长笑富儿多事间复盱衡今古览眺山川积有篇章分为卷轴梁生适越不无五噫之歌平子伤离乃有四愁之赋莫不留连宛转清丽芊绵得意行间传声格外比之香草送异馥于秋风譬彼芙蕖耀华姿于晓日尔乃取岭云而自况借都水以为名此其寄怀从可知矣予尝造其寝处与为燕歌能于湫隘之中独出风尘之表过从有客是莲社之高人萧閒无营只藜牀之雅具辄复披帷而想元度过户而叹宋紆信其隐于文词未易求之章句也

袁重其母太君霜哺篇序

拜义成之册未必皆鲁国之贞姑受遂昌之封岂尽是刘家之列女而寒庐少妇抱影终天委巷孤嫠摧心永夜既不能捧鸾回之纸聊种忘忧亦惟有啼鹃化之魂空悲长恨自非令子谁识其名不有文人莫传于世盖泰徵赴子胥之饮雏仅三龄吴母保赵朔之孤家惟四壁心同夏草虽向日而偏枯身似秋蛩每逢霜而自泣呱呱在抱影寒五夜篝灯藐藐空存力尽百年砧杵堦前画荻总是泪痕案上丸参惟多苦意卒成佳士早有令名常繫马以延宾共识陶亲之义能辞鷄而饌客益嘉茅母之贤是以见孝尼者许以正人怜伯姬者旌其笃行女歌泛栢遂几黄发之年子咏采兰无忝白华之志名流作传用劝其家钜老称诗以风斯世积之五十余载无非雨夜霜晨遂有百亿万言不减龙文麟篆而重其每获一字辄跪进於堂前或取数篇为拜赓於尊畔而节母怡然进酒莞尔加餐啜一菽以如飴斥三牲而弗御以视世之文轩彩綬起居夸八座之荣金轴银函焜燿极五花之赐而内行弗备君子羞称大德无闻哲人勿道诚相悬于河汉而永贲于星云矣盖古人节孝之事显於诗书而昭代文章之荣久于富贵有节母之行则贰心之臣可以慙闻重其之风则敦本之人知所重矣

梁溪倡和诗集序

兰亭岁月忆前後者屡更梅里溪山凡往来者多次时则阿衡受命分百里以牵丝宗袞当官宰一方而制锦寇平仲之相业肇绩巴东狄怀英之勲名始基冀北余谬叨族谊忝奉宾游镂管文樽忘忧孝王之馆华灯朗月登高邺苑之台坐满邹枚下客空怜司马调倾元白君侯独羨探骊窃叹文武之才当乘风以破浪早知将相之器必纬地以经天乃自结主知未踰五载而差强人意洵致三公较相如之谕巴蜀小行人乌足道哉系尉陀而归朝廷大丈夫当如是矣而言思旧雨近属晨星或金马浮沉寥落子云之阁或穷鸟伏处栖迟仲蔚之园或杳藐河山怅黄垆于既往或飘零湖海嗟皂帽之不逢而公独致云霄手挥雷电以仗钺而兼工草檄当横槊而犹忆赋诗斯则命世之英岂独亢宗之杰而已哉原夫勾吴之始实本仲雍迨自延陵以来不乏季子然子顔龙占未闻作赋之能季重凤观罕见济时之略兹兼二美独在一人况乎天远五羊风清一鹤忆山桥于月下长怀知管之言望幕府于天边徒有依刘之望池塘春草灵运宁不忆夫惠连海浦沉香道助将无惭于附子耶

陈集生影树楼诗序

曲逆长才曾居委巷元龙豪气独据高楼缅想伊人恒伤异世而吾友陈集生者抱奇不偶怀古难羁一寒而耻受人怜三北而无求世用风貽清白知无愧於豫章口絶雌黄信有传于颍水较相如而犹无四壁比子猷而仅得一壺而雅爱名流恒多侠气八方縞紵乃尉顾之人豪五色绣丝是苏韩之上客高明满野时时逢鲍五之车雄辩当筵处处惊孟公之座自言热血可以赠人但有寸心何妨结客终袍典酒清谈而欲醉平原本榻栖尘高卧而长留孺子以故名卿钜老愿相得以成欢素士平流亦投交而恨晚斯固好行其德独季於时者矣胡乃过爱陈人虚推薄艺雕龙自好譬刘勰之见隐侯烹雉何心比茅容之逢郭泰荣枯一致宁同门下之盈虚久暂无忘每问山中之动静其为向往不更异乎顷以一编索我数语谓必加之月旦始可定其风期盖诗之为教复性本於缘情声之感人因心乃以达志集生之志可谓通矣集生之情可谓笃矣由是而本乎忠爱发为竽瑟之音听以和平郁乎山川之气古人可到宁须芍药以抒华此事必传非复葡萄而织锦心乎爱矣庶或遇之

汪扶晨谷玉堂诗集序

马迁着史穷河岳之观张说为文得江山之助良以才华之动盖亦灵秀所依也余友汪子扶晨秋月长凝朝霞独举论交四海早看声徧龙门作赋三都尽许才倾虎观桃花潭上水让情深斤竹岭前山随兴远何年丹竈尝寻轩帝之峯几处仙庐数访焦公之洞二分月里留连隋苑之风烟千尺雪中感慨吴宫之花草每经屐齿辄付奚囊时染彩毫动盈宫纸他如河梁赠答李都尉字里鸳鸯公讌绸缪衽正平酒边鸚鵡莫不低徊尽致俛仰多怀譬之初日芙蓉未可方其婉丽拟以微云河汉差足况其清华是以听者倾心见而却步藏之笥篋如闻草木之香写以缥緗即起云霞之气之子於焉寤宿先生可当卧游矣予附响鷄坛投交鹤市吹箫故里长逢浊酒以相娱剪烛秋窗每出奇文而共赏心之爱矣将置身於今古之林子好游乎信得意于山川之力也

孙树百给谏保留虎丘山木诗序

白象秋围应灵期於乾竺青牛夜走失王气于咸秦况此海涌之奇峯赖有云屯之古干绿陰
百亩皆累朝雨露之遗黛色千寻是大地烟霞所托岂意作兹舟楫遂欲残以斧斤在经国之
弘谋宁问无知之草木然救时之大体务留不尽於山川赖有伟人适临胜境推竹西之棠分
庇东吴用冀北之梧陰远垂南国回天运掌无烦六叟之鼓门当路同心共鉴万民之跽地遂
使武侯古栢青葱於短簿祠前蘧父仙楠蔽芾於生公石畔人天欢喜还如再长菩提士女讴
吟竟似重开罨画六代之莺花如昨两山之烟月依然斯其所全良为大矣至若省吏胥之渔
猎以奠人心免山水之髡钳以全地脉务令林安翠葆无伤嬴政之残庶几阁建铜壶不损蒋
堂之惠此又仰裨于军国非徒祇益于游观而已也倘木德之有知同应下拜幸山灵之无恙
请共式歌

家茂才一壑居士桐江草序

吾家自荆土以来延陵审音而後风雅之事代不乏人柱史挥毫首变文章之体舍人传样益
高着述之名虽时世屡更而咏歌无替良亦家风有在不以世远而衰也丁卯初秋时方却扫
乃有小年族侄特携子晋先生所辑遗诗属予为序予受而卒读因为慨然曰先生以建安之
才值永嘉之季遭时不偶徒嗟猿臂之难封失路无媒遂抱龙头以终老椎雄博浪仅中副车
门掩明湖空怀缕管当年沈约曾加礼於投书此日范宣尚兴嗟于予砚天乎不慙命也何如
然览其篇章若清风之拂兰蕙拟其姿态如初日之照芙蓉使其获售荆山遇知冀阪当不在
子云之下亦何减季重之时哉犹幸小年言念厥祖收菁英于版荡之後授梨枣於壁立之间
袭此芳风用流馨於艺苑传兹大业同永寿于名山是将有赖乎亢宗岂仅无慙乎肯构也哉
诗曰绳其祖武小年有焉又云貽厥孙谋子晋得之矣

江秋水园居倡和诗序

江子秋水性耽林渚癖染烟霞有谢幼舆之一丘开蒋元卿之三径亭中花发不见俗人池上
诗成每同词客向值西园之会言来东海之踪笑杜牧之颠狂逢花便住爱渊明之萧散得酒
还留曾未几时遂同昨梦倚栏明月是当年薄幸之楼绕槛清波异昔日醉歌之墅灯前红袖
谁怜往事都非花底黄衫尚喜豪情依旧既经秋而涉岁或卜昼以连宵邀中散以弹琴遇桓
伊而弄笛红笺小字常为锦带之篇紫袷高吟竞赌金茎之句音成山水非无丝竹相关坐有
莺花遂觉壶觞都韵爰多名作并写乌丝共赋闲情皆题黄绢少闲人而似我宁须问何处烽
烟愿胜事之无忘且莫负吾侪诗酒也

田纶霞诗序

盖闻九光霞锦不襍凡丝万石霜钟非同细响建安创体皇哉大雅之文正始成音允矣中和
之气非其性情之各别要亦风格之本殊也纶霞田先生衔书北阙校艺南畿士相庆为得师
人由是而知学而先生提衡经术雅居两汉之间领袖篇章亦在六朝之上迹之所至事必可
传本无累以为神故能会高深於山水涉不穷而成趣故能极俯仰于古今气自国香不藉薔
薇之浣味原神鼎匪同芍药之和藏以篋中经三年而不歇坐其碑下过十日而犹思以此惊

人良堪永世矣而情以日生而益上词以屡变而愈新五言既号长城七字亦称坚垒近体已见精严而古调仍多闕肆孔雀之羽岂有择於山鷄凤凰之声自罕同於鸚鵡则安见杜拾遗之後不别有拾遗而韩吏部以来不再见吏部也哉然具昌黎之气节而後起八代之衰有少陵之胸怀而後集百家之胜是必有其人而乃有其作所以重其作而愈重其人矣

曹冲谷漫游草序

十年公府清游曾共陈思千里故乡雅政还同任昉叹当年之匏系思隔停云幸今夕之萍浮欢邀坐月得逢公子纪羣两世之交如覩故人嵇吕三秋之雅维时清风欲袞洗马之神清既而明月相投识士龙之才俊偶看摇笔已见涌泉旋覩倾筥还同霏雪象诸六律斯为琴瑟之音譬彼羣芳此有蕙兰之气则冲谷曹年翁漫游一篇所以独絶于时也昔孙郎布履玄德为之倾心符子清谈李膺因而捧手予钦国士早知日下无双君覩严君为道山中未老

顾书先梅花诗序

人存标格隽则多风物有性情淡而能韵家多绿竹而爱者必谓琅琊岁有黄花而采者独称彭泽惟其神之相似是以得而益章也予居种字林中时值丙寅春半长卿室内赋成非以求金潘岳园中客至常同藉卉而书先顾子示我一编写庾岭之幽姿传孤山之逸致行间吐艳更欲洗其铅华句里生香遂若闻其浮动水边林下珊珊而若有人兮月落参横寂寂而谁为是者盖其胸原无热长多冰雪之怀是以语可出尘大有烟霞之气读之三过应知春在兔毫对此终朝但觉雪生乌几岂必窗前夜发始见相思檐下朝巡方同索笑而已哉予也手锄明月将种树以忘年子则口嚼香冰且借花以写照矣

程山尊春帆集序

岁载兰亭之笔人归梓里之车索啮齿於坐中遇孟公於门内虽披襟之顷已信生平当倾盖之余如曾夙昔盖予与山尊程子始订交焉於是雪磬霜钟共卧秋风之被红灯绿醕常同夜月之尊杜牧颠狂因花就宿许询萧散得酒舒怀而程子筑响情生杯酣耳热王郎击剑尝为斫地之歌屈子怀骚数作问天之想若无以自得者岂有所不足乎盖程子世累朱纓曾依日月身怀白璧雅志风云不问家人之有无兼值世途之消长入孔融之座未许钱通读马迁之书恒删货殖时非得意气益自豪以此发其新声顿可称为絶调山以不平而增秀水因多激而长鸣故其诸体并陈咸无坚垒更以五言占胜独号长城飒然风雨之忽来灿若云霞之迭起声能掷地听下士如笑苍蝇语必惊人在诸君应推绣虎星辰可动宜呼于华岳峯头花木无私可置之锦官江上盖其情深而力厚故能律细而声宏也嗟乎程子狂如李白是唐家有才之才骂似祢衡乃汉代不平之气吾侪未老此事必传矣

田牧园滇行诗序

人同汝水种棠树而偏多我爱樊川插菊花而可共爰于豕渡特访芎求而田公牧园初回渤

海之轅已解浔阳之綬从容对酒意殊眷於三间慷慨论诗字已盈乎一卷夫半生廉吏值陪紫马之游万里行人竟作碧鷄之使怀简书而可畏惧飞挽之不前况乎鸚鵡洲边频更舟楫兼之螳螂川上甫戢干戈过金筑之乡关梁匪易宿铜安之驿鼓角堪惊遂使时异当年欧阳詹徒修玩事路迷何处杜子美惟有伤心荔酒椒盘俗非荆土石泉槐火梦绕吴天计程而道远九千经岁而月圆十二离人易感既有见而情生劳者常歌亦无声而不苦此滇行诸作虽少而必传也既往论交已识伯仁雅量兹来问政益知仲举清风知公之才信驥足不终于千里读公所作岂鸿名惟竞乎一时耶

丁鴈水观察暨令弟韜汝棣华集序

昭阳理楫将揽胜于罗浮长烈停车暂观奇于章贡三台并耸有李相国望阙之乡八境遥开是苏学士寻山之处则有梦松硕彦列栢英贤文章则韩柳齐驱政事亦元常方驾横牀匝月论心于山水之间剪烛连宵合意在云霞之表松陵分赋衆独让其探珠兰畹填词复共闻于夏玉抗怀览古秋风击筑之声尽致言情细雨吹笙之曲乌丝写就直须手浣蔷薇红豆拈来都讶身如菡萏此则斋分一坐谁言陇右惟三牀拜双鬟不让河东第七矣尔乃既逢康乐复见惠连已识伯仁还交仲智偕工协律查浮十样之笺并善倚声艶发五花之管兄如淮海何殊山抹微云弟拟小山更爱岸停残月因为击节共美同车夫词原本于骚余辞必归于雅称而近之作者或极意以争新人竞从之皆效顰而取拗不知声期应节其何取于聾牙语贵宣情复宁求于借面兹则调高北宋采夺南唐独追正始之音允叶开元之奏可谓盛矣亶不然乎至若宗臣宝臣并获名于景佑敬礼正礼亦齐誉于建安皆号双丁同称二妙斯乃锤灵晋水复见拔萃济阳以古视今後來居上矣寿之梨枣名曰棣华岂独三笔六诗美刘家之有集联珠列宿美唐代之多才也哉

石濂上人诗集序

神骏非常服支公之爱马昭灵莫测叹老子以犹龙古之所为垂乎不朽大抵立言必有奇气而後其势日生暨乎入世必有远神而後其风自上用观昭代不易吾言乃有西竺之异人来於东瓠之淨域则石濂大师是其人矣师以白象之姿悟紺龙之旨冥心济物未忘有觉之弘因妙义超羣已证无生之密谛而城长五字垒固四声浑成颇类贯休高亮更同齐已暮云自合江淹拟而未能新雪常逢郑谷吟而独叹爰闻下士笑彼蝇声每见时流目踰牛背望之或以却步识者偶为注眸予一见於柰园已谓风尘外物载逢之莲社愈知濠濮间心遂与论交慚非鲁公之偕清昼因同索句若如苏子之遇参寥时而清露流桐爱凤条之初引时而惊飈振叶听鴈语於方来时而峭壁秋开陡絶风云之路时而奔涛夜至砰喧霆電之音莫不海立山飞星回电激去尘言而务尽振灝气以无前终日与静者谈举体无常人事乃知灵鲸吼雪非凡响之可同翔鹄摩天岂纤禽之是伍而况乎李桃之俗艶蔬笋之余酸也哉昔古人之未遇常遁迹於空虚而高士之不平每陶情乎歌咏师殆其流亚矣宁知所际量耶

季伟公诗集序

余浪迹寻梅特作五羊之客潜心藉卉将求一鶚之人乃有【缺】言与伟公季子来过花下共数心期间向酒边还为耳热而季子早多奇志独具性情壮等终军方弃繻而未果吟同杜甫维败案而不知盖积之者既深而发之者必厚故能由微至着剑虽藏而有光以少胜多矢无坚而不入然辞多感慨疑非年少所宜而意在激昂或亦古人之过则韩昌黎之索句穷而後工司马迁之着书言皆有托吾侪之所闻也季子其有忧乎虽然十九人中谁如毛遂五百年後必知子云君子但居易以俟老人将闻声而思矣

宋长白岸舫集序

羊城访戴时乘兰叶之船鹿苑逢陶共结莲花之社轩轩霞举欲为东野低头奕奕风清足令西崑敛手由是而三泷挟弩不辞埭历蜈蚣乃复五岳同登宁计峯回鸿鴈潇湘月满大夫之江上题诗沙渚星高太傅之祠中酌酒或襟分於楚水浮踪历万里而遥幸烛剪於吴山离绪写三年之渴萧斋夜雪酒倒银瓶茂苑春寒花开镂管王郎斫地既拔剑以同歌祖逖临江亦投鞭而独啸盖长白夙怀大志雅负隼才终子云早岁入关欲请缨而未果陈孔璋频年作客徒草檄以空传若鲤湖若鳄海行役维艰或玉塞或金台悲歌未已贺兰山上常奋笔以留题枫叶江头忽投书而竟去才情若此遇合如斯写以篇章形之歌咏雕云镂月山川发秀异之灵酒舞花飞笔墨有英雄之气杜陵之沉郁顿挫草堂之跋扈飞扬兼而有之固其所矣遐观往代厚福者不少庸庸幸值兴朝英才者悉皆衮衮岂有司马雄才竟少黄金买赋将见元龙豪气定能碧镂装书宝此一编君自爱其五花之管抒其伟抱吾当相待以七宝之牀耳

夏宁枚粤游草序

忆昔分符苕郡乃得凭轼桐封知仲御之宗诚为多俊於清溪之裔实获二难则宁枚之与宛来犹惠连之偕灵运乃已酉解组叹别路以多岐至癸亥拏舟幸故人之相见台高栢树喜遇次山幕啓莲花重开小海尊前授简同赓听鹤之篇枕内求书尽覩雕龙之字乃宁枚之游愈远而宁枚之才益奇千里碧云不减江淹丽句一声白雪如闻郢客高歌譬之秋筱吟风莫名其韵遂若晨兰受露但挹其香五色相宣得素丝而更为绚烂八音竞奏有和玉而始得铿锵此在正始以来可仰同乎颜谢若论贞元而後足方驾于钱刘斯粤游之诗正为可传也昔马迁作史历海岳而乃奇燕国为文因江山而得助则与其十年仰屋之空劳实不若万里儋簪之足快而山连五岭尽吐烟云岩竦七星共凌霄汉凡所经之胜槩可共给其清裁矣虽然上林羽猎衮衮尽属诸公天禄石渠落落谁为才子以君兄弟犹困泥涂吾为千古伤不为二君惜也

顾辛峯羚江草诗序

荆土堪依王粲作登楼之赋梁园未倦马卿多授简之辞仆本恨人不堪多读君真名士定自可传则幕啓莲花有鳄溪之三俊香浮蕙草在羚江之一编矣顾子高出虞山奇同拂水长才未遇聊自隱於读骚壮志难名每独抒于覓句是以俯时伤往感流失于永嘉怀古登高叹英雄于广武惊心节序王郎斫地之歌顾影山河屈子问天之想以至长杨芳草赋也弥工走兔

流乌时哉不予七星岩畔李供奉语逼烟霞三水江边谢玄晖悲生日夜莫不抑扬尽态慷慨言情楚泽含毫寓奇怀于鸚鵡河梁贈句等丽制於鴛鴦既摇笔以散珠益擘笺而成锦读之击节惟唤奈何倚以作歌殊嗟未若昔名如元叹乃闻更有一邕才似彦先遂以能齐二陆以兹方彼何古非今耶仆以樗栎之余适逢斯地当菰芦之内乃得此人同越石以闻鷄虽叹相知何晚若孙弘之牧豕宁言得遇已迟哉

孙殿扬樵吟序

端居不适相如聊复游梁旧梦难忘廉颇常思用赵予以渡豕之岁始至炎海以浮槎载当于貉之时爰过端溪而访砚遂与韩君公吉联縈紵之交乃有孙子殿扬得披帷而见相知一日忆论交曾以文章作别十年叹浪迹空悲道路岂期异国忽覩故人覓啗齿於座中徒怜短鬓接嘉宾於幕後自是异才也乃其流览之余辄生兴会凡夫踪迹所及即赋篇章收月露之文以成彩笔揽溪山之胜而入锦囊水可濯纓不足方其澄澈花能擷佩未可比其芳华色虽艷而非浓丽芙蕖以初日态原工而益美拂杨柳以轻风楚泽峯青似夏湘灵之瑟缙山月皎如闻仙岭之笙至其贈答纏綿略同都尉若夫流连跌宕近类参军以此清才自合牀横七宝因斯丽制还堪簞夺五花而犹身似文通迹同翁子盼神仙兮不见望富贵而未来则樵吟一编乌可已矣然予之知子有素而子之自待不凡岂汉室之公侯乃竟不如狗监而茂陵之词赋遂至无荐马卿者哉予且归欤非荣期谁知孙绰子无恫也有东野自遇昌黎

厂翁潮行诗序

晋朝名士支许联世外之交唐代英流顏谢结山中之契三生有石岂浅见之所能窥百尺为楼非恒人之所得上予为漫叟浪迹鸥波得遇厂翁论心虎阜前期莫负不辞拏楫而来良晤偏遥乃复披帷不见则余之至粤始及一阳而师之游潮已先五月矣既而莫回北律松转东枝庐岳篮輿还迎靖节石泉槐火常对参寥时同匡坐三更爰读潮行一帙或状溪山之雄丽而岚起笔端或写潮汐之奔腾而声留纸上或宾朋贈答叙情致以纏綿或岁序迁移慨光陰之流转盖相知有素偏逢好客陈蕃而自得为多不类依人王粲故能无言不韵有语皆新直从句外求禅岂啻诗中有画而已哉昔人悟道惟闻击竹三声古德传心只在拈花一笑以此慧解求之正声自有天中之天别得味外之味岂与白莲为集较蔬笋之酸醎青豆成编得梅檀之气味耶予罔知西竺之学颇览东阳之书万水千山知和尚之来得得三唐八代任说者之论悠悠尔

江柳州眉瞻陇塞集诗序

司马公徧经川岳始就奇书张道济得助江山恒多杰句盖耳目所及既广故性情之养独深发为声诗不可及也江公眉瞻以非常之才涉无穷之境一麾江海几尽於南北东西廿载间关数历乎陰阳寒暑乃以所得咸着于篇色异绣輦是云霞之丽采声如夏瑟为山水之清音是则词客服其探骊俦辈推为立鹤者矣仆夙叨葭倚谬忝荆班拏罨画之舟曾同泛雪吟柴桑之句长忆停云分手湖边已十八年之久论心岭表在七千里之余羚峡烧灯重开白社兔

园授简频倒青樽遂出一编俾予片语嗟乎人生靡定莺欲出而传声世路何常鸿既飞而留爪用为不朽惟此长存今公所作陇塞诸篇或写霜雪之凄迷而兴怀於岁月或纪山川之雄丽而寄慨于关河或凭吊遗墟而心伤逐鹿或低徊故垒而哀感啼鸟莫不出入三唐奔赴六代而法原风雅气本中和比於香山长庆诸篇较为沉郁方乎少陵秦川杂咏并着精严所养之深盖可见矣夫罗池名胜既得子厚而能彰象郡遗思尚记河东而未泯斯则地虽险僻为仕宦所弗宜实乃俗尚醇愚得循良而可用公以惠爱之术力为抚绥又于德化之余着之歌咏则安见桂林境内讴颂者不再溢于南交而柑子堂前向慕者共恒推以北面也哉

韩公吉观察崧云集序

余以癸亥秋杪始至羊城甲子月中乃过羚峡扁舟未泊已呼船覓张凭幸舍初分早见轩临李贺则韩君公吉似古人而折节为近代之旷闻者矣既而入襄岷之境中人怀其德见荥阳於驿内世叹为贤府绕莲花尽皆枚马台森栢树不少求羊於是志有星岩倒篋揽山川之胜赋同雪苑挥毫收月露之奇探骊而君早得珠吐凤而衆慚其彩爰出崧云一集用俾草泽片言夫辞以摅怀交发於性情之际诗惟言志长存乎律度之间气不静则不能有合於和平格不高则不能自全其忠厚盖自三百篇而後十九首以来虽体制各承而源流不异故家分赤帙文人或自相轻然代有青绡骚客终难别创今君养之也既裕所以出之也甚全时序迁移李勉或兴怀于望阙江山绵邈仲宣或寄慨于登楼都尉河梁见鸳鸯而赠答参军关塞覩鸿雁以低徊皆遇物以言怀每缘情而有作莫不嫵媚尽态写杨柳於初春绮丽多华炫芙蓉于早日譬之八音竞奏而清响合乎琴笙亦如五色相宣而绘彩尊乎黼黻其为诗也不已盛乎昔石鼎吟成退之起衰于八代宫烟句美君平获誉於一时当代复见名篇君家何多才子耶自知瓦砾殊有愧于士安愿作珊瑚庶期同於孝穆尔

徐凤池龟峯孝感诗序

朱寿昌之覓母名士悉有赠言景忠烈之寻亲圣主还为给传然皆生前之覲面访求尚有音容未闻歿後之遗骸埋没都无影响此非诚心之仰格何由奇事之克传也哉凤池徐君三韩名胄七叶华宗磊落襟期久仗仲华奇策英豪志略行看士稚先鞭而幼值家艰早逢时变方陟岵而旋陟屺谁怜未乳之儿初入广而继入都竟作丧家之子南荒失路八千里马鬣难封东海移根三十年狐丘莫辨见负薪之奉旨繫我独无问上冢以浇浆慈亲安在于是乎不辞胼胝历燕齐吴楚以独行罔憚泥涂经寒暑陰阳而不悔重来珠水仅鹿苑以依稀载访梅林独龟峯之耸峙兔葵燕麦既入望以无涯棘刺藤丝复手披而不得遂乃抚心抢地洒血呼天哭似秦庭较哀猿而更惨号同历野比鷓鴣而还悲足偶升高欲陟松岩而上身如入梦忽投菜陇之中衆共讶其非常心乃怛而欲动爰发布金之坎果当瘞玉之区题识依然香虽埋而未化鍼封宛若血尚渍而犹新双鹤翩?来吊陶亲之壠羣鸟翔集助成文母之坟此非精气之潜通而为鬼神所默佑乌能相感以若斯哉诸君谊列同人我辈分叨犹子登堂既杳空怀嵇吕之诚展墓有心更感闵曾之孝表扬泉壤将有待于龙章昭示寰区宁无烦于兔颖况逢枚马适授简于梁园并集王卢共摛文于邺苑纪贞纪孝金管与银管齐挥起敬起哀彩笺共素笺偕擘溪苹润藻聊陈一束之刍霞烂云辉总是五花之字在坐聚九州之客可知彝好不殊传

书貽百代之人应见廉顽有赖尔

家观庄粤游絕句小序

岁当癸亥予家少参先後一帆并挂秋风於江上浮沉双桨同寻夜雪於溪边岭表崎岖既悲歌乎行路天涯偃息遂欣赏以论文乃出新诗得三百首计经远道乃四千余其间兴会倏来莫不水流花放以至激昂忽动咸惊海立山飞骏马奔陂胡可达其运腕饥蚕食箔未足羈其含毫此岂格律所能拘固亦神明所独旺矣噫嘻山川有助张燕公岂待攒眉今古无穷阮嗣宗常多流涕以视予二人之梗泛一身槌悬十指暮云天畔惟深南国之思春草池边不入西堂之梦者久矣宁必定王家之优劣何烦分裴眷之东西但爱子之诗漏三下必读三过欲醉君以酒歌一首请进一觴

林蕙堂全集卷三

卷四

钦定四库全书

林蕙堂全集卷四

湖州府知府吴绮撰

序

严荪友秋水集序

往予解组溪干系船湖曲见当垆之酒母瓮酿百花有题壁之词人墨成五采则严子荪友所制望海潮一章也继而赞写羊孚楷羨鍾王之法因之函开殷浩书通嵇吕之交乃严子谬许入林时同藉卉身如鸿雪虽漂流略似西川契比云龙然企慕实踰东野顾予湖海之气犹未除豪而子丘壑之姿非关作达波涵千顷不浊较胜于不清干挺百寻若近尤能以若远眼无青白登山独喜看云口絶雌黄对客惟宜饮酒是以静多于动实胜其名王公甚重嘉宾懒于置幕

天子将召供奉呼不上船良由情性使然实非矫强所致矣至於才清拟月言粲成花具庾鲍之幽思用钱刘之妙格引人着胜多濠濮间情使我犹怜是风尘外物无不仰追骚雅共振藻于葩坛并使旁及声歌总掣香于兰畹洞庭落叶凄清葭莼之声湘浦层波澹荡芙蓉之影此秋水一集所由名耶嗟乎名士无多虚声何益上林三奏惟相如能赋大人汾水一篇独李峤可称才子吾不能无生瑜之叹且重有怀璧之伤也

见岳楼诗序

原夫天垂翼轸长沙独炳一星地极衡湘资水先通九派考之往代蔚有大观慨自寅卯之多虞困于庚癸而不辍荆湖半壁难销铁马之尘鄂渚千村尽没铜驼之草盈郊瓦砾叹归燕以无巢徧野干戈抚哀鸿而何术时予江倩来尹是邦虞诩才高其何忧于盘错王阳气壮曾不避夫艰危未三年而立起疮痍出百计而潜消饥溺遂使战塲多垒悉种潘花虽至比屋无人皆生召树爰于簿书之暇特为楼櫓之谋呼父老而告以耰锄子来勿亟减餽殮而具夫木石吾力犹堪大匠遂踊跃以庀材孺子亦欢呼而负土登登竞响咸临龙首之渠穰穰来归争璧鱼鳞之瓦功成不日义有取于高深备缮他时事永资乎扞御於是环连百雉无烦天女之劳并矗双翬似有神人之助丹雘特起如生赤水之霞粉蝶周围若聚碧台之雪朱帘画栋看云雨之去来正练蓼花揽江湖于远近至若北斗回看星文仰灿南山对耸岳气遥通西临鹿阜裴相国之遗踪东眺龟台王婉妗之古蹟桃花浣笔得骚赋于灵均细柳鸣刁溯英风于汉壽此则阮步兵登之而起叹顾长康目之而未能者也尔其帆过平林笛生远浦庾公夜啸坐明月以一牀张叟秋渔泛斜阳于双桨雪消郢树压晴色于栏边雨浥湘花绕香风于座上霞飞

碧浪如翻贵主之旗星隐黄陵若鼓灵妃之瑟时则宾佐清游荐绅狎至咸谓戴星之密画用成偃月之壮观闻于蕙之清歌同来倚檻醉建康之醇酒频共飞觴顾而乐之洵可志也嗟乎先忧後乐良符文正之心和汝倡予可少子安之赋隐侯八咏得此地以同传崔顥一篇在他年而何有是为短序以纪胜情尔

卓子任近青堂序

尝闻文莫奇于司马而其迹常遍于山川品莫高于元龙而其气实资於湖海子瞻之渡儋耳笔墨益豪道济之【阙】江山得助盖所见既广则其蓄之者必盈而所历既多则其发之者必盛精华所结良在高深奇奥所成蔚为风雅古有然者今亦见之则吾友卓子子任是其人矣子任为惟恭先生之後人乃火传年兄之犹子火传操持月旦标举风流似棋墅之谢安偏知幼度若竹林之阮籍独爱仲容而子任少有异姿长怀奇节轩轩霞举其气不愧于凌云奕奕神清其才独能于镂雪论交未久方多倚玉之惭締好既深更起挥金之叹言其大槩略有数端一则丰度不类中人被服有同儒者而高谈聚米若闻要害于诸边独往据鞍历见风沙於古塞论文可与论兵而并用学书乃能学剑以兼长一则先生独有藜牀孺子恒居委巷而座中杯斚对酒时有高人门外轮蹄凭轼恒来长者则处约无殊于处乐而能交实在於能贫至於衣尘已欲化緇薪劳难以炊食而陇头负未曾碍于带经堂下持竿竟何嫌乎漂麦则其博雅之怀即在勤劳之际耳若夫臧否不形诸口喜怒罕见于顔而射聊城之书曾无再顾击燕台之筑傍若无人则烈士之风不在古人之下矣凡诸雅致尽属修能况乎闽粤燕秦霜雪备经车马江淮河海风烟历饱檣乌一切东西南北之情皆归旅筇百凡陰阳寒暑之状并入奚囊观其足迹所留益见匠心独苦故时而惊涛骇浪则为奋迅振发之音时而嘉树名花则有穠丽纖妍之句或而猿啼鹤唳则其调多发于凄清或而虎啸龙吟则其旨必归之雄放斯其近青一集足以振彩千秋也于时雨过庭花风吹隣絮偶尔得兹快作足以畅我幽怀窃比汉书可下舜欽之酒如歌周雅是为吉甫之诗不禁倾心遂为弁首

张山来心斋聊复集序

原夫庄子寓言遂有鸞鵠之笑屈生讽谏乃以凤凰为媒借弹事於甘蕉托微词於曲水东方拔剑以訾郭是为滑稽之雄淳于絶纓以入齐无殊坚白之旨皆即小以观大亦由隐而极微也吾友张子山来以终贾之岁负庾鲍之才家有赐书三十乘是茂先之博物时长握槊十二年乃平子之研经既漱芳於六艺亦揽胜於百家存於其中窥豹而罕穷其蘊肆乎其外雕龙而莫测其涯爰用笔精聊为墨戲长言之不足而兼小大以为言正论之难明而合精粗以立论云敷丽藻开词坛希有之奇霞蔚新辞尽艺苑未开之秘能为庄语足景前修偶作绪谈仍多逸致是以说诗匡鼎听者悉为解颐不独奋袖苻融闻之咸为捧手也见麟全趾用知苍甲之灵得凤一毛已悉支文之瑞未敢秘之枕内爰请出於篋中尔

萧楼集序

帷中续史雅闻班有大家阁下传经允赖伏存女子中郎书册写之仍属猜弦太傅家风传者

多称咏絮人皆有集还夸刘氏三娘世岂无才尽道李公一妹代威明而作答羣僚翻讶其工与关图以齐名进士何妨不桱盖辰分星月皆有助于阳燧之光而天有云霞必俯藉乎山河之气芙惟去草虽入梦以成夫兰自有花必含香而待女此非偶尔彼亦宜然岂有笔解画眉定有殊于青镂人堪傅粉反不坐于绦纱者乎吾友邓子孝威既登文选之台独树诗观之帜穷搜月露坛方列于四唐遐慕林风席更分於三孝爰成一集命曰萧楼将由地以传人实因今而溯古揽其雪咏尽载瑶函考厥星源半生珂里或琅琊之新妇原配参军或鲁国之逸妻早归丞相或伯鸾同隐赁舂于高士桥边或司马偕归听曲千长卿筵上玉窻窈窕原属神仙金鎖葳蕤尽藏书画当年借砚香分玳瑁之斑尽日含毫墨点胭脂之晕水晶帘下才看装梳软玉屏中旋闻挥洒于是红窻昼永碧檻春深六六莲陂问鸳鸯而有对三三竹径说鹦鹉之无聊则有绦树谐声青莲协律剪彩花而写志步罗袜以含情翠幙红桥有赠郎之作玉楼朱户成寄妹之篇嘲伊字之无人笑影儿之与我则黄花九字欲登才子之坛白雪一篇可夺词人之席矣其或飘零异地寄托非人既所遇之不辰亦有思而未遂闻杜鹃于马上何日成欢听蟋蟀於灯前非秋亦感则有篇名落魄集号断肠携手无人岂谓风能吹恨画眉何事那知山可留愁斯则染蜀井之笺原同血色把湘江之管总是泪痕也邓子既掇其华复裁于古凡收各调悉準大晟拈天女之花都成宝鬢拾蛟人之泪用作明珠香分麝月有墨皆芬彩擷蜚霞无思不艳譬之青鸾对镜祇现分身遂使朱鸟临窻如将写照顰云笑雨无不极其妍情梦峡啼湘都欲呈其慧态?之琬琰宜藏金屋之中函以琼瑶当置玉台之上矣

家叠峰诗集序

半生游宦恒疎赌墅之情七友论交始遂入林之乐岁当辛酉方从吴苑以言归家有叠峰亦自涟川而共集曾无此客见于安石门中果自异人得之凿齿座上开罇对酒湖海之气偏高刻烛论诗金石之声忽作搜其敝篋得见新篇因思栢园先生艺林宗主人如皇甫肯为太冲之序言诗必项斯乃得於陵之称说爰为卒读初挑叔夜之灯继则高歌起作王戎之舞盖江河日下箕毕好殊北地以来借面惟堪作吊竟陵而後捧心亦苦效顰而兹则步等骅骝言非鹦鹉心游弦外耻闻下土之声耳热杯前半是英雄之色如仙人之长啸自彻苏门若侠客之悲歌欲惊燕市卿能有几偏怜当代之不逢我亦真痴反笑相知之已晚也

并头兰诗序

西崑才子东海英流生当羣玉之山人称山玉来自衆香之国家种国香值九畹之鍾灵遂双葩而竞秀光风晓转臭本无殊新露晨悬茎非孤引花如比翼那知情出无情荣媿同根信有意存不意梦怀燕姑觉探赐之已多佩结灵均方交纫而未解馨列侯之夫妇日日比肩世爱君之弟昆时时携手插将宝髻只宜配以鸂鶒供置瑶奩雅合对斯鸾镜此实兆祥於君子岂惟获媚於幽人而已哉於是人过澧浦共擘鱼牋客到梁园咸抽兔管声齐汉赋俱怜竞体皆芳美过楚辞更以同心表异笑緑窻之晁女未覩芳姿叹紫陌之韩郎空成连理爰称绣虎窃附续貂采奇芬于背上影羨连峰挹重秀于尾间巧逢双燕矣

栗亭诗集序

着雍在岁夷则协音吴子方憔悴于卜居言来问月汪子亦经营於恤难得遂观涛意气既许以同心踪迹乃欣于聚首夕阳共巷尽日披衣夜雨穿窬无时罢酒黄花虽老欢场莫胜于三秋朱橘方甘别绪忽生于千里时奉益公之骨用归轩帝之原双树金棺犹思故国千花宝塔忽涌名山谊在远而无忘道虽遥而必践故交如此肯有负于平生方外犹然宁致疎於吾党君之好义不既多乎然六代销魂正在江淹之地而一时分手空吟杜牧之诗木叶西风楼边一鴈垂杨细雨江上孤帆游子徒惆怅於褰裳诸公咸殷勤以置酒於是金龟硕彦并集临邛绣虎词人俱寻平乐停车则一十二国文情得助于江山授简有五十余人交谊并敦于风雨抽毫花发皆惊五色之开画壁歌成竞下双鬟之拜矣况夫别离之际君子为之伤心聚散之交古人所以多感一杯更进情倍笃乎右丞五字同赧体敢殊于都尉於其行也能无言哉

卓次厚江上草小序

伯鸾南迈度岭长謡洗马东游临波浩叹维兹一片有情之地云水堪怀是为千古长恨之乡山川可思吾友卓子次厚少承家学早负时名偶为览古之行遂有登高之赋珊瑚丽管擷兰杜之幽香翡翠华篇振葡萄之异彩洵名流之杰作诚才子之雄词也夫子与火传有同年之好且又与次厚忝一日之知交既笃于纪羣望益深于王谢见之不觉眉舞读此岂但情移爰此雕龙爰题数语还期展骥毋待他年也

白华楼赠诗序

盖自虹垂孔室贯天经地义以成书鸟集参冠探木本水源而立论然经言至德修身即用以显扬而事在敦伦养志必先于寝食故陟岵陟屺三百篇皆教孝之言而肯构肯堂十八章重思亲之义何微言之既絶说诗徒慨于卜商致至行之云乖补亡乃传乎束皙良由廉耻之道几废于雷同遂使磨错之功罕闻于风雅世之季也心有忧焉何期方氏一门乃有淮阳三俊奉其壽母几杖惟勤迨此诸昆埏箴允叶春生棣萼惟伯仲偕季以孔怀日丽萱华合手足殫心而竭力乐其心复娱其目太夫人常御板輿承其懼因虑其劳三君子共成丹阁庭前草树移来宛似新丰檻外烟云望去依然洛社信盛事空传里巷歌于斯宁意哭于斯岂仙人真好楼居祭如在亦复事如在爰题其额仍以白华用表其心长存朱桷登此楼者庶无忝于所生洁其身焉将聿修乎厥德于是梁园上客慕义抽思邺地才人闻声伫想湘东玉管抒诚欵于望云江左银笺写高言于垂露千音竞奏皆传韩凤之声五色相宣若洒皋鱼之泪岂若词芳芍药徒矜东壁之光句艳芙蓉但耀西崑之藻而已哉昔李兴笃行柳子厚为铭其门费冠潜修杜彦之特旌其地斯为懋矣岂不然欤今

天子风励学宫云兴寰宇将孰荣乎懿行用砥砺其末流斯人不愧元方可作百城之表诸君好同子美将挽六代之衰矣是为序

吴子远亦安乐窝诗序

自宋代年建元丰有邵子窝名安乐两牕日月法动静於陰阳八位乾坤仿图书於河雒时方

向晦常修燕息之仪气察由南早识?啼之兆道之远矣谁其嗣之乃我宗贤恒希往哲如长卿之慕蔭遇伯喈而与邕悟彻象先契深言外卧游五岳皆羲皇一画之余学殫百川在尼父四科之表於是仰通皇极寓坎止于乾行嘿契宗传本乐天为敦土栖心於澹时时俱得意之方葆德以和处处会养生之旨其曰亦也岂不然欤宁待司马相公为之买宅已如犹龙老子扰而度关矣子系共延陵师同曲阜山中窥豹殊怀讲德之人海上浮鸥最爱忘机之客室其未远愿均大厦于人间歌或可思尚待小车于花外也

王氏五集序

尝闻入荀朗陵之室将车者几尽如龙过崔光德之门列戟者人皆跃马莫不欣然怀古托想来兹以为灵秀所鍾不於异地英华所聚常在一家岂其偶然信不诬也迨己巳之岁谬主鸥盟而甲乙之才咸来凤集时则羣贤毕至皆淮海之英豪五俊同临有琅琊之昆弟乌衣竞爽既少长以相将彩笔争华实後先而无愧盖山右之身教备载鲤庭而孚嘉之心传首登驥坂楚士偕允文以?起斗南与丹书而蟬联既右史而左图遂月征而日迈文章则蜚声于学海皆不欲作第二人词赋则拔萃于名场尽可以超最上乘是以宫商调叶角徵羽并奏以成音黑白丝分青赤黄杂燥而作绘譬之雕云散彩为卿为喬而色被其方有若朗曜经天聚奎聚井而应同其用猗欤休矣不其盛哉昔者璧合珠连窦氏以名其集金昆玉友辛家爱重其人在古诩为美谈方今见之实事又何必称诸往代而忽于近今也哉况乎数马庭前汉尊万石授书门内刘有水经三笔而又有六诗龙文而还多凤侣从此腾辉东观奋翼南溟且将世食其休何但人皆有集一编具在请浣薇露而读之五色为章可染柳衣而待也

徐石霞诗序

昔在墙东曾传王叟今闻城北复有徐君所居在杨柳江边原以大夫之後退耕於芙蓉郭外犹传季子之风一榻长悬惟堆书卷双扉自合靡逐车尘不以客子为多喜共酒人而醉当年藉卉闻偕家仲以论诗此日班荆适遇老夫之泛棹欲为授馆悠然而若见南山时复开樽贫也而能同北海此其志意远矣宁在时世间乎遂乃探其囊中悉以置诸几上穆若清风之拂座岂许纖埃皎如朗月之入怀旋披宿雾考其所得已窥大历之藩能尽其才可入少陵之室矣夫诗之为教本于和平道之所存原於忠厚十五国之风謡具在数千年之雅颂犹存虽有殊名要为一致但须仰瞻初盛问格律于神龙必将远继雅骚正风规于绣虎耳

赵翔九诗序

居黄柏而筑室常见仲连赋紫菊以倚楼独称承佑自此而後罕见吟毫今我适来得逢奇士则有赵君翔九定交於黄歇山前论文于杜康桥畔恒随戴笠曾不间於停云长笑飞觴乃能同乎听雨江潭千尺既宛若其情深濠濮一方更悠然而意远爰以一帙索我片言朝采盈眸既积蓝田之玉夜光满室复探赤水之珠至於逸气横流豪情独迈则渐离击筑旁若无人师旷鼓琴复乎絶俗也盖文章之盛由山水之灵赵子既负高才更多遐举径山问法曾同高士以谈宗顓水移情每共雅人而结侣访盟鸥之阁欲乘兴以探奇登骑鹤之楼迺抒怀于吊古

所历既广其得益深故皆奔走于吟囊遂得发挥其赋笔昔子长遍游海岳而其书乃成燕公得助江山而其文始富考之於古岂不信哉虽然养之厚而其气乃昌思之深而其才益大翔九当求之於蔗尾老人则进之以竿头也

题藏山大师诗集并送北游序

盖惟拈花得笑根蒂本殊嗅水知香源流自别是以闻高谈於二惠独表东安推博学於三支有功西竺至若云门击鉢振絕响於李唐石屋抽毫擅高言於赵宋弘亮用推乎齐已浑成莫过于贯休斯又领袖词坛匪直传衣法苑者矣大师品崇白象道伟绀龙立雪庭前悟四十九年之旨成风座上提一百八句之宗而理入情中心游象表兰亭墨蹟不嫌萧翼传看莲社钟声未许渊明归去书如智永常登虎跳之门画比超然更入龙眠之室乃复捻眉高咏拥膝长吟以无字之禅为有韵之学一枝雪里但拈字而堪师半偈岩前每成声而可佛问十八遍作什麼生从三百篇说如是法味非蔬笋是春风杨柳之姿语出藩篱有疎雨梧桐之致此则李洞范之而难肖江淹拟之而未工者也乃师欲阐玄风将游北海而余言寻旧雨偶过东山爰结契於区中共论交於方外香闻薝卜非薰紫栈之炉鸟听频伽得展红楼之帙非弦非指向琴外以寻音是火是薪在灯前而取焰为之捧手用表会心夫大雅不传玄言既远将辞鬪巧固有类於野狐就格求声亦自同於家鹜而师能为汉语得继唐宗持此而远陟恒山遐游渤海将见文章之府共闻狮子一声岂独智慧之牀乃护龙神八部也哉

冒巢民三秋语不休诗序

一代论文遇赏心而不恨百年求友得快意以非常则余与巢民先生同为广陵逋叟乃龙蛇御历惊闻君子之灾而蛰距关情大有良朋之痛迨逢汉腊忽拜片函载及王春尽观多什廼知苏瞻不死一时误信讹言实则秦穆重生七日曾闻广乐始以菊开而遭疾终因桂发以还苏银鹤一丛悲哉秋之为气金鵝几树信乎香可返魂夫人负胜情乃可传於终古而身多奇事实不等於近今盖巢民致疾之由本於陶潜之爱而巢民更生之後犹耽杜甫之吟此於嗜好之情居其最胜而於生死之事良为可奇者矣然而五夕弥留一門哀吁太丘两子并刳股以和羹方朔细君亦剪膏而进药一钱焚顶小民之祈祷者万人片语喧传同声之痛悼者千里此其精诚所致足以感神加以纯孝之怀尤能格帝是以东华注籙复延将尽之年南极回光更放已收之魄理为可信抑何疑哉余既喜而还惊客止哀而作庆愧非康子能馈药于一奩窃比枚生聊蠲痾以七发相看白发愿有乐而无悲敬报苍头请汝歌而我和

学易堂诗序

十五国删于周而其旨皆归於温厚什一代断于汉而所着杂见乎风骚然诗以言情文如其品若陶若谢而不一览之者似见其人若杜若李而多殊读之者如瞻其貌岂其声歌之有异良亦情性之不同耳叶子雨苍予未得把入林之臂论听雨之心乃其中表临思罗君数相称说而我友目天钱子每为推扬汪君舟次实有序言谓其人霞举轩轩有同司马而风期落落颇类元龙劒气冲斗牛间其光时现篇章在唐宋上厥意殊深信有志于乘时而多怀于望古

者也及为卒业每磊落于自豪辄复称奇遂歌呼以共赏盖叶子生六朝之胜地曾见弹箏具万里之壮怀常思击楫遇酒人於燕市买骏徒伤拜漂母於淮阴钓鱼安在过吹箫之路长牵隋苑之垂杨游响屐之廊莫问吴宫之荒草台名拜汉空访遗踪阁号留滕惟吟旧句览江湖而寄兴历雨雪以兴怀或剪烛以留宾情深听雨或鸣珂以送远意重看云莫不携手留连披襟慷慨故其清澈也如晨露之滴新桐其萧疎也如秋风之陨惊箏其迅厉也如搏物之秋鹰其高清也如鸣皋之夜鹤凡此者皆予得于叶子之诗而前此者则予信于叶子之友叶子之胸次果能无愧於前人则叶子之篇中自可不殊于往者而果有志于斯也不几日进于古乎昔珠贝非华而令思着声于江海溪山自好而少蕴拔俗以石林子其有意欤吾将愿见矣

谢晋侯诗品序

三百篇以来诗独盛于仙李十九首以後格莫老于浣花盖开元之时乱离多有而少陵之世艰险备尝故矢诸咏歌多情深而意厚见之慨叹常旨远而思真所以天赋神符有诗王之目人推杰作得诗史之称壽春晋侯谢先生梦草华宗粲花硕彦广川射策遂鼓棹于泸江蛮府参军乃弹琴于焚道啼鹃声里仅分百里之符战马丛中已绘三年之像而惊传鼙鼓影匿烽烟流离于玉垒山边转徙于锦官城外比之彭衙窜月徒有吟魂与夫寒峡飡冰尤增哀意迨乎羈踪历岁乃得返迹旧都古垒荒凉遂触怀而多感故山寥落亦遇物以兴思凡所行游率多篇什兹者吾友邓子孝威见其真挚之辞谓略同於杜老因加删定之役遂端授于枣人览之信然未为妄也夫晋侯先生遇好文之主读其赋而愿见长卿以可为之才试其能而无殊宓子行将待以不次岂但等于能言独是子美值安史之秋麻鞋独往而晋侯当滇闽之际皂帽空存而卒也蜀道羈栖终数奇于葱肆淮山招隐还志阻于桂岩盖惟其遇之同是以其语之似也岁行尽矣方将作别赋数章子之往兮愿以代歌骚一卷

靳书樵游黄山诗序

盖闻名山之开名世之出咸定于五百年而大圣之生大河之曲或皆以一千里胜如有待灵不自呈吾乡自任彦昇临莅以来称於千古然而在谢安石坐镇之内僻在一隅三十六峯势摩银汉百千万仞径絶瑶梯洗钵池边尽是蛟龙之窟炼丹台上惟留猿獾之踪雪积岩端都无屐齿松横涧上偏作桥身信人迹所未经非尘言之能述而况戴星不易何能就涧底以循絙沐雨犹疎岂暇向湖中而判牒也哉乃书樵先生以西河之华胄整南国之岩封既架学於区中复游神於象表心以清而多暇何妨偶锁即牀才以大而能贤自可长垂帘影振衣独往尽谢輿台携襍先征无烦参佐浴朱砂之水更欲寻源看丹竈之烟还须陟顶怀渊明之雅韵不须儿子篮举具夸父之胜情毋借仙人柱杖於是山幽毕现岭秀皆呈破宿雾於衡山宁非正气蹶高风於华顶独有奇缘见河使於云中絶似吴门白练望野宾于岩畔岂同张氏黑衣况寤寐之亲承还逢古德信因缘之有在定属前闻载布地之黄金是赖只园长者留镇山之玉带当须蜀郡名贤夫岂偶然良堪卓尔至于舒孙登之长啸岂藉转喉携谢眺之雄篇更为搔首布云霞于纸上悉采柔岚运风雨于笔端无非朝霭既登高而能赋信有合于智仁复望远而多怀宁无心于离索桃花潭上每忆汪伦莲蕊峯前还同王俭遇文殊之院谁教师子横牀上观音之崖可有鹦哥解语石头路滑叹康乐之着屐非奇山腹云平笑昌黎之投书未达

丽城舒翼若为人来迦陵吐音全非世谛莫不传之清咏出以微吟是以挥妙墨于谪仙已足追于此日若夫覓丹砂于勾漏且姑待于他年耳予性托林泉身生江海青山有癖也知家对莲花黄海无缘窃笑身同萍叶老而贾勇奉木主以初还贫愿归仁守蓬居而鲜出幸故乡之有茂宰颇遂依刘当吾世而见大贤欣同御李衆香国裏三生定属神仙羣玉山头一卷长留天地遂使鸟鸣蝉噪吟成而独絶於时以至云起水穷到处而必收其趣空成仰企王司州多林泽之游莫遂趋陪张燕公得江山之助一时神往美架笔定有珊瑚千载名高料掷地都成金石瞠乎後矣吾愿为之执鞭读者欣然君何辞于饮酒

家云襄西湖四时游草序

金牛昼现开积翠于两峯宝马春嘶踏软红于十里古之高士多择胜以潜踪近有词人每寻幽而乐志是以比之西子写黛色于镜中每至东皇鬪华篇于酒半然而地分四序烟云各有所宜人在一时楮墨难穷其致家云襄耽怀泉石僻爱烟霞或往或来虽漫游之不定而靡日靡月率幽讨以无穷积有余年备收多胜时为春也冰既泮兮梅向溪生画舫交横于雪下树笼堤去吟鞭争袅于香中迨及朱明是为炎暑荷风入舫地以旷而偏凉柳?连桥峯最高而不热凄其秋矣不亦爽乎蕊粲金鹅香入玻璃之水霜清白鴈林飘玳瑁之枝厥在上冬是为贞岁千峯立玉居然多宝之山六出飞琼宛若万花之谷若夫东西南北林峦有争胜之奇寒暑阴阳烟月多不齐之候乃欲入幽出显备极其形容即变求常历收其光景斯则以有穷之点染写无尽之高深以此言诗盖亦难矣而云襄既有济胜之具复怀蒐远之情领异生新履无徒涉推怀送抱笔鲜虚吟得趣于山水之中适意于暄凄之外故能使六桥之花柳竞入毫端二水之波澜争来纸上披其卷轴如闻弦吹之声诵彼篇章似接衣香之气徒令白头之倦客梦到旧游都忘绣口之才人赓其新咏也

家逸园侄留香集序

予家丰水有侄逸园少即工文洗马原称才子长而好古伯鸾实异时流心在名山迴出风尘之表情耽好句每多月露之华家有青衣能空冀北人如碧玉不嫁汝南本自一枝发金鹅之蕊生而独秀飘玉兔之芬即比目以非多却叹有鱼名妾将同心而不易犹怜在燕为雏慧性出自灵犀闲情稠于小凤膏研紫笋偏能渴解相如烟炙緑洋肯复熏分韩壽将奇葩以比面应知消恨为多用卯酒以窥粧为问含娇谁似时而攜手镜中照出柔情偶共比肩灯下传将密语鞋提金缕堪怜一晌相偎枕冷罗裳空拟五更留住依真欲死惺惺早定百年郎或难归去去如遥千里堂前不意悲萍梗以何从山下相逢望靡芜而罕见身惊换马千回犹掩琵琶魂化啼鹃一往真惊羽箭阮始平之累骑竟属空还乔右司之寄书皆云不识桃叶空迎渡口嗟团扇以难圆柳枝既出墙头怅带环之莫结馥沾残袖再来应属他生魂绕空牀梦断谁堪此夜灰心无术覓方士而荒唐化石何时作丈夫之行状爰吟七字略计百篇蚕丝备极其纏绵蛩语不嫌于凄切似罗虬之写恨惟比红儿若杜牧之紫怀宁讥白傅莲花破的惟存苦意于心湘竹留枝只有血斑成节弹泪痕以和墨墨尽泪痕裁愁粉以匀笺笺皆愁粉情天莫补石五色以奚为恨海难填木千枝而安用腹转车轮而自苦口衔石阙以何言于是见者为之神伤读之因而气尽杜陵词客竟为伤心江夏文豪多因赋恨是可忍孰不可忍何辞一片青

衫人言愁我始欲愁莫问三生红豆曲中别调美絕调之能工世上鍾情慨离情之不尽茲诚尤物仆本恨人翡翠瑶钗覩关情之残挂荔枝金带见贈别之佳章香可留乎嗟何及矣为云为雨历朝朝暮暮而长疑非雾非花若往来来来而如见一篇具在三叹奚胜李逢吉云是大好诗不信断肠之如梦得杨於陵曰有如此作直须极口而说项斯

汪紫沧披云阁诗序

老而才尽拙乃甚于文通倦得身归事颇同于元亮人无知者窃自附乎逃名客有问焉遂谬辞以忘世岁当协洽月在塞阳方返棹于歙川得掩关于丰水而汪子紫沧远驰一价告以四愁字拟隋珠笑百朋之非宝珍皆赵璧同四友以偕芳并附多篇用徵小序夫诗以言志志定则词高声以宣情情深则旨远斯为不易之论实非颇测之词也今紫沧负名世之才具兼人之学行且有为于当世用将共见于一时岂但香湛蔷薇浣燕公之手华矜菡萏艳康乐之眸乃寓物能铭登高善赋流连赏会则邨苑之名贤贈答纏綿亦河梁之都尉虽复朝霞展彩不足喻其高华朔雪清严未足方其明丽斯则仰追乎正始岂独下媿于贞元而已哉至若兰畹发为清香花庵时为小令则才兼淮海调轶屯田红豆妖姬还能记曲綠么小部更足谐声矣绮茗水逋臣芍城遗叟半生好客但爱才实出素心千里依人况论交何辞远道闻声相忆梦想已结于三年见美难忘怀袖弥殷于十日晚风吹雪行停剡水之船夜雨闻泉共剪巴山之烛子能拔剑将对影以长吟我且挥觴欲闻歌而起舞也

漱香阁诗集序

尝闻才人不可一世气本凌云名媛雅足千秋词能拟雪然皆称其独立未便许以兼收是以台上吹箫自属神仙之事若夫垆头滌器终成儿女之羞求人必可比肩论世难为屈指矣吾友佟子金支碩彦玉树奇姿当浊世而翩翩驰英声而奕奕八叉作赋负司马之俊才五噫和歌得伯鸾之佳偶则有人如洛浦系出颍川谢太傅之家儿由来习礼李尚书之弱妹本自工诗方同桃李以齐年蚤叶芝兰而入梦组文五色元分绣像之丝镂管三枝即用画眉之笔于是翠鸳堂上时茗熟以抽书朱鸟牕前或粧成而弄墨杨容华含情芳树人在月中刘令?写意丛兰思来天上大雷有寄兄之作札岂让于左芬东海得贈外之篇镜常貽于徐淑闻弦即辨本得意於非弦顾曲无差但谐声而是曲宛若佳人之在空谷遂使名士而悦倾城斯则锦出天孙非是江波可濯花栽帝女应同月魄难扶者也尔乃林下宜家兼擅郝鍾之美牕中窥客能知嵇阮之贤一双龐氏之鱼羹諳姑性三载乐家之豹织勉夫勤素纸飞鸿为使君而作答青纱挥麈代小郎以解围斯又有璧皆完无珠不慧刘更生作传之所不详谢道韞望尘之所不及岂止声高綵树足张娘子之军人瘦黄花可夺词人之席而已哉予以闻鷄之岁来登游凤之台入玉照之堂前频同旧雨望水晶之帘外得聆清风含以成滋得沾唇於芍药享之无忝欲浣手以蔷薇不烦荀令之熏炉若揽魏王之衣袖对花陰以展卷应知见亦犹怜看鬢影以弹琴不觉羨余生妬聊题数语敢夸鸚鵡之能文每诵一篇请解鸚鵡而貰酒也

胡枢巢诗集序

夫诗因世降而历代之风气不同律本心声而诸家之体制各别譬之五色玄黄不能相混以成文若比八音竽瑟不能代宣而入听乃欲以彼易此续短为长是天地昭日月而少风雷有丘壑而无江海理惟一致类写万殊恶乎宜哉言之谬矣不知初盛中晚通有其时即李杜钱刘各成其是予以蓬飘四出匏系一麾未及登道南侍御之堂观光豸府拜补松先生之砌奉教鲤庭而犹得与枢巢胡子缔好莲漪订交兰谱乃胡子深情豪迈如朗月之入怀密意流连似清风之拂座下仲举之榻但觉情移饮公瑾之醇频为心醉乃能虚怀问业雅意求言出其寸碧楼之诗索以三都赋之序夫予望惭皇甫何能起誉於当时而子才过太冲自可追踪於前代且观所作备有诸长取调必高都无细响选言多俊独有清音故翠筱含风不足以言其净也红蕖被雨不足以方其华也沧海月明不足以昭其洁也蓝田日暖不足以写其温也李昌谷字欲呕心尽可盛之古锦张燕公文堪浣手只当薰以名香况夫送往迎来写纏绵於藻思登山临水书眺览之幽怀鹤盖犀衣叙欢情于五夜金盘玉案述梦想於四愁咸能抽兔管以言情并足染鱼笺而尽致若加以学何难坐进于古人但用其才已足成名于当代时方展读值檐雪之初晴共作微吟见庭梅之将放月射窗而并皎花送馥而时闻以此言诗可知其况矣惜哉巴山剪烛徒怀听雨之思吴水归帆莫尽停云之想也

依云轩诗序

盖闻玉叶浮空长卷舒而莫定金翘丽日每吞吐以无穷霖雨可徧乎九垓弥纶常及於四海盖惟山川所出实乃天地之英是以汉武之用长卿见凌云之气卫瓘之逢乐令有披云之称也卜男胡先生学驾区中心游物表实具栋梁之器雅怀丘壑之情对异质而偏怡抚乔柯而独啸与贞姿而并固仍呼介石先生叹古干之俄倾自号补松道者而帝乡不返长多季子之嗟天路空遥莫慰怀英之望予以辛未时值则阳偶游桑梓之乡获订芝兰之好而嗣君枢巢交联异姓契结忘年我愧林宗幸得留车于北道君如仲举乃能下榻于南州既饱德于授餐更邀欢於适馆爰开别室是为依云则张君之所题而胡子之所息也琴书静好不入纤尘庭户清幽独留古石曰是吾先子之所志也谓子大夫可无言乎乃出一篇俾为数语颠如米芾具袍笏而呼丈人癖似奇章题甲乙而编昆弟平泉院内虽李氏得以长留华林园中识到公之所最爱昔人称为雪浪古志号为云根云触石以生石抱云而立胡子所朝夕而常见者是胡子所梦寐而不忘也况乃胜友衔觞名流搦管各吐奇於四咏咸奋藻于七言或湘客之朱弦清言玉振或郢人之白雪高唱金铿或莛发芝田灼烁九光之彩或花开兰畹徘徊十步之香莫不极想烟中亢心露上譬玄圃之积玉俱属夜光若赤水之探珠尽成鼉彩洵足乐矣不亦美乎今胡子以光辉万物之才具荫覆八埏之志将见大云合于肤寸而甘泽霈于方州矣抑闻永康之时延贞观侧松有化石之异会昌之代大食国内石有偃松之形苟精气得於名山则其像昭于庶物松何待补石可永贞尔

江允凝咏古诗序

江子允凝躬崇古道力谢尘嚣声誉重于一朝交游遍乎四海时而含毫妙染每上薄乎倪黄即或抱膝长吟乃更侔乎元白且复留心丘壑乐志林泉信有得于高深时能入化独抗怀于今古境可生新远溯仙踪为访链丹之井留题胜蹟言寻洗药之池或经梵界而忆高僧或过

幽林而招隐士问钓鱼之石仰企循良临射蛟之潭兴怀侠烈紫阳洞口缅想传经黄蘖山前恒思入道登文殊之座欲说法而无因上大士之岩怅度迷之莫得万年松树不受职于秦皇三月桃花罕泝流于渔父莫不崢泓萧瑟尤兼典丽高华因奇境而发奇思信腕中之有助出慧心而成慧业觉笔下之如神凡有赓吟格律皆非常调览其纪述古奥复与衆殊谢康乐工山水之篇谁其似者李谪仙多胜游之作未足方之又岂仅传絶唱於新亭擅遗音于怀县而已哉予幸获班荆言同藉卉探怀中之冰雪不禁神往于斯编赠笔底之烟云犹待卧游于此日尔

程予秉及春游草序

余闻新安江水一碧飞流富春山台层青夹峙严子陵之所高卧任彦升之所快游诚吴越之名区而东南之胜览也会因尘事未果褰裳即此素怀空怜倚杖冀得苕川公子写以彩毫不则皖水文人悬知素帙乃相去不及二千里而长怀遂至三十年信匪幽人莫传灵境适予友蒋子忽与客来谓此程君允为时俊出彼及春一帙索我结夏片言则布帆所经无多日月而锦囊所贮尽属云烟既遂我夙昔之怀若见其平生所念矣予少常着屐既成司马之篇老值悬车乃息向禽之驾今程子以其壮岁具此妙才使能畀以輶轩乘风万里佩之镂管破浪三峯凡所经游必多题咏则见江山之助岂仅让于燕公篇什所成得无同于康乐者哉子其往矣予且观之

吴孚占诗集序

予以姜桂之性早赋归田兹当榆柳之年始能返里获邦君之把臂误入吟坛共英俊以论心同游词苑适因小阮得识元方孚占身近青云句裁白雪龄才似贾已驰誉于胶东志欲如终久蜚声于江左人皆竞爽品自多英越国独重于六朝符朗终期乎千里乃囊萤之暇更爱拈毫出绣虎之余还为拥鼻观其卷轴俨明月之投怀览彼篇章恍清风而拂座不携奇奥之语以冀惊人雅擅绰约之姿偏堪絶世若能坐进于古必须独步于时乃下问乎一言将远追乎三拜昔士衡入洛得见赏於茂先太冲赋都遂获知于皇甫以之相况良用自惭矣爰感其诚遂为之序

家仲云诗序

忆先宗伯之视不佞犹康乐之视惠连而不佞之于仲云若处冲之于武子先宗伯早登一第晚举三雄而仲云以季方之才来游隋苑适不佞因文昌之疾暂息扬亭乃数过从既情殷于问字爰相论说遂意洽于闻诗肆力揣摩既下帷以师董子留心吟咏复登台而窥少陵观所谋篇言皆合格流连山水率多会意之辞感触禽鱼亦有赏心之作神清而气远彷彿乎大历贞元骨俊而词新伯仲于参军开府由斯渐进何难到乎古人即此遐观已可超于时辈夫唐代之文体至左台而始兴而吾宗之诗人有子华而迺盛遗书具在子可寓目而观之大业堪留吾将跂足以望矣

家云逸酣渔诗序

予与云逸同出红鞋之裔如东西裴每为乌衣之游若大小阮则王家痴叔殊少清言而谢氏客儿颇多丽藻作观颐之室以养其亲为酣渔之篇以超乎物斯其寄托者远矣寧复浮沉于时哉岁之云暮将告而归爰哀其新诗以质于逋叟受而卒读窃谓不减古人于以长吟遂可前无作者时方快雪初晴寒花欲笑么凤悬于树杪此身若在罗浮雏鹤啄於庭中是日如临大庾而一编在手觉香气之盈襟数语赏心有清风而入座其为高致自当在晋魏间宁但清音有钱刘辈耶昔袁叔明爱书好古而醴陵因以纳交张志和带笠披蓑而鲁国为之结契仰怀往哲方有天际之思岂竟斯人乃在家山之内乎夫唐文三变而开其先者首推左台唐诗四传而极其胜者是为承旨诗乃是吾家事子其勉之未可与俗人言吾为妄矣一帆归去且赠以白雪之枝数卷携来愿示我黄山之什

家駟公桂留堂暨汪少君余香草合刻序

予与家駟公分若木之华修竹林之好昔年虎阜曾见委以三都今日鷄台复重逢于一水久惭夙诺殊怜嬾似嵇康重见故人更喜吟同何逊词高望古颇多白雪之篇意切悼亡更续彩云之句夫同心迭唱自古为难携手联吟于兹益鲜是以蜀都司马仅闻一曲琴声吴苑伯鸾独有五噫歌响盘龙明镜秦掾之後无闻引凤灵箫萧史以来实寡家駟公少称立鹤长擅雕龙南宫驰誉已献赋于秋风东序论文复鸣弦於化雨红绫饼馅伫待上林黄绢篇章行窥中秘文章则齐驱于贾董讴吟亦并驾于钱刘览其一编鸚鵡空惭于学语观乎诸体骊龙悉得於探珠尚论古今而既怀于俯仰穷搜山水而极致于高深洋洋乎其音在正始之间飘飘然其人亦贞元之上矣而汪少君芳兰丽质穠李清姿获作配于才人遂共称为佳偶红窗问字岂其不识鸳鸯紫阁裁书每欲偕装玳瑁高柔爱玩胡母信是上流天水归来清照原多韵事天寒罗袖方倚翠竹以为欢秋卷珠帘忽与黄花而比瘦神香四两叹愈疾以无徵艳雪一枝乃招魂而不返金荷烛炮徒有残煤粉壁蜗停空存剩字雨中伏枕泪欲尽而留痕花下挑灯血将枯而代墨尔其啼湘怨峡都非儿女之私以至弄杼鸣砧大有古人之格此余香之草哀比猿号于桂留之诗同存鸾啸也夫文生于义而义莫大于伉俪之间诗出于情而情莫深于死生之际三百篇所载多存闺闼之词十九首以来未尽温柔之旨今所得若是或有览于斯读駟公之诗者可以兴读少君之诗者可以怨已

崔青峙社集诗序

广陵为四会之华区鍾两间之秀运陈琳草檄独美冠于七才徐铉燃香亦声侔于二陆他若词高选阁集徐庾以称华近则名重文台与苏黄而竞丽斯为莫尚兹意有然则我朱其恭崔青峙二子受学鲤庭蜚声虎观叔敬乃考亭之裔品欲无双彦通是武臣之儿才堪第一夜分天上俱来益部之星秋满人间共看广陵之月爰升车以望远遂策杖以寻幽登帝子之楼长怀金管访仙人之井重问玉鈎览堤上之垂杨神伤兴废攀阁中之古树肠断别离地可吹箫梦觉长怀杜牧堂堪倚檻人归徒忆庐陵凡兹山水之间并有古今之迹莫不含毫往复执卷低回嗟盛衰之所由凄其宝瑟究哀乐之所以慨动瑶笺于是四座情深一时神往华灯朗月

追七子之风流修竹茂林招羣贤而雾集人皆司马并蹑屐以游梁客有元龙时据牀而当汉
咸复振衣长啸脱帽狂吟酒盃淋漓动操发哀箏之响词毫飞洒临池染宝墨之香每因携兴
同来或以言情共集亭边放鹤偶回采藻之舟沙际归鸿遂布班荆之席羣空冀北二美有若
求羊品重汝南一见有同枚马入怀朗月皎然似欲照人拂座清风冷若偏能絶俗乃相投以
一卷信冰雪之堪携竟兼擅于多篇得江山之所助

陈北溟诗集序

丰溪迂叟将牵黄子之舟【黄子湖名去召伯廿里余别业在焉】湘水才人忽枉孟公之驾
掀髯惊座慕高义以投珠握手分牀羨飞谈而屑玉忆当年之姓字曾因洗马传来【谓余壻
赵念昔也】接此日之丰仪何幸元龙获覩于是结金兰之密契敢谓忘年对琼树之清标相
将永日悠然意远如见南山渺尔情深将由北道乃出赏心秀句索加弁首芜辞夫诗之盛衰
固由于风气而才之大小实本于天资故徒恃其聪明则必有空疎之诮若独资于学力复恐
无灵妙之机所以气擅纵横耽怀欲兼于澄静性多沉挚命意当出以和平是非学力之有难
求抑惟聪明之不易得也乃读沧洲之集悉本灋水之遗才既高华学尤醇备情无近寄殆欲
振建安以上之音言必入真不肯作贞观以下之调托闲思于丘壑旨尽幽深写哀绪于蓼莪
心伤孺慕探奇揽胜谢康乐工山水之吟揆藻敷华张道济得江山之助早望龙楼而染翰挹
爽气于西山将登鴈塔以题名蜚英声于北海名贤雾合衆已让其探骊硕彦星罗人共惊其
吐凤莫不清如鸾鹤闻者尽使情移壮若鲸鲵听之辄为心折譬千寻之皎雪辉映须眉对九
夏之严冰顿凉肌骨采莲花于露下能教竞体皆香羨杨柳于风前絶爱全身是态然而华能
不艳岂同温李之纖穠澹益多思不似岛郊之寒瘦纸上有英雄之气直教酒涌花飞篋中藏
秀异之珍真令笔歌墨舞盖其神化出于十九首而其寝食究乎三百篇是以法律精严格调
自臻纯美原夫性情爽朗词句始得清新者也嗟乎人尽操觚谁当击节谈诗之辈每自命为
拾遗作序之家动亦称为皇甫虎皮羊质谬比义山牛鬼蛇神侈言昌谷甚至爱忘其丑尚云
游夏以难名所以贗失其真遂令风骚之永替用起雅人之叹宁无识者之讥哉而余序沧洲
之诗则大有异于是者自惭审律独推斯作迥出风尘世有知音岂以鄙言视同河汉请看惊
天破石行簪平一之花应夸镂月雕云定夺延清之锦方早朝而和贾至君将得意而游当夜
坐而赏李峤吾其拭目以俟矣

江上吹箫阁赠言序

西冷松柏同心挽油壁之车南国蘼芜携手结金泥之带信相思之有地我辈岂合无情问得
意之何人此生乃能不恨则有平阳隼彦亭可玩鸥淮海英流家原结驷千金作埶市骏骨而
何辞十斛量珠买蛾眉而不惜佳人难得是卓女岂必无夫名士非多即使君何嫌有妇拨瓮
中之宿火未了余香访石上之残阳犹存旧笑于是人如碧玉还嫁汝南身似緑华长归河右
桃花帘幙起来常看梳头杨柳栏杆伫立偏宜顾影居然林下儿家自有清风共在江边君意
乃如春水秋宵选梦偏从煖处知香静夜凝粧每向淡中得艳或调琴于午夜能和大妇之心
常擘纸于中宵自合仙郎之意是以孙家小妹见则犹怜楚国蛟人闻而下泣者矣况乎銓江
胜地胥浦名都傍明月之二分得华风於六代东眺而佛狸祠下斜阳隐映潮红西望而司马

渡边朝霭横分眉翠时而凭栏一曲应知响舞鱼龙即或倚檻双吹必且声和鸾凤其为乐也可胜言哉遂使邺苑词豪咸抽兔管西州才俊竞写鱼笺点彩笔于红窗同夸京兆绀朱丝於壁网共羨临邛信密意之往来惟神女读之其解赋艳歌之长短岂诸君尽谓无情谓樊川不必再问紫云请郢客须且重赓白雪

陈素素诗集序

噫嘻乎此陈姬素素之诗耶姬来自衆香见於羣玉縞鸾应节广寒本自清虚緑凤梳翎姑射由来绰约极艳原生于极淡多情遂至于多愁笋茁湘山已是泪盈之竹桃开露井生成命薄之花红粉凄凉哀吟昔昔朱顔飘泊长恨年年月下匀笺洒啼痕以染墨灯边织锦裁愁绪以抽丝泣类穷途究是闺房之阮籍吊怀知已可称巾幗之虞翻哭甚于歌生何如死一双红豆春风自种相思十斛真珠夜雨徒闻独叹是以言多扼腕集号断肠洛下才人感触难归之日江东词客悲生不嫁之年岂独蛾眉写怨洒玉筍以成痕鸾髻含啼对金缸而顾影也哉嗟乎痴同杜牧空结梦于青楼文比淑姬但流声于白雪此而忍孰不可忍人言愁我始欲愁矣家流章以余岸桴诗十二章谱之琴操是为序

偶咏杜陵之句兴怀於黄子陂头暫效庠阜之吟避迹於白公池上程无半日即是壶山地少千峯还如镜水就菰芦以自匿为欲求闲顾桑柘以相怡非云避世然而书堪借读依然孙氏之楼酒或能沽不异陶家之里牵船岸侧拟效张融垂钓牀头略如白傅花中覓径柳下横桥凭栏而霏雪争飞望远而斜阳不尽若龐公之夫妇时对一灯有蒋氏之宾朋频来双屐杜甫之?亭可憩邵平之瓜地堪锄实获我心不减幽岩邃谷偶逢同调何殊流水高山则有家侄流章实为今时叔夜性偏谐于雅器神独重夫元音廼用无累之心叶乎宫徵合有道之物养於和平得意在心手之余无复声为秦而声为楚求音于字句之外宁可听於指而听於弦蟹行鸾鸣十三徽各穷其变岩栖谷隐二六首尽得其幽若中郎之入清谿每一曲乃成一弄如成连之居海上有七弦而移七情可谓嵇心羊体巧妙极其兼长乐指潘文美丽诚为独擅也昔萧思话之见赏乃在松石之间俞伯牙之受知独於流峙之际子且援琴而奏我当击节以听也

陶懔庵诗序

盖闻才由间出必有灵秀所依感而神通自赖江山之助而诗文难求于富贵要之原本至情奇伟多出於山林生也廼知杰士况乎人同骐驎应看千里腾骧运值龙蛇遂至一时隐遁经文纬武虽怀未已之心饮谷栖丘聊作终焉之志时非偶尔道岂徒哉然而名重汝南竚见蒲轮下聘望隆京兆还来纁帛遥求为海内才人先笃行于孝友作山中宰相始建业于经纶斯世诚难其人此日幸覩其作如吾友奉长陶子尊公懔庵先生足当之矣先生衍长沙之名裔承句曲之高风慧比香山早识之无之字悟同子静辄窥宇宙之奇对座上之羣贤四声能辨惊殿中之学士五赋俱成论说比于戴凭屡夺五花之簪丰神拟于李白堪登七宝之牀以是世尽知名不待范逵始重人争识面宁惟张说方夸多士授经独高卢植一龙起誉首让管宁而张倬难登乃以名经作喻刘蕡不偶翻缘忠说兴嗟策果裨于治安徒以奇才见忌名几同

于党錡转以正人得称虽未梦浴于龙池亦先身游于虎观迺望云心切坚辞郡邑之徵爱日情深屡却参佐之召孝行既敦于德里令闻愈炽于清时於是邳下贤王爰求国士河间贵胄特进高人曳裾而谈敬致横经之席披裘入见优隆设醴之仪而先生志在林泉癖耽讽咏慕仲连而远蹈羣推鲁国一男若烛武之求归转笑汉庭诸老门栽五柳依然靖节高风居号七松犹见华阳雅操志足高已事可为乎若夫性笃天良诚能色养方当舞象之日即愿为兄泊乎戏鴈之年遂能述祖牀前视疾七十日无暇求衣庖次衔哀十数载何心御肉间阎为之感动风俗藉以改观无忝所生此其大也至于驰义声于乡党笃雅好于友朋竞入清风似在许询之座频来旧雨如过杜老之家阮氏高宗不分南北张公甲族无间亲疎有东汉之英豪曾纳交于郭泰是西京之弟子尽藉誉于扬雄而先生既具修能允称硕果高吟抱膝宛如秋月长凝清啸舒怀恍若朝霞独举开蒋元卿之三径竹里挥毫得谢幼舆之一丘花间染翰笔底尽烟云之致篇中悉川岳之奇莫不格压曹刘体高屈宋歌因慷慨题成不坠风流赋或悲凉味处还余忠厚真不羡鬪新声于穠丽竞藻思于繁靡者也予窃附鷄坛获交骥子莫结耆英之社望楚汉以神飞远托声气之盟忆湘潭而心醉初为快读直教薰以名香急命珍藏还欲收之古锦序惭名作敢云皇甫之于太冲传在令嗣譬若肩吾之有开府

林蕙堂全集卷四

卷五

钦定四库全书

林蕙堂全集卷五

湖州府知府吴绮撰

序

彭爰琴词序

忆予久沉金马之曹将受玉麟之命齿牙不惜频闻芳誉于文通肝胆可披获订素交于汝励而彭子爰琴以及瓜之际为歌折柳之篇千里河梁拟纏绵而指日十年湖海感惆怅于停云及乎解组苕川还辕苕郡屈原既放方从泽畔行吟王粲言归辄向庭前问讯见故人之面宛似青山读才子之文都如白雪仰追芸阁有燕许之弘裁?及草堂亦周秦之丽响因出酒边诸作用俾简首一言夫词号诗余体原乐府翰林三阁写怨思于寒烟博士八义怆离情于夜雨翠翹金雀虽务极其绸缪玉宇琼楼要本原于忠厚夫何小巫日竞几自类於倚门遂至大雅云希竟难求其入室兹则法综淮海义仿屯田端丽出于性成穠秀原于自有春风杨柳是孝伯之清华初日芙蕖非顔延之雕绘七襄成锦支机得自天孙三日留香拂座都如荀令倾城有笑何须齟齬为妍照水堪怜不待捧心作态是以江郎虚已尝欲让其风流而宗子逢人还共称其雅令也予顾曲徒怀夫公瑾作序颇愧于士安入仙圃以看花心迷四照过旗亭而貰酒拜下双鬟矣

周岷公澄山堂词序

忆同范叔论四海之词人辄谓周侯为一时之才子以其丽句索我芜词惭负诺以三年徒抱怀于千里兹来桃叶访慧远于山中小憩旃林识伯仁于座上凌云气壮雅推司马之文听雨情深益笃彦龙之好爰搜敝篋尽得彩毫新声罕亚于屯田藻句独高于淮海而漳河马渡恒多吊古之文楚泽鸿飞半属思归之曲芙蓉江上日日斜阳萍荔镫前时时夜雨莫不凄其欲絶慷慨堪怜艳思纷来柔情婉转花间徙倚心伤燕燕之篇酒後悲凉耳热乌乌之唱则孤臣去国洒别泪于琵琶壮士投闲动雄心于箏篴可或歌而或泣且鼓之以舞之矣夫岷公以迈世之才负兼人之气使其得志固为公瑾一流即或知名岂让美成独步而牵丝不达制锦无成家本四明偏忘可狂之客宦游即墨复当多毁之乡托美人香草之词抒其幽愤用残月晓风之句寄彼壮怀曲以顾而多情调以高而善怨固其宜耳复何叹乎独是仆本恨人时逢怪事乌啼门外青棠无蠲忿之花人在天涯红豆是关情之树酒楼何在难为击筑声悲蜡烛难灰不觉唾壶口缺读离骚而无泪夫独何心歌长恨以善怀我能无感因题数语践宿约于当年更把新篇结遐思于此夕梦中寻路空望彼于渺渺波边别後相思又送君于劳劳亭上哀

弦浊酒把离袂于河梁红树青山望归帆于别浦耳

江辰六春芜词序

江子辰六少负隼才长多雅望花生梦里乃当代之文通璧在车中是吾家之叔宝篇章妙丽揽香草于中洲诗思清华照芙蕖以初日然而着述之暇长拟陶情击赞之余偏能顾曲牕前按律每协大晟灯下匀笺时裁小令西风汉阙发秋思于青莲宿雨闲庭长春心於红豆玉笙鸡塞南朝宫体之篇羌笛黄河北里旗亭之曲莫不调飞郢雪响遏秦云譬种萱苏见者愈三年之疾如搴兰茝佩之生十步之香固可使周柳让其妍思辛黄惭其丽唱矣尔乃半生骥坂数历燕吴万里龙标频游梁楚一双蜡屐登览既多数曲哀箏悲歌时有闲写清晖于逸藻或传壤思以新腔尝于斤竹岭头白紵染明霞之色时而莲花社里红弦写瀑布之声侍女倚箫姜尧章之烟波十里将军铁板苏玉局之雪浪千堆以此豪吟还将济胜斯又极词人之雅韵备乐部之幽情者矣昔者山抹微云少游获夸于子倩门开明月德珣取重于妇家并属美谈传为轶事而予也参军已老凄清湖海之音开府空归萧瑟江关之赋不觉闻声而起舞惟言对酒以当歌尔

钱葆汾湘瑟词序

岁值马逢月当龙御雉媒日暖问猎苑于苕城鱼蕖波深访钓徒于莼浦时有青峰江上赋瑟才人实则紫禁云中簪毫旧侣爰开西墅许水监以哦松特馆南州共漫郎而折菱灯前侧帽既多顾影之怜酒畔鸣箏遂有缘情之制风流宛在比思曼以垂杨姿态横陈拟子京之仙杏凄清欲绝我见之始欲言愁哀乐无端人听焉浑难自主舞山香之一曲技至此耶闻水调之数声观其止矣盖词原靡丽体虽本于房中而语必遥深义实通于世说彼汉宫之衣袂固自伤淫若宋殿之屏风尤为失隼而葆汾穠纖合度摇曳成姿拗益加妍在疑雨疑云之际淡还生艳是非花非雾之间譬姑射之仙肌何妨金粉若太真之艳质更胜铅华故使淮海惭声屯田辍响美人南国叹红豆之丛生词客西崑谓青莲之再出昔天下历三百载此道几属荆榛迨云间有一二公斯世重知花草信乎五茸之兴废关于三李之重轻今葆汾并轡相羊齐鑣髣髴彼徒惭其倚树此益美乎积薪君将奉勅以填行且闻之枫宁我且选声而听悉以付于雪儿倘或问陆贾之装黄金几两则请诵姜夔所谱白石一编耳

董少君挽词序

少君桃叶名媛也姿穠转玉品贵埋金鹤矢意於离羣鸳有怀而慕侣吾友辟疆闻声晋渡觐面苏台灯下团纱醉眼曳留仙之带江边画桨同心借续命之丝乃雅韵难谐情波更折三生有石遂坚匪石之心离恨无天欲作问天之想转车轮于午夜瘦尽灯花驾艇子以秋风来逢月树遂使当时才子竞着黄衫命世清流为牵红线玉台重下温郎信是可人金屋偕归汧国遂为佳妇闲心向月并啖红箫巧笑将花同临碧镜香分博士贪烧鸂鶒之斑书学夫人戏问鸳鸯之字扇松风於林下静影如吹吮梅雪于庭前天心自浣新橙未擘纖手讶其香留弱蕙初承小唾疑于花乱斯可谓独秀青闺恒芳彤管者矣尔乃楼通西阁琴调大妇之心饁进北

堂羹諳老姑之性过华亭而听鹤乱中存赵氏之书入臯庑而依鸿病里伴龐公之坐十年织素巧在丝前五夜弹箏韵流弦外乃惊鸚鵡之梦果有不祥伤鸾凤之身于焉速化死而可忍弥留椒蕊之筵去必有归恍惚莲花之国某偶游射雉恰值骑鸾见奉倩之神伤为安仁而气尽云高巫岭不遮伤逝之心雨入巴山尽是悼亡之泪展湘鈎于遗墨覩旧日之钞书省瑤佩于生绡见春风之出画闻其语矣为之泫然媿乏八义之才聊代七哀之赋青牛帐里想入梦以氤氲紫玉坟边当闻歌而宛转

范汝受十山楼词序

夫词者诗之余也诗号三唐极骚坛之变化词称两宋尽乐府之源流然风雅所传不能有王韦而无温李岂声音之道乃可右周柳而左辛苏譬如五味之滋并陈醯醬若夫八音之奏同具宫商乃说者互有所持而究之皆非通论也予友范子汝受少多奇气人知孟博之名早擅贤声世重巨卿之义青箱家学闻六艺于趋庭黄绢才华夺五花于?事聪明冰雪学架区中意气云霞心倾海内当年对酒同游白兔之园此夜论诗共宿青鸳之寺杯酣耳热辄发新声灯尽人归多成逸调所着十山词二卷清而兼丽直如霞引新桐澹更多姿有若云横古木听琴弹於清夜独爱月明比花发於空山偏临流水皆以自然之韵抒其不染之怀更将独得之情出以无穷之思以视世之雕金镂玉仿优孟之衣冠筑粉涂脂学夷光之顰笑者实已有殊於河汉岂但尽洗其铅华而已哉嗟乎华屋斜阳海燕有难归之影离亭暮雪流莺惜欲别之音予既将返于江城君亦言怀其旧里乃命小红以吹笛倚曼节而歌遂浮大白以挥毫作数言而去

黄庭表古宫词序

嗟乎西京路失致叹黍离东国人归言譌麦秀仙人汉阙洒别泪于金盘商妇秦淮抗哀音於玉树盛衰之际感慨生焉而况羸鹿虽亡道原存夫恭俭轩龙既邈事有异于荒唐蜀魄号冤难招望帝徐方感德犹忆偃王则甲乙观书撰述无嫌於南董岂癸辛遗笔流传有禁于中?此吾友黄子庭表古宫词所由作也夫宫闈之制易近哀淫禁鑠之篇多伤靡丽此则述忧勤之实事可补国史之遗忘记典礼于当年足备兴朝之考订大家亲说见闻本确於仲初臣子铺扬夸大不同于禹玉岂止青城妃子记孟蜀之偏安绣岭山翁想开元之全盛而已哉清歌一曲请浇杯酒以醉苍梧长恨千年愿系双丸而听黄竹

汪晋贤桐叩词序

夫词之为道始於李唐而其体浸淫於五代盛于赵宋而其情原本于六朝故体以靡丽而多风情以芊绵而善入虽有花间兰畹之目实则美人香草之遗也余友汪子晋贤甸外飞才区中架学论文独妙已结契于青松顾曲偏精更留心於红豆以故鸿冥高士目以瑤林鵲起才人称为玉海而汪子乃以桐叩词一册问序於余受而读之浣手濯薔薇之露函而藏之熏衣吹兰茝之烟譬见杨环凭栏独笑如逢郑旦却扇自怜秀本出于骨中妍复生于肌外是有托而鸣者何其言之丽哉嗟乎古调寢微新声竞起效周柳则折腰齟齬以呈姿宗辛苏则努目

张眉而称快安得以此颁诸乐府悬以国门花底沉香爰酌玻璃之盃灯前锦字试调玳瑁之箏

孙汲山山啸词序

予与孙子汲山论交者三十六年赋别者一十七载中间风雨无非剪烛之期到处莺花不少衔觴之会维时长沙公子常授简於西园淝水先生每徵歌於南第名贤雾合竞奏新声硕彦星罗争传丽曲雪儿坐上弹箏红豆之词云母屏前击鉢青莲之句而汲山悠然意远不辞金谷之三升卓尔神闲时倒玉山于一夕人皆讶其莫测予独许以无俦泊乎旧事空花故人小草十年冰雪频消京洛之魂两地山川再执河梁之手询其近况示以新篇爰开古锦之囊尽出明珠之篋格传长庆已堪元白齐驱律協大晟尤喜秦黄再见或体物而尽态或即景以妍情或慷慨于欢場或纏綿于别绪莫不匀笺意满振笔情飞自有鸾凤之音响传山半羞作鸚鵡之语词寄篱间得兰畹之微何论柳家第七穷草堂之变宁言李氏成三遂使吴下羣贤同为刮目邺中诸子并极赏心岂非逸气横流惊才絶胜者乎昔达夫覓句在中岁而方工子美言诗亦晚年而入细而或者偶逢龙睡遽欲阻以重云未见鹄飞遂谓量其千里是犹拘时俗之见乌足论天下之士哉

饮水词二刻序

一编侧帽旗亭竞拜双鬟千里交襟乐部惟推只手吟哦送日已教刻遍琅玕把玩忘年行且装之玳瑁矣迺因梁汾顾子高怀远讯停云再得容若成君新制仍名饮水披函昼读吐异气于龙宾和墨晨书缀灵葩于虎仆香非兰茝经三日而难名色似蒲桃襍五纹而奚辨汉宫金粉不增飞燕之妍洛水烟波难写惊鸿之丽盖进而益密冷煖祇在自知而闻者咸歎哀乐浑忘所主谁能为是辄唤奈何则以成子姿本神仙虽无妨于富贵而身游廊庙恒自托于江湖故语必超超言皆奕奕水非可画得字成澜花本无言闻声若笑时时夜月镜照眼而益以照心处处斜阳帘隔形而不能隔影才由骨俊疑前身或是青莲思自胎深想竟体俱成红豆也嗟乎非慧男子不能善愁惟古诗人乃云可怨公言性吾独言情多读书必先读曲江南腸断之句解唱者惟贺方回堂东弹泪之诗能言者必李商隐耳

余文宾蓉镜词序

维兹贞岁言归采菊之庐适我巢民亦过垂杨之苑月明无恙或听吹箫雪意将垂时同剪烛爰遇雕龙之客频闻扪虱之谈则余子文宾斯其人矣余子登楼舒啸雅负豪情击筑哀吟恒多丽节遂使杨郎耳热得酒还歌屈子神伤闻弦起叹予两人用是兴十年之感而余子益以深一往之怀也因探古锦所藏遂得新词一帙灯前展读若有人来檻外披寻如闻花笑点僧繇之画疑将破壁而飞持赵后之裾竟欲随风而去香生字里不烦燕尾留芬艳出行间未论蛟文比织此则微云半抹直登淮海之堂残月一痕已夺屯田之席者矣尔乃髯真似戟气欲如虹曾事侠游不惜千金买劔长多豪举独数百尺横牀则宋广平可赋梅花张留侯宛同好女人固不可测才又何能量耶嗟乎四百年来古诗词几归天上三十载内新声空满人间周郎

之顾曲难逢娘子之记歌谁在则词家九字不推仙李帘前而酒肆双鬟应拜芙蓉镜下也

史云臣蝶庵词序

塞巷春泥陰连人日盈庭冻雨寒甚尧年吴生方煮酒以读骚陈子乃拏舟而欵户好风拂座与客俱来朗月投怀如人未已而余与史子始联嵇吕之交尽读秦黄之作相其体制备有风华揽厥性情雅多深至因叹今日声音之盛实为当年骚雅之衰用考诸家良由二弊一则因本房中之体务雕楮上之文量五色之真珠何关窈窕披千丝之神锦祇益妖淫宝井琼厨似入波斯之肆烟绡雾縠徒盈织染之坊宁知人出西家那用露华遮颊品高南国不须黛叶通眉一则缘写思妇之情罔顾风人之旨夷光自好而偏学其捧心孙壽何堪乃独怜其齟齬本是清羸之疾回身谬作纖腰原无袅娜之容曳足阳称巧步宁知神如处子曾何藉于矜持婢学夫人祇益形其羞涩于是俳谐杂进图画靡真识者欲矫以辛苏究至有乖于唐宋兹则以其古意用发新声丽不伤华清非近弱都梁迷迭熏炉同是荀香扶荔鲜支入苑都成汉树珊瑚挿架光鲜逸少之毫琥珀藏衣响夏丽娟之节吊鸱夷于胥浦白马银涛问帝子之湘灵青蛾锦瑟翠翘金雀皆本于读曲之篇香草幽兰无失乎寓言之意斯固屯田愧其残月淮海逊其微云者矣于是陈子为之倚声吴生因而击节邺台座上还闻车子之讴李氏筵中共听雪儿之奏但令弓弯踏处得五斗以同倾岂待羯鼓催时随百花而竞发

孔东塘宫词序

十五国而陈风钟鼓式和于宫内三千人而为雨琴笙本叶於房中盖教化始於后妃哀乐因之而起而窈窕比诸君子讽喻由此而深是以范蔚宗之敷华因而列传王仲初之摘藻爰以名篇然而桐雨花风时为易感莺啼蝶恨事近多情三国十家有非常之雨露千门万户多不尽之风霜于是写以珊瑚传之翡翠或流于侈竞夸玉女之窗扉或失之靡漫洒铜仙之涕泪求其词兼丽则调合中和罕有当焉盖亦难矣东塘先生尼山宝罍泗水璇流本圣绪以维贤用今人而学古道综六籍偏传诗教之精微义总百家更得乐章之美善偶成宫体遂得百篇久擅词坛咸夸七子以忠臣孝子之义托于梦峡啼湘抒贞姬旷女之思传其憔悴脂瘦粉玉钗罗扇皆缘忠厚之心鸾寝羊车各极纏绵之致比诸供奉花前益有新声较以龙标月下如闻长叹此则命词之旨早据上流啓秀之先无惭大雅者矣尔乃银鹅金凤制度出于累朝然蜡抱衣典礼详于四序此则铜沟月冷弗得称说於大家绣岭泉温不待传闻於宫监闻而足感应教金屋多颦歌以堪思欲令玉河皆咽红牙敲处宁无调落灯前翠黛低时定有韵流弦外岂如汉宫丽节祇传遗事于佩兰唐苑新词但得柔情于花蕊而已哉呼李峤为才子我亦云然赏佳期于婉儿君真若此

茅天石溯红词序

出湖南郭半百里而遥有山东林矗三峰而立葛仙翁之丹井于此在焉吕真人之画垣未之湮也虽黄金白酒与旧迹俱遐然碧嶂青溪具名都之胜吾友茅子天石先人数楹居梧竹之间三径在蓬蒿而外流离兵燹拜杜宇而犹怜移徙琴书听蟋蟀而未远然而情殷与砚每眷

故都遂亦兴托含毫多賡雅调柳七郎之作非为多情张三影之篇俱成絕唱爰取梦窗之句名曰溯红可入花庵之编歌而浮白盖天石之审音最细而天石之按律必严譬如李帅之旌旗能移其色亦若程营之刁斗不紊其声谱合大晟节奏长谐于锺吕法同内部短长悉協于宫商得淮海之精岂止云高一抹具清真之妙宁惟露湿三更夫娘子记歌犹烦红豆而周郎顾曲乃在碧油亦何让焉斯可乐矣昔锺期雅奏乃知山水之音张子清言适有松石间意是可拊美夔之节聊以遗庄舄之思矣

陈次山香亭词序

予昔与陈子其年联枚马之交具袁羊之目每谓牀横七宝合有斯人果至簞制五花终推此客迨於鬱孤台上复遇纬云遂于章贡江边仍同旧雨乃汪甥上若京洛回轅方千里而言归出一编以相示则次山陈子所作香亭词也夫系出三君长多伟士建安草檄骥骋於七子之坛颍水将军凤翥于二难之席才高良史以椽笔而着声文蔚儒宗碎胡琴而振誉或荐于元佑而诗文自是一家或文动绍兴而翰墨独高羣辈然皆间代而出或异地而生乃我次山实皆荆水心伤广武叹往者之难逢踵接毘陵觉後來而居上文推梦鸟撷八代之英华声满求莺统九州之气数焚君苗之硯不俟篇成染文通之毫每闻花放常賡八韵何殊江上峯青偶试七题宁待堦前日转固已声传洛下名重江东元礼开门竞接停车之客当时置驿争迎惊座之人乃复兴极情来酣余神王楼头击筑还为兰畹之音市上哀歌时发草堂之唱在酒边而怀友向逼乌乌过花底以言愁性同素素千里有还家之梦四时多子夜之吟行见酒酌玻璃天子命龟年而度曲岂但弦明翡翠雪儿按鸾板以徵歌也哉夫词出骚坛实原乐府非诗非曲其妙在深浅之间可乐可悲其调以安和为主自说乖三易都忘邦彦之章而独笑七分但鬪刘几之句寝非古调岂为高言而次山独能出其清思振兹丽藻以秦柳之柔情发辛苏之逸气或芊绵而不絕如睨晓之啼莺或奔放而难羈如嘶秋之骏驪左提仲举与太白而高吟右挈尧章听小红之低唱吾不知其所际又安量其所成乎方诸其年宁并驱而驾也乃呼上若相倚声而歌之

家镜秋侄香草词序

时当渡豕序值鞭龙将踰梅岭而南偶憩蓼洲之上听翁老叟初访徐穉以登台族侄镜秋常就扬云而问字迨乎旋车隋苑却扫芜城复惠寄以数行用徵言以一帙啓而卒读尽为兰畹之篇展以长吟可入花庵之选夫河山千里犹记绸缪岁月五年未忘慨慕此其过人远矣不几用力多乎是以链字偏工谋篇益妙香浮楮外如披荀令之衣珠吐行间若发贾胡之棧岸留残月声韵溢于屯田山抹微云格调夺之淮海寓幽情于湘芷托骚思于蘼芜拂几清风足擅一山之馥盈笈华露可靠千步之芬所谓种自都梁全无别味烟吹薰陆不杂余滋岂曰非耶蔑以加矣盖其弱冠即负迈世之才甫及受书而具兼人之学杯浮御苑用登七宝之牀曲奏旗亭定下双鬟之拜撷中林之兰蕙吾欲移以赠君肇初日之芙蕖人又谁能及此也

黄仙裳诗词序

论交四海少慕袁丝作赋十年早逢叔度则仙裳我友此其人乎仙裳雅负俊才素怀奇节汉家童子江夏本自无双宋代才人著作斯为第一而田间艺黍恒愿为兄坐上推梨常闻与弟见孝廉于堂下独养萱亲入参佐之廨中无惭棣友是以高车竞过如看太学之碑美酒频将或问玄亭之字及乎时嗟改玉事异投珠将陇亩以终焉岂波涛之偶尔身充狱卒爰明李固之冤产破中人竟脱范升之罪斯其赴义足用廉顽矣仆壮听鷄声曾同旧雨中怜鸿迹常忆暮云而仙裳不与客俱罕因人热廿年离恨相逢在桃叶渡头九月愁心共话于菊花篱下搜其敝篋示我佳篇受而读之观其止矣钱刘雅调是大历之才人周柳新声亦宣和之丽节冰壶一片清如洗马之神镂管十寻豪匪元龙之气将见波澜独老可追步於如花岂止格律偏高足娱心于藉卉也哉爰为贶酒同登孙楚之楼遂尔和歌并击荆卿之筑观者窃笑谓曩客之何狂醉而兴歌恨古人之不见也

毕正持松涛阁诗词序

余老矣未能偕少年游又卑之不喜与俗人伍而南邨晨夕独爱渊明东壤风烟恒依子美者有毕子正持焉正持雅负隼才兼居密戚潘杨之睦既有所自来张陆之文乃因而更洽丙寅之岁夏秋之间适仲氏之远游喜伊人之快集於是深林着屐高榭披襟坐明月之二分当雄风于千里而正持每从客次先得予心抽架上之书尝窥鸿宝探囊中之锦早获骊珠响出行间不惊人而不止香生笔外每遇物而偏工五字城高得随州之俊爽六朝帜建有开府之清新斯则读其辞者当以蔷薇浣手思其度者谓如芍药生姿者矣至若调取青莲词填白苧花间小令直登三李之堂柳下新声欲夺诸鼂之座既吹花而嚼叶亦啸凤以鸣鸾斯又玉树惭花金茎失艳者也然而会心不远如当濠濮之间举体非常似得江山之助何若是其异也岂别有所得乎乃正持避席而兴推琴而对曰予家白岳是在万山之间地有苍松迥出千林之表因而建阁颜以松涛秋之夕春之朝身若浮乎云海入而息出而游耳不絶乎天风虽非冰雪之文聊堪避俗窃谓烟霞之癖难以告人余曰是矣古有人焉句曲斋前日婆娑而看五鬣蓝田厅下时讽咏而对双株或相号白衣而名高当代或官卑花绶而誉起同时惟於物外以摅怀故可区中而架学也子而得此我实慕之何日同归携百篇而登百尺于时朗咏每一树而歌一章

家镜秋侄诗词合集序

原夫制作之盛衰每因其世而文章之高下惟视其人是以前毛麟角其材不可相兼兔夜乌晨其时各有所用揆之千载考之百家信有然焉或无疑者予与族侄镜秋为鯤运之交敦籍咸之好以文义而赏会其游也不啻乌衣在江汉而相通其见也曾携玄草乃滕王阁上始擅美于填词迨炀帝台前悉见长于诸体盖其豪气既啸傲于烟霞而其侠游又留连于丘壑着书系舫西岭之爽色飞来种竹寄亭东湖之晴波自绕到处春风仗劔谁识英雄吟来秋水露襟可称才子常浮画桨涉彭蠡以观澜喜载青编登匡庐而挹瀑望斜阳之千里辄叹佛狸见山色于六朝长怜司马问琼箫于隋苑听月多声拥宫袍于敬亭看云不厌吴波别鹤种红豆于三生胥浦留鷄泛白沙之一曲廊空响屐都无麋鹿之踪弩可射潮大有鱼龙之气吴江叶下每多枫落之篇浙水涛来频咏雪飞之句于是浴朱砂之水峰是莲花擎珍珠之帘岩多榔

树大好山水任彦升之所游不辍舟车马子长之所历时逢注目日有赏心凡所身经即为兴到或如啼莺啭晓听者恒自情怡或如朔雁惊秋闻者每为神耸或如清箏入耳哀乐不能以自由或如雅操抒怀高深悉有以想见总之义以深而得秀辞以淡而愈妍譬诸弱柳临风春到还为濯濯亦若新桐引露晓来更自亭亭以故五七言之尽神并高温李以至长短调之入妙不让周秦置以绣丝炫目蒲桃之锦装之玳瑁移情兰?之香人有兼长固如是矣文多合作诂可量耶况夫九龙并产师友得之门中一鲤再过诗礼闻之庭下抽书赌茗玉台若对良朋伸楮联吟画阁常传韵事其得之家国者既深其生于天地者非偶逢好文之令主杨得意岂尽古人遇爱士之高贤左太冲宁惟今日空堂对酒幸共坐于残春远道飞书愿无忘于旧雨

王学臣杜鹃声集序

安仁去邑栽花犹忆河阳元亮归田种菊惟思彭泽盖古人足迹所至即为当时精意所留非但欢欣乐易之情足以传诸题咏是即悲哀劳悴之意亦足写其声音者矣学臣王子以治剧之才受烹鲜之寄当滇黔之孔道值兵燹之残黎手可独支兼方圆而靡困腰虽频折历俛仰而无愆卒之士饱马腾时少呼庚之虑至今民怀吏畏殊无旁午之嗟濯锦江边朱仲卿祠常荐酒浣花溪上羊叔子泪欲盈碑而剔弊蠲苛恩多及物乃直情忤俗性不谐时归而选胜平山撷芳蜀岭门前垂柳犹有清风阁上观梅全消旧雪于是为谢安之拥膝何事不可以咏歌效长统以舒眉无时不成其愉快何不作鸚鵡之赋用厥长才乃独以杜鹃之声题其简首也哉盖拾遗下拜重怀古帝之魂虞部言愁啼比婴儿之痛吻边流血欲诉无从月下悬身长号不止比于戴星而出劳苦不能上闻解绶以还减分何由自白将无同也不其然乎若乃高调凄清如唳霜之鹤或而柔情婉转若啭月之莺复有奋?之难齐类惊风之雁阵至于洁鲜而自喜有映水之鸾文然皆多不能语之情且与夫不得已之故流于笔墨之表传乎节奏之间以周柳之华章运辛苏之逸调非同鸚鵡之语似小子之啁嘈所为杜鹃之声使离人以起立者矣予取而竟读为之朗吟感慨多怀宛在锦城月下低徊欲絶长行玉垒山中

汪甥上若诗词小刻序

诗欲才高而过巧过拙皆为才累词须韵胜而或浓或淡咸使韵伤求得乎中实难其选而汪子上若则为近之汪子不藉门基能符宅相姚崇器重曾教儿侄连名卫玠神清竟与妇翁齐誉洁如姑射本自辟尘妍似昭阳何由着粉遂使花开管上皆成五色之文锦出机中别有九光之彩此则芝心蕙质良堪俯视西崑即在兰畹草堂亦可远追北宋敢云黄鲁直之诗句得之谢公正恐王元长之文章归于阿土耳

林蕙堂全集卷五

卷六

<集部,别集类,清代,林蕙堂全集

钦定四库全书

林蕙堂全集卷六

湖州府知府吴绮撰

序

太白亭修禊序

道峯之麓归云之旁有诗人孙太初之墓焉予以丙午位郡首为剪其蓬蒿迨及己酉去官久未将乎苹藻兹逢春暮时值上除爰有名流言修禊事山陰上客方并集於兰亭庐岳幽人亦相过于栗里陈家持杖才有季方洛下将车还同叔宝于是怅高风于既往惜胜事之难追偶尔班荆纷然藉卉青樽蛮榼挥觞于下马之陵乌裕长藤布席於听鹧之墅望赤城于海上似欲逢仙聆苍籁于山中如闻招隐于时东堂雨过桃花红近竹林南涧天高苔水碧同云影洵可乐也畴复抱琴而来何以言之可少含毫之赋罚同金谷聊分处士一瓢写用紫丝独让右军双管矣

胡循蜚尺牋序

原夫行人执简义取疏通作者含毫辞占体要陈孟公凭几而授咸有当于亲疎陶士行削牍而书曾无遗于远近昔维重矣今或缺焉而吾友胡子循蜚管乐弘才班扬丽藻早挂冠于乐岭遂挂笏于米山匡时有论断义仿之马迁玩世为心谐语同乎曼倩乃至友朋戏谑亲串问遗莫不出安石之碎金皆可当士衡之积玉一函春送字里花生半札宵投行间月照诚如对面实可移情譬积萱苏见者愈三年之疾如搴兰茝佩之生十步之香昔谯国高贤尝矜懒慢豫章太守或听浮沈恐见斯编还忘故癖谁为匡鼎将听之而解颐得遇李膺且闻焉而捧手矣

江逢其地理集成序

盖闻燧皇幽赞肇分八位之方炎帝仰参乃备四营之数形脉测之白阜疆域步于大章于是八万余言夏演图而首艮四十五策殷列卦而先坤艮取兼山坤由行地堪輿之说由来远矣然严善思之建议山川上应于列星童初中之链形丘冢攸开于五炁坎峯高揖是为彭氏之阡洒水却流永定孔林之里自非精通八索默契三才未可析妙理于牛毛决神机于龙耳也

江子逢其游心画表得意象先似吕蒙之梦神人全通一部若虞翻之逢道士早饮三爻具彦辅之清言兼景纯之奥旨故其集成一书以地道而合诸天人用周义而通乎殷夏四元密诀远契金精八字灵詮遥通玉检既拨沙而得解亦画地而成图虎啸八垂识神仙之讖龟言百世泄水土之灵岂必闻音指桑东于裴侠何须得篆定树下於沈彬哉至若道合推莫识高累黍宾寅纪物曾无爽於金仪纳甲成声遂有符于玉琯斯则伯瑀之所不及延翰之所未详而徒以牛眠徵奇鹤来志异沙中竹策表徐地之祥土下木根去婺人之患则占验之小术岂河洛之真传也哉爰弁其简端以俟诸识者是为之序

青来程君湘潭瘞骨纪序

燎原莫救白骼成丘塞水难流青磷遍野使周文王而若见益厯如伤非韩卫使之曾逢仍同罔覩兹幸倡於程君青来和於黄君希倩偶尔浮湘共为哀郢施既穷於广柳谋乃就於空桑由秋杪以迄春余二十旬俄踰半载皆手胼而与足胝六百筌何啻万骸塔建普同岂筑鲸鲵之观园开漏泽尽驱狐兔之尘昔汉水之蛇曾衔珠实即华陰之雀犹献玉环况系有情种就岂遂无情原自果报得来何能不报惜也昔在一邑获免夜台之悲痛哉今则四方并作春闺之梦夫安得两君子化为亿万身以俾此衆冤氓超出微尘劫乎

题方秀千园居像赞并序

夫一丘一壑谢幼舆身置崑中半水半山仲长统心游物外此为幽人之逸致实亦旷士之素心也吾郡名亭向有竹西诸胜兹时别墅多当城北之偏然俯涧依冈势难空旷连巢并垒地少纡回略存栏檻之形未尽林泉之兴而秀千方子始在壮龄豪似元龙比襟期於湖海俊如司马仿意气以云霞爰因爱日之诚遂有买山之乐当门种柳晋处士之清风引溜栽荷周先生之雅致尔乃心通仁智理彻高深遂能即近为奇因疎得秀径以曲而花分阁以崇而树合泉回仄礀竹隐幽枕酹酒临池可侧山公之帽焚香扫石堪陪谢傅之棋方子偕彼贤昆将其壽母进茅容之饌日膳双鷄御潘令之輿时同一鹤兄酬弟唱合棣友以承欢三笔六诗对媒妻而共醉斯则孝为养志爰以引和者矣爰属虎头濡其麟角写菟裘之丽景极燕息之幽怀跂足林间不羨黑头作宰科头树下无烦白眼看人远眺晴岚望三峯於缥缈旁临曲涧玩一水之滢洄于以息焉亦足乐矣夫四宜莫并衆美难兼地有名山罕渊明之二三友人虽胜士少戴符之十万钱空有玉潭之书不卖平泉之石古今同慨人境罕齐而兹抱独往之情得双清之趣寧不足写沧洲於妙手追濠濮之遐踪也哉乃为之赞曰

奇士耽幽少年知足春树千株寒河一曲其室则还有人如玉据石忘形临流引目有琴有樽不栉不沐抗怀昔人匿影空谷意淡弥高神恬益穆隐显不殊古今齐躅

张山来笔歌序

闻之诗惟言志而能诗莫尚於青莲曲以宣情而顾曲独称於红豆然情之所发乐之数不及於哀若情之既深真之极究归於诞古之达士庄言之而或乱以谐昔有文人静观之而即有

所动经留于子首称乎漆园之书赋本于骚独妙在江潭之作也吾友山来张子少承家学早负时名书既读于等身赋复工乎义手乃于授简之暇爰多協律之篇酒边时复高吟花下频为朗咏哀其所制题曰笔歌以一帙而示予命数言为弁首夫子文无口何意能声元銳诸毛寧能奏雅子惟是也谁其听之既而展卷以观乃复掩书而叹仰怀穆满闻天

<集部,别集类,清代,林蕙堂全集,卷六>路之难登远遡嗣宗怅世途之多阻巧难胜拙徒貽诮于陈梭衆欲呼颠且放狂而具笏武侯洒泪千古沾襟令伯含毫百年陨涕他若兴悲于弱子并足遗慨于後人此为之歌痛于泣矣岂其为笔不能言耶盖情之感于欢乐者轻而感于悲思者重情之托於言语者浅而托于翰墨者深所以拔剑高鸣匪云乐只扣壶长啸惟唤奈何而已但韩娥抗声而四座之悲欢不一叶女合奏而一人之卧起再三彼其歌者之精要亦作者之妙也嗟乎人生快心之处寧有几端世间失意之时当非一事吾安能借三影之丽句尽以写千古之闲悲也哉

赠徐浩然序

文举好贤门多雅客伟长博古时得异人则有浩然徐君者其流亚矣君以东海之名家得西雍之秘典丘明撰史自续典坟师旷审音偏宜雅颂既知其变而复得其所同爰识其文而更详其为数适翠华之临幸雅意崇师值玉几之亲承留心访道有怀厘正简名儒而用杜夔特命精研求异术而知郑译问泗滨之石磬欲叶中声购楚室之梓材将成雅奏盖将宣中和于阙里岂只备歌舞于太常而已哉予以班荆之好既投契于东塘乃因累黍之精遂订交于南国叹难能于絶学谢弗逮于妙谈其不美欤信祖少卿有所不及于其归也实李都尉之所难忘矣爰弁诸诗书以为赠

记红集序

余向有选声一集问业四方节欲其谐尽是迦陵之语音期于畅无取蛮府之谈固已响叶红牙遂得赏逢青眼人传珠串旗亭欲拜双鬟家奉金科乐部同推三影然以簿书旁午犹惭顾曲之未精较閱刁丁尚苦谋篇之不备积怀既久适耳为难逮卞岭之投簪得康山而键户频回俗驾同心赖有求羊尽谢尘氛寓目能知亥豕乃有陈子丹问既研精而肄学亦好古以求音咸搜兰畹之藏益广花庵之选窃谓词虽小道义在大晟究其源流体制实由于乐府相为表里兴观允助于骚坛是以三唐伟士两宋名贤无论秦柳之专工以及辛苏之媲美他若考亭理学犹歌绿酒飞红茱国清贞亦念杏花芳草忠如武穆尚矢韵于凭阑烈似文山复和歌于缺镜赵忠简之一枕梦入江南范文正之孤城心伤塞北皆有怀于白苧曾何累于青编至如供奉之名重开元三调实为星海太傅之集高长庆诸编独擅春江欧庐陵文冠八家小令偏多旖旎苏眉山书传千古长讴更自雄奇盖词章原非两途而诗笔诚归一致或以才难兼胜遂言义有相妨斯则浅见之拘挛实少英流之卓犖矣若夫和凝入相辄羞曲子之名韩偓登庸便悔香奁之作斯又唱渭城而不暇寧关皱春水以为嫌耶予与程子掇拾无遗编摩最久谱蒐古逸寧言葑菲之微词尚淹通用冀枣梨之壽务令记歌娘子数红豆以传声勿使度曲才人望青莲而阁笔

巾箱诗词二韵序

原夫律吕相宣声归大雅陰阳互協义尚中和故衆管克谐而法先用损诸经并列而诗独宜删此东阳之四声传西园于千载也但高才领异互矜扬子之奇末学文疎反失沈侯之妙非樊绍述而专尚夫诘聲岂刘知几乃谬工于茁軋斯则声音之学必须厘定为先矣予泛迹珠江避尘金地闲居抱膝聊寄兴以销忧独坐捻髭偶选声而送日爰检巾箱旧帙重为韵府新编诗则准之升庵先生而兼夫百谷词则遵乎东江主事而参以笠翁庶不杂不紊咸知宗乎典要而毋奇毋险总可出于清新付之梓人公于藻客将囊盛古锦得共探其骊珠而佩用芳兰可弘章其风采矣

崔莲生四时小影序

盖闻涵育羣生者必备四时之气包举一世者务养五德之纯柱可擎天而苍昊于焉定位斗能福物而紫府用以垂芒是以變理必赖元臣而亭毒迺归真宰也崔公莲生博陵硕彦恒岳名贤鍾薇极之灵符得兰台之正气生而忠孝既有类于仲文早得才华复无殊于亭伯故能献天人之策名重广川乃致受民社之符勲高密县保孤城于烽火之日厝岩邑於泰山请重兵于刀锯之时奠穷黎于衽席荐牒屡传于三事简命乃畀以一麾开庐陵之堂重栽杨柳登安石之埭更种甘棠而问疾苦于苍生出之汤火治安於黄老与以生全遂以简任两淮用以匡扶半壁盐铁也而行之以经术耻为心计之弘羊钱谷也而泽之以文章欲扩仁恩于子骏卒至关中转饷救寧终赖于鄴侯岂但江左抚绥镇静允归於安石信伟绩难以更仆然大略始於人民盖其力之足以济屯实其才之足以御变故听讼之际常擐甲以登陴在戡乱之余即投戈而讲艺又其政足以及远乃其德足以化愚故不忍存心化多事以为无事而志诚在念齐衆情以为一情至於量之有余实其心之无欲故处脂膏之内而皎若冰壶当襍乱之时而平如玉尺若夫明之作哲则又守之常贞故时在致身加威武难以屈志而义为守土任邪妄不入其衷是以元亨利贞自得乾坤之正而陰阳寒暑能调水火之平以之比于古人则衰冬日而宣夏日用以揆之圣道乃夷清风而惠和风也何来妙技之虎头爰写神姿于兔穎设境中之境身历境而长闲生身外之身境遇身而更适花间卷帙无非与物以阳春树下收纶更欲出民於清冷吴江枫落常怀万宝之辰官阁梅开直欲四方之燠虽灵生一片裴晋公难写丹青而敬起千秋诸葛侯常留楮墨倘当代而梦怀良弼寧烦肖像以求哉若斯世而伫想伟人是可展图而见矣爰题其首用示诸来

郑蕃修梅花楼序

曩者怀人曾吟梅屋今兹得友适在萸江则有郑子蕃修肯与入林时为藉卉来同白社无违庐阜之盟共在青门更作兰亭之会应持一帙爰集多篇则以梅窗索句之图用乞筱墅徵言之作也夫郑子以超人之品赋迈俗之才体不受尘得烟霜之气心能似雪聚山水之情而好等林逋栽晴云于绕屋情同何逊写幽况于巡檐月色横分但觉瘦同诗骨雪香轮与应知清入吟魂于是胜客寻芳更推敲于驴背高人多韵还爱玩于虬枝吐异馥于行间不羨广平有赋乱香愁于纸上爰知官阁能诗某开卷情移闻声色喜如看浮动米襄阳应知有国能香净

洗铅华梁伯鸾寧复因人而热清极忘寒请诸君同锄夜月高而多韵将吾侪共嚼春水

己巳九月贈家酣渔序

旧里仙都夙称练水吾宗族处实重澄溪滙一派之晶莹当万峰之围绕可以三春肥遯颇足桃花亦谓数亩观颐犹存荷叶乃小阮云逸自号酣渔其有得于山水之间而自适于江湖之内者耶夫士因慕禄或见诮于波臣客可忘机多自同於溪叟今云逸初当壮岁夙负异才方致力於文章夺五花之簪可蜚声於殿陛登七宝之牀以好义之名传于当代用能人之誉拔于恒流其有闻焉何可量也胡为远同于鲁望取足于茶竈笔牀聊比于志和放歌乎绿蓑青笠也哉然而忘于荣利并辞独醒之名托乎林泉乃有醉侯之号此其志意殊远而其景行甚高矣于其诞降之辰诸君举觴以致祝乃于卷轴之首属予濡管而为言爰挹玉醴之浆效陶彭泽遂采金英之藥曰傳延年大斗堪浮子且得全以酒中流可泛吾将为扬其波

瞻龙阁序

家非止民部君既以瞻龙称于人复以瞻龙名其阁闻者未达听翁问之而瞻龙矍然曰夫龙山者予先人之塋所在也闻之古者过墟墓而生哀及乎风人陟岵岵而见志诚以心之所感实无间於三年故其目之所存乃不遥於千里天经地义难踰罔极之思行倚目参聊志不忘之感耳听翁曰孝哉君子有兹名也夫人之受恩爱莫深于顾复而子之报本情最笃乎瞻依是以蒲版耕田五十于兹而慕尼丘载笔三千以是为先仲子重茵泫然出涕臯鱼倚树黯矣兴哀不其悲乎皆此志也今民部君高义闻于天下陰德过于古人教子而受万石之封处世而表四方之望以着管寧之行可云无忝所生且将卫武之年岂曰亦聿既耄乃有视如在听如在遂至朝於斯夕於斯歿者犹然生可知矣远者尚尔近其忽诸抑闻山水之灵每于人事之相表况有忠厚之气能以地脉之吉凶今君之善修其躬者在兹君之永慕其亲者又如此则晴嵐远映而爽气朝来应必有连理两枝入神保之座右灵芝数本产希乔之庭中岂止顾氏之玉峯惟矜雅丽石家之金谷徒侈繁华而已哉余登其堂而若有神鸟三足翔曾子之冠排其户而如见驯兔两头在解生之舍

重修黄山志序

盖惟司马善游海外难穷五岳向禽多愿人间徒望三山境有未通则神理为之不接目有不至则纪载为之未详复乎渺哉莫可述矣至于神禹铸鼎伯益勒山海为一经皇汉成书孟坚列地理於十志扬子始为志录萧公乃纪山栖然而豹齿婉姸徒有真形之籙龙威仙丈不传宛委之编则天地之精英时藏于密而山川之秀异难得而言也然神境之开略有数事而弘图所建必待异人故夫康乐耽奇常多蹶屣许询济胜不待支筇度絙索以寻峯过石梁而观瀑是则陟幽之癖爰爲辟险之才若乃览浔江之作九子有待于谪仙诵庐阜之篇五老维彰于白傳赋天台者词堪擲地登太华者语欲惊人此又揆藻之英共有采真之兴至于庄严有象締构无穷开生面于山灵留苦心于岳麓无烦助木现鸞岭于片言不憚悬金集鸿章于百世斯则烟霞之志士良为山水之功臣矣予乡黄山着名鄣郡神器仙的聚三地之灵氛丹鼎

药炉具累朝之灝气去天咫尺出地亿寻虽天宝更名特闡軒皇之秘而慈光錫額尚留焗后之遺然由漢以來陳太守之後罕傳高隱自唐以上李供奉之前靡着雄文迄乎普門大師始開雙樹逮夫玄陽道者僅蓋一茅勝境猶虛達人滋嘆茲我內子諸父于升先生初當綴帛之年已有布金之愿一詞慷慨衆或為驚獨力經營卒成其志紺龍之宮斯建白象之路宏開厥在梵圖是名檀主爰求山志用授粵人取汪程三子之書定丘壑千秋之案既成卒業備此事之董狐復懼繁文滋他年之亥豕特延閔子賓連專司筆削并屬汪子扶辰嚴佐校讐以劉氏之三長權衡川岳用江郎之五色點染雲岫大書之間以特書鏤玉期成夫琬琰一刻矣仍為再刻施珠靡靳于縹緲美哉觀乎何其盛也或云先生之誕降具有妙因疑為道叟之再來完茲勝果昔傳眉山學士重登五戒之堂近則潛溪巨公更濡三生之筆曾有然者復何憾哉抑吾所聞先民有語黃山六百餘里能到者未及半途天都三十六峯可登者終踰十數雲霞之靈幻以地為天洞壑之幽奇在山而海既無黃鶴之羽徒嘆赤龍之髯力士擘河掌難通于蓮秦人垒石足尚裹于桃花猶能執簡尋源披榛覓徑則是書也直當藏之謨觴之館緘以琅函貯于輸寥之宮貽諸玉斧余未窮仙篆徒逢王烈傳看遙企神都輒羨陶公遐舉又烏足語以浮丘之道容成之功也哉

七星岩志序

天垂七曜運默化以靈杓海涌三峰殫神功于光岳蓋高卑之位既列而俯仰之勢以分兼而有之罕其覲矣余來端郡言陟定山竊焉窺焉降得幽而深得曠高矣遠矣形則異而氣則靈爰興渺然之懷遂有觀止之嘆乃觀察韓公具山川河岳之雄姿兼廊廟江湖之逸志恒于公暇共擬褰裳適值政成常謀濡簡適僧真際偶出斯編雖蒐輯之力頗勤而久大之傳難廣公乃欣然展卷為更訂其豕魚用是詮題遂命壽諸梨棗青緜縹帙借卉木以騰輝赤水玄珠映璇玑而絢彩家大司馬延攬詞英若文僖之遇永叔標宣旨趣擬玄晏之叙太冲蓋自昔名賢每流連于勝境故至今偉蹟多炳照于尘寰手摘瑤光見襟懷之霞舉氣吞雲夢識器宇之淵涵豈僅遇物能名效書生之珥筆登高作賦侈學士之抽毫是知挾雲漢以成章匪僅七襄之妙演會見與湖山而竟爽爰期千載以長留云爾

贈工画顾瑟如序

晉唐以來法遵三祖宋元而後派別累朝然方寸之間備諸衆有毫芒之內悉見多奇則推蚊睫之工罕及虎頭之勝矣顧子瑟如本四姓之英滙萬家之妙源流出於立本變化極乎探微吐納山川善寫有水之聲旋雨露能為沒骨之花乃復意在筆先神生物外既觀大以小收瀛海于棘端且得有如無納須彌於芥子宗家壁上五岳堪游蕭子扇頭萬里在握遂使工踰馬遠巧過龍眠視且難明欲眩離朱之目談而若妄几疑侯白之言此則高尚書望而腐毫李將軍為之擱筆者矣若乃迂同倪叟洁類滕生心有所期彈指無辭于水牯情之未合掉頭直謝以風鸞斯又翰苑之高人不獨藝家之能事也余見于拾遺坐上共嘆其工送于主簿祠前敢無以贈此時好我能圖虎阜以相貽他日思君為展鵞溪而若對爾

錢目天百二甲子序

原夫苍颉制书奇偶肇兴于鸟迹大挠迎策支干仰協于鸿苞厥义良为甚弘斯文亦称最古者矣兹者吾友钱子目天逸致云流胜情霞举才如希白常疑供奉重来诗似仲文辄共长卿方驾全神麴蘖恒居晋魏之间肆志缥緲不读秦汉以後偶摹史籀遂欲刻鸟图虫略仿羸斯更已编禾得穗及其暇也爰取建斗所占因而重之倍作纪年之筭六身二首展卷而无待于繇人七曜五行按图而有符于黄帝即文以考道而道莫尚于古文游艺以养心而心益精乎正艺也由此篆徵王烈虽未得仙苟其字问扬云还须载酒定六术以六义即不及天皇之万八千进一岁以一觴业已过召公之百十九子其醉矣吾且观之

医暇卮言序

予友程子云来学裕雕龙品高立鹤少有班扬之誉未展其才长闻庄老之言独知其解斯固羣超江左萃拔汝南者矣尔乃有术如岐恩流含气得经如扁名动诸侯通金匱之秘文着银丸之妙谛疾无常异煮一枕而咸瘥人有寒温试五炉而胥效又仰通于鸿术将大拯夫骈生暇而後医也医安得暇乎及观其卮言一书包举二仪周罗万彙用河间之博识抒稷下之雄谈道自显而知微理由穷以得变事分乎钜细以旷览而不遗类极夫洪纤惟静观而自得昔茂先辨物仅着洽闻辅嗣谈玄惟多妙绪粤稽斯集实兼有之以此去疑辟金鑑之刮目以此析理如铁镜之照心岂止王氏名流辨异闻于砭石泰山道士传灵册于瓠而已哉盖一人之身各具天地万物之族咸有性情不揆其通则无以详其变化不知所合则无以得其异同既揆其通复知其合故呪树能死缚刍可针病女或以出蛇邪鬼于焉走獭道之所至技亦神焉而眇彼戈夫矜其陋术未饮上池之水徒求灵海之方亦乌足窥秘义于巫咸测玄机于秦缓耶嗟乎圣人无位常居医卜之间大道有恒聊存施济之事吾於程子是编重有感矣

家文仲传灯录序

不有长明之炬难破重昏若无可续之薪谁开大照故宗门衍于西竺而觉路喻乎南离也若夫术取专家何关密印岂有书同正法欲等微言也哉不知阳主明而陰主幽幽则必烛之而後显天曰文而地曰理理则必晰之于至精此其说有真伪之分而其事在明灭之际也家侄文仲漱芳六艺振藻千言得杜陵之长诗中有格探考亭之秘删外存经业理協乎兼三亦数同乎参两乃获逢于仙客遂得授乎奇书兆灵验于桑东标奇徵于竹下篇分内外理备高深密义究于弘农有同圣训微言衍于诚意尽泄仙机杨君穷天地之精寧为救贫而立论张君寻山水之脉更因遗後以成篇具一卷而非繁咸片言而居要览其砂石水穴较龙耳而尤灵察于向背陰阳比牛毛而更细利其生乃所以安其死寧云富贵非致孝之心趋乎吉正所以避乎凶自是水土有敦仁之道符神谄于八字远契金精传真诰于四元遥通玉检允传高士定有鹤来何必神人乃占鹿起其于座上拈花之旨皆有别传庭前敲竹之机俱多妙悟也哉爰为鑽火用志拨沙

上郑郑氏族谱序

自先大夫潜德昭明代居丰右而太淑人懿修圣善系本荥阳予於吴郑之交世有潘杨之睦

而郑子东邑恒共雅游尤称夙好间尝溯河源于星宿考木本于丘陵图绘流民则近思安上
门开通德而远慕康成郑子避席不遑操觚以请则曰祖原洪姓实分胄于尚书姑适郑门获
作嫔于令尹时在宋元之季地当宣歙之冲活万户者封尹既宣劳于社稷从一人以贵姑乃
受服于河山野有留棠思而勿拜涧堪采藻荐则惟馨羊叔子之碑见者多为流涕晏恭人之
砦犯之犹有戒心而五桂勿荣孤萝独附孙而继子厥有前文侄不祀姑究非通论十五世以
後尽属耳孙四百年以来难忘鼻祖爰述其始末冀特为表章予感其诚弗克以让窃惟礼之
论祭必後海而先河志在程功或因堂而考室张家击鼓合八院以同餐苏氏成书建一亭以
覆谱凡以事原厥本因而义笃所生自行葦鲜敦本之情恒疎诸父而葛藟忘庇根之谊遂等
路人皆昭穆之弗明致亲疎之失据也况乎鲁妻抱侄义虽感于齐师而柴氏继姑礼罕闻于
周典其间式谷之故较螟蠃而加亲自此绵瓞之祥赖牛羊其勿践可不宣之赤管用告後昆
俾得守以青箱永敦前训乎乃郑子遵其庭训辑为家乘系别纵横支详远近由初世及乎末
世可按牒以稽自一人迄夫万人能合尊而飨而又追思祖武远访先型始则虬轩公仗节全
城射救聊之天继则狮山公持忠入地结赴卫之纓或遗爱之在人而家无长物或好修以洁
已而篋有奇书莫不彪炳後先鸿章遐迩斯诚美矣何其盛哉夫郑子童年刳股知报本以哺
乌壮岁立身方论交于结驷乃独存心睦族笃意展亲由其至性而行必有过人之业彼李昉
盛德惟给饷以资贫萧瑀元臣乃分田而贍党皆将企有厚望岂独丽其弘文乃谱之成冠以
上郑犹裴分三眷而东异于西若阮本一宗而南殊于北云尔

某上人挽章序

无佛法可说是向上事由声闻得悟乃方便门如某上人者盖其人也上人智炳黄睛行高白
足将调狂象振不二之玄风善驭法牛破六千之迷雾种旃檀之树此间不异东林嗅檐葡之
花是处都如西竺因缘普度曾开丹蜃之楼智慧高骞大建绀龙之宇弘扬妙谛翻贝叶而缁
素归心力转法轮散雨花而人天合掌业已仰参无上独悟有为者矣尔乃法性圆通慧因朗
彻能兼衆妙染翰远过于贯休雅擅诸长得句颇工于清昼而蟹行鸾啸每擅移情鹤舞雉飞
偏能入雅以非弦非指意常运于曲先在水在山声独流于轸外是以高贤倾盖闻音而共赏
其奇胜客停车洗耳而莫穷其旨而一花方绽于绛台双树俄归於鹫岭徒传只履谁复辨其
去来每听微钟几欲忘其喧寂爰抽弱翰并写哀吟怅向法以何人叹知音之不见则白莲社
里常深元亮之悲而紫栢庭前更切鍾期之恟耳

婺源程氏族谱序

盖闻名山之支有千而咸宗泰岱大河之曲凡九而悉本崑丘葛藟用庇其根而礼严於十叙
行葦以合其属而诗咏乎方苞故裴有东西河东乃为中眷而阮分南北陈留是为大宗疏戚
必有攸殊系牒斯为弗爽也吾郡实多甲姓诸程更为庆门盖自安定以来其流实远及乎忠
庄而後厥裔益繁或树绩于方州或策勲于社稷或支分於冀北或名著於河南咸开祚於山
川多垂光於竹帛簪纓继美颇称飞盖之乡棨戟承徽不异鸣珂之里此其宗派既已有若列
眉详彼家乘不必更烦屈指也乃其右族别号佑源则始於天佑公来自开化县奉其遗像占
籍邵南肇厥丕基是为宗首凡历二十余世聚国族者于斯逮今数百多年长子孙而益衆然

沧桑之屡变散在四方致谱牒之未详难传百代而尔功义笃先畴情殷祖武念箕裘之方大必水木以难忘爰肆力以修厘合谱不遗于唐宋遂覃心於谘访列图必悉其亲疎自一人以及於千万人可合尊而飨由一世以至于千万世可按牒而稽奉元晦之遗篇无乖礼教法仲淹之义举更切睦婣此其贻谋实为远矣夫礼之论祭必後海而先河志在程功或因堂而考室自世风之不古致宗谊之多衰乾餽忘敦本之情恒疎诸父原流失敬宗之谊遂等路人谁为挽之殊足叹也今尔功少怀孝友敦至性以哺乌早慕贤豪希高踪於结驷乃尤存心睦族笃意展亲由其行已而推必有过人之业行将应陈氏之卜俾炽厥宗岂但见苏老之亭而藏其谱也哉

阎氏本支录序

【阙】

淮

陰再彭阎先生两朝硕果一代英标弘文距司马之前高致轶伯鸾而上傍枚臯以卜宅独号寓公类延伯之寄居共推遗老屏藩伟迹列三戟以开基簪组华声聚五车而讲德家由祁邑族启晋都索一字之手文虽遥遥而莫考奉千年之鼻绪实奕奕以相成高山留禹凿之痕乔木本唐封之旧农桑不替咸传清德之家弓冶无衰共服先畴之陇逮逢元运始居西塞之村洊及武宗爰寓北淮之汴择四通而处信若陶盈卜五世而昌早知陈大绵绵瓜瓞美子姓之实繁纂纂椒聊且丁男之益衆乃先生忧其宗分而无统必且代远而难稽是订一编特详十叶速诸父而速诸舅罗若列眉孰为穆而孰为昭焕如指掌或贻谋以忠厚力敦秉耒之风或创业以艰难义笃牵车之事或带经于陇上有若倪寬或鼓篋于宫中还如朱勃或世传清白而心凜于四知或人絶雌黄而品高於三善或耳鸣之陰德泽播乡闾或手建乎弘猷功存彝鼎详略既已攸宜近远复为不紊四时合食可登苏氏之亭八院传餐并列楚公之宅尊其所自出用之木有本而水有源察乎所由疎亦可喜不庆而忧不吊夫参议公历居显任屡效繁疆操洁悬鱼拔薤与留棠并着神全履虎倾葵偕列栢同高从恬淡于急流裕谋猷于来?而先生雄文振古壮志济时慨东海之扬尘守西山于介石庭槐传响争夸才子之声篱菊怡情益挺徵君之望以百诗而为其贤嗣当代蔚其凤麟以复中而为其文孙举世知为鸞鸞行将腾骧皇路辉耀故乡直若崔卢冠百家于唐代寧同顾陆号四姓于吴都而已哉乃犹殫怀追远笃意展亲念一身以至千百身见其分当思其合由一世以至亿万世从于厚无至于浇则孝子之情可油然而起而仁人之思将自此而深安见五服之图不有关于世道而九族之序一无所益于民心乎

张虞廷弹琴序

余初识谐声即慕雅音于四善方能读曲长怀逸操于三均然少染尘缘志颇分于铅槧中婴世务心每役于簿书布袜芒鞋殊乖夙念高山流水独好知音则有张子虞廷实为今时叔夜两京作赋人推平子之才四库多文世重茂先之学久同白社每把臂而入林共隐青门常论

心而藉卉而张子诵读之暇每留意于歌风挥洒之余长娱情于操缦性偏谐于雅器神独会夫元音常用无累之心叶乎宫徵每以有道之物养其和平得意在心手之间求音于字句之外岩栖谷隐五七弦尽得其幽蟹行鸾鸣十三徽各穷其变可谓嵇心羊体巧妙极其兼长乐旨潘文美丽诚为独擅君每援琴以奏余常击节而听盖两蜀三吴缓急每因地异而西秦南楚柔劲亦以人殊而张子韵独取于中州调常求之太古故其声取乎正而风气罕致于偏意极乎精而考击独收其胜若成连之居海上有七弦乃移七情如中郎之入清溪每一曲乃成一弄是以闻之者竞躁无故而平信矣哉哀乐不能自主譬雍门动操而孟尝为之涕淋孙登理弦而嗣宗为之朗啸游鱼出听时为瓠巴舞鹤回翔每因师旷观其止矣技至此乎于是历下才人竞握珊瑚之管邺中名士争书翡翠之篇并极形容羣为讚叹昔萧思话之见赏乃在松石之间而俞伯牙之受知独于山水之际以今方古何古非今耶张子挟此以游咸识名高伯玉携之而往将同意会坡仙尔

秦楼月传奇序

箫裁泪竹即善离声瑟制贞松偏工丽曲况乎珊瑚枕上既待子以三年翡翠屏中且思君兮千里崔徽南浦写别泪于生绡苏小西陵怅同心于绾带则被之乐府用谐鸾凤之音传以教坊可叶鸳鸯之奏矣粤稽往代亦有才人门内乌衣由来第一囊中青镂更自无双乍侧帽于楼前才闻巧笑偶遗鞭于门外即动轻颦于是下蔡?娟河阳窈窕将花并影弱处生怜对雪呈姿清中得艷有佳人兮在空谷宜名士之悦倾城折梔子之华同心可赠采莲花之苦意难言黄鹄晨鸣欲飞焉而且止紫骝远去既行矣而安从少妇空叹于倚楼天孙亦悲于破镜似蠶丝而不尽但有纏绵望乌角以何期惟存宛转镂金箱篋欧阳詹肠断香鬟软玉围屏河东生心伤红泪精诚不泯人在可今可古之间时会为难事亦若有若无之际于是毫抽五色聊以为娱声按九宫闻之可感听之将或歌而或泣作者不言性而言情此则玉茗文人夺烟花于南部金荃才子擅月露于西崑者也谁解记歌愿留心于红豆吾为倚节且动魄于朱弦

慧照和尚语录序

问大意于西来原无文字迨至人之东度略有因缘是以树匪菩提直合麻鞋擦去花为优鉢惟从宝座拈来此慧照和尚所以不存语录也然而无法向人虽难言说将心与汝何处求安非藉三乘谁空五蘊则又当年贝叶还须神马驼来此际宝华莫待野狐参破而我慧照大师破烦恼障?清净幢十载深山曾学少林面壁几年鹫岭还同天女翻经叉手庭中不欲孤吟白雪低眉世外惟闻连唤苍天作海潮观画出广长之相如风铎语无非微妙之音如是我闻依旧不存一句留他些子好教认取三摩

灵玺禅师语录序

道启只园实由皇胄法传芦渡亦本华支盖其品有不同故其诣能独造至若青闺弱质罕闻玄苑微言虽练行清修仅传异操然道馨法侣未见多材岂非世境之移人难得真如之拔萃也哉迺灵玺大和尚则有殊焉和尚家本陇西祚兴淮右根蟠仙李烈祖奏绩于秉旄响报灵

槐伯兄驰声于补牍姿温似玉不乐荣华性净如珠偏多智慧谓能养为孝孝莫大于全身而不字成贞贞无过于出世遂无情于法喜乃有事于靡那无实无虚独窥八解不来不住自识三明忍草悲花早出非想之界霜筠雪竹常居无欲之天乃同天镜慧照两大师既密义以同参亦微言而共和玄灯自朗原非横出一枝半偈常持遂觉缘空万品爰从实地特指迷津云本无心不待岭头遍踏月如可指还从水面曾看听迦陵之声无非和雅说鹦鹉之法自觉支离信乎无着天亲携手同为不二岂必寒山拾得饶舌乃至再三耶

督鹺郝大中丞柏台霞颂序

仰惟一代清风千秋正色三钱饮水胸中生自无尘七夕晒书腹内言皆有本不事小儒之学乃经国之文章务为当世所难有弥天之气槩名高枫陛方持橐于金门威振兰台即巍冠于玉垒当门仗节定欲溃之貔貅对阵扬袍扫方张之豺虎虽邪谋消沮淮南憚汲黯之忠而

圣度包容海外表子瞻之直徙薪曲突世宁不验乎危言错节盘根天欲备尝于利器龙荒何处较定远之道里尤艰马角无期比属国之星霜更久豪情不挫李长源岂望银宣直节难移刘器之终成铁汉迨乎烽连六诏鼓震两川讨元济之不臣召贾生而非晚羣公推轂咸共服其豹文

天子赐环乃更工于骢步松到天而益劲岂问炎凉柏拔地而无邪何心雨露念胜筭之资飞挽

皇心特注江淮用名士以理灌输盛世无庸桑孔特重度支之寄是裨理学之宗草木知名奉龙纶而待润山川动色迎豸节以生寒果当持斧之初遂有改弦之妙谓兴利必先革弊须知害马当除惟洁已乃可奉公自信烹黿不染于是井蛙夺气顿教市虎潜踪钱已无神不信鲁褒之论言能有味行看传说之调某夙叨御李谬辱班荆荅川对酒曾陪十日之欢梅阁论诗窃有二天之幸先輿人以献颂义忍外于师门合词客以扬言庆实同于吾党名原可久岂须更介冈陵辞愧弗文敢谓堪书钟鼎

云间鲁谦庵太守江左仁声序

盖惟双麟剖玉宠艾绶以亲贤两鹿颁金理蒲鞭而宣化所以汉膺良牧即拜三公宋重名邦常分两制然而权多兼统地有异宜留棠拔薤事或取于古人渡虎悬鱼势每殊于今日求其张弛不匮才望同称者盖亦难矣我同年友谦庵鲁先生者新蔡名宗中牟硕胤纶扉珥笔品重红鞵铃阁分麾治隆黄绶十万户之受福久动枫宸二千石之知名独高苕郡湖名三泖尽属春波城号五茸偏多善气斯则治行弘推第一声名允谓无双者也尔乃民久罹兵郊原濒海悯疮痍之未复痛旱潦之不常李舍人之弘文空传绣虎马将军之毒焰未远哀鸿而公加意鸣弦捐千金而啓塾殫心射弩历七载而乘轺讼比风行听湖中而不倦诚惟露祷曝陇上而何辞清国逋于重困之余釜锺不爽恤民力于积劳之日舟楫先成是以人比文翁民多譙秀房君凿井苦变为甘白傳溉田丰成于瘠随车得相公之雨挥扇销酷吏之风境外飞蝗争

投海水溪中巨鰐远遁江流一钱之誉恒传五袴之謡偏起岂独颍川增杖天子待以非常河北赐书使君称为独立而已哉余学分席硯照忝邻膏不止见野叟之蒙恩惠同慈父实亦感遗孤之受恤谊比古人偶览嘉謡遂成短引听渔阳之颂惟张君游可不怀惭作春陵之行岂杜子美乃能学佞也

张公蔚生署分司德政序

苏子瞻泛秋之岁秦始皇改腊之时予南国方来东臯偶涉始得与蔚生张公修陈徐之雅联侨肸之交朗月入怀既情倾于接袂清风拂座乃气洽于饮醇盖公以超世之才负济时之望行能克效道靡类于浅尝遇值可为时共期其大用而鼎调未试锦制徒工君子劳心四野几忘巨浸至人无欲一代咸仰清风方司牧于昭阳歌闻耆老迨兼庖于延令颂起名英余既以芜辞弁其蕊简矣乃兹鹺务更借鼎才而公不以斥卤为烦罔用脂膏自润抚商恤竈剔弊厘奸却厨传之陋规谢赢余之旧例夷齐可饮心何易于贪泉管晏堪卑意更同于止水济宽严以裕国本仁爱以字人其所以治乎十塲仍犹之夫两邑於是十塲之爱戴犹然两邑之讴歌也夫化理既乖矫诬滋甚或饰情以取誉而炙手维艰或饰貌以行非而盗名终败上以此欺其下卑以此罔其尊天地为之相蒙江河于焉莫砥求其神明相感得显号于自然和易无私致休声于勿斲有如公者岂易覩哉诗曰其新孔嘉其旧如之何也又曰在此无射在彼寧有恶耶盖由是而颂溢渔阳秀两岐之麦歌腾陕服树千尺之棠公可趣驾以临余且珥笔以待矣

贺昭武将军杨元凯再镇全吴序

盖闻麟台耸峙惟图第一鸿功鹄印焜煌用显无双骏烈必江汉克安于绥定乃朝野快覩其宠荣则我昭武大将军杨公者古今一人而已公英谋天纵伟略神资剑授白猿弘礼得家风于越国书传苍兕沂中同世绩于汾阳方束发以从戎世咸称为奇男子每奋身而破敌人皆避此飞将军草木知名张万福威行万里山川改色李临淮功着屡朝如飞如翰如霆如雷共骇兵从天下自豫自闽自齐自楚咸占师在地中业已望杨仆之楼船鲸鲵影静立马援之铜柱狐兔尘销者矣乃九重独軫东南谓三吴实兼江海非藉北猷于方叔难免密伺于卢循特命金符爰归绣袞遂使机山父老快衽席以重登泖水儿重喜旌旗之再见营开杨柳无烦雨雪之歌幕启芙蓉共遂云霓之望营平方略何须愿到金城子翼功勲不俟借临河内于是人如乌弋酌水知归将是白题望尘遥避绿沈长卧闲看五色蜃楼赤羽无惊静掩千屯虎帐大丈夫抒嘉猷以报我后圣天子颁异数以晋元侯铸金印以孤悬觥彤弓而三接武即布天威之允武俾赫濯其不虞昭乃本明德之孔昭用宣扬于无外云台画像长观燕颌之章天府书勲不数龙骧之号也某恭逢采芑忝与维桑为新息侯之乡人何其幸也作孟尝君之客子可无言乎愿着短衣随李广以射虎惭无彩笔效扬子以雕虫赋朱鹭之三章聊当铙吹图苍龙于八阵还待勒铭尔

林蕙堂全集卷六

卷七

钦定四库全书

林蕙堂全集卷七

湖州府知府吴绮撰

序

送王阮亭司李维扬诗序

郡司李贻上王公琅琊名胄历下才人东郡相夸羣推玉海西京雅步独秀瑶林镜影芙蓉早对红云之殿诗裁菡萏重开白雪之楼方结绶於龙衢遂驱车於鹤郡官名大李地有垂杨永叔堂前还来染翰董生宅内再启藏书信美政之有闻喜斯文之未絶岂独虫归古狱酒足消冤虵殒神祠笏堪化愿而已哉某等盟缔同岑交称匪石或以人伦枉重或以心语相知或将借照于邻膏或得分陰于厦?班荆北阙恒追飞盖之欢折柳东门?遇鸣鑣之驾香山暮雪远盼流尘滹水严冰难留去轡爰寻邺苑之游各赋河梁之作呜呼风雅薄则朋友之道衰行谊乖而治化之本阙子之往矣言修谢傅之甘棠我且归焉用访岐公之芍药

送孙桴菴归黄山序

孙子桴菴欲返黄山将辞白社仆夫介其行李业已历有岁时过客赠以垂杨复且增夫卷轴乃石娘江上尚阻回舟萧氏楼前还逢戴笠时衔觴于北馆每斫地以长吟尝剪烛于西窗或临风而永叹故山猿鹤已相望于三年何处鲈鱼可更迟夫八月嗟乎仆原浪士值此旧游风景都非人民亦异泽葵依井徒写恨于芜城官柳成堤已迷踪于隋苑重凭画檻非旧日之青山欲听琼箫岂当年之明月况复嵇家凤字楚国猴冠豕腹盈途輦头满座望非元礼偏难百尺之登识岂嗣宗顿改双眸之盼蛙惟竞大遂自忘其污泥鬼信可憎反笑人於白昼此则朱桃椎之所蹙额陶靖节之所攢眉长此安穷望而却走尔其崛强犹昔沈吟至今原欲闭门寧思今雨才当解组即系闲云不赌安石之棋何妨坐而袖手数举元?之扇犹恐尘以污人归去来兮予奚为乎惆怅谁其知者子何待于经营若乃峯本炼丹源曾掷鉢藏云有洞立雪成台骀荡榆花之溪嵯峨柘木之岭红术与紫芝比冽虎头偕象鼻争高云霞一万重成太守之所栖隐烟岚四千仞李供奉于以寻真认棋石于峯头可饮仙人之酒遇弦歌于桥畔疑吹王子之笙饭五粒之松枝长过毛女裁一池之荷叶或遇宣平何必侯鯖乃饱饮河之腹寧须驷马方酬题柱之心也哉濯足红泉尔早辞夫尘驾盟心白石吾久告诸山灵乃为歌以送之歌曰青天削出兮金芙蓉上有玉检兮丹霞封下土溷浊兮不可容余将从子兮驂两龙

送江辰六归广陵序

年归荔子风报梅花问节而始过烧灯访友则偏宜泛雪吾倩江子辰六言寻角里之居用宿沧浪之馆屐声才响罗雀惊飞烛影方同庭乌未息三年澧浦思公子兮不言十日平原喜酒人之尚在辄复盱怀一世抵掌千秋览时态之迁流慨人生之倚伏读子房相遇之事虎啸艰难闻刘琨起舞之言鸡声激烈田文宾客屡见盈虚顏驷郎官恒多进退南山种豆或至为其东海成桑行将鼓楫莫不哀歌击缶太息衔觴慕终子之请纓美相如于负弩既而出其丽字示以新篇欣赏为多悲凉特甚老而未倦殊怜食苦之虫穷且益工欲化成仙之蠹叹扬云之覆瓮世鲜闻人恐羊佑之沈碑後谁知者则谓惟兹继起彰彼前贤志在名山心留古道得谢家之诗句愿效廷坚传韩愈之文章期同李汉予虽未髦实感心知子念平生当非戏笑而元龙楼上甫共横牀洗马江边旋惊理棹嗟乎故人已散旧业都非燃寒谷之灰热凭何竈绕武昌之树栖也无枝殷深源少日相思谢安石中年易感仆原善恨其何以堪况乎客路烽烟江声战鼓啼乌门巷动庾信之哀杜宇山川下少陵之涕春波画桨期再至以何时明月琼箫怅为欢而已晚子之往矣复何言哉曷为乎来且尽藏醪三斗黯然者别更须作赋一篇

送姜定庵少京兆之任奉天序

定庵姜先生道足匡时言能济物英才盖世五百载重继钓璜正色当朝二十年频闻折檻虽忠能见信人题鲁直之书而大不伤苛客醉阳城之酒是以兰台聚散吾道视为盛衰槐省迁除天下占其进退也眷言天府用求金马之贤简在宸衷遂有玉麟之授念青社开基于千载培养允藉正人思黄图建极于四方弹压亟需名士维

召奭周公之有貳治扶风冯翊以成三是用王

尊俾参京兆岂有汲黯远薄淮阳乃慈母教忠笑牵裾之未达致名臣报国忘揽轡于独贤袞遂赴乎东山帷暂褰于南国澄清有志方占益部之星觴咏多情偶看广陵之月词人入坐并托龙门上客登车旋辞蜚苑攀隋堤之杨柳虽尽折而难留赠官阁之梅花且相思而未已爰泛碧瑶之棹同抽青镂之毫赋鸚鵡于当筵偕分四韵唱骊驹而载道各奏七言指长白以兴怀旧化曾沾公望付小红而度曲新词那及尧章聊吟周渚之鸿仁归洛邑为问辽阳之鹤何似扬州矣

送汪舟次赴贛榆广文序

汪子舟次具逸羣之才敦好古之学雕龙美业沈约见以倾心挥麈清谈李膺闻而捧手乃两京射策未登七宝之牀而东海传经暂受一瓊之席汪子聊以隐文豹耳诸君为之赋骊驹焉嗟乎卞玉难逢隋珠莫赏昭王台畔非金而骏马不来轩帝阁前无竹而凤皇常饿道旁负弩岂能尽赋上林门内鸣珂何必定知獬廌而汪子言居下位独抱奇姿空餐苜蓿之盘未改芰荷之服非其志也寧不叹乎然而遇值鸿昌宜居通显时当蠖伏惟贵浮沈禄可代耕尚有抱关之客吏如堪隐何妨执卷而师夫子之讲座原高司业之酒钱未乏况乎地兼淮海是汉代之山川人近鲁齐有周家之风俗访遗踪於夹谷可与谈兵寻旧迹于仙山还堪学道於是春风满迳种桃李以成陰化雨霏筵坐芝兰而讲德明镜不疲於屡照洪钟有待而大鸣则鹿至

洞中鱸来席上开扶风之绛帐并列管弦瞻泗水之缙帷长闻俎豆金华入直先生将自此而升碧缕抒怀良友可无言以赠爰将别绪各奏新篇染素茧以陈词指飞鸿而送远同把杜康之酒思公子兮不言烦过漂母之祠问王孙其安在

送周伯衡先生之楚诗序

伯衡周先生命世鸿才匡时骏望性同屈轶到天横指佞之枝泽比甘棠徧野种怀恩之树羣公推轂起安石於东山

天子赐书委伯仁以南国会包茅之未入致行李之犹羈道出梁溪地当吴会家留村怀殷投辖遂教美尽东南诸同人谊重留鞭不觉情关今昔琴书潇洒因携一鹤以停舟文酒留连共望九龙而拄笏乃先生雕年客路计日皇途比流涕之袁宏尝存慷慨似当年之孟博雅欲澄清既维縶之未能将别离其奚忍爰谋胜事用展余情开邺苑以飞觴入梁园而授简临邛辍食知令尹之重贤京洛鸣笳信主人之爱客于是一时硕彦并集蓉湖四郡名贤俱来梅里玉堂金马选已迈于瀛洲紫电青霜才倍雄于大历胜同梓泽无可罚之觥美并兰亭鲜不成之赋而况时当春半节应天和芳草成丛杂花生树晴生李径适逢明月之入怀暖入桃谿已见好风之拂袖一觴一咏独当四序之中载啸载歌几见百年之内其为得意何可胜言然而战鼓横江羽书塞路虽书生破敌雅善围棋而壮士临戎犹闻卧甲人非少壮何堪待子三年时在艰难况复送君万里斗牛在望会龙剑以何期班马长嘶寄鱼书而尚远谁为斫地之歌莫尽临岐之泪矣

送陈其年赴大梁携家序

余自罢官菰郡求友荆溪始与陈子其年听黄鸟之音订丹鷄之好山园听雨出笔札以相娱木榻眠云叙家门而自慰兄袁弟灌同当学易之年大孔小杨独少传经之胤嗟同伯道买妾何嫌拟似方明梦儿可应而其年则谓游梁之日曾聘茂陵会逢归汉之时早生通国流离千里欲璧合以无期羞澁一囊望珠还而未敢遂为商之吴质且为话及徐陵并肯毅然用资爰及延陵解橐办装于孔棘之时东海飞书引车于未经之处情关义举即持襆以何辞助出名流或入钱而不可行将有日别矣何言嗟乎陈子具元龙之逸气有司马之妙才使得早遇诸君推挽青云之路何致长贫此客凄凉白雪之音而八载飘零半生沦落文章自好寧堪路隔龙门词赋徒工独笑人非狗监及此少寬内顾于以勉树令名献策可期赐书有寄梁园日暮不烦稚子之牵衣汉殿春深还为细君而割肉将见人归雪苑乐家室以琴樽益令客奏云门重友朋之胶漆矣

送吕半隐归蜀序

盖闻庄舄行吟靡忘情于越土杜陵念国常寄咏于秦川黯然而别绪之萦怀甚矣故乡之入梦仆原放客久作羈人身似三闾卜居无地家才一水倚楫何时乃吕子半隐忽兴言迈之思用索曰归之赋嗟乎吕子少称玉树早入京华信立鹤于人间作冥鸿于霞外酒泉太守过室而

惟见长松栗里幽人当门而恒栽弱柳而月中乌匝二十九年峡里猿啼八千余里昔则锦江玉垒是唐代之春光今则雀桁乌衣有谢家之残日长卿老去挟瑶轸而难鸣子美归来过浊醪而谁在抚时伤事兴慨何穷况乎天高蜀道今古风烟地近巫阳去来云雨无君子者为秣马而脂车彼美人兮空惊 而怨鹤往殊不易别益为艰矧在同侪俱成逆旅秋风摇落庾子山萧瑟于江关并水凄其贾浪仙低徊于客舍酒虽上若非旧里之青樽歌在前溪亦他乡之白紵看安仁之双鬓见也何年咏平子之四愁伤哉此夕以言为赠爰陈鸚鵡之辞命酌忘忧敢下杜鹃之拜

送李箕山归隐沙村序

予友李子箕山笃意好文覃心学古清音得之山水而余及艺材妙悟合乎图书而旁通籀史采百家之芳润独患才多交四海之英贤无忧意尽以是驱车燕赵常分买骏之金策马晋秦不响歌鱼之铗足游五岳誉动一时今以残秋遇余邗上九年赋别华髮都非两地相思素心犹在留连听雨何辞剪烛巴山感慨停云遂共联牀并舍酒边吹泪各有当年鬓上流霜空余此日人间可畏将为庐阜之装婚嫁虽完暂返沙村之棹村连查墅有数百家地去吴陵可三十里背山临水虽无长统之园林凿井耕田颇有陶唐之风味都无轻薄可到眼前但见渔樵相逢世外北窗横榻先生时挂诗瓢南亩扶犁光禄能多酒瓮鰕鱼独宿漆园之论养生雏鹤俱成高密之门执业山池自足皆手种之龙鳞庐墓相连有魂依之马鬣爰因敬梓用赋闲桑伏腊既有以为欢觴咏能因而自遂其为往也不亦乐乎然而四海多虞百年无几置身今古谁为得意之人携手林泉即是快心之事乌犹绕树我尚无栖鸿可渐磐君堪自托方依依以相送实眇眇而多愁矣

送宗鹤问之官秋浦序

春风隋苑兄弟有似一人旧雨咸园乡里惟称四子然寒曹剪烛同心于持戟之时薄宦悬牀共命于推轂之日则宗子鹤问谊较笃焉顾颠沛十年予既心伤于按剑而浮沈半世君亦气尽於碎琴病虽异而同怜饮不欢而余醉而才堪草创未横七宝于殿前乃禄以代耕仅得一羶于江上嗟乎不遇好文之主冯唐之白首何辞非逢有道之时叔夜之青眸安问兹则德过太始值天子之怜才选迈平津命云官而荐士而马卿徒困狗监难逢寧少故人寒莫怜于范叔竟无知已冷乃甚于郑?是谓文穷足为道惜然而时艰弥甚宦苦方殷大吏虽威岂有膾于俎豆严程纵迫谅不及于琴书脯缘学礼而堪餐酒以问奇而可醉沈酣于名交之内优游于仕隐之间亦足以容可无愠矣况夫齐山胜境秋浦名区峯近九华人有烟霞之气地原三辅家存礼乐之遗楼似故乡帝子文章尚在山留明月鄂王山水犹新李学士之题诗偏奇莲萼杜舍人之买酒惟傍杏花于追古人之风讲先王之德鱣飞席上鸾舞宫中思贾生之谈侯之异日读扬子之赋愿与同时斯非制发之先资而儒林之捷徑也哉则情殷苏李执手于廿四桥边而望重严徐已注目于十三亭上也

送辰六令益阳序

吾家洗马当代雕龙纸贵三都雅负无前之志毫开五色偏多不尽之才羣公交颂其英声

圣主务求之实用牵丝入仕仅得雷封制锦当官遂过云梦惜之者伤其小试如斯未足回旋识之者信其多材由此终期远大华陰神土拭龙剑以生芒蜀郡澄波濯蛟文而焕采斯为利往无待筮詹矣尔乃天表一星地横三水山名白鹿宛对香鑪浦近黄牛如闻宝瑟过关侯之濂睢彼英风经贾傅之居怀其壮节借江山之灵秀发越神明收辞赋之芳华章施政教往而治物必非俗吏之能持以字人定有仁民之誉昔淹之金貂采笔乃得封於醴陵韦之玉白水清用有闻於襄邑武可绳而非远业以广而方新何必读五车之书吴靖有慙於彭泽作三闾之赋屈平空怨於汨罗哉若夫时值三秋家携一室於其往也爰倾山水之罇厥有怀焉共授河梁之简以才子而涖才子之地此游定属非常集词人而赠词人之行是事都为仅有则斐然白雪言歌风雅之篇勉矣青云勿负循良之传尔

送李南枝游宜春序

七载暮云怀兹李白一江春水来共王猷方为扞蝨之谈忽并飞鳧而去黯然而况岂有异于醴陵卓乎之情复何加于梁苑而李子拂衣长啸如登匡俗之峯击楫高吟欲上子婴之阁斯则寄怀山水良为结念云霄者矣夫李子以霞举之才值河清之代使其成就岂可涯量尔乃屈首泥蟠安身磐渐超于磷淄之外葆其贞素于中闻达无求歌不传乎衰凤是非靡及影独远于冥鸿斯盖大过于人非只不同于俗也况乎柳间习鍛陶徵君之清节可师花下悬牀徐孺子之高踪足尚康郎山下还看江飈吹风兴霸祠前争看神鸦舞日布帆无恙访遗迹以何存浊酒堪浇呼古人而共语凡其所过未免有情则广武登高叹英雄兮何处沅湘望远思公子而不言抽兔管以题碑染麋丸而写壁因以江山之助发其今古之怀昌谷之锦囊探来复满文通之彩笔梦过还开既听鴈以宵吟复闻鷄而夜舞壮哉此去且将虚往实归渺矣难从谁复倡予和汝采芙蓉于木末愿寄我以新诗折杨柳于堤边聊赠君以短序尔

送陈子万归大梁序

疆圉御历无射吹商方掩虎阜之关忽枉龙丘之刺庭空拥簪既左迎于五柳门前溪未回船遂定交于百花洲上班荆绡好兄弟爰及於机云藉卉言欢伯仲孔偕於袁灌乃陈子凄凄欲别爰有感于授衣而吾侪忽忽将离岂能忘于揽袂夫梁园胜地雪苑名都人尽能文尚有邹枚之习俗惟近古多存庄惠之遗陈子以隐豹之姿修雕龙之业得清言于乐广声起平舆驰美誉于左思名高洛市必能自树以遇于时行且有为用绳其武但余将老倦哉司马之游梁值世多艰渺矣伯鸾之适越寻懽何地恨无斗酒以忘忧相见无期空有长歌而送远怅碧草於千里把黄花兮一枝斯时之情黯然而已况昔先人弭策曾结客于夷门迄今从弟移书尚留家于宋土子之归也指江水以寄愁我所思兮望云山而增叹矣

送刘震修赴越幕序

虞卿失意才见诸侯冯子作歌徒称上客粤稽往事实用伤怀岂有才似相如犹复困同王粲

嗟乎沧海涛飞蛟腾失水青旻雾霭鹏起无云子之往焉固其宜矣虽然新丰濯酒竟发迹于鸢肩定远投毫遂成名于燕颌遇合亦何常之有英雄非无故而生试听鸡声宁无起舞遥瞻龙气肯许终埋况乎山号秘图异书可访城名飞翼霸迹犹存谁欲请纓不少风云之势因而作赋定收岩壑之才子其勉于脂车吾将为之赠策矣

送何脱园诗序

岁在壬戌时值清和遇何子脱园於隋堤之上人如明月似平叔之当年赋是梅花见仲言於此日爰投佳句载览新篇风度夷犹神姿清彻相其格律则祖述乎少陵老人玩厥情声已伯仲于随州刺史把之过日遂以忘餐何其词之工欤信其人足尚矣夫何子少怀壮志早负隼才奕代蔚乎家声四方传其物望竟其所至将何事以不成揆厥所由岂夫人而易及而时方北道集号东篱盖其寄托遥深欲在羲皇之上存心卓犖非同顔谢之间耳行既届期言以赠别一编白雪子且操伯玉之琴九日黄花予姑酿王弘之酒也

送家伯成先生赴闽臬序

六鳌砥海银箭频飞九鲤腾波金戈未偃

圣天子临轩鼓瑟爰求忠义之臣诸元老当陛推轮聿重文武之宪我伯成公懋应上简特擢外台甫奉皇纶听欢雷之忽动才登祖棹报瘴雾之渐宁实用二泉之名升闻五位乃以百里之命超进八阶昔公琰广都遂录尚书之事子康密县平登褒德之侯今古原无几人遐迩传为异数矣而公当仁不让受宠靡惊虽截镫道旁去後思深於何武而埋轮亭下行来志壮於张纲允为公辅之才信有社稷之器也然职司纲纪道重激扬方反侧之时胁从多有迨兵燹之後讼狱繁兴或祸起于同文而张罗受惨亦门开于告密而投匭生冤虫得酒以难消鸦挽铃而莫诉自非敦颐泽物谁从一路求安元结綬民罕为八州请命况夫中和洒翰宠被赤幢平反篝灯恩流丹笔在古人之报国无忘忠厚之心乃才子之当官必有文章之气公之往矣活万人者必封我所思兮润千里而不远将见钓龙台上讴歌不异于龙山仁看浴凤池头简拔还归于凤阁绮谊叨昆弟庆在

国家窃自附于赠言聊共申其送远青箱命子用歌杨柳三章紫帽逢人好寄荔支一幅

送卓火传归隐计筹山昇元观序

予与同年火传卓君聯半世之交历深情于风雨赋十年之别托远梦于湖山适于戊辰之冬相见邗江之上形容非昔情好有加曲巷泥深予方委形于皂帽名山花发君忽托兴于黄冠盖计筹山中有昇元观者计然十策常居此以运谋少伯四通亦于兹而握筭後隐苍崖以服气遂蹑白石以乘霞昔有葛仙翁远绍灵修留神光于玉磬宋则杨和王特寻仙迹创杰构于琼楼慨兵燹之洊经至荆榛之不剪欲闻要道必藉名流而余体崖始为结茅及周玉峯继为除草然金亭未显空存九节菖蒲绦阙犹虚未长万年神药而我火传年兄褰裳独往将寻赤

水之珠着屐思从欲访玄都之籙何其勇也不亦异哉盖火传以不世之才具无前之器渊源家学宁惟驰誉于一经炳烺时名会且置身于七宝怀仁辅义何难坐致古人纬武经文立可取荣当代而龙章不耀猿臂难逢香若猗兰徒自零于幽谷苦如寒蕖将终老于空山此诚有托而逃宁若无因而至然才如司马终见遇于云霄气若元龙岂但矜其湖海于其归也乃酌而告之曰君非隐者岂无得于衡岳之中谁为酒人可相待于镜湖之曲

送毕正持归里省覲序

江山千里岁月三秋露咽玄蝉方凄怀于草木天高白鴈又送别于河梁则于毕子正持盖有感矣毕子以磊落之气负清丽之才西蜀亭前就扬雄而问字东都门下偕匡鼎以说诗芍药新篇或捻髭而不觉芙蓉雅制每叉手而即成踈雨微云既擅长于王孟晓风残月更兼美于辛苏遂使邺下才人常为焚砚关中诸子并让登坛我匪於陵善敢藏于项子君如元叹名欲比于中郎几载相偕听雨剪巴山之烛一时不见闻涛鸣东海之琴忽有意于承懽遂多怀以赋别韵束皙补亡之句辄欲采兰讽季路念昔之言恒思负米于斯行也不其孝欤然白发娱情子以遂老莱之乐而青山入梦予益怀庄舄之思以离人而竟作归人情有可遣用送客而翻为羡客意复何堪况乎放鹤亭空梅堪作妇钓鱼台耸客可为星忆千古之清风泛一江之秋水登高望远感慨而扣舷兴发情生低徊而策杖乃至听松阁上涛声犹似广陵照古梁间月色还同隋苑则养体者当思所以养志而相见时宁复待于相思耶

送浮村上人参学天童序

豕渡逢年正鲁国建亭之岁莺啼应日乃庐峯开社之时爰有浮村上人欲往天童古刹担簦以别将索我之一言杖锡而游遂寻师於千里夫浮村有绀龙之伟器具白象之英姿导引得之异人术通紫府吟咏传於高士业并红楼是以戏演五禽并问养生之义声闻一鹤多传言志之篇缁素为之皈心缙绅闻而捧手也乃戒已传於见月而法犹契乎密云证妙谛於拈花重参狮子访微音於击竹更礼蜂王固将白雪岩前悟四十九年之旨丹霞坐上提一百八句之宗矣况乎寺近云峰山经雪窦自义公入谷已感灵符迨璿老同林普兴禅悦代传白足风清揖让之亭世服黄睛草净跏趺之石迺浮村忽为行脚欲问点头用诗法以作禅机机应更捷本仙宗而参禅果果自能超岂须弄破泥团还见行齐塏影但潭空清水禅和子何处寻真而日暮碧云休上人能无怨别耶

送杨尔琮之任青浦广文诗序

予昔为春江花月之社用扬竹西歌吹之声已风动于一时将与梁园而媲胜乃云飞于四国遂同邺苑以中衰迨龙历之方占复鸥盟之再启时则有岷山硕裔杨子尔琮风雅存心云章在手乃于荷花开处仍来六一堂中遂于桂魄圆时更胜十三楼上人能授简尽枚马之才客共衔觴有求羊之致斯为盛矣谁可继之会当选衆于芹宫遂乃言离于芍郡行如伯起席前还见鱣飞岂但巨源坐上但夸骊得然锦囊之句足比长城而玉轸之音已成絶唱何难振凤皇之响岂必效鸚鵡之吟而已哉夫峯泖之间昔皆称为胜矣而陈李之泽今其无有存焉者

乎杨子于以挥毫时而振铎将见继前人而起开後叶之风其在是编用怀古处尔

送家芳友之任彭城序

东南形胜彭城当水陆之冲今古繁华芒碭是英雄之藪然而张节度之画阁独见风流苏学士之黄楼犹存月色则文章之气且炳耀于千秋而节谊所留亦焜煌于百代矣余家小阮芳友孝廉以千里之才具一时之望将持衡於当世暂秉铎于斯州此日名流咸赠绕朝之策而吾宗朋好皆倾文举之觞或谓地异中区非鸣琴所能鼓动或谓官同矮屋恐张袖难以回旋不知功令日烦方兴嗟于束湿抑且徵求难应多致慨于吹毛此则职暇而尊终岁无簿书之扰境贫而庶尽人知俎豆之隆况

圣天子加意右文待师儒以异数而诸大僚存怀率属旌廉善以殊科苟劝綏有类于九龄而化行兴国训教无殊于安定而泽被荆南则鼓钟而声闻端形而影正槐市垂陰竟可作九州之?薇垣佐治行将登三事之荣岂止送司业之酒钱夸为胜事作昌黎之学解独擅文名子之往兮且饱餐其苜蓿余之望也实翹想于竹林矣

送卢菽浦之戍所序

今

皇上三十有三年仲春既望卢菽浦明府以无妄之灾蒙明夷之难遣谪于晋之太原时有吴子听翁送之于蜀冈之野饮之以邗江之涛而告之曰夫君子之处世也因乎其时故古人之当忧也贞之以道是以眉山患难作过海之雄文禹锡迍邐有作宾之特召龙蛇之伸屈既已无常虎鼠之行藏因之靡定惟君子泰然于其际以待天道之清宁达者坦然于其中以俟人心之转易故能仰回帝命用承银信之来上鉴天心特受玉环之赐理应不爽事有固然今先生以楚泽之名流宰广陵之岩邑神明重誉冠于百城慈惠循声传于四野徒以狂蜂之噬偶尔经天遂至征马之行飘然去国廿五年之知遇不能自保其身三千里之流离何处可为其室伤哉冤矣谁与辨之虽然

圣主之恩泽甚寬仕路之是非有定时事之往来不一人生之荣悴有时吾安见汾水之波长流而不止太行之雾终昧而不开耶请为歌屈子一章聊以当枚生七发

送陆舒成入

朝序

济世文龙仪天瑞鷟科名盖代古今第一人家干济匡时前後无双国土栽花于白公亭下处处春风憩棠于贾傅庭前时时秋月弦歌化俗学宫每见鸾栖案牘惊神厅事尝闻虎伏然犀独照字莫溷于刁丁害马先除事无忧于旁午筑鱼鳞之埵年自灌输凿龙首之渠力为修复

盈郊起颂民在镜而胥在水比屋闻歌春有弦而夏有羽于是赐书嘉宠特宣褒德之侯遂致卧辙遮留难挽去思之客爰上燕台而揽辔因过隋苑以挑灯念我阿咸既依萝而谊切嗟予如济以折柳而情深爰赋短章若班生之望洛水并謠茂绩同杜老之颂春陵也

林蕙堂全集卷七

卷八

<集部,别集类,清代,林蕙堂全集

钦定四库全书

林蕙堂全集卷八

湖州府知府吴绮撰

序

秦太翁六十壽序

地啓周封人重兰陵之学溪由梁濬世传梅里之风然而史纪凤馨合後先以媲绩书通彪马分大小以专家德惟幼于华阳胄莫尊于淮海矣我年伯秦先生世衍鼎钟道隆圭璧绍鸿图于方伯绩重屏周承燕翼于中丞功存翊汉家传纯孝庭前白鹄双飞代着华文门内雕龙独擅閎闕崇于诸陆世称逊抗机云经纬重于四韩人道综维绦纁先生独超物表深味道和持盛满而若虚历岁时以弥固兹後中和之三日已周甲子于六旬月际高丛人称耆宿堂前进酒将逢扑蝶之期户上悬弧适值献鸠之会长公留仙太史以珥笔之宏才奋请纓之壮节饶歌朱鹭方登南岳以题碑樽挹苍牺乃返东山而奉笋袍拖宫锦宁夸莱子之舞斑杖捧青藜自有神人而吐火余称三凤并竞爽于瑶林下迨一鸾早露奇于丹穴兰馨芝茂尽遶灵椿玉映珠辉咸依壽极君子致万年之饮封人进三善之辞轩乎鼓之猗欤盛矣然石家万石以谨厚而承恩窦氏五株本肃雍而致美夫其祥备诸物良由道集厥躬先生于亲以诚为养早岁切为兄之愿髫年承述祖之诗茅生设饌宁因过客而分甘颖叔遗羹独感君王而知味以至牀前视疾七十日不暇求衣甚且庐次衔哀十数载无心御肉是以两枝孝笋自出林间五色神瓜还来梦里邻母爲之感动刺史欲以表闻无忝所生斯之谓矣先生于弟以爱为恭少知让枣而能谦长念分荆而益笃礼肥孝瘦怀急难于鹄原宋武梁文敦雝和于雁序仿昙首之析产独取图书慕陰庆之让侯空悬印绶是以闺中青鬓不愬射牛海内白眉羣知推马里叟咸师夫让畔乡人自格于讼田兄弟孔怀又有然也尔乃一经着训七叶成家为清白之子孙在家庭如君父中原采菽勤则报以菑畬上国为仪优者称为龙凤铜盘美食勉杨家之芳规麈尾清谈率顔公之雅诚是以羣贤鹄起列俊鸿騫才号西豪星动陈荀之座名胜东观云蒸王谢之堂家有严君庆未艾也若夫桥同百口火待三宗即有异门而异烟亦鲜常父而常主徐陵得俸尽给亲知疏广散金多周穷乏有而不借因焚阮裕之车逋或难偿屡毁田文之券是以河润九里云四郊德及壶飧客报翳桑之饭惠沾瓶罍神酬种玉之田德出仁人功尤溥也夫人操独善尚享鸿名君具修能寧无厚弗况乎才方司马文章自足风云品拟元龙意气独高湖海而早辞圭组闲心略似渊明竟拂轩裳乐志遂如长统于五千言内常存知足之心在百六爻中独契见几之旨谢安丝竹是东晋之风流文举壶觴有西京之宾客虽纶颁紫阁

义取先河而诒捧玉堂恩存爱日蒲轮下聘访故事於申公纁帛遥临托後乘于吕望而先生损之又损冲乎其冲盖于庄生齐物之篇老子谷神之论思而有悟得之甚深矣是岁在辰辰有三阳震起之义厥日维卯卯为万物茂达之时考以周仪在二月而养国老稽之唐典踰两夕而祀壽星凡此多徵皆宜介祉昔香山居士雒中允冠耆英颍水名臣宋室咸推硕果同当降昴并合生申今古一揆吾无间矣先生继美二公追踪四皓有轻裘缓带之乐当围棋赌墅之年八千岁以为春秋六十度而成运会桃开瑶水齐眉攀王母之花瓜献温泉捧手进安期之枣华筵合乐赐余江上金钱宝籙传书望见坛中绦节筭将无极美不胜书余从孔鲤以闻诗见李膺而得御摩挲铜狄空闻仙父同游展玩琼图莫测神人至止聊同李委奏玄鹤之南飞共望老聃引青牛而东度

鲍隐君五十壽序

盖惟祚锡玄圭肇洪图於东海名高苍佩衍华胄於西京司隶尊严风清挽鹿都官强直烈着行驄明远文章俊逸遂同於庾谢慎由词赋汪洋并驾于苏王迨祖德逋及于梅山而子姓弥馨於兰砌至其修能允劭内行克敦则鲍君瑞生实有之矣君生负异姿少多至性六龄怀橘早解亲仁五岁推梨偏多让德趋庭问礼曾闻立雪之谈入市窥书大有乘风之志傅介子弃觚而叹端木赐结驷以游而兵燹惊心室家琐尾管寧避地不穩藜牀原宪居贫谁怜土锉乃惊雷破枕难移砥柱之才错节刳斤益显太阿之器遂至楚人重其一诺谓比黄金陶地适在四通爰兴素业大史感而列传乡里闻而向风岂非创业之英流而乘时之杰士也哉兹当玄默之岁适逢服政之期羔币走于四方歌颂扬乎百世而余谓瑞生之致是者盖实有故矣夫松柏之茂始於本根崧岳之崇先由培塿君则早悲陟岵独赋循陟堂上灵萱尝闻圣善堦前孝笋时有萌芽泉通跃鲤之波日照弄雏之影甚至祈天益筭吁斗延龄乌集曾冠每心惊于嚙指鹤呼隐舍多涕泗于望庠日知尽哀路景潜闻而求状安丰笃行柳宗元嘉而作铭感可格天孝堪永世宜尔纯嘏此其一也至於棣华早谢荆树双凋药怜独活之枝虫类寄生之种而君则抚其遗胤咸至安全饭吐两颐有郗家之保侄分五女见虞氏之嫁孤慈为长物之原爱属涵生之本斯宜黄耇又其一也若乃淳风渐邈古谊云衰徵逐笑其蝇营翻覆慚乎豚信而君则立志毋欺矢怀弗二季生赴义重无宿以片言朱穆论交守其介於终日信为德之可久贞者事之有恒合于引年又其一也况乎频来着异煮白石以成粮再世徵奇受丹砂于得偶君之遥胄自属仙宗何必啖琼岛之瓜方期大耋进玉门之枣乃致遐龄也欤抑五为中数合大衍以陈蓍十号塞阳候应鍾而協律韦玄微始为松菊之主实在斯年朱翁子方将富贵之时言当此日允称未艾洊及无疆余之与君久忝孔李之交窃附潘杨之睦迓斑龙之馭自切遐思窥朱鸟之窗惟多喜色尔

程太翁七袞壽序

偶归鹤郡暂憩鸥岑程子绣章因予汪甥而过访焉望其冠佩若涓子之木鸡示我篇章是曹家之绣虎探珠於水信有灵渊采玉於山知为异宝乃程子者为述过庭之训并徵跻堂之词而知才之独秀道有自来也盖其尊人叔清公少笃良怀雅多逸操覽哺乌之句每欲陈情闻叱牛之声尝为陨涕阮家宴集惟在竹林戴氏交游独严兰籍杨惲为叔暉所识居食皆殊公

綽受子華之知家門是賴而公心存讓畔志在歸田王仲祖獨妙丹青孟浩然惟耽吟咏高人寄意遠托雲林徵士陶情閑觀月露是以鄙夷塵務脫略世資同漢叟以披裘笑華歆于揮鍤金鸞入地莫令開池赤仄成倉何曾返顧允矣稱為令德洵可教之義方茲值吹商時逢授杖問楚丘之帶索方聞壯歲之言見單豹之栖岩猶肖嬰兒之色采芝草而同於四皓攬松竹以頌夫九如程子即歎然修灋之未隆而顯揚之未至乎然德積于身者慶貽于後道足于已者譽達于時程子益修其文取榮于世自可乞大官之醞以酌金罍奉太史之函而当寶籙况曾氏之芸瓜馨于跼鼎萊子之戲彩華于楚冠也哉過劉殷之門能興七業入荀淑之里還見八明我為歌焉指南山而作頌子其歸矣倡北斗以挹漿

冒巢民先生七十有一壽序

歲自申以迄酉時入夏而猶春吾友冒巢民來從賈婦陂中留寓蕭郎閣畔蓋以操戈入室禍几烈于魚腸遂至賦感登樓踪久縻于雀角而情深旧雨今尚能來交締初年老而未倦憶君方少值世尚平承累葉之風華操當年之月旦三君在望常振履于龍門八俊同稱獨橫經于虎觀地名金谷人是玉山香生荀令之衣氣壯王戎之舞揆其地望何事不成誦彼才華無奇弗有豈田桑之遽改忽庭樹以難堪馬埒烟飛遂盡南交之焰蜃樓云起頻生東海之波露冷金盤縱是神仙亦汨地殘銀燭難窺魑魅何心而曠識弥高豪情無邁頻來柳下同听隋苑之鶯每到花前輒駐?沟之馬吾儕故態嚴子陵信是狂奴此日多情杜牧之豈非才子所以循年按譜已當李公致政之期若復祛慮存神實契老氏養生之旨者矣况夫孝稱愛日節重高風叔屢射牛誠堪作脯人當盜馬還為飲醇產既讓而猶均人倫靡憾刃虽戕而不中天意可知將有待于蒲輪又何疑于椿算也哉嗟乎宋家令子并得友文之牙鄭氏名孫欲似康成之手猶余翠袖既醉能扶尚有青箱虽貧不困月非寒而已滿春欲盡而堪留以七十之老翁偕二三之良友但当把小红之袂吹碎玉簫傾太白之樽卧橫錦瑟英雄已往付?子以功名成毀何心任小兒之顛倒也

家伯成四十壽序

聞之養生之道其神定者斯全長世之方其器弘者自遠余論交一代求友四方覓齒於坐中遇伯符於堦下如家伯成明府者蓋百不一見也明府生應異徵長蜚雋譽沉香浦上传清白于隱之燕友台前擅風華於季重是故門推第一士号無雙者矣尔乃志慕投繻言从制錦拜讓王于梅里世有清操移单父于蓉湖民多雅俗山橫九萼便為學士之台水洌二泉即是李侯之井龐士元之展驥原非百里之才宓子賤之烹鮮已試十年之久莫不羣呼為父或字其兒家題峴嶺之碑户謹桐鄉之祀朝將大用既特簡以輶軒国有恒依尚勾留于化瑟斯蓋才由敏見德以誠孚恩允洽于樹棠威復行於拔薤空中潛度鬼神聞破胆之聲境外爭歸邻比快移家之愿漕嘗先兑而民不知兵賦鮮弗登而里無罢役大師頻過无妨腰笏以引船奇獄須明不惜當廷而抱牒而且子游為政首礼澹台仲舉臨官先詢徐孺老人并載嘗知決案之能上客飲醇徧得垂帘之暇爭寶換羊之帖寧夸白練為工共傳舞鶴之篇獨羨彩毫多麗豈曰能吏信屬才人者矣迨乎隣邑亡猿中途叹凤秫田何在將回彭澤之車尘甌空留并少壽春之犢四封雨泣万姓霆奔野積留鞭郊橫卧轍重臣動色爰飛伏阙之書天子知名特濡

题屏之墨而我明府喜愠不形於色荣枯不介其怀湖海之气益豪山岳之情弥重若谢郎之遇变尤善围棋譬夏侯之闻雷无嫌破柱以此言器器可量乎以此徵神神斯裕矣仆以雁行之序来观鸿渐之仪烛频剪於西窗樽复盈於北海时逢建子庆值生申当王溥彩服之年是江总黑头之日诸君奏笛引玄鹤以南飞野叟濡毫擘丹麟而西望天心当复君子之得位可知星纪方迴青帝之敷恩不远如其进岷山之甜雪此正其宜若夫问勾漏之丹砂斯为太早尔

王北山都谏五十壽序

今

天子崇文覃飞龙之治羣公式叙修振鹭之仪清问不辍于临轩敷奏时勤夫佩笔我北山王公以台谏第一首简宸衷唐识李峤称为才子宋登苏轼选在正人而公以不世之才际有为之日方骑羊之岁李泌谈棋迨蔚豹之时张璠理楫金门射策入天禄以吹藜玉署挥毫上瀛洲而视草自甲至乙凡四库读人间未见之书袭六为七作一经是天下可行之语时推陆贄爰欲见之施行上识贾生遂以观其讽诫乌鹄集升平之第乃应迁官白马乘光武之朝还闻指佞鱼头比劲不憚批鳞虎颌抒忠无嫌履尾赵忠献三十六事一一朱销韩魏公七十余章频频白副然而存圣朝之宽厚靡尚风闻若乃陈民事之艰难偏多露奏松到天而不屈葵向日以恒倾故事莫重于格君请经筵以崇正学惠无踰于爱物论清丈以豁浮逋軫畿辅之灾而欢声动地谏颁历之失而鉅力回天胆落貔貅似温造之弹李愬迹消狐鼠如元礼之按张成是以哲后改容都人敛手两界进贤之任皆收得士之功桃李悉入公门梗梓尽登天府门生脚迹传衣鉢以金莲公侯腹心得翹关於玉笋遂使献

圣主之颂贤臣允赖直臣歌王国之诗多士咸由一士盖其政治原乎经术故朝野仰为真儒风节泽以文章故进退皆成学道当其闻慈帏之变庠处三年迨乎忤贵室之心岩居数载淮南枕畔但有鸿文西蜀亭前惟多奇字虽天人之已对尚下董帷即日月之云除仍亲孙案滋兰树蕙时歌屈子一篇蒔柳栽花独向元卿三径被服有同乎寒素乡关罕识为贵人斯其旷怀雅致渺矣难几实则峻节清风确乎不拔也若夫天怀纯孝南陔常自耕田至性友于北阮曾闻让宅任彦升之禄米半乞亲知徐孝穆之车裘恒资族党都无介意推童子以赤心岂待论交埋故人之碧血微才可録项斯顿引以登龙片语相知朱季何辞于嫁骛此则挺峻望于一时宁让昔人于千古哉忆余未申之间遇公苕霅之上琼林玉树见太尉回出风尘金马碧鷄信使者能操月旦而公罔谈荣利谬许清游浮碧浪以连朝对爱山而终日共平原之坐十日壶觴泛清猷之舟一囊图籍及乎分衿河上归袞朝端泰斗维隆幸得分辉于威凤云泥自远犹蒙垂念于穷鱼兹者岁值疆圉月居监德余友贺子千里致书谓夫会啓龙华香闻浴佛实当梦来麟绂庆協生申瞻紫气于函关诞黄星于崧岳长羸届节应律吕以全昌大衍成蓍得乾坤之正策顾贱子奏南飞之曲俾同人献西望之觴爰考前人辛说怀康济之志用稽此岁翁子当富贵之时而公姓名早着于彤闥勲德已传于青简岂待熊经鸟伸之说验其麟摩凤集之祥但当开櫻笋之厨酌郁金之酒为亿万人而请命壽及苍生用五千言而养生道崇黄老尔

臬宪金公壽序

西京七世光祿特着其忠勤南宋千言太宰允称于傳洽累传碩德笃起伟人我长真金公越水鍾灵燕山毓秀得冬成岁当君子之乘时诞岳维神应正人之得位二难竞爽美龙跃于平輿百行咸修听凤鸣于岐岭弹琴受讼入县皆花制锦当官随车即雨诏以豫州为法政莫善于贾逵出守广陵之区衆悉呼为召伯军国资其飞挽金粟藉以流通名动

宸宸威崇宪府赤幢曲盖以宠向雄苍佩彤幘而来郭贺胸中冰雪能平雀鼠之心手内雷霆欲破狐狸之胆矫长孺之节藜杖皆苏大于公之门蒲鞭不试黑头未老仁登公辅之堦黄耆何难自是神仙之相盖由少由壮而至于耆艾陰德有似乎耳鸣自令自守而迄于台槐盛业几难于指屈史之言循吏活万人者封诗之颂大贤作三朋为壽勲绩已详之鏤鼎纪述岂待夫抽毫哉独是公之为政断于经术而加醇公之治人本于风雅而益厚泽加四海所至皆慈惠之师名重一朝共奉为文章之主梁园宾客时满坐中蜀郡弦歌常闻境内西园竹叶频开文举之尊东阁梅花共索何郎之句如一麾于汝水重新大复篇章方再莅于平山更大庠陵堂构望仙楼上六朝之烟水全收喜雨亭前四野之禽鱼欲舞青箱万卷有才子以读书絳蜡三更共夫人之捧笔此皆近时之罕见亦岂俗吏所能为也夫人虽富贵惟有德者必传道有盈虚独斯文而可久岂待熊经鸟息守黄老之庚申二首六身筭絳人之甲子耶予偶来桃叶适庆椿龄敬捧兕觥从父老之後爰抽兔管进元辅之前

孙汲山六十序

一人知己在当代以难忘两世论交虽古人而匪易嗟余不敏运值鼎移赋命多艰时逢琴碎赖得汲山孙子有敬仲之同心以致新斋先生见吴蒙而刮目呼之小友期以大儒特悯其才既施之于不报爰周其困亦爰也而非怜俾我良朋经雪霜而弥笃迨兹薄宦历风雨以相依而先生早梦白鷄遽骑黄鹤碑前酹酒空伤腹痛之言海底扬尘不及指弹之顷顾小子已成皓首笑长君亦见华颠兹值逢申适当周甲因以祝华之诞回思入雒之年谓壮志之同怀方慚季重美英才而独妙还让子荆赋尽鸿裁望赤城而霞起声多鸾啸响碧嶂以云凝明复才高非他人之可及伯符年永将何事而不成岂知半世沉沦彼百年有同过客万端寥落我两人具作老翁也哉然令子文章堪绳严祖旧家富贵已任小儿君善长歌每篇辄数百语我闻善酿一斗可十千钱宁不足举酒以自豪倚声而相乐耶

丁泰岩方伯闰八月壽序

盖闻河岳鍾灵雀籙维彰于辅治乾坤衍策龙图用协于归奇良臣奉帝赉而生是月名符天纵君子应大来而出维时数叶阳余白帝之运方增苍生之望弥永大方伯丁公直方而大纯粹以精虎观谈经屡夺九花之簪鸾台视草频抽五色之毫宠照金莲归常赐锦班崇玉笋奏輒含香

宸衷雅识其多才名隐暂观其大用驱车剑阁澄清立靖蚕丛叱馭金台惠泽溥施龙迹帝曰

汝往维吕侯乃可祥刑民谓吾生在于公从无冤狱山高百子未比陰功江近九宗难穷德水庇幸同于斗野殊庆来苏曜忽照于吴天乃蒙分召紫薇开省三台望此中书翠蕙承阶四岳权侔宰相清操特立如山而独柱中流雅量无方似海而能收衆泽严甲乙之辨犀照难欺靖戊己之屯?张不逞芙蓉被沼府中时有三才桃李盈门座上恒多八俊斯则裕钧衡之度非惟宣屏翰之猷矣尔乃岁沴频闻时艰独任请宽逋额章十上而犹持奏罢苛条漏三传而未寝开仓可济不辞矫诏之嫌分粒难周时有辍糴之叹遂使金饥木毁水火无忧左矩右规方圆不困鄴侯粮运还成翊汉之勲王濬戈船立奏横江之绩此又功在生民道存家国由兹积庆庆何止于百年以此膺封封寧同于万户也哉兹届生申之会适逢闰酉之时辰在壽星倍见而应知多壽月临观卦重逢而正得大观桐已茂于一枝莫更舒其六荚羲龙缓轡留连顾兔之光岐凤添翎稠叠素鸾之影四十七年而再见夫岂徒然百千万姓以同欢吾无间矣况乎五年而称大备备则具美之辞三载而号归余余有延常之义酉为阖户万物于以成功闰则居门五行因而得序其为正人之福寧烦太史之占也绮厄比黄杨?分苍樾云生待岳方自托于依刘神诞维嵩乃适同于颂鲁望丹葩于玉宇快覩重轮献碧藕于瑶池欣多一节指长松之东茂即十八年入辅之松歌素鹤之南飞是一千岁神仙之鹤祥随历远美岂言扬幸诸子之文心芳同兰?属鄙人以简首义取藁莱爰述休声伫观茂祉丹分八八灵膏信可驻顏门入重重瑞梦非同折翼尔

徐辰远六十壽序

盖闻士君子获遇于时则统货泉而司九府不居其位则肯堂构以亢三宗俾孝友之称式尊于乡党而仁义之实用協乎经纶虽有隐显之殊略无贵贱之异也徐子符赤砥行能文凤与吾家聯葭莩之好恒来余邸深兰?之交因得悉其庭闈用以钦为模楷信足声传于东海良为誉重于南州则其尊人辰远先生具摩顶之麟文应集肩之凤采虞廷才子堪能竞爽乎八元荀氏家儿鯤乃鍾灵于再索生而岐嶷当抚尘已与衆殊长更权奇在垂髫即膺时誉问杨梅而即对慧识偏多緝蒲柳而恒残勤工不怠会值永嘉之末地满黄巾幸当贞观之初天开紫盖班仲升慨然投笔耻为章句之谋管夷吾意在筹边决用牢盆之策念王父年逾杖国何堪犹问米盐痛伯兄身早辞辰无复能司管钥敢辞劳瘁王戎独善持筹力任艰危周顗雅能当户一成一旅淳兴当衰夏之余三缩三盈崛起在居陶之际法天时而消息冬资絺而夏资皮视地利以权衡齐树桑而陈树漆不侵然诺出言恒重于黄金每好施予结客何辞于白璧义声日起好行其德以无私侠气云流善用其才而靡困遂能方员并画内外咸资催租不患于叩门可赋重阳风雨倾橐无嗟于仰屋常资伏腊壶觞兼之门无间言庭多愉色柳公权之尽孝虽异出而姻戚不知王休徵之存诚每上食而饕羞必谨事嫂如母衣冠恒肃于文渊抚侄如儿封爵可均于郑国曾家之弟妹单弱恒赖其贍范氏之宗亲田宅悉沾其惠是以闾里称之长者朋友谓为正人缙绅愿与之交冠盖成为之式固其宜也岂有异哉岁在着雍月逢大晋先生适加三豆诸君将进一觴弗揣不文因而授简用其多祉藉以侑觥遂揖我于宾阶乃陈言于客座曰人之格天者以德天之报人者惟年资之好修既为圭而为璧酬以上壽必如冈而如陵花甲六十年而一周天道始为不爽椿龄八千岁而益茂人事岂为偶然昔孙相之上书始起平津之阁若羊公之建节初题岷首之碑前路方遥斯年末髦先生华龄始届盛德方新偕隐鹿门是庾间之梁孟承懽燕寝有廨内之机云以文旭而为长君才如卜式致厥构

之方长以符赤而为仲子名类何蕃识其门之将大凤毛在握已备九苞驹齿方长行看千里
婆娑二老聚兰桂以成欢矍铄一时咏臺莱而衍庆欲徵园绮待纁币于瑶廷共羨陈荀列盘
觴于珂巷某忝称逋史幸覩遗民歌玄鹤之南飞偶停轮于淮水望青牛而来度还辍驾于漣
川敬拂鱼笺欲作无疆之颂爰抽犀管聊歌既醉之篇尔

代王孝扬将军祝吴留村制府壽序

盖惟辅世长民必有并包天地之量亨屯济蹇定须弥纶川岳之才量不足以蓄其才不可以
成大业才不足以运其量不可以树奇功余虽早弃终繻罕窥董册然尝盱衡往古羨名臣遭
遇之隆流览近今识哲士匡扶之故乃知萧张辅沛姓协龙图申甫弼姬功存雀籙其人其事
岂有诬欤今天子神武懋昭弘文广被瑶堦舞戚消兵气而为景星玉几垂裳变炎云而为甘
露海无惊 四瀛已靖夫狂澜雨待重云五岳并敷其恺泽而我留翁懋膺

帝简特应师占寄重钺旌如召公恩绥南服望隆鎖钥似莱国权镇兆门总百粤而化行不三
年而课最余忝叨阃外幸交平勃之欢共事行间复讲晋秦之好小非大偶聊自附于芑萝矩
用规前窃用忘夫樗栎依葭谊重公既不鄙其愚聚米谈深余乃备闻其教虽管窥蠡测何能
言海岱之高深而禽语虫鸣亦足见乾坤之广大一则公以文章华国经术承家或能起誉于
循良未必显勋于师武而公得龙渊之剑本自秘传演豹韬之书由于神授是以谋而後战六
出见意表之奇动则有功三捷奏师中之吉下至山陰只矢每欲贯鵬河北空弓还能落鸟仁
必有勇岂不信乎一则公以铁石为心冰霜在手未必克调于水火必将过任其风雷而公德
济刚柔原求止杀性全忠厚惟用胜残是以破柱宣威长殄九头之暴高门集庆独存三面之
恩下至伯氏遭褫没齿无怨李平省过铭腑益深猛济以寬又其大也至若躬擐甲胄跋履山
川费禕临戎似少围棋之暇谢安破敌无复赌墅之闲而公才大于身器余于事傳修期之露
布下马即成曹孟德之诗篇橫槊能赋遂使通白狼之译只须自制誓词赓朱鹭之歌无烦代
为凯唱左宜右有实已兼之尔乃廉可酌泉清为饮水武侯报国家人并少栽桑文正居官旧
好惟貽画荔而公情殷赠缟谊笃盍簪筑渤海之台常因燕友置茱阳之驿每用迎宾遂使禄
米资粮任彦升尽分戚党衣裘车马徐孝穆恒借故人礼至情生无以间矣是以允文允武既
为宪於万邦所过所存乃弘孚于四海功崇社稷

天王爰见其忠宠锡河山云裔咸蒙其祉名高一代李元礼望重龙门功炳千秋霍博陆形图
麟阁盖建非常之绩其才必自非常而存靡尽之心其泽益为靡尽胸不留乎一事始万事遇
之而非难怀可容夫万人无一人当之而不善公之得此岂易言哉予之知公如是而已若夫
桐乡泽远樊留多朱邑之思栢府冤销平反颂于公之德密谋制胜机屛中而维先神筭除凶
功垂成而不有挥戈穷海立清九鲤之尘秉钺岩疆迅扫五羊之瘴覆哀鸿以甘棠之?此户可
封震害马以拔薤之威扣舷无警诸葛上渡泸之表南人竞拜纶巾一韩赞平夏之谋西土羣
归綉纛则遗黎诵德百蛮可谱为国风太史书勲千载永传于册府何待小言以抽简乃当盛
烈之铭钟耶兹逢昂诞之辰共献嵩生之祝野人酌兕歌君子之万年老子犹龙备圣人之五
福臺莱可咏虽宰相尚在黑头而葵藿同倾况姻娅偏承青眼聊书鄙见用表微忱闻兆姓之
讴歌咸称骏业合万方之颂祷必致鸿禧矣

黄高枝五十壽序

盖闻瑶浆玉屑不美钟鼎之荣宝质秘文何殊黼黻之贵具餐霞之逸气自有灵姿抱朗月之清标皆原仙胤粤稽往册历有神人胄莫迈于春申名必推夫江夏来同角里过商岭而茹芝奇似初平入金华而叱石覩叔逵于市上世尽知为异人渡黄安于江边羣共矜其幻术故不仅圭纓累叶夸燕翼之纏绵车戟盈庭慕鸿图之赫奕也我高枝黄公第一英流无双华裔清名映世澄千顷之层波雅操轶羣比一时之山谷独超物表鹤立蜚声深味道和鸾仪竟体幼知辨月种宿慧于英龄长足凌云耀神姿于壮岁是文强之後嗣世不驱蚊如季常之诸昆衆咸推马惠沾闾旅真乐善而不疲德及壶飧屡施恩于莫报是以身膺厚弗代啓纯麻彩舞日边有阶前之一凤絮飞风际见掌上之三珠庭墀聚王谢之佳冠盖尽应刘之彦兹邁中和令月已登大衍遐龄岁德纪于昭阳实兆物孳生之候義图临夫大壮乃一乾奋起之辰乐奏华筵听夹钟而应律觴飞琼笋借檀尺以添筹桃开度索之花草满曲江之路昔韦玄微主持松菊实在斯年高常侍讽咏诗篇言当此日古人可及盛德攸同所谓家有素风亦何需于跼鼎人称耆宿岂更企夫楚冠也哉余远望西瀛仰瞻南极初交洗马因知乐令之清欲御犹龙未遇李聃之度比金兰之共谱行将进夫丹麟与赤松以偕游早已窥同朱鸟矣

程吹万五十壽序

余尝遐稽往乘近采芳猷则有名炳于射蛟而支分洛水宗高于毓凤而胄衍岑山人称乔木之家世结丝萝之谊虽云齐郑小大或有攸分要是晋秦疎戚曾无所异念当归里获奉通家既谒上慎先生展登堂之拜复交象六伯子修对雨之懽契胜兰荃知深棣萼轩轩霞举似司马之当年奕奕风神得元龙于此日因知吹万名高第五何减骠骑之称才擅无双早得鹄雏之目与江子辰六既忝断金偕家侄星陈复叨倚玉淮波如带徒深藉卉之思隋苑褰裳未遂入林之愿兹岁逢单阙月在修臯偶登韩信之台遂访枚生之里西园对酒恒剪烛以宵分东瀼联吟乃披襟而夜永不但加之觴豆若鲁肃之遇周瑜益且诵我篇章若苏涣之迎杜甫既叹其伟识为无以加又服其虚怀实不可及也君少标麟角有应奉之五行长具龙文擅陈思之八斗推梨道左非藉教而能怀橘筵前本因心以得故人如福時曾不憚于誉儿而客对休文或反称为知子高轩偶过即知昌谷之才朗鑒长逢辄被庐陵所赏既芹香于泮水尝欲弃繻乃菜释于園桥仍为鼓篋逢当年之郭泰许以龙头叹此日之刘蕡终成猿臂固自安于义命聊小试其经纶端木赐名列四科何嫌亿中管夷吾功高九合独致富强既雅遂其归田益勤修乎服耒堂前椿树频将膳鲤之盘庭畔荆花罕问射牛之矢小臣有母虽继也而加亲君子爱人即远焉而若近且夫三宗待?百口名桥所有经营终是诗书之气偶为筹画无非仁义之心射鲁连之书恒因排难命原陟之驾常用扶危意以诚求曾赏放麋之德交无泛及寧忘嫁鵲之言胜友飞觴席上常闻横塵名卿倒屣巷中时有鸣驄洛下英贤咸归朱勃关中豪杰愿识袁丝既梦刀已協于三州而赠佩将驰于千里且捧檄不仕谓其乐莫过天伦而执卷自娱云吾意惟师古训朱翁子时当富贵已在今年苏子瞻生有文章适当贞岁宾客将为之进酒先生反用以辍飡奉杖履于方康恒言奚以称老念壘篋之多故索处何忍言欢况植杖于家始能及艾而称觴非古敢以固辞遂使人似荀龙竟无欢于舞彩即教仙来茅鹤且撒乐于开筵策有乾坤数始全于大衍道由河洛易实备于中宫故蘧子因之而察非尼父乃缘以知

命斯时为重在古有然兹值悬蓬适当指李月名天皓斯为四季之成节号星回差在一朝之後咏高山而颂刘涣予也爰用抽毫泛朔雪而访戴逵君兮何辞洗?程君乃避席而起曰敢不拜嘉吴子遂扬觶而言曰祈为引满

汤惕庵夫子八袞壽序

尝闻具超世之学必有超世之才怀济物之心乃有济物之事故权衡内外略有数端而粤考古今实难一见盖文章精如晁董则理学阙于程朱经济妙若臯夔则节概疎于巢许道难备美品鲜兼收而吾汤夫子则其人矣夫子秀擷章山灵鍾盱水以韩昌黎为尚友力振颓风作李泰伯之乡人重开正学鸣珂华胄传经高虎观之声覆锦宏才闻礼得鲤庭之教汉宫射策广川独对天人宋殿抡英沂国寧求温饱初当解褐宾僚选重于芙蓉迨及弹冠物望风清于芍药鸦能诉枉曾闻讼院之铃虫自销冤不载属车之酒香焚五夜赵閱道事可告天雨润三春郑子游心原如水抱牍而争富民之狱宁忍避嫌开仓而济荒岁之饥何辞获罪见督邮而弛带独伸彭泽之腰抗内竖而回轅不屈洛阳之项大臣奏状偕推轂而谓非常

圣主知名将题屏而需不次委股肱任咨傅说乃予阿衡作耳目官有田锡是朕汲黯乃因姜桂之性不赴朱门遂致梗梓之材暂淹粉署指珠江以叱馭直至五羊过锦石而埋轮惟携一鹤李元礼之为司隶破柱而挫豪强陈仲举之守豫章下车而询贤士戴星出入必秉烛而治簿书竟夕勤劳每忘飧而忧饥溺入日而平杨泰美料敌有若天神一战而?卢循叹成功乃出儒者用剿而兼能用抚百万衆悉以投戈治兵而还可治刑十余城羣为解网靖海滨之鳬雁咸沐生成化岛上之鲸鲵总归覆育是以名高历任勲着累朝周必大之面叱羣?允资服丑王居正之力辞兼职克佐诘戎旋晋中枢端司远略而心伤荆棘徒衔恨于铜驼身隐蓬蒿遂忘情于金马笋鞋桐帽有处士之家风诗卷棋枰是潜夫之日课虽制府虚席肃纁币而频将而藩侯式庠列鼓钟而空返姜伯怀之蒙被不见画工苏云卿之移家爰逃过客事传在昔人见于今矣若乃盗可化贪惟畏知于王烈民尝经乱多就避于管寧陶氏诸儿靡营心于利禄韦家令子俱肆力于篇章既正己以化其乡爰藏身而善其俗忘机海鸟寧知野老之争混迹山麋罔计醉人之忤登临靡懈郭尚书之龙耳多徵仁智相资朱考亭之虎皮足据乃致邦君登请来为庶士仪型缉柳成编大啓横经之席折松为麈弘开讲德之筵遂使负笈云从儋登景合雾屯五里寧言市比华陰风动百城但觉车填通德何其盛也不亦休哉兹者岁届摄提月逢修相在曝衣之先一日当舞彩而庆八旬瞻绮季之冠裳眉真似雪随王乔之履舄足健凌云钞向朗之书蝇头未倦造宋纈之室鸾德愈高时间谓之地仙天下呼为人瑞绮久疎几杖夙忝门墙老已无成谊殊慚于知己望而弗见忱未達于行人仰厥生平已全乎三不朽揆其福泽必至于万斯年敢因捧竿之辰聊纪勒彝之实顾三凤而告曰君能养志兼乎养身持一鵠而祝云吾将卜年且以卜世矣

广陵太守崔公壽序

盖惟三河作表同称慈惠之师两汉旌贤独首循良之传是以宠咨贤牧别造玉麟秩进上公专驰画鹿然而权分轻重事具古今才或未竟其心事且有违于志矣而况江环海漚地当水

陆之交民馁军疲时值早潦之後非藉抚绥于召父难期含鼓于尧民兹幸生崔公用德为才以仁行义灵锺常岳天与宝符秀诞清河人推象笏杏园对策摛文丹凤楼前桃岭鸣琴建绩白虾池上障狂澜于既倒支大厦于将倾三捷频传美书生乃能辨贼一麾不次信

天子不肯负人股肱莫重于江南心膺遂膺于淮右幡熊欲度争栽百尺之棠竹马初迎已秀两岐之麦化行无欲绩报有成兹当星现之期共献日升之颂儿童忭舞迎紫马以奉觞父老欢呼持白鸠而拥轂或谓公清若水咸言君惠如膏比人在于镜中神明可感若兵过于席上保障无忧惟其存不忍以为心本无私而出政悯劳人之已困惟爱人不致伤人识多事之维艰欲省事遂成无事何烦破柱蒲未试而先威罔待投书薤相传其自拔冰壶皎洁笑刘宠何用一钱玉尺温良较廉公寧惟五袴仁恩翔洽遂闻经月以无笞义问昭宣不俟五年而始信若乃拔素土于泥中似文翁之长随儒者拒奸人于境外若楚材之不拜国师菜佣弗问独悬榻于南州兰会维严特传经于北地斯则智炳机先识超格表公才公望虞????实有兼资用武用文裴侠诚堪独立凤来颍水仁见徵黄龙望巴陵行当擢沈岂待主簿之贺乃占宰相之祥也哉念昔贤昆用传令嗣亭伯之子以慈父而着称神武之儿以良臣而起誉养和平之福功已在乎苍生食贞固之休算自绵于绛叟而公仰齐芳躅远绍前徽顾金仙而授籙毋须问玄雪之丹命玉女以行觞且愿进黄华之酒

大中丞汤荆岷夫子壽序

盖闻直方者君子之心而包举百代惟其大清任者圣人之德而令育万彙则以和然而理学之儒耻谈功业勲名之士罕究正诚求其内外之兼全实则古今之难覩先觉後觉尹旦之迹既遥见知闻知邹鲁之传亦远谁为名世实在大贤乃数千年以来绍仲尼之学在五百世而上闻伯夷之风则我汤夫子盖其人矣我夫子名居雀籙生应龙图镇天地之偏灵异聚于中岳分星宿之闰浩荡衍之大河玄鸟开符远继瑶筐华胄苍麟吐篆允膺绣绂殊祥当卯角以趋庭有严君乃生哲士方香心而立庙为烈妇定产真儒继直节于徽猷品高介石传奇文于光禄名重吞星早岁横经已矢怀于忠孝少年登第罕自足于科名奏天人之书良如董子絕温饱之志远类沂公纵覽青编自甲至乙凡四库穷搜紫府袭六为七作一经欧阳修之在翰林文章莫大于是陆敬輿之称内相公卿罕及其才出而试焉天语相期以银信用即效也地险聿障乎金城皂盖朱幡布清风于一路青藤翠竹养重望于十年会

圣主之念贾生致大臣之推李泌玉堂再入还登视草之台金匱重披独据编年之席珊瑚入网尽东越之奇才玳瑁装书有西清之秘典班孟坚爰成七志刘知几实擅三长史局无双四百载之劝惩不爽经筵第一十六字之敷奏独详常言折柳之非时

上輒改容而听每效倾葵之向日人皆掩耳而惊谓界半壁之乾坤非赵尧而不可欲出三吴于水火得用李勉以为宜汝往钦哉惟重臣斯当重地名望久矣欲仁政必赖仁人父老欢呼迓单车而稽首吏民震懾瞻油幕而言情于是白简频飞墨吏闻而解绶皂囊特献贪夫畏而改弦照察燃犀虫足自销其百威行破柱兔窟何虑其三请托难通兹夕止谈风月关节不到此间大有冰霜偶试雷霆已令钱神褫魄频施雨露宁容旱魃留形正风俗以正人心江汉因

无游女省靡费而省物力间阎顿絕淫巫感至德之馨闻赖梁公以不毁念清尘之髣髴俾刘尹以重新是则政未及期而百废已举令无烦再而事远悉闻者矣至若霁月光风穷達不移其操浑金璞玉美好弗入于怀服平仲之澣衣非因学俭具公孙之布被岂为沽名坐少重茵每念四方之困食无兼膳恒忧百姓之饥积数月之焦劳聚米频经密画竭一身之胼胝煮糜每用亲尝岂若汲长孺之开仓惟全数千余户乃如韩忠献之设法至活七百万人仍欲飞章减浮粮于昔所未能减常思请命言大事于人所不敢言即或奏免而未行顾吾心之已尽若其求生而不得信国法之难寬是以遍野哀鸿同登衽席一时害马悉化戈矛听神语于空中尝云胆落遁妖踪于境外尚自心寒西蜀纶巾罗拜武侯之德北门鎖钥羣知莱国之忠自结主知登公府惟凭赤悃行膺帝赉拜宰相犹是黑头盖我夫子由格物以致知而学术斯为有用自修身以治国而经济乃以不穷惟与世毋欺自可有功于民物必居心不愧始能无负于君亲本无欲以成刚善养浩然之气非有污而自洁长存卓尔之思合朱陆之异同而折中有本浑蜀洛以参究而归正无阿故能江海为其量日月为其心乃复见古君子坎富贵不能淫威武不能屈此之谓大丈夫也兹者候月为阳得冬成岁杓方指亥调玉烛以功高岳更生申仰珠衡而光灿虽先忧後乐寧须黄老之修持而巷舞途歌自有苍生之祝诵绮本原樛栌谬采参苓登伊川之门何辞立雪入扶风之帐自喜披云虽承一日之知实附千秋之契自谓为大贤所得士但觉身荣况今遇君子之逢时何胜色喜南山栲北山柎聊取华封之义川之至日之升难穷绛县之期望白鹤以南飞何能吹笛值青牛之东度徒愧抽毫尔

徐健庵先生六表序

皇上御极二十八年十有一月健庵徐公以假乞归其次年大学士立斋公谢政而还斯时也良臣因浮言而避位一朝之去就匪轻

圣主扩大度以容贤千古之是非自在或为

庙堂惜者则曰谁其弼我皇猷或为世道忧焉则曰谁其作我士气而黄陂之逋叟乃白社之旧交爰驰寸牋以申言乃酬一卮以致庆曰东海之泽其于斯而益长北极之思其于斯而益重乎盖考之人事既有进取而即有退藏稽之天时必有寒消而後有暑息今公之昆弟以不世出之才遭大有为之主偕膺荣遇并擢巍科似诸陈之并入龙墀而皆司纶綍若三洪之齐游凤阁而专领文章继起而振佩金华同趋而联班玉笋是则科第之盛复絕古今矣况夫宰相为朝廷之股肱而手足并系济时之任尚书乃

帝王之喉舌而花萼迭司执法之权元臣方蹇谔以立朝多俊亦聯翩而入选是则勲名之显照耀一时者矣尔乃简在宸衷屡膺异数光腾万丈雄文齐李杜之称宠冠百僚大儒媲朱程之号撰书编而名高历代总史局而功在千秋是虽燕许之鸿篇未可同日而语也至于身标物望德重儒林所至而车马羣归多于林宗之槐市在座而人才广聚盛于任昉之兰台後进仰为楷模羣贤奉为宗主又虽君公之雅望岂可并驱而争即如周甫之鸿名奚妨同声而颂哉予之与公睽离十载今公之业日盛公之位日尊遂天壤判乎云泥而信誓盟于风雨华子鱼之挥锄久见量于管寧杨伯起之却金从不闻于王密岂有叔子乃至鸛人可信曾参原无

杀客忆今岁之孟夏曾相见于隋堤方对酒以论心喜停飞盖且临岐而执手暂挽仙舟谓友朋之知己难忘况受恩于君父即平生之话言不苟矧毁行于苞苴曾几何时乃多快事夫贤如王曾也不能不疑公着之受赇即圣侔光武乎不能不使文渊之遭谤但正人之心事揭日月而可倾良辅之胸怀值风雷而不惧故不有所抑不足以扬其辉不有所藏不足以发其气嫌生于最近而孤立之操始明毁积于多端而流言之来可白以此立望而望益重于龙门以此受知而知更坚于螭陛将玉环之召不待再赐于九重而银信之符何必趣归于万里也而予之臆见更有鄙言昔庐陵之忠终以苍蝇而有赋眉山之直还应磨蝎以兴嗟古之大文人类有然者今之诸君子又何论焉且也志炳日星何妨身依泉石东山局畔苍生之眼自青海樽前白傅之头正黑宋温公之再相终当福及蒸黎周诗人之九如但以颂夫元老

家中一七十壽序

余家自延陵以後代有执珪广平以来门多列棨文称三变体首创于左台词重一时名更高于中舍凤凰村里碧沼浮香鸚鵡筵前采毫称妙大魁洊登于昭代名卿迭见于两朝良为蔚然可云盛矣然而虎头未遇猿臂难逢叠奇字于一牀蠹鱼空老着雄文以千卷绣虎徒伤亦有其人实伤其世也予族侄中一隐君生而穎敏幼即权奇白凤集肩应悬铃之梦苍麟奋趾兆吐绂之祥恢也相期吾家不乏季子柔之见赏君才可比扬雄而运值中衰时方多难严君已卒乌鸟叹其难存竖子营钱鼠雀为之自饱青衿一领徒嗟岁岁年年黄绢千箱但笑期期艾艾见小试则勇何才之多乎遇大敌而奔非战之罪也乘风宗慤空思万里之雄失路刘蕡频为六月之息乃复怨尤不作义命自安忘得丧于楚弓任盈虚于鲁席趋庭有鲤学礼而还以学诗射井无禽读史而还为读易时而素蓋灋雪常含泉石之滋时而紫栈浮烟忽起楼台之气陶渊明之室内惟有琴樽许玄度之窗前无非诗画萧然自得多忘螭螟之争淡若无营静看鷄虫之竞而情深赈患恒裹饭于雨中且义笃论交欲分金于台上焚券非关于市义不待冯驩纓冠常为夫解纷偏多原陟是又勇于为德厚于济人者已而世事多浇人情日薄借耰鋤而见色谄语时闻破釜甑而失声伤心不免门前十丈难消蛮触之尘山下多岐莫问羝羊之径故当年之荣辱不入于心且此日之纷纭不关其累其于黄老之旨得之已深何必缘人之言算而始识也哉然而人多似马总是白眉子尽如龙咸同紫色仲君某名高石鼓之碑季子某声振环桥之席森森桂叶看来絶胜燕山奕奕兰枝种就都如李浦将异日之绳乃祖远胜于前而皇天之报善人必昌其後矣兹值斗杓之指亥适逢崧岳之生申入灵女之庙中歌传赤凤见麻姑于海上脯擘丹虬余也忝阮氏之步兵竹林曾入似王家之痴叔椿干亲瞻实久羨于至人遂荣观乎胜事君之醉已且待蒲轮之徵我所乐兮更酌松醪以献

盛霁斯五十壽序

霁溪解组笠泽浮家看花邓尉之山藉卉吴王之苑获交高士时有求羊爰爰名贤多如枚马尝为置酒论故事于青梅每复和歌记新声以红豆尤与吴生交好者则有盛君霁斯焉君夙负隼才少多至性耻为章句班仲升投笔以兴嗟小试经纶费长房悬壶而乐道洛阳市上曾教女子知名少室山中徒说至人无位乃君冷然而善具诗人之情藹乎其温有君子之德何烦猛士不教贡父眉扬雅以雄文可使曹公头愈况乎才精顾曲学妙审音白石吹箫自谱新

词一阙青莲吮笔频传雅调三章度云母之屏前冠新声于法部付雪儿于座上传丽句于宾筵斯则艷极芙蓉良亦秀传杨柳者矣尔乃温恭御物孝友承家子骞曾无间言太丘尝多懿行林中觅笋惟以供甘陌上推梨不渝其爱铜盘馈食抚育过于所生玉粒调饥施济颇能无倦是以管公邻叟尝感分泉朱氏乡人咸能让畔慕其行谊者既比之以马少游见其词章者亦拟之为韩康伯可也然君之品无忝如松而君之年甫称及艾较高适学诗之岁则已着才名若翁子富贵之期则方当荣显时维佳日门鲜杂宾庭桂初开诸君皆举觞而泛月篱英将茂吾子其进爵以延年乎

孙禹锡壽序

人多俊杰世重乐安间尝尚考遗编乃得历稽往哲或功高相楚而以廉吏作歌或威着强吴而以宠嫔立法或品崇漱石而雅志不羣或文贵擲金而雄才自喜他若苏门长啸九天传鸾凤之音海国专征万里靖鲸鲵之浪字不可易集贤长叹于曲江名欲无双秘书获登于制院几难指屈在昔日已知名独许心期于今时而显誉则有鸿冥高士是为豹人先生以遗世之才负济时之志数奇不偶长怜李广难封岁暮弗雕终喜冯唐见识览其鸚鵡赋偏知受简能工夺我凤凰池不觉拂衣竟去归来黄绮歌既遂其采芝共住朱陈好更聯于附栢当车行酒常同荀淑之儿素爱赏奇乃识士衡之弟则有禹锡公者门多列棨家有赐书华岳鍾英掌擎巨灵之?渭川擷秀身依帝女之津山啓尧门长浮云气地分井野仰应星文生本梦兰早有青麟吐绂少能怀橘曾闻白鹄驯堦谓是儿必大吾家言此子可名当代声蜚芹水杜樊川曾心赏于武陵遇沮棘闾苏眉山乃目迷于方叔嗟鸿文之败北三战由天徙鹏羽以图南四通得地管夷吾非欺我者端木赐固贤人哉用是持筹致金钱于三累因能肯构振师旅于一成然而性恶浮靡兼以身甘劳瘁十年在篋恒留晏子之裘竟日登盘弗美何曾之箸志不在于温饱雅慕古人意独存乎淡寧无乖昔训匪伊朝夕荷鋤靡废其带经好以诗书挥麈每闻其辍食岁时樽俎惟有故交门径蓬蒿都无热客二三子而外寧偶然款数十年以来盖泊如也是以田中冀缺见者讶其如宾庑下梁鸿遇而知为有礼顏公定誠常手写于屏间韦氏藏书每亲抽于簾内一夔足矣早振藻于桥门三英粲兮并露奇于里塾捧毛生之檄色喜因亲题仲举之輿名高为国然而公据鞍如故强饭为佳昔闻武公之时常箴饮酒今当向朗之岁犹且抄书是可谓之地仙予每呼为人瑞乃自执徐改历监德届辰节过烧灯盘内犹余荔粉时当祀户杯中还泛椒浆方当貳膳之期适值悬弧之旦承筐尽谢止教彩舞堂前吹笛无烦却喜诗题座右于是式间而请还怜魏照心誠遂乃濡笔而书敢谓江淹才尽念临雍屡见汉主正在乞言且登岳将封轩帝曾闻访道商山羽翼仁为园叟之求修水车轮必有申公之聘予且拭目以待公寧掉首弗行乎冀遥望其鹤飞愧少将乎鹄放但语令子且啜菽以为娱归告尔翁毋据梧而不听耳

乔翁六十壽序

予家世居江左籍隶歙西去陶唐之故都距临汾之大国星分两地有参斗之殊域限九州判冀扬之界然而经营鹺政每有往来流寓淮封实为亲切故冯翊之族每締朱陈而延陵之中无分齐郑而家侄祇若壻于乔焉乔居河东望为鼎盛如吴都之顾陆四姓称华若唐代之崔

卢一门居首里名冠盖入巷而竞逐丹轮庭列鼎钟当户而皆陈画槩先生稟中条之秀鍾姑射之灵生即权奇少而敦敏九渊三岁问天地以何穷僧孺五龄愿经文以常读见而知为大器长者惊其异才乃家方少替业值中衰先生闻叱牛之声时为陨涕览哺乌之句每为动心乃为端木赐结驷以游岂效傅介子弃觚而叹敢辞劳瘁王戎爰善持筹力任艰危周顗雅能当户法天时以握筭冬资絺而夏资皮操冰监以用材耕问奴而织问婢是以一成一旅勃兴当衰夏之余三缩三盈崛起在居陶之际而性安恬澹力谢纷华守诸葛之格言笑鱼弘之侈丽冬裘夏苴披服不异于儒生蓬径茅堵居处有同于寒素门无剥啄何曾刺挟绫文出每徒行不喜车驰锦幘至于时当见义勇在力为白璧连城似藺轻于一掷黄金满篋在楚重其片言鲁仲连之解纷射书即下原孝先之急难辍食而行或倒橐以赈饥或倾貲而助乏兼之闺门有礼孝友无惭似陈仲弓之居家若阮步兵之待物是以义声日起好行其德以无私侠气云流善用其才而靡匱其为德也寧有量哉岁在重光月逢监德先生适加三豆诸姻将进一觴弗揣不文因而授简用其多祉藉以侑卮遂揖我于宾阶乃陈言于客座且公之诞适值迎春是日也腊尽星回寒余日丽土牛呈瑞祝

天子以万年彩燕凝祥兆真人之百福气融残雪欣看生菜登盘景变条风其美官梅绕砌先生樽开白兽用酌屠苏幡剪苍龙以图人胜其为庆也又何如乎某谊忝葭莩情怡松竹望青牛而来度奏玄鹤之南飞敬拂鱼笺用作无强之颂聊抽兔管爰歌既醉之篇

新安太守朱公壽序

予尝读书至元崇受代荆人乃截鐙以遮留侯霸召迁淮土至攀辕而拥塞或严装待发山鹄为之衔旌或襆被将归枥马因而顿轡窃以为史臣扬厉多过实之辞文士铺张尽浮夸之论尔兹者重光御岁橘且当辰方载笔以归乡乍回轮而入郡时我朱公偶因夙累忽至左迁政拙催科大臣虽循例以入告恩留汪濊小民乃怀德以惊传於是士罢弦歌农抛耒耜荐绅伏阙车不待驾而遄行童叟途争汗未及挥而狂走于斯时也不既岌乎乃三事大夫尽闻声而嘉叹九重

天子遂览奏以咨嗟谓有臣而若斯万物将为吐气抚吾民而如此四海可以无忧爰沛德音用抒重望破一时之格行将破格以登庸缘万姓之情必且缘情而大用诏传之日六邑歌舞以腾欢命至之时亿兆喧呼而拜德且节逢日至运值阳舒璧合珠聯方庆大人之占泰葭吹灰动尽知君子之道亨也盖世尚矫枉之风人怀束湿之虑清或伤于过察而度鲜寬容刚则嫌乎近苛而道乖忠厚乃公也胸包爱育体备中和二曜无私赵之日惟冬而靡夏四时有序程之风即肃而皆温是以具直与方而独成其大兼清与任而悉出于和竿牋难通而不作岩岩之色问遗不受而匪沽皦皦之名驭属吏以深恩而臂指遂能相应协寅恭以厚礼而手足乃以不殊是以登元礼之门同饮醇而俱感入彥升之座偕挟纊以忘寒禁少长羈茂树生青于园户案无留牒好山绕緑于讼庭息积俗之器而牵牛之辞不听革里胥之扰而冠虎之刺无闻化类文翁有造者人皆譙秀政如言偃能来者客尽澹台百废俱兴而数仞之宫有臯门而俱整万家同戴而千寻之堰与洛渡而偕修峯号莲花比其嵯峨而莫及滩流竹箭较其灌注而益深则其德无穷而其名益久将与庄椿比算汉栢齐年岂若朝菌之华荣争旦暮实已

汗简之録光賁古今矣抑公之先敬则以庐境之声名立登宰辅仲卿以北海之治行超拜地卿考前事以非遥受皇恩其益重某亲逢盛事近炙荣光始知当代所为去古人而未远乃知程史所载在前世而非诬诵闕宫之篇聊为生民而志喜猷春陵之作更庆

圣主之得贤尔

新安别驾蒋公壽序

今

皇上御极之三十载尘消五岳听铁马而无惊庆协三辰卜金羊之有喜臯夔在位鼎调水火之争方伯连州垒壮河山之气澄清半壁江左赖有谢公綏抚方隅南阳或称召父而我公朗蒋公爰由浙水来判新都王休徵望重三公先着海沂之绩陈仲举名高一代暂收荆楚之功将大行焉有所试矣乃若先生神游象表学架区中本自游龙所至辄兴云雨常为鸣鹤由来直上云霄处闲况之曹偏持体要当颓玩之後独振纪纲清心常湛冰壶庭下时看瘞鹿妙用恒同玉尺案前不爽燃犀用法无私不挫庖丁之锋铎临文靡忽偏穷旁午之繁苛方坐理于一庭春风为之拂座迨分猷于四邑膏雨遂以盈郊开门兴子固之謡满道感季方之化东皋沛泽牛不喘于田间北野徵粮蚨欲流于地上是以别施坐榻礼独异于恒僚不撤屏星名已闻于当宁不期年而课最踰半载而政成譬之光弼临戎旌旗遂为改色一若武侯作相壁垒顿以殊观谁谓治中不足见千里之才长史未可入九重之听也哉昔公琰负社稷之器而竟掌钧衡子通具文武之才而旋膺封爵唐则秘书显绩开祚于义兴宋则学士承恩建功于枢密他若勲着平章迨乎名高学録簪纓衍于当代圭组盛于列朝而先生者承累业之荣麻振前贤之遗绪少怀异质穎不露于处囊长擅英姿器独先于迎刃惟因亲老勉受世知其养之也既深松栢允堪乎梁栋其出之也必裕枳棘何损于凤鸾由是而腾蹕天闲驰驱云路何所不至必且难量岂但开三径于杜陵侈为胜事封一朝于上党乃为隆名也乎予以耄龄甫归旧里快闻弦于入境已知赵轨能清及奉塵于登堂更识刘弘有礼盖半生慕义久怀嵇阮之清而三世论交实见纪羣之雅捧觴燕市幸谊笃于停云扫榻苕川复情殷于听雨匪朝伊夕信覲面之难同自昔及今慨论心而不易乃者时方建酉将乞筭于北辰序值生申且注龄于南斗距素娥之良夜仅隔一宵当白帝之正秋同开万户满城耆叟咸欢舞以跻堂属邑儿童亦讴歌而徧野君子颂无疆之祉小人賡难老之章客尽持觥望青牛而东度子将吹笛奏黄鹤以南飞矣

林蕙堂全集卷八

卷九

<集部,别集类,清代,林蕙堂全集

钦定四库全书

林蕙堂全集卷九

湖州府知府吴绮撰

序

徐母顾太夫人六十壽序

岁届旃蒙值天门之始旦月当毕相度星驾而方旬验瑞莢於璇堦辰临二九采灵桃於瑤水
筭合三千我年伯母顾太夫人悅结五花席加三豆婺华宵映雅協梦庚壽极秋悬始称周甲
舞彩而人皆宫锦称觴而客致上尊乃果亭立斋两先生珥笔西清徒切望云之想健庵年兄
脂车北道弥深爱日之忱睠此春晖逢兹秋爽中和令节聊将檀尺添筹圣善隆仪不待金钱
合乐三宗奉聿咸歌颂鲁之诗列郡承筐并效祝华之册谓太夫人家承曳履室有赐书世本
玉堂偏宜咏雪生成金屋不憚履霜桃花爰赋於南州苹藻聿修于东海拥牛衣而共语恒慰
仲卿肃鸿案而相庄母慚德曜晨昏龟勉常采茎以供炊风雨漂摇每牵萝而是补既曰女以
代士亦云母也兼师画荻堂前并是人间金马看花江畔总为天上石麟云在机先龙尾冠龙
墀之选错随鉉後鴈行齐鴈墀之名分灯而迭映金莲草制而同依珠树鸾回紫诰宠极河山
燕喜朱楣荣深雨露而太夫人处之欲若视以蔑如顾明璫而不御犹访蒿簪曳绮制而弥欢
长求弋绋莲花有国心皈祇树之篇菰米成餐口给翳桑之饭老而益笃贵极靡骄计其鍾祥
厥惟二善传而长世实有四奇小子敢越席以抽毫大夫其洗觴而待酌盖闻裴郎高第仅美
一夔孙氏聯魁才闻两鶚在红绶实关於国宠岂青箱可任夫家传兹则数应台星象成鼎足
叟咨咸遇而尧佐亦对銓坡遵迈同游而洪适仍陪凤阁踐羣材之上并得连枝处万选之中
恒先衆宝尔乃蜂腰起叹品量悬殊龙卧难侔声名或异几见玉昆金友谁言三笔六诗兹则
家可为言人皆有集读眉山之制作不数文定文忠续中垒之篇章皆是孝仪孝绰文称花萼
词号聯珠禁中传才子之称海内有正人之目至于八荀竞爽未必同胞三薛争蜚寧无异产
苟稍分于荆树必致憾于棣华兹则簾幄合为一音酥酪原无两味震坎艮之列卦总属坤成
孟仲季之分时爰资岁序鸞夸五采都出丹山珠耀九光俱生赤水若夫鸣珂入院仅在一宗
植戟当门无关他族甯氏徒闻於起宅崔家但訝其盜书兹则得玉署之名元是金闺之快壻
苗夫人有儿弘靖识韦令为贵人李太君得子叔原许富公以国士补科第之盛事巧借義牀
传姻党之佳谈独高温镜奇真未有美亦难名凡三君子扬名以显其亲皆太夫人貽谋以裕
诸後始则典珥收书鬻衣资学不祈金玉常燃台上之香欲具盘飧每剉牀头之荐继则遗书
教义封鮓明廉读大过之爻戒鍾毓以无咎览党人之传勉子瞻以效忠是以金桃表瑞玉笋

成班宾至如归才多不忝无烦啜粥人知魏勃之心何假造门客重范逵之口迨乎上林既遇阊苑同升韩忠献不负於科名王孝先无求於温饱楷模一代小侯钦郑穆之仪罗致四瀛寒士抱沈詹之感咏龙头鹤髮之句岂用相规覩鸾翔豹变之文仍多拔起将见诸王之後更有诸王应知五窠之余还生五窠太夫人含饴萱寝植杖兰阶为绣帔之侍中作绦纱之都讲文轩丹穀受义成之封彩绶金书拜建昌之爵乡名万岁乐极千春其为荣也寧有艾乎昔逸少之妻至耄耄而神明特茂齐贤之母以老福而宠礼有加以古况今於斯为盛况考玉京之胜日实为金母之诞辰轮驭斑龙降阿环之少女窗窥朱鸟呼曼倩为小儿笙响三山仙应遥集图开五岳庆有夙因某以坐末之碧衣望坛中之绦节周瑜堂下聊陈织锦之词天姥筵前用博投壶之笑尔

钱母鍾太君五十壽序

余自乞麾苕上选俊菰中化媿文翁时逢譙秀而钱子秦六乃以都人之望获成国土之知韵海楼中侯芭过而问字爱山台上苏轼曾以论文会予解组以归子亦就犴而出相遇于伯通桥畔长依乎翟尉庭前雪已盈堦尚有门生之迹沙飞在粥愈知童子之心料致远之可期信寧馨之有自乃钱子思深爱日归切望云谓夫律应蕤宾冀舒二策实以悅悬慈母策衍全耆用乞挥犀爰将献兕吾闻其母鍾太君以颍川之巨族归彭城之俊人郝岂如鍾自昔美夫人之礼钱能入宋迄今重武肃之家而太君静好瑟琴操持井臼伯鸾庑下曾无叱狗之声仲郢堂中独有和熊之训俾其夫子既隐雾于南山貽厥令嗣将抟风于北海是足多矣寧有量乎昔季伟烹鷄用起林宗之叹范逵繫马因知陶侃之贤莫不炳乎千秋便足壽之百世何待奉义成之绶共美文轩要当传中垒之书长留彤管尔

罗母叶孺人六十壽序

吾乡宿号名区而罗尤为着姓自君章挺秀揆异藻於衡湘迨仲素力行阐微言於濂洛相承朱绂代有闻人独富青箱时多喆士而频洲景有两君子犹有同声之好共为总角之交以是知有章怀祖临思三昆季振河东之羽空冀北之羣树在堦前珠皆照乘珍当席上玉尽连城窃获叹此寧馨乃复闻斯懿训则叶太君之事有足美者焉太君尊人叔子先生讲德梁汾世重文中之教隐居瀛海人尊玄晏之书太君为季长之马伦作中郎之蔡琰能赓柳絮及咏桃华鹿车既挽爰修提瓮之仪弋鴈相将雅叶弹琴之操登堂馈食叱狗无声问夜求裳鸣鷄有诫却蒲萄之锦长服浣衣谢翡翠之钗无嫌椎髻是以姑嫜互庆知新妇必大吾家娣姒咸欢谓夫人实重其族所谓终温且惠淑慎其身者欤而一则太君之才能行其德也盖方若履公躬亲栉沐志在经营既有事於四方鲜留心于一室太君操其箠钥饬彼酒浆方区豆之维稽无忧蠹饱迨瓶罍之告罄靡惜鼠粮时杂佩以貽宾或方舟以恤患一门有礼称巾幗之太丘三党分烟是闺帏之原隲一则太君之量克保其贞也盖若履公中仄尘劳早捐馆舍室有遗弓之惨家生析箸之嫌太君力谢丰腴身安荒陋甘何若苦惟有取于熊丸富不如贫亦何忧于马磨薛包让产乃近见于闺房丘嫂轅羹遂不闻於錡釜至其虑存意表智炳几先当巢燕之处堂效飞鸿而适野同迁居之孟母匪为求隣若避地之陶公偏能远害是以厝薪不爇焚玉无伤鵲徙北以为鹏子在陰而成鹤天开鼎立是为三索之英星灿珠聯并作一门之宿焚

香台上尚无倦于祈贤读易堂前更频箴以择善不几超于束带之儒亦且过于秉珪之士哉
兹值骑羊御岁适逢渡豕当杓偶泛归槎访江边之明月遥传仙籙闻林下之清风六叶冀开
启璇堂而悬彩幌千年桃熟捧金竿而舞斑衣爰陈鲙背之词用祝鹤龄之算昔欧家画荻永
叔赖以知名陶母留宾士行因而树绩由是而锡义成之爵封万岁之乡流庆无穷贻麻未艾
矣

蔡少君三十生辰序

鹤市名姝鸾台丽质是中郎之幼女早善猜弦作麻姑之主人曾看掷米碧窗学绣巧不因丝
画阁弹箏声非待曲可谓亭亭南国袅袅西家者矣迨其嫔我俊人益得工斯能事爰因暇日
共写闲情借京兆之黛毫旋能画绿仿唐宫之晕品即解调朱缕管争持便欲脂涂董巨玉钗
并坐浑疑粉抹荆关吮樊素之唇偏宜晓墨出灵芸之手即吐春红树可生鳞花真没骨鱼鸟
生成于研匣烟云起灭于笔牀是以松雪斋中尝得相娱孟頫归来堂里无烦别买徐熙斯又
艺苑之清风洵属名闺之逸韵也予以丙冬言旋丁里遇伯鸾于皋庑正值携家见大令于青
谿还逢载艳共续兰亭之雅会尽招梓泽之英流月地云阶遥瞻玉圃霞绡雾縠总洒金壶性
爱双飞不信人间去凤情兼特立忽教堂上生松此慧定属再来衆妙咸云未有昔公择之妹
善卉木而涪叟见称房璘之妻着金石而庐陵特赏於斯为盛在古无俦直须呼以神仙岂谓
得之闺阁哉时值王侯之腊初占女子之祥距绿华之降生仍先三夕应白莲之化现同在一
朝果或生迟善颂俱来名士年当而立戏言敢效前贤不辞拊节以徵歌略似投壶以引笑须
知捣千年之药常闻姹女还丹不待展五岳之图始验画家多壽也

黄甥母太孺人七十壽序

盖闻国多懿行必纪美於青编家有芳规乃垂馨於彤管范蔚宗之传史惟载贞姬刘更生之
着书专称列女或以贤明而得着或以孝谨而获名或坚匪石之心而矢怀节烈或秉素履之
操而勉力俭勤咸足炳烺乎一时昭着于千古者矣然运逢平治守井臼而不移事匪艰危笃
藁砧而靡失亦乌足显奇于巾幗表异于帷帟也哉而予家企道太孺人者则其人矣毓兰蕙
之姿早闻三党习苹蘩之训少着一门常借硯于牕前咸推栢士每缝裳于牖下亦号针神时
值鸣鸠振佩出延陵之室人堪挽鹿将车归江夏之庭谢马氏之资装偏能椎髻操梁家之箕
箒但御澣衣洗手调羹独得老姑之性齐眉进饁恒同君子之心方合好于百年忽分飞于两
地企道公四方有志乃结驷以游太孺人一室无资独抱雏而寝会黄巾之未靖天步将移至
皂帽之无归地图奚缩虫争飞而为螫人歌行路之难马已化而非龙客赋无家之别陈季卿
之竹叶未可为舟韦夫人之槐枝詎堪供?怀中黄口呱呱巧妇之炊堂上白头寂寂远人之梦
而太孺人左支右拙虽截髮而何辞仰瞻俯存即剜疮而弗恠兽名狼狽竟欲何之鸟是流离
究能无恙遂使别经四载幸镜破而终完变历万端嗟蜨罄而莫耻安居淮甸丛桂犹存徙业?
封官梅更茂太孺人佐计然之策屡致黄金企道公赋长吉之篇旋归白玉凡内修而外整皆
家督之经营若女嫁而儿婚悉母仪之提命逸劳有训而文伯乃以克昌教诫多方而士行於
焉独显由是而立身行道皆因画荻之所成即此而显亲扬名难报丸参之所得而太孺人时
惟劝义犹致警于鸣鷄每以亲仁辄励修於脱珥是以鲤庭奉教圭璧之誉日隆鸾寝无譁鍾

釜之怨不作廿五年之苦节堪媲美於栢舟七十载之清风足流芳於竹策兹者月当圉壮岁在摄提序属三秋舞将陈乎素女朔惟一日祀已近于壽星鹤髮宜年欣逢授杖龙章锡嘏喜见开樽方玉帀以宣荣亦鼓钟而具物顾予不敏实忝戚於宗亲忘我弗文曾备官于内史爰加授简俾佐捧觴窃惟家之淑人於黄也世属诸姑之列而子与壽母在吴也族居痴叔之行谊既笃于葭莩语难辞乎葑菲乃抽兔穎祝愿效于华封用启鲙顔庆欲同于溪颂夫宗元观内丹井犹存濮阳道中钞书尚在真灵之蹟既相望而非遥忠厚之遗复堪传而更永而太孺人备六珈之礼齿髮未雕膺三锡之荣神明益茂礼当貳膳乐在含饴福未艾于来兹德更隆於往古昔曹大家之淑范用享高龄宣文君之令仪因登上壽是可信也寧有涯哉况乎丸就玄霜天上秋高玉兔香浮丹粟人间夜集金鵝四美俱宜当詹介福二难竟爽可种忘忧我将望青鸟以作歌母其擘丹麟以进酒乎

方尔邳淑配汪孺人五十壽序

盖闻世业之隆昌先观家政而人伦之雍穆必在女宗是以祥女入门而九族以之相贺淑人应卜而五世为之其昌然而读刘更生之传谁能丝绣为图讽顾恺之之箴几见书绅为法是以河洲之咏仅美周南曹氏之书惟传丁妇闻之古矣盖亦难哉余家本丰溪与方常为世戚而方居黟岭在昔屡有闻人尔邳则其巨擘也君具圣功之卓品衍元老之华支名重乡闾身登仕版家如万石常数马于庭中户有六诗列乘龙于塔下闺门有礼世尽奉为清流孝友无惭时尽推为楷模咸谓其德足致天祥不知其家实多内助也盖汪孺人胄分越国裔重天都代有乘轩不减龙图之望里多列棨弘扬鹄起之声孺人生具苕姿幼多蕙性公宫习礼早姻鸣佩之仪侯国闻诗雅善抽琴之对及归君子获事伟人肃百两以言归才闻秣马指三星而矢咏还警鸣鷄既淑而庄彤管书之而不尽终温且惠青编纪之而未详记此修能咸皆中矩言其大节首在寧亲时则白髮之垂堂乃朱顔而拥簪调羹厨下寧待问于小姑捧杖堂前独任劳于诸妇脍姜家之鲤絶似孝龐烹茅氏之鷄非同季伟则养体而兼能养志且代子而并以代夫历三十年而不衰虽百千端而罕及者矣至於家多娣姒是谓後先而诸院雍和序有同於鸣鴈一门嫺睦言不进于射牛是则李光进之家不私管钥汜稚春之室无异衣粮者也至於綉褓同恩卒无伤于各乳綠衣分惠终不叹于抱衾不又如王国之美洗洗而魏风之歌艷艷者乎而乃钗堪易酒恒来座上之宾珥可市书每助堂前之读画方圆而不匱合内外以咸资德足以用其才爱足以生其敬是以行成于内福集其躬方君既以长厚之声闻诸淮海孺人亦以孝慈之誉式于家邦诗咏九如书称五福良人用世将题仲举之輿诸少能文并列崔嵬之宅行偕豹变伫见鸾骞兹者岁值重光律逢姑洗灵鳩拂羽方当桃绽之期仙鹤舒翎适遇萱荣之候演神图于河洛爰应中宫布瑞策於乾坤斯为大衍孺人楣悬锦帨塔响瑶笙与刘纲而携手早共成仙偕萧史以齐眉俱当未老擘丹虬于席上戏语麻姑向朱雀之窗前笑看方朔又岂但邳夫人之上壽徒羨神明张相国之尊慈特称老福而已哉

程丹问母郑太君七袞壽序

余自己酉解组于苕州迨及甲寅回车于芍郡袁丝门巷谢俗客而弗通翟尉阶庭问旧游而安在而程子丹问顾独好余与五陵之同学不慕轻肥从二仲以偕游匪徇名利身慙郭泰久

知魏照之存心才美程元欲就王通而讲业盖原能好古故多爱素之怀既善读书独喜草玄之字此则吾钦其可畏而衆叹其寧馨者也及乎蜡屐长过华轩屡造而帟帟清肃有如仲举之家图史横陈絶似罗含之室门多长者知皂盖之非常座有英流识緑衣之全别下南州之榻情胜于文浮北海之觴醉常以德宾筵礼豆参丰俭而皆得其中友质师资权轻重而务从其厚信惟贤媼用诞英儒岂止得戚友之传闻始识闺中之礼听济尼之评论乃知林下之风而已哉盖郑太君秀毓人云灵分女宿门高通德演华胄于康成世重荣阳继家声于仁表公宫习礼桃李媲其芳妍王国闻诗兰蕙亶乎懿淑爰归国土厥号女宗修提瓮之仪偏能挽鹿筇弹琴之好每听鸣鸡始则推枕中宵伸纸待王郎之赋继而持筹午夜求衣进管子之书谓君才岂是庸流贤智何嫌于屢中计吾夫素怀远志英豪必处于四通于是井臼亲操车牵共出何无何有龟勉自矢同心如阜如川积累俄成反掌既而天倾莫补海涸难填寡鹄衔悲既伤宛颈双雏抱痛还叹覆巢时则长君瑶天方值弃繻之岁次公丹问始当襁褓之龄而母忍涕丸参含啼画荻埋钱池内何殊身自教儿授册帷前乃欲母而兼父仲乃渐呈其头角伯先早振其羽仪望紫极以摩云将图萱庆惜红英之陨雹俄悼兰摧而母叠遇闵忧益敦征迈一经在手初教子而旋且教孙百务萦心既治内而还能治外半生寒火独自凜其冰霜两世单门乃尝经乎风雨酒浆醺醺虽琐物而犹清婚祭吉凶在远人而必问豆区有筭曾靡耗于鼠粮桑土维绸更何忧夫蚁漏垂堂白首家督咸称列座红颜女师共号而且情多慷慨性本慈和既喜怒之不形泥中罕曳复勤劳之是悯?下无嗟不仅门内被其深恩抑使里中沾其遗惠千人待暖奇温沛国之绵三党分烟饱饫淮陰之饭平玉钗之价每为收书脱珠珥之粧频因赈粥尔乃幢依绣佛座礼金仙蔬盃常甘不进灵虬之脯稻畦还剪罕珍神茧之丝澹以明心固其所矣静而有悟岂不然欤兹者岁在旃蒙辰居沈实踰天休之二日櫻笋犹余先地腊之一朝葵榴欲吐而太君六悬锦帨次君辈敬舞斑衣薰风渐拂于青条永日已行于丹陆三千果熟锦围镂玉之筵十二英舒香荐郁金之酒乃含饴萱寝引满芝台指黄鹤于云中望赤麟于海上以此言乐寧可量欤从而介眉正未艾也夫起居八座不若称才子之亲熠耀五花不若得文孙为後兹则丹问鸾翔于艺苑早自名家仁初虎视于词坛还能冠世拥树美褒师之爱着膝有文若之贤咸聚一门允绥百福王大令之母年登耆艾而未改神明杜京兆之妻德备幽贞而长看矍铄岂必侈丹台之籙而遗彤管之编也耶因纪交情用扬闾范传之輶下聊窃比于范逵拜向堂前敢自同于孙策耳

徐母王太夫人六十序

盖尝读诗而至鲁侯之篇览古而得更生之传历观彤史徧览青编远则仇母断丝而名昭俎豆近则虞亲授字而功在文章斯为旧章之艶称实亦诸儒所习见他如汉宫图像用开七叶之荣鲁郡推飡是启五原之纪爰如申国而礼法于以传家教若庐陵而德业于以冠世乃知人事之盛必赖貽谋益信家运之昌良由壺政忆昔旃蒙御律析木当辰偶泛雪于西神忽闻风于东海而孝思徐公方值牵丝已成制锦陟其境而萍乡奏鼓曾无异于曦顔入其都而醴序鸣弦乃有同于王异化传三异驯雉已见于儿童誉播十奇服虎咸惊于父老窃叹为百城之表行当有三事之旌兹值重过益当报最颂声遍播将同梅里以传馨惠泽争流欲比蓉湖而校润常疑厥美必有自来是以萱草茂于琅琊乃为棠陰满于陕服盖由圣善王太夫人笃生朱槩实衍青箱真本兰亭传清风于林下仙姿蕙晦梦朗月于怀中媲美周南获归城北而

太封翁【阙】先生用偕挽鹿同声而雅叶调琴每警鸣鷄携手而仪先整佩知良人素多大志倾四海以聯交谓夫子岂合长贫矢百年而广业采苹采藻曾无懈于倾筐何有何亡常自甘于曳练遂徵休于玉燕乃鍾瑞于石麟再诞神珠永成大器和熊佐读为通儒徧涉五经展驥匡时在令子早騰千里本于家而效之国永叔肯愧于先人宜其孝以作乎忠子瞻实符于往哲盖有养雏以昭爱而陇旁之驯雉益以广其恩得封鮓以训廉而壁上之悬鱼更以表其洁听朝理于屏後而明镜之察騰誉于祥符见夜績于堂前而戴星之勤获馳声于单父凡公之德咸以归之母而孝乃极其隆若母之慈悉以发之公而化遂及乎远也岁值辰龙之秉令时方土牴以居寒月值橘深候将梅放荐紳学士为歌介祉之章鼓篋儒生并奏迎禧之颂老人筇杖将踊跃以献鳩稚子筱簞亦懽呼而放鵠太夫人高居八座恭受五花錫石窀之荣封原因有礼得宣文之显号良为通经况茂宰舞彩于阶前而诸昆捧觴于堂下聚兆人之祝以为祝寧为华邑之三集万井之懽以成懽自应箕畴之五余猥称客子获友康侯逢悬輓之佳辰覩躋堂之盛事敢辞鄙陋将貽笑于醴陵用报殷勤实诚求于巴郡聊濡长卿之简美莫罄乎三迁看投天女之壶欢可资乎一粲耳

毕姻母张孺人五十壽序

盖闻颂睢麟之什必推本於丰岐读鼓琴之篇亦遡原于妫汭上而妃嫔固重刑于下及庶黎犹端身教妇人何德德视所天女子有行行归父母以柔为道有美必彰矣如我毕姻母者彦先姻翁之淑配也姻翁生同桑梓与予结两姓之懽性比松乔入世擅三君之秀横经石鼓之下慨汉季已变唐初挟策珠囊之中以儒林而兼货殖季氏一诺人争信其如金陶地四通衆共资夫借箸且也效输边之卜式慷慨独行保覆穴之程嬰干戈不恤非徒意气施恩于不报之时颇有心胸种德于难为之地谓夫子岂长贫贱知诸儿必大门闥凡兹轶俗之行始信相夫之力若乃鸛夷三致时有盛衰鸿案屡迁世多浇薄屈而雌伏伸则雄飞莫不涉历乎盘错之秋弥缝于纷更之候晨昏黽勉茹荼亦甘盥栉周旋停春如饱此多劲节益仰芳型迨乎骥驥生驹咸称千里凤皇得子仍识九苞比王氏之三株已看全树较窦家之五桂止逊两枝咏絮庭中适予幼子含饴堂上随彼大儿教子以方从其所好有此母始有此子非斯人莫诞斯儿而又荐上抽薪咸知敬士窗中设饌忽讶有人恒蓄不时之需良人结客自识知名之輩君子得朋非由内助之贤曷致外交之盛兹数大端悉原闕德岁当秋季月值上弦菊可延齡食者得上仙之筭萸堪益智佩之增中壽之年距长生之降人间十有三日望日月之会列宿祇余七朝乃孺人设輓之辰符大衍敷爻之数百齡初半行地无疆九如骈臻荷天有庆西池仙姥传来十丈之莲南岳夫人遥授九华之烛顾予匏繫仰止崧高命膝上以进瑶觴向窗前而窥绛节至于世藏金监生本玉鈎由来京兆之家眉传黛史行见刘刚之妇鲤跃金盆斯固崔卢俪其芳芬鍾郝侔其礼法无烦颂鲁始见祝华者矣

为东枢弟妇丘孺人五十壽序

岁逢单閏月届蕤宾余以送客过淮旅居萧寺访枚皋之旧宅幸诸赋之犹传问韩信之遗台怀千金而孰报独东枢家仲泊星陈诸君相与讲速釐之欢并为敦鸣鶴之好则有东枢内子丘氏大家念我兄公肃酒浆而弗怠怀兹旅客感脯糗之频遗爰以问厥家声则我同年两太

史之女昆且以询其内政则我静公诸犹子之慈母也母以希范之华裔早归季重之名宗适运值中衰时当末造鸾轩既叶声无异于初调鹿轂同将礼更闲於方驾向堂前以操帚羞为靓女之粧入厨下以尝羹不待小姑之问曾无叱狗礼严于曹母遗经频有烹鱼孝笃于姜妻列传惟时持竿高凤方漂麦而不知牧豕孙弘亦负薪而何有乃中宵推枕先伸纸以待吟或寒夜篝灯独鸣机而未寝茂陵秋雨同心翔司马之凰太泽青云携手隐乐羊之豹屡常盈于户外座满还留尘屡积于釜中餠空弗耻谓夫子岂长贫贱巨源应作三公爱吾儿必以诗书易简恒先诸幼既勤劬以缉柳复龟勉而丸参卦读鸣谦恒咨嗟而授卷语闻匪义辄恚怒以忘餐入柳氏之家虽亲属罕知其异然冯母之炷乃神明果鉴其诚窈窕奇芬羨一枝之早发刘芝竞秀看七业以同兴遂使壺中共号为女师门内无惭于家督也时方九夏旬有八朝云当设帨之辰是有称觴之庆序当大衍在河图雅叶中宫伏应三庚占历候初过寧颺风吹麦信适快披襟雨润桐花方宜洗笋维宗人介眉以请顾逋叟拜手而言爰述徽音用膺纯嘏隔縹纱而讲听宣文者重见斯时颁紫绶以封号义成焉行瞻他日

陆母盛太宜人壽序

忆予曩者承乏右垣聯鑣左掖则与筠斋盛君敦侨肸之好称苏贾之交鸣佩趋朝长同游于建礼簪毫入省每并处于承明方三事以称华俄一麾而赋别历今多岁忽覩伊人来自魏塘渡长江而已远访予邗水顾蓬径以非遥则陆子衷哉为盛君之宅相也陆子为鹤湖之俊称虎观之英卓犖一时起居八座孝独深於陟屺养欲展于循陔谓其太君时当大耄之庆属予聳叟特为不敏之词因而考厥徽音遂得详诸圣善盖太宜人鍾祥梁国毓秀禾城廷尉仁风衍朱纓于累世太师淳德积画桨于一门南国闻诗早读采苹之赋东都习礼颇闲佩茝之仪若女岂事庸人之子爰当吉士柴车可挽偕司隶以旋归竹筥何嫌谢扶风之装遣则有青灯展卷养蔚豹于南山翠幙褰衣警鸣鷄于北牖惟时老姑失视顾忻虽舐而难明兼之弱弟无依闵损知寒而莫抚太宜人羹调龐鲤曾无恟于蛭螯语絕弘牛并靡伤于鸿鴈下至米盐委琐乃必躬而必亲他若亲党周旋亦何无而何有盖家缘衰落偏无疊耻之忧外政操持亦鲜絕弦之患乃太宜人守之以俭靡嫌束帛之戈戈济之以寬不致翻羹而嗃嗃是以声名复振区中共羨崔卢礼法兼隆闔内罔慚鍾郝虽时当賁恨志竟殂于伯鸾而道在诒谋庆终酬以双凤解分参佐云在东而机在西美起黄门暉处前而恭处後长公揆哉杏林射策花县弹琴抚循称五岭之良治行作百城之表而梦刀蛮甸既已开洱海之云名振宸居行即作傳岩之雨次君才堪伯仲品絕低昂六馆文章让何蕃而独步一门声誉在文举而偏奇方将饼噉乎红绂岂止碑题於黄绢而书传还鮓益勉以清白之操药饋丸熊更惕以雌黄之戒其为教也不几成乎兹者节过天中时当地腊长筵启处初加五豆之珍天酒分时并是三浆之醕缕存长命更余长命之丝蒲可延年还结延年之佩太宜人叠膺紫绶独据縹纱封万岁之乡君作九如之壽母二龙在馭庭前飘桂树之芬五马争还塔下吐兰英之馥诩捧回鸾之纸歌传驾鹤之笙其为康寧可几及哉子方遄归樵李寄讯渭阳将见郝夫人之高年神明益茂张太君之宠礼老福有加也子其登堂上以奉觴献真仙之籙吾将向山中而泚笔续列女之编矣

乔太君七十壽序

闻之福徵壽考书标箕子之畴德着柔嘉诗美侯斯之诵是以皇娥天上锦织献于璇宫金母台前青裙拜于瑶阙笙吹缙岭黄鹤为衣酒送余杭红虬作脯然惟妇德乃可发祥必赖女贞斯能永世芝桂攸生馨实传于遂谷榎楠所产?自托於高岩所以范蔚宗之清篇雅传内则刘更生之彩笔特着坤仪也郑母乔太孺人冯翊名宗益公华胄生而婉变从南国以闻诗长益幽闲自东都而习礼家传四库常怀列女之篇代有十乘独奉大家之训会薇垣之天陨緑线兴謡致苟郡之土崩青襟秉节合门死义叹奇忠乃出儒生一轂犹存适弱质已从夫子调和琴瑟传静好之音浣濯裳衣尽芳菲之气常鸣鷄以示警推枕终宵复弋鴈以昭勤求衣昧旦翁姥闻而交贺得佳妇以配佳儿宾客至而如归为能妻必应能母枝生连理伤哉寡鹄之诗树长三株伟矣羣龙之誉而孺人恩勤不怠教诲惟多脱簪珥以易奇书永资博览断机丝以励苦志用就弘才长君孔昭不愧难兄实为端士而仲季两君并敦行谊咸受琢磨豹蔚厥文伫在成人之变龙潜其德聿观君子之行縞紵遍及四方躬持白璧然诺独崇一代语重黄金远效康成已见人归於门下遥同善果皆由母听于阁中故知诸君子之好修能传于当代实皆太孺人之懿教恒勉于一堂也某忝属姻亲既有葭莩之谊纳交昆季复多兰臭之情闻范夙闻鍾之礼而郝之法徽音咸企女可则而士可师岂曰泛然良为卓尔矣兹者屠维改岁蕤宾御辰萱茂一丛四序爰称地腊奠舒三英二朝即是天中太孺人年始从心礼当貳饔壽母忻逢悬帨密戚共为举觴瑶笙锦瑟喧闐于东海之滨綉筐雕筐杂沓于西池之上太孺人神明益懋矍铄有加含饴以弄诸孙皆欢忻而扶鸠杖衣彩而来令子咸歌舞以酌兕觥洵人事之荣期极天伦之乐事况夫时当熏夏节近朱明符可辟兵早献千秋之镜缕能续命先分五色之丝天酒酌夫榴花何嫌既醉华髮悬乎艾叶可辟不祥行将远贲龙章还綰建昌之绶何必仰希鹤驭而阑入易迁之官而已哉

家孺立淑配余太君七十壽序

予居丰水去富山不五里而遥故在新安於延陵多两家之好虽国分齐郑井里略有不同而村近朱陈烟火实为相接昔我姑母肃鸿案以于归有彼少君驾鱼轩而至止维萝附栢非一日之纏綿似葛依葭尽百年之姻契如家隐君孺立先生之淑配余氏太孺人是已太孺人早亶蕙质少秉苕姿受诗礼於名门得楷模于师氏光腾神井簪纓衍自大魁力镇狂澜閱闕开于名相数传而後代有闻人柔德所鍾闺生淑女性多婉变爱观刘向之书品擅聪明能辨蔡邕之操迨归吉士获事良人赋弋鴈以由房警鸣鷄而在寝挽鲍家之鹿井臼偏勤烹龐氏之鱼盘匪自肃而桑田变起嗟国步之维艰樾?中微慨家园之渐落老人在室耻餅疊之谁供君子于田为耰耨之是赖而仰事俯育以妇也而代子之劳左支右吾以母也而兼师之任遂能一成一旅淳兴当衰夏之余以至三缩三盈崛起在居陶之际盖先生以至诚待物而不欺然诺黄金比季布之言鲜有緇磷白璧守仲雍之诚而孺人律己独出之以和平先生以慷慨济人解难排纷幼安每闻息鬪扶危济困聊城长有射书而孺人存心要养以忠厚先生交游每好轻财助元振之钱何辞折券贈曼卿之麦不惜连船而孺人持之以俭故能施而不匱先生居室多见坦怀护认履之非跣行不愠饮攘鷄之酒攜筇无烦而孺人济之以寬故能处而不淆盖其先也有曾大母以贞节抚六尺之孤而懿教开于其始其後也有方阿吴以絕粒同百年之穴而烈性着于其中太孺人身处其间得坤贞之大备德纯于内秉妇顺而独完五曜丽天既珠聯而璧合七星横斗亦杓灿而枢辉杖倚玉鳩百岁有同心之侶樽浮瑶鶴一庭环攜

手之人紫诰鸾回行起居於八座金章鸳绶同烂漫於一时天之报施良亦厚矣家之善庆岂有艾哉兹者节届春王将及燃灯之候人同天姥方登悬帨之期一门酺酒以登堂三党承筐而献币余叨世戚敢忘两姓之欢况属宗人聊献三多之祝昔齐贤之母以老福而宠礼有加逸少之妻至耄耄而神明特茂以今方古莫盛於斯况夫笙响三山仙应遥集图开五岳庆有夙因某以座上之碧衣望坛中之绛节周瑜堂下聊成织锦之词金母筵前用博窥窗之笑尔

家天生侄母汤孺人壽序

岁在重光时当终相予将蹶康乐之履归访家山登供奉之楼言寻旧里而以微疴掩户略似漳滨总之溽暑戒途有同蜀道遂使诗书已卷空怜无伴以青春杖履非遥尚自梦踪于黄海而林开种字有客叩门则族侄天生登堂而请乞绪言于痴叔祈介壽于慈亲也盖其尊人如楚公少有奇姿长多懿行才如应奉宁言目下五行学类扬雄直欲心穷四库年年煮字砚头乾煞蠹鱼日日研经窗外谈高灵羽中林兰蕙岂惟秀出于延陵上国梗楠业已名香于歙浦汤孺人以吞星之华胄具孕月之清标闻伯鸾之贤言来提瓮得司马而事遂叶弹琴既淑而庄不懈如宾之志终和且惠母忘作妇之劳中宵伸纸以待吟对案看王元索句半夜鸣机而促织篝灯听乐子拥书美醞珍鲑但供宾筵谈笑青裙缟袂独安儒室粧梳以至洛水云屯门欲齐于通德华陰雾合市遂比于公超虎观崇贤名既升于宗伯鵷林集彦选乃重于儒臣雕鶚横秋行见大人之变龙蛇占岁忽为君子之灾日既出以当心天方倾而莫补竹生湘水总是泪?莲出横塘恒多苦意嗟文鸾之不舞徒恨回肠叹寡鹄以空歌惟甘宛颈青灯多怨照人而偏在青年白雪难缙历世而终期白首三十载几经风雨飘摇藐诸孤共历冰霜惨栗遂能养鵷为鹤并可冲霄种子成松皆能拂日伯也沉酣五典无愧青氍仲兮点染三毫偏多彩笔适五旬而介祉越千里而求言其孝可风其贞可感爰为濡管俾藉奉觴夫菽水可以承欢何必鼎钟而後饫笑言足以为乐寧须笙瑟以方娱予正索居又当却扫乃二子惟荣亲以为念虽陈人而必求是心之诚足以为养矣寧辞之侈然後足多乎聊进九如之篇寄北堂以将母用代百花之酿酬南斗以延龄

胡母汪太君五十壽序

余以顾长康之女箴人不概见刘更生之列传世所习闻爰辑彤史一编用以传馨千古于是溯徽音于往代昭示来兹阐懿德于遐陬宣传中甸然而帟帱之行无取英奇贞烈之操多由患难若乃显微一致作遐迩之女宗终始偕康及伦常之闺范扇清风於林下实所罕闻应婺宿于人间良非易遭吾于胡母汪太君见之矣太君赤水鍾华黄峯毓秀簪纓承越国之裔铁券金书纶綍衍晋江之支黄麻紫诰苕姿夙裕无烦习礼东都蕙性天成不待闻诗南国迨及桃夭之候获事伯鸾适当冰泮之期爰宾司马其归我胡先生也能改粧以椎髻甘操箒而偏勤方洗手以尝羹即含辛而无倦念代夫而为之子妇矣而遑问其新乃割股以忘其身姑兮而遂能起信以非常之纯孝乃有其实并避其名复罕及之撝谦惟诚乎心故格乎物且以良人远出将求禄以养亲君子遐征惟孤居以持户东西南北蓬矢之志四方酒醢米盐井臼之躬百务而太君画方圆而不困合上下以靡愆是以内顾不叹于北门盛誉乃闻于西省陈当世之务直上金銮抒夙昔所怀爰登玉陛遂与【阙】侍御兄龙弟虎棣萼蔚其相辉左戚右

干荆枝聯而竞茂乃置田以贍其族崇祠以妥其先义气布於三宗更解囊以济其贫炊糜以振其馁仁声敷于四海微君之故也非母之功乎方思效力於九重或值弄兵於七国李供奉不污伪命预遯江湖刘越石每愤忘家竟归泉壤天莫补羲日俄倾悼广柳之难归流离异国望维桑而尚远彳亍中途而太君决计还山无辞辛苦全宗返里屡被漂摇堂构有未竟之猷频频丹雘宫墙有待成之绪力振鼓钟为其易复为其难虽风波而不惧见其大不见其小历霜雪而不渝是以锤釜无虞闾帟益肃兼鍾之礼郝之法林下之风自清在後以裕前以光堂上之春更永庭趋一鲤砌绕双雏文既备其九苞名高虎观足自驰于千里气振龙衢兰茁其芽香映鸾回之纸萱堪为树花纷燕喜之堦固其宜哉亦足报矣兹者岁在敦牂月逢泰腊太君应河图之中宫畴全箕范具義爻之大衍德佩坤含而嗣君既舞彩于莲峯欢承色笑复驰书於天水乞为表扬予夙忝懿亲属有葭莩之好遥闻淑德敢辞葑菲之章谨拂鱼笺特抽犀管表徽声於一代是谓女宗介遐祉於千秋良云壽母尔

家节母余太孺人七十壽序

家对莲花时想青山之宅身同萍梗新归白版之扉第天畔鴈鸿虽有一枝可借而月中乌鹊恒嗟三匝何依乃西蜀櫻桃贈筠笼於子美南村杨柳共晨夕於渊明者则我小阮孔彰其人焉孔彰饌有江鱼爱学茅容养母门无枥马思同陶侃留宾然而不欲苟为常临深而履薄独能自爱还执玉以持盈因负米之诚翻为贈米思推餐之意频见授餐虽恭谨得自天姿亶怀不偶而薰陶由於慈训勗志为多以余所闻余太孺人则於今世所仅见者孺人为文学大士公之冢妇而处士曷否公之哲配也绵瓊出自富山风土得清嘉之美丝萝托於丰水冠裳接文物之华当其毓德芳年早着声於三党及乎承欢鼎族犹尽礼於一門良非偶然有自来矣此孺人女德之宗也至于洁治甘肥虔供菽水鹿车既挽爰修提瓮之仪弋鴈相将雅叶弹琴之操尊嫜互庆知新妇必大吾家娣姒咸欢谓夫人实重其族而处士公心耽任侠耻事经营将有志於四方乃罹忧於二竖孺人自操筦钥饬彼酒浆每区豆以维稽无忧蠹饱虽瓶罍之告罄靡惜鼠粮问夜求裳闻鷄有诚登堂馈食叱狗无声此孺人妇德之懋也迨处士公中仄尘劳早捐馆舍芳龄失凤空叹操弦永夜啼鹃恒悲破镜备尝风雨独凜冰霜乃谢丰腴身安荒陋至於逸劳有训期文伯之克昌教誡多方望士行之能显廿五年之苦节堪媲美于柏舟七十载之清风足流芬於竹策兹者岁当庚午月在孟冬七裘筵开启璇堂而悬彩帨千年桃熟捧金竿而舞斑衣顾逋叟拜手之言应宗人介眉之请敢辞葑菲爰陈鲙背之词共献蓂莢咸祝鹤龄之筭昔曹大家之淑范曾享高年宣文君之令仪因登上壽固知瑶池阿姥重辉碧玉之环海上仙人竞进丹虬之脯矣

家德远母汪氏孺人六十壽序

七十三年每忆粉榆之社一千余里言归桑梓之邦而桥傍观星初能息驾阁名高雨乍得横牀似晏子之居信无嫌于近市若陶公之里聊自适於闭门而白髮长垂难起乡人敬慕黄金已尽殊多游子凄凉乃有族孙独亲旅客则家德远其人也晏笑时陪乎杖履过从不倦于晨昏时而酒熟梨花先提壶以致敬时而果成青子乃倾匣以相貽虽继廩继粟之仪久不闻於州郡而执酱执醕之典犹偶见于市?知其尊人季成公已失过庭之训而太君汪节母犹多倚

闻之慈也盖季成公早叹伶仃长逢丧乱鴈行四出久疎咏棣之欢乌哺独留远失采兰之养乃公殫心拮据竭力经营卒成堂构之观即备帟帑之礼而孺人殷懃提瓮曳屣将车既斗粟尺布之维均而视膳求衣之不怠俄而天倾莫补日出当心老人有未谅之情恐其孙之失恃而贞妇坚靡他之志得厥幼而相依叹黄口之三龄曾何知识矢丹衷于百折寧憚忧劳鹄独宿于终宵篝一灯而照影乌长号而竟夜瞻四壁以断肠三十四年历冰霜而益洁百千万事经风雨之多端泪已尽而血流尚自焚膏破牖手卒瘁而心痛犹然画荻空堂卒能丸药和熊教雏成鹤女偕子而并长婚与嫁而皆完竹笥练裳备经辛苦亲仁就傅总属劬劳乃德远独善居奇不辞余贱身甘劳瘁王戎每日持筹力任艰危周顗雅能当户法天时而消息冬资絺而夏资皮视地利以权衡齐树桑而陈树漆一成一旅淳兴当衰夏之余三缩三盈崛起在居陶之际不轻然诺出言恒重于黄金每好施予结客何辞于白璧义声日起好行其德以无私侠气云流善用其才而靡困遂成方圆并画内外咸资收残烬而见新图行有粮而居有积改敝庐而成广厦千斯仓而万斯箱乃十月之方中登六旬之大壽庭陈筐篚三党交致其玄黄阶列鼓钟一族尽将其酒醴咸谓德远善能大其宗孰知太君慈能昌其绪也昔湛媼能为剡荐士行誉起于晋廷苏母德着瘞钱子瞻文成于宋代德远虽潜踪葱市何敢仰比二公而孺人则厉操栢舟实已足传千载其介福寧可易量而引年又岂有涯哉爰酌一卮用当三祝

邵大士暨严夫人五十双壽序

明月连江是苏子泛舟之岁裸花生树当杜郎醉酒之时适我塞翁顾余山馆看云南郭写妙句于旗亭听雨西窗发清言于瑶席论心竟夕每及雅流屈指近今恒多名彦则谓邵君大士此日之元龙实乃严公灝亭当年之洗马冰清玉润极晋魏之清华外整内修备郝锺之礼法而邵君区中架学五采蔚其龙鸾海内腾声四方望为麇凤扬云奇字竹中之高屐时来文举芳罇花下之小车频到王郎辩论落麈尾于饭中范叔饥寒脱雉头于坐上时则恒闻解佩日有授餐或听清谈识异人于隔牖能知雅志助胜举于脱簪衆共矢于勿援彼益施之罔倦则谓鲍宣之物望实自少君而道韞之林风多由太傅于是有怀于接席恨无自以执鞭已而序历丹鹑风高黄雀而我塞翁蒲帆十幅将归南浦之舟椒酒双瓶欲献西池之斝言兹初夏实庆淑人迨及来春爰歌令德方齐眉于未艾特藉手于不文用是粤考前修每难佳配才如司马祇贻诮于弹琴贤似乐羊尚有辞于废织浚阳荷锄仅闻翟後陶前皋庠赁舂几见梁歌孟和至若台高渭上能致凤皇道就武威并骖鸾鹤斯为胜矣又其难焉而兹则仪度美于河山声名昭乎日月人同胡母端是上流壻过参军寧非杰士中宵鼓瑟雅衔杨惲之觞半夜挥毫辄具王元之纸亭前露綬当朱翁子富贵之将来堂上抽书正韦玄微松菊之方茂声清似父曾传韩氏东隣教奉于姑尚有曹家丁妇其为乐事何待名言而况家近明湖山当大涤故侯门外犹存五色之瓜阿姥垆头已熟百花之醞也哉独计君与家塞翁之締好谊重忘年而余与严先生之论交情深浹岁承明夜直每重金缸建礼晨趋恒持紫橐王裴并轡频同禁苑之游高李褰裳数对曲江之酒曾欢乐之未几而少壮之已非一隙白驹怅然易失三山青鸟招则能来玉杵非难人或求而得妇金丹可致君寧无意于学仙耶

家赞公暨淑配徐太君六十双壽序

盖闻人在五伦之中其大者以忠孝为重士生三代而後可传者以义烈为先是史迁着书爱伤於游侠而孝标作论致愧于絶交盖古人立身曰道曰义必以信为终始今人取友曰名曰势多以利为合离所以结交之篇每为黄金起叹而行路之险终难白首相知是惟一室之中着刑于之化斯使四海之内有好义之名也若我赞公足称佳士盖赞公生而聪颖在抚尘已与衆殊长更权奇当垂髫即膺时望问杨梅而善对慧识偏多缉蒲柳而恒残勤工不怠闵子骞之门内絶少间言陈元方之堂前时多愉色行成于已还将名著于时学积于躬自可报成于国但蓼莪起诵长因易箠衔悲觴豆频嗟殊令具餐多虑乃偕徐太孺人躬亲井臼手奉盘匱慰慈顔于不悵之辰尽子职于承欢之日此之为孝其本立矣迨乎将车养志结驷远游铜斗山前方论交于缟紵金华岩畔或起变於戈矛首助军资爰申大义乃清寇乱卒振天威不致流毒于闽粤之间遂能保全乎江楚之境其为功也不更大乎至因烈士之一言感其忠义遂出妻孥之九死悉予安全则黎庶共鉴其诚因为尸祝而地方实受其福同赖履旋也时太孺人内政事修不以釜锺分四方之志而我赞公躬行益谨不以毫厘貽一室之忧叠产双珠增辉羣玉兰馨桂馥既有当于孙谋挟策持筹用克绳其祖武岂知一十五载之後重见兵兴以至二十六年之间仍惊羹沸郢人之歌不作三户但见啼号楚国之变丛生万室悉嗟逃窜我躬不閱何况乎苙内之金国士难支奚论于草间之壁而公虽遭顛沛终为保持德不思酬独种德於难酬之日诺非易践偏全诺於难践之辰遐哉国士之风伟矣古人之谊也予夙闻梗?久钦侠义之风今履庭除复见整齐之化帷帘有礼信不愧於太丘宾从如归复无殊于陶母乃知家人之卦内外咸谓严君是以周南之篇风教必先淑女盖有吕荣之躬勤家业而徐升之操行乃专有胡母之名着上流而高柔之功勲益显湛能剉荐而士行誉重于晋廷程有瘞钱而子瞻文成於宋代庆延後裔寧不然哉岁在壬申月逢乙巳太孺人方悬锦帨两嗣君并舞彩衣而序值一阳庆皆六十同登周甲谁言夫唱而妇随共迈长庚还见女先而男後冬之日夏之日俱当爱日之辰萱之龄椿之龄悉在延龄之会两阶竞奏其鼓钟三党交驰夫筐篚予忝居族末既同献其兕觥属在宾筵敢有緘于兔管爰书鄙语用祝大年

家天期侄暨汪太孺人六十双寿序

盖闻陶公种秫惟得翟而其节愈高刘叟入林爰有郭而其踪益远天生良士夫岂偶然人有贤媛斯为卓尔至若登台嬴女挟风管以俱飞炼汞刘君骖麟车而并驾在仙家诚为固有而儒者谓之不经然君子万年歌咏传於鲁颂而善人五福徵应见於箕畴此又修德者之所为期而亦善颂者之所必道也余家世传让德代着古风堂构相承未改高曾之矩帷帘有礼颇闻鍾郝之仪而躬备潜修门高笃行则以天期乔梓为巨擘焉盖天期幼多至性人传曾闵之风早负俊才世有顾厨之目乃值时方多难傳介子遂决意於弃觚势不可为端木赐乃留心於握策不侵然诺义声顿起於江淮独创?模盛业将侔於管范而登陴不守墮洫几危幸默相之有神得奇谋而免患间关故里一成兴复夏之基转徙通都三累定居陶之业乃少君提瓮力挽鹿车德耀赁舂共襄鸾庑卒使窈家丹蕊还茂五枝马氏白眉首先诸骏父也母也燕喜时聚於北堂伯兮季兮鸿绪日恢於东序故躬行克懋既心计以无庸而陰德所施较耳鸣而自积时而收遗孤於草际则世传贾父之称时而起饥瘠於桑间则人感赵侯之德时而绋袍以赠范叔则曰绵定奇温时而金币以赎文姬则见瓶能不坠他若饲华陰之雀不悵黄花放余不之龟还依緑藻垒洛阳之壁不待乘輿布舍卫之金无烦衆造闺中劝善每倒篋而无辞

长者乐施遂倾囊而弗惜是以酒泉太守列钟鼓而式庐陇右名卿驻轮轩而入室一时慕义竞愿纳交千里闻风曾为折节兹者龙驰其轡莺奏如簧时届正阳先生既悬弧以当户月逢嘉庆太君先设帨而在庭椿萱偕乐以齐眉兰桂纷陈而绕膝鞠衣初荐柳桃映户以宜人郁鬯方开樱笋登厨而召客礼綦盛矣庆有艾乎况大道以八千岁而为春秋天数以六十年而成运会男下於女厥卦为咸是有咸感之文已既於辰其星建毕乃有毕宣之义况乎五龙迭跃数实協於河图五凤联飞兆有同於大衍此而鱣鲤匪藉神供彼复烹鷄还劳客叹双垂鹤髮常共乐於含饴迭献兕觥并承欢而进酒槐陰葱郁望而知当贵之祥瓜瓞绵聯筮者有其昌之卜何必远希黄老相与守乎庚申乃可仰比绦人得拟筭其甲子也哉予山中避迹同痴叔於王家泽畔行吟见高人於角里玉鳩持杖恒随商叟以作歌银鹿将车欲向申公而问道幸遇捧觴之盛事慙无镂鼎之弘文聊抽管以抒词後至窃同於司马遂登阶而致祝遥瞻实羨夫犹龙日之升而月之恒颂九如其未艾乾为父而坤为母开万象於无穷尔林蕙堂全集卷九

卷十

<集部,别集类,清代,林蕙堂全集

钦定四库全书

林蕙堂全集卷十

湖州府知府吴绮撰

题跋

题江氏忠孝节义合传後

四世五公环雀蝉聯于累代一門七贵金貂鹄起於当年吾见其人吾闻其语矣若乃贞怀介节合内外以流芳懿德显名迄祖孙而济美作史者罕传其事读书者靡覩其文也乃观合传一编而济阳江氏後先相映表里咸彰东之公既秉直以输忠应全公复覃怀以养志七母频传于茹苦多贤迭出以见奇或尚友于逢屡献批鳞之直或仰希曾闵能通啮指之诚或矢志存孤正气反留于巾幗或扶危拯困烈声弘着于衣冠闻结客之鲁连情深蹈海有思亲之仁杰感切望云莫不炳烺青编辉煌彤管但能得其一二足挽子臣夫妇于颓波何况行有三千悉备孝义忠贞之大事语於人而未信际其盛而非夸信乎人之得纲常较难于得富贵而天之重名节更甚于重事功而江氏之貽庆後昆着称来禩者为未艾也

题江氏双节传後

奇男子嚼齿成仁甘留碧血贤妇人持身秉义长恨白头本属同归要无异致然而一时媲美累世貽芳则青史未之前闻而彤管于焉罕见矣江母程太君中含隐痛破镜伤鸾汪孺人早负深忧离弦怨鹤两心自对断肠因以知心四目相看擦血难为比目卒使乌能返哺鹄可高飞具季伟之餐非因饭郭上陈情之表雅欲报刘则孰谓急景之冰霜非所以成寒岩之松柏也哉昔崔亲秉节乃受义成之封卢母持贞卒下武昌之拜吾信荣华之启後必有节孝以开先彼下里之谈轻同篱鷄伦父之见局等井蛙亦乌知天道之微识人伦之重也耶

王苍霞万卷山房诗集题词

世途险阻每易危身仕路浮沉惟应裹足只有青氊一片可称吏隐之资况夫锦字半囊足快诗豪之用盖脂膏不能相润故贪黷息其诛求文史足以自娱而神明全于澹泊也苍霞王先生少怀雅志长负隼才本贞白之乡人为安丰之令子仕而未達官已多闲初弹茂苑之琴行理昉溪之棹乃篋无长物惟存苜蓿高吟袖有清风不减葡萄丽字好而示我辄欲享以熏香

持以贈人亦匪等于懷璧始知文如韓愈何須伏宰相之門詩似鄭真可入飲仙之座況乎溪
邊釣石任彥昇之所曾游嶺上閑云李謫仙之所旧憩由是而寫之逸調出以新聲登伯起之
堂先生自此升矣醉司業之酒老人其愿歸乎

張鐵橋顧云臣合畫像冊題詞

影息槐陰時當竹醉倦初同于司馬好忽惠於求羊具芝嶺之衣冠須眉并古把谷城之書冊
意氣多奇則鐵橋張君寫千金于駿骨而云臣顧子合雙璧於虎頭也蓋張君探道之微養神
于曠青衿學劍得妙術于猿公彩筆摛文寫奇情於龍友負管葛之志寄意圖書具陶謝之情
放懷山水而顧子通神絕技超代殊能興極滄洲家法頗傳于顧愷情娛山岳卧游雅類乎少
文名既重而還冲藝已精而未滿以是鞠躬進履仿孺子之登橋点頰成圖顧先生而捧杖蓋
契合在形神之表故点染居筆墨之先也昔宗生慕古用寫玉于步兵李子稱詩特范金于賈
佛在古相傳佳話於今同美勝流矣但得意云泉此日看君於紙上而置身丘壑何時益我于
圖中

題汪上若蘇幕遮詞後

予甥汪子上若學類陽元才同陸果借美人以喻君子雅善微詞本古意以發新聲尤工小令
寫紅窗之韻事有雨皆香傳粉黛之幽情和天都瘦則珊瑚作骨直疑身作錦鞋豈翡翠為牀
但許花開彩筆已哉乃程子亞韓并擅清才尤多藻思含珠吐玉行當較勝秦黃鏤月裁云遂
已齊驅元白誠謂一台之妙寧惟獨秀于時者乎鑄之琬琰用以共著其國華勉以縹緗尚望
無虛于宅相也

姜仲子宣審脂粉箱題詞

萊陽姜仲子博學而好奇多臧而服古所寶宣審一器質素文青體堅制妙詢之宮監知為翡
翠香奩置以書牀用等琉璃硯匣姜子既獨珍之什襲三君乃競美以篇章物兼華實以咸工
詞備抑揚而盡變嗟乎燕來漢殿夜珠時照露華獺補吳宮春暈還添玉屑仙如秦女方涂一
轉之丹寵似昇平特賜兩輪之磴昔之口脂面藥不知何處恩光今則粉白縹青但許名流把
玩其為物也君子傷之矣而況昭陵玉匣已出人間漢殿金盤盡歸天上考工零落久無大邑
之供大雅凋殘非復宣和之旧人事見其盛衰物力因而消長其為感慨可勝言哉仲子其韞
櫝以臧之異日可執型而考也

家文仲唾余草題詞

家星陳仲容雅量慕阮籍以入林承祜清才傍枚舉而卜宅十年馳想每飲香名千里聞風恒
傳好句而家分三眷迹散四方難聚首于灤西徒懷思于渭北茲因訪戴乃獲識韓而星陳誼
篤停云情殷听雨頻過廬阜異靖節之聞鐘每坐蕭齋共許詢而揮麈既留連而對酒遂慷慨
以論詩初未開函即有清風而拂座既而終卷盡看朗月之入懷若成連之鼓琴弦一彈而即

爽如欧冶之铸剑锋有试而不留则曰异哉此才乃复近生吾族若其加之以学何难直到古人夫诗以传情而情必生于厚诗以言志而志必取乎深幽兰之馨要滋之於九畹芳桂之烈乃被之于一山渤海男意在研精而名齐于摩诘玉溪生心求入格而品贵於飞卿岂有他异人哉亦在乎刻意耳由此而抽毫广座建帜长城取冰雪而携直云君当自爱得江山之助毋曰臣叔不痴

题灵芝白鹤图

余友罗君临思敏而工文贤而博古尝属蒋子前民为灵芝白鹤之图曰予家系出长沙家于歙浦裔源梦鸟湘中曾号琳琅道擅骑龙天上犹传冠褐簪纓继美史册流辉乃在李唐之时则有庐江太守者分餐香积未遂飞鹏携卷黄都或传鸣鹿二十年虎符朝佩松杉已长旧围三千里鵬锦昼行桑梓还沾雅化生灵拯患竟同梁国之仁弦诵遗风遂有文翁之政禁淫祠而巫风顿息崇本业而膏雨弘施惠以及人廉以律己于是芝生燕寝表瑞应于双麟雀下讼庭传喜声於五马夫草木应时而茁错彩显盛德之葳蕤禽鸟得气之先纯素见清操之洁白大吏上其治状圣主赐以玺书行比淮南课是百城之最名高颖上公从五等之封既炳烺于宸章亦昭垂於家乘仰揆往迹窃愿学而未能远邈遗徽庶可风于有位蒋子乃吮毫而起曰是以盍观乎听翁亦展卷而称曰美哉是图也因书数语聊代座右之铭用示後昆毋忽庭前之训

题宗鹤问竹秘阁後

宗子得竹秘阁一具厥质既良其工特妙相其正直不殊君子之居身助彼英华每伴词人而运掌华子比之陶瓦言分铜雀之形汪君谓为策书用镂赤龙之字二者辞既工而调美两君名虽异而实同从此品重裘钟辞高笔格筑书城之偃月长从管子登台铭笔阵于凌云欲为班生剖券矣

宗梅岑为燕子洗巢诗题词

吾友宗子梅岑雅负闲情尝多胜韵习静而深居杨柳移家而独爱芙蓉马逸士之文窗时回素羽张集贤之寝榻恰对香栖乃雏去梁空偶念薛郎佳句而泥随花落尝污扬子玄经爰命涤除更加封葺灰飞残劫已销宝墨之宫尘满人间不入乌衣之国盼娘楼阁转见清华赵姊亭台益成窈窕虽红襟归晚徒怜杏垒云高想翠剪重来应讶芹泥雨润诚哉佳事之堪传美矣新篇之足咏才过春社史邦卿藻井之篇欲近玉堂张子壽华轩之赋从此柳昏花暝长看此处帘栊宁教野草夕阳更向谁家门户也

永愁人诗集题词

夫张衡写志思在泰山卫玠言情茫如江水世有买愁之地人欲寄愁於天愁非慧心未易有也梁溪女士龚氏大家生有令姿少逢时难吊屈原于楚泽已殉故君葬李白於青山空留爱

女既伶仃而失路遂俛仰以从人爰有闲情乃工韵事卷帘秋咏那堪瘦尽黄花对镜晨书直欲香盈素手李公择之妹信解含毫王凝之之妻偏能染翰常含思而未吐纏绵略似春蚕遂顾影而自怜凄切有同夜鴈自题所着命曰永愁嗟乎知己维艰赏心不易人逢意外事阻情中口衔阙以难言肠绕轮而徒转石虽五色终何补于情天木有千枝竟难填乎恨海笋生湘水未竹而已有泪痕虫是秦灰化土而尚存冤气愁端百集愁态千名丝无绪而难寻酒不浇而长醉其为永也得无是乎然而我命不犹此中有鬼从前怪事怅当世以何多向後幽怀问他年而谁解年年綠树空销蛺蝶之魂夜夜青天枉费杜鹃之血仆原善恨人已视为卷施子欲何为我欲赠之萱草

天镜和尚语録题辞

法向谁传不来不去相从何见非我非人乃有沛国礼宗是为天镜和尚生由紫竹产自青莲出羊烈之名家真操独立解鸠摩之密谛妙性常圆偶涉爱河即上慈悲之筏宏开觉路旋明智慧之灯爰与灵玺大师互相参究共作比丘而说法同超天女以献身寺号青鸳并居灵境林开白象不到纖尘入火宅而先凉出污泥而弗染排沙秘义直能探灵照之心面壁真传岂仅得達摩之肉于是升坛提唱列座敷扬发狮子之音声闻十地阐蜂王之教语尽三乘广?法云普及大千世界朗开慧日咸归此一宗师固已道合人天心空彼我者矣至若神游境外识香气于林间悟在言先得春光于枝上机锋共证不须坐破蒲团顿彻俱忘直欲还他拂子虽当年只履已自西归而此日遗经犹传东度请亲承於当下作什麼生问谁认其本来因如是见

跋尤悔庵菩萨蛮後

阮生失路浇泪无端屈子问天寄愁何处水以不平而激木因有郁而奇情有所之理固然矣吾友悔庵文高於命宦薄於名艷曲三章欲醉沉香之酒奇才两字不分归院之灯孤竹崖前空随射虎百花洲上徒共眠鸥刘公干高卧清漳王仲宣哀吟荆楚爰以沉郁之意写为穠丽之音此病中八首之所由作也夫生而识字即种愁根长解言文原非善气惺惺自合人奴咄咄何堪令仆吾侪若此复何怪耶子善吹箫请命小红而按节我为拔剑聊浮大白以倚声

跋高苍岩太守洞庭倡和诗後

蜡屐一双谢临川时多逸兴画船十只白香山每赋新篇古人理政之余常为游览良由风雅之气足于性情苍岩高使君绩懋黄龙声高紫马乃湖中了其公事而濠上适有会心爰发山水之清音无烦丝竹遂振云泉之逸彩自得鸟鱼而汪子扶晨及家鹿园并擅清才同追丽响昔苏家二客未见成吟王氏羣贤犹传阙制兹则嬉如杜牧赋比枚乘同挥鸚鵡之毫总艷蒲桃之锦知公把酒时当不似人间笑我闻歌此曲浑疑天上矣

跋孙止澜太史诗卷

少陵之吟落月雅忆平生彭泽之赋停云愿言畴昔古人崇乎气谊出之性情交相重焉良有以也止澜射陵两先生徵君种柳学士班荆同为山泽之游共结云雷之契固已清风被服古道照人矣乃止澜因游寓之时録赠遗之作俾宋子穉恭用为世守夫穉恭之济美诚王献之继王羲而止澜之締交则陈羣之有陈纪诗篇赠答情致绸缪不足以风示来昆追踪往哲哉爰题简末俾教荷叶而藏永作家珍可比梅花之赋

素心诗跋

南村晨夕惜幽朋之姓氏未传东瀛往来叹胜侣之赓吟不着在一时以为阙事乃千载用以遐思云纪黄子以江夏之逸才集广陵之多俊李供奉雅称词杰梅都官最擅诗名赋能掷金石之声惟闻孙绰品足收湖海之气两见陈登瑟鼓湘灵得仲文之佳咏赋言京洛有平子之雄才思或进于吞星能自高於立雪莫不争标汉帜共奋秦椎日丽神都竞长四声之垒云迷絶塞恒坚五字之城然当八音迭奏之时耳不倾于郑卫逢衆彩错杂之际目不眩于朱蓝譬幽谷之兰芬都无烟火如空林之梅发不受尘埃以此言知其相知也至密以此自得其相得也愈深由斯而坐进古人力追大雅心之为素不既多乎予懒欲谢斨未暇执斧而导喜因见猎犹能凭轼以观

宋牧仲枫香词跋

近之词家互为澁体施于乐府竞号新声实有江河之忧岂独风雅之变哉先生楷模八代衣被九州乃以大雅之才间为小山之制具周秦之丽节而去其靡写辛苏之壮怀而去其亢所谓永嘉之末复闻正始之音也

余广霞浴鹤吟跋

一百五日可禁冻雨连旬七十二峯空叹春泥塞路正作听鹈之想忽传浴鹤之吟值仙叟于下邳殊多逸思得才人于东海同写高吟孔庭咸可闻诗杜氏皆能索句凄然对酒先得我心所同率尔焚香但觉君言特妙也

跋彭爰琴壽閤再彭序

再彭先生具栗里之高风躋芝山之上齿须眉俨若疑是神人耳目未衰犹称词客而荀家之才子早骋龙媒且萧氏之文孙还翔鹤羽洵足称之人瑞号以地仙者矣吾友彭子爰琴为抽犀管用擘鱼笺写星子之词装之玳瑁染霞卿之翰丽若芙蓉何必图展紫绶见真形於五岳籙成青简传灵诰于三山乃复义笃稠桑还求金缕思深落叶恒念瑶簪斯又意与世以俱长情随年而更永者也余既览彭生之作复观陈子之篇持为情移敢辞才尽进之仙诀用质牛叟以五千缀以鄙言聊濡龙宾之十二

郑若干诗笺

予于辛未上巳之辰重举春江花月之社维时庭前受简不乏羣贤花下论文尽来多俊而郑子若干兰梦一枝草生双带文章清丽独操正始之音吟咏高华自得元和之体历观五作足擅一場自可与子美聯鑣岂但令君苗焚砚哉因题芜句用授枣人

跋陶奉长维扬竹枝词後

春风城郭旧是魂销明月楼台时为肠断而香车宝络虽如昔日繁华乃绣幕青丝迥异当年佳丽写柔情于纸上不减名士风流寓胜赏于篇中欲问美人消息君请歌竹枝于堤上余将寻桃叶于江干矣

引

双节乞言引

伏以髭髥矢志从容较甚於捐生髣髴存贞坚忍尤难於继美故

朝重褒嘉之典虽待及年而野存激劝之风宁辞颂德惟江母程太孺人者鹤诚先生之淑配郢上之尊慈也少裕鸾姿早成鸿偶妇能自好方静御其朱弦士故多奇独激昂於赤劍迨至天欲倾而莫补遂乃海可蹈而不归寡鹄空歌谁怜宛颈文鸾不舞徒恨回肠动则捋茶几见忘忧之草生而食蓼长为茹苦之虫称未亡人几四十年抚藐诸孤如旦暮事潇潇夜雨时闻鸣杼之声惨惨晨霜不灭画灰之字爰俾郢上聿振衰宗业授一经名成黄绢家完三徙事出青箱人推士行之亲运甕良由于剡荐时值阿咸之匹矢栢遂合以如兰盖境若公早赋玉楼致汪孺人遽尘瑶瑟题扉已决家人曲谕以存孤引刃何难娣姒羣寬以守志蚌虽胎而不育叹岂由人螺非种而还生呼常似我墙边洒泪俱开思妇之花海内填波莫尽帝娥之石泉能跃鲤汪能以事嫡姑者事其叔姑树有啼乌程即以爱犹子者爱其犹妇青灯两世有苦无甘白首一门长昏不旦里闾纪实志乘并载其词郡邑飞章旌典先从其长乃太孺人谓冰霜砥节痛教形影相依岂日月垂光肯使声名独後以兹谦德暂寝褒封用待遐龄同膺懋典然而龙门纪竹犹存巴妇之台天禄吹藜尚志义姑之传况此双贞之媲美盖偕五烈以齐芳可少弘词以扬淑范长篇伟制雅号鸿裁短咏微吟咸称风采倘文通镂管能开五夜之华则莱子斑衣足慰三春之草庶荣深袞字共知林下清风而宠溢绋箱永沐毫间瑞露矣

江青园七十小引

青园先生理学名宗忠贞华胄风流不坠荣名代着朱纓节义相承灝气独凝青简清刚化物彦方感还劍之风施济覃怀阮裕动焚车之叹盖慷慨原乎大义岂矜游侠之名而然诺本於至诚遂有真儒之勇是以朝尊更老独礼桓荣社后耆英先迎富弼一时遵为律度当代奉其楷模至若大历词人还衣五彩高阳才子并得三珠竹林多均爱之情兰茝有竞荣之势斯则杨家传其玉佩杜氏号为宝爻者矣兹逢诞岳之期适值观涛之候稽之人事前半月而彩丝延筭于北辰考之天时後八夕而紫纬悬辉於南极书繡宝籙犹龙老子之文杖赐玉支单豹

婴儿之色炤长筵于不夜明月犹悬乐盛事之如春丹霞可接何人善颂敢抽兔管以陈词此日为欢愿酌犀觥而进酒君请歌乎既醉余方庆其作朋尔

汉殿传经彦梁台梦笔生华纓振橙里朱槩耀芜城维岳时生甫占星夜诞衡魁奇原独立磊落早多英威凤存遐览高鸿足旷情观书怀卓犖学古志纵横道欲尊三代声尝动两京艰难因就义慷慨为全名仗劒归齐地持盘定楚盟辍餐周友急汲井化人争白璧身同贵黄金诺匪轻里儿凭息讼隣境赖休兵携酒攘鷄醉投钱饮马行危巢留破卵沸鼎救余鯖令德惟神听陰功似耳鸣素环应有报青策岂无铭屡和居陰鹤频闻出谷莺易精王辅嗣赋美庾兰成虎观方联席鹏溟各奋程碧瞳夸矍铄黄髮仰仪型几杖华三祝衣冠汉五更幸兹逢大戊还共庆长庚涛长符川至星高并月明鮐顏齐卫武乌爪降方平绦县何能筭丹丘不待营愿开蓬岛席永奉景山铛家士雅孝廉居忧致疾作诗慰勉并索同人属和小引

盖以道远循陔彩服罕闻于菜子乃致情乖陟岵素冠尝慨于棘人嗟斯世之不臧幸吾家而庶见则族侄士雅此其人也士雅本负俊才尤多至性以尊人之易箴率诸季以抚棺日日悲号尽泪而继之以血时时躑躅几死而遂不欲生以致鷄骨徒支猿肠欲裂经年病瘵瘵痾赖得银丸毕世衔哀返魄恨无瑶草昔攀筵附子感邻母于属垣泣扇王修致乡人而罢社斯为似矣良可风焉爰乃慰以新篇且可箴乎末俗白华敦孝聊同束氏之补亡彩管旌徽愿得郢人之继和

为家元士节母罗太孺人六十乞言引

盖闻紫绋秘笈书藏于阿母巾箱彤管名编字照以神人拄杖非待彰于藻制难共显其芳规兹有元士吴子之慈亲是为幼符先生之淑配琳琅家世本为梦鸟之孙琬琰声华代有珥貂之客幼悲岵岵孝不待教而成早赋河洲礼独因心而具堂前椎髻能同夫子之心厨下尝羹独谙老姑之性桓少君之挽鹿提瓮何伤龐孝妇之烹鱼脱簪靡恹瑟琴静好一十八载罕窥喜怒之容并臼操持三百六旬尽属勤劬之夕缙衣欲造宁嫌锦却蒲桃黄卷堪酬自笑钗无玳瑁烟分百口旁且及于翳桑祠展三宗远益?于采藻此则懿难尽述美不胜书者矣尔乃河决难填天倾莫补始则星前刲股深闺亦有金滕继则日出当心絕壤空埋宝镜题扉粉字几欲还陰封髮帛书聊因存赵几年夜雨鸣机和助读之声半世秋风断杵警缝衣之梦养雏成鹤谁怜寡鹄凄凉有子雕龙肯惜和熊辛苦身肩四代心许千秋遂使膝下文通欲协貂蝉之兆阶前令伯将陈乌鸟之情岂徒台蕙夜香令子金桃叶庆已见堂高世彩曾孙玉笋成班他如义比鲁姑识同许妇独将赤手救伯姒于蓐室之中不惜黄金却暴客於空庭之内此皆闺闈之仅见良为巾幗所创闻者矣兹开六袞恰半九秋天上蟾蜍已就长生之药云中鸾鹤争浮久视之觞信与月以俱明心常皎洁将和天而不老节更高寒范式登堂爰同展拜杨羲授籙雅足承欢封万岁之乡行见起居八座锡百朋之字仰祈组织七襄尔

陈母姜太夫人七十乞言引

盖闻光昭青简凡才子必有慈亲颂纪彤编由令妻必有壽母积徽声于往古传懿范于近今

则陈母姜太夫人实有之矣太夫人灵鍾玉燕胤本出於鈞璜庆笃琼鸾祚久昌于锡券华纓累世河山传象服之荣画桨盈门井臼着鹿车之范爰归硕士作配名臣义笃三从钦嘉仪于鼓瑟功高六出襄秘计于篝灯纯孝表于高堂勤干闻于中饋龐家烹鲤厨羹必自亲尝崔氏扶鳩中服多由手澣烟分三党每见脱簪廩济一乡恒闻辍膳虽华称珈翟既身贵而靡骄迨恻切藁砧复门衰而不坠堂前画荻空怜三凤中分室内丸参还羨一夔已足布裁大被冀佳儿长近正人珥易奇书谓是子终成大器乃俾令嗣是谓健夫若终子云之过关雅多壮气如陆士衡之游雒洵号异才乃涉世不慕声华而读书耻为章句窥其所造将显亲必赖扬名揆厥所由惟能文乃堪养志岁当乙丑月肇甲申节启中元庆先一日壽增天秩时际七旬宣文君坐有生徒称论自若鄰夫人年踰耆艾神明未衰岂不盛乎是可颂也敢乞江毫之五色用赉鲁衮之一言则文重鼎彝永赖仁人之赠而词高琬琰弘瞻君子之光矣谨启

紫金丹小引

杵分兔窟品重玄霜药献龟台名珍绦雪张子本杏坛之佳士还种杏林以芝岭之高入自畊芝亩传家金鑑早看藏发光明济世珠奩更见书分宛委惟兹秘授实具奇功砂链蓉牀频经九转丹成桃液独妙三还气可除疴似启龙膏之合香能辟恶不殊萤火之丸得自神人癰何为而徙树佩之君子体竟胜于纫兰

募修镇海楼观音阁小引

南阁高楼名曰镇海丹臺飞拱凭陵百雉之巔画栋遥骛用奠六鳌之足卷风云于南浦雄峙金汤驻慈月于西迦灵分瑶岛舟航万里共瞻朱鸟规模钟鼓九霄自有白鸚响達此既深于卫国良亦显于佑民者矣素修上人者朴能生悟静可破愚百八子之勤持二十年而苦行云霞千尺不烦棕拂登筵风雨一灯独向莲华听漏念此翬飞鸟革莢江之保障非轻然而鼠穴雀穿桑土之绸繆宜早倘迟修葺必致宝相之淋漓若任废弛何论铁围之倾坏敢辞饶舌仰恳信心用为助木之山神共作聚沙之童子施之材施之丕幸为费之无多孰为补孰为修计成功而尚易母云官之所掌何烦撒手五铢将见福有攸归絶胜盖头一笠

为朴庵和尚募具足戒衣单引

嘯鸾人後司马家儿忽有意于离尘遽舍身而入道头皮直上虽云烦恼能除脚板行参尚有威仪未具在嗔痴既絶要本无贪而慧定维修必须能戒是菩萨不名菩萨究竟如何做闍黎像个闍黎规模不免是用丰干饶舌徧求檀越发心念珠有一百八丸要令随时圆满布衫重四斤七两须教当下现成看他禅和子作甚麼生惟愿大善人说如是法

为姚公六子募缘小引

僧某者故廷尉永言姚公之六子也廷尉刚而絶俗清不谋身以故世未一传家皆四散儿如任昉虽有葛而弗完子类叔敖并无薪之可负栾氏降为皂隶已足伤心孝客去作浮屠尤堪

酸鼻况乎路穷于托鉢又复辞拙於叩门涧底束薪偏难煮石城中合掌谁与施珠非蒙长者之涓埃难起遗孤于沟壑伏祈惠以五铢共谓旧家所不忍见庶几延兹一綫毋嗟廉吏之不可为

方君乐志图小引

夫入世尘而不滓者斯玄達之鉴已深超物态而自颐者则贞休之气弥足于以保兹纯素和以天倪得河图之中宫庆符龙马应羲爻于大衍德叶凤麟度黄绮而齐年絜乔松而等筭虽列名朝籍而溷迹尘区识者有以知其不凡达人早已许为无尽矣黟山之麓夙有异人方雷以来犹多杰士乃尔郅方君者少负英资长多伟抱岐嶷由于天亶慨慷实自性成擲笔早类於仲升结驷有同于端木而闵家门内絶少间言曾氏堂中恒多懿节萱堂偶疾辄步祷而忘遥荆砌分劳每躬当而靡倦坦怀无曲其直如弦遇物惟诚我心匪石陰德不愿人知胜事难为仆数是以赠佩见于吕?琅琊济美题輿称乎仲举颍水发祥兹当知命之时用祈黄耆方庆遐龄之筭以介白头尔乃身寄寰中具渊明之逸兴心游物表慕长统之高踪则其清言传诸柔翰波分上下可涤尘缨风有雌雄偏宜广袖心知鱼乐其何美於渭滨目送鸿归爰有同于江渚於是谢鲲一壑宛似虎头叔则三毫端由麟角其旷怀有若此者则高致为何如乎是当被以篇章传好修于久远岂但留於简牘写盛德之形容哉

静之朱先生七袞介言小引

黄山结幃紫府传筹传称君子之国侨诗歌张仲之孝友式如玉式如金仙醴助彩衣之讌饗乎鼓轩乎舞良辰飞濯锦之笈静之先生古黟望族让产同乎让国追延陵季子之高风敬友本于敬兄仰司马温公之盛德居睦亲之宅年年风月乐以忘忧表郑公之乡世世子孙引而勿替阶前兰玉谢家之幼度超羣墙上薜萝张氏之公超成市挽鹿车而行汲何尝对泣牛衣藏龙劒以传家已见名标虎榜运逢清泰壽届古稀緑鬢朱顏独饮菊溪之水清泉白石同听候岭之笙紫芝之眉宇争观碧海之烟波可涉羣公作赋并渊云班马之奇才令子开筵招鍾吕佺期而共集绮夙忝维桑之谊媿糠粃之在前况当酌斗之时奉盘匱而恐後

林蕙堂全集卷十

卷十一

钦定四库全书

林蕙堂全集卷十一

湖州府知府吴绮撰

露布

拟浙江大兵平大兰山土寇舟山逆贼捷报露布

【臣】闻玉弩垂芒九地失负嵎之险瑶堦舞戚四瀛销吐雾之妖日月所临有容光而必照雷霆下击无负固而不靡干戈扬天子之威钟鼓送

圣人之喜恭惟

皇帝陛下天挺英姿神授伟略玄云入户奉宝籙於丹陵綠错昇坛得瑶图於翠渚荣露下竹苇之泽薄桂海以敷文肃云垂芝草之华罄氷天而服武涂山禹会已集万国之珙球蒲版尧衢自静九重之尊俎蠹兹浙寇敢悖天常肆虐金戣辄奋九头之暴舒凶赤堇久稽一面之诛始犹衅构鱼书遁苍崖而伏莽终则怒回螳臂依碧嶂而凭丛踪几类於黄中蔓欲同乎緑线兼之蜚背爲帆通孙恩於扈渚螯身弄楫连杨泰於鼎湖出没蛟门凭陵虎巘山倚海接相为犄角之形水借陆援用逞连拳之势遂使曹娥江上估客尽弃桃枝严子岩中隐士难安桂树屐殊康乐寧烦孟顗之疑戈挺卢循屡致王凝之变【臣】等敢承庙筭广布

皇灵方传垒而呼冀追扬旗之罪乃挥弋而舞仍矜拒辙之能犬既敢於吠仁虎愈威於服猛遂乃应变出奇潜师制胜蹶悬车之岭暗捣腹心陟束马之岩平分牙爪气冲南斗辉煌双劔之芒影灭西郊变幻五云之阵始于夏关之地歼厥凶锋继于斗门之区躡其坚壁焚骸积阜几成京观之风残息登高更切守陴之哭爰于某日遂破大兰山土寇某者羊头巨獠并穿袁尚之颅龙尾神鰐争断蚩尤之背血被原而成赭何言鴈宕千寻屍伏地而流丹遂满山陰万壑而逆贼某等或以干城旧将为背地之陈豨或以岛屿游魂作图危之道覆犹尔迁延重地窥伺岩疆【臣】等益奋天声严伸大讨秉屏翳之效灵值冯夷之助顺楼船万艘还兴黄海之师戈甲千重共合昆明之战鲸波夜涌笑鼉令之浮屍蜃气朝昏繫吕嘉而授首兎方迷于入穴鸟乃叹於焚巢惟此舟山者去浙水才有两潮藏沃野宁惟千顷咽喉吴越烦庙虑者十年襟带闽番结隐忧者数省获兹全胜遂据要冲凡皆遥稟乎神谋故致奏功於师武资其甲仗不烦武库之兵藉彼餼粮可上金城之策断上流之奔逸势若建瓴作东越之屏藩雄如列嶂远人归化皆言水不扬波樵客迎仙益见山无匿影矣【臣】等无任懽忭踊跃之至谨奉露布以闻

疏

霞雾山北庵募缘疏

五丁开嶂罕覩神工三癸建亭爰称胜迹惟此菰城之外多古道場忆彼霅水之旁为旧游地尝爱山名霞雾厥称境足云烟向逢石屋老人久幸秋围白象非遇烧庵婆子俄惊夜舞绀龙火种莲花信因缘之有在天开祇树知事业之攸存兹有隐愚上人者座列三支灯然五叶轩轅峯顶曾提顽楫之真传妙喜岩前拟续皎然之故迹但高坐不为汉语而上行未易唐捐是以抽毫代丰干而饶舌俾之托鉢乞给孤以盖头倘童子聚沙共种旃檀之树则山神献木即成蒼卜之林识岭路之高低不碍吟成瞌睡尽人间之兴废还闻福在檀波矣

为彻千上人结茅疏

盖闻胜缘有待嗅水知香法会将开移泉作供虽地经桑下不成三宿之情而坐涌花中实现六通之果惟兹彻千上人者系出吾宗法登彼岸生龟早脱尝称白足名流灵鷲恒参不数黄头小乘一瓶一鉢徒闻粥饭之缘千水千山莫问袈裟之地将参禅而少壁此面奚堪欲聚石以无台谁头可点何方兰若能容狮子之牀此日竹林不听鸚哥之语是以持杯不渡振锡空吟师惟得得而来室且摇摇靡定必藉聚沙之神力乃非筑舍之虚言贯似蚨飞钱聊分於于顚珠同鹤报金共布於给孤买沃洲之山灯留黄蘗开庐峰之社池有白莲矣

为默雷上人募古琴疏

神僧洗鉢但乞伊蒲长者布金惟资祇树苟非悟超宝筏将得意而忘言何以供设银丝乃闻声而说法惟我默雷上人法传五叶道契三支短簿祠边长携焦尾生公石畔还欲点头言募名流用求古器扫一切有为之法别作檀波用十分无累之神孤寻果地作水仙操烟波何处移情得混沌材风雪还堪悟道非弦非指直须言下儋承在水在山莫令当前错过我慙坡叟曾得交聪谁是韩公应来听颖倘令心游轸外频教击磬敲冰不妨尘冷匣中依旧山空月老

募修溪南会馆法华庵疏

盖惟河山西极一花开白象之天烟雨南朝双树栖赤乌之地考报恩之为古刹前代爰崇而法华之有精蓝吾家持建旃檀馥郁在长干胜选之区瓜瓞绵长是丰芑发祥之所三百年簪纓赫奕堂构常新十八冠盖往来弦歌不辍故九秋鸚荐宾兴有赖以云蒸而千里鸿飞客至无忧于露处允矣名宗之美制皇哉上国之雄图然地属梵宫守护必资于释子迨事经军帑倥偬不戒夫祝融遂使势烈燎原悲兴巢幕青氈靡托何言蒼卜之园画栋难存竟作荆榛之苑斯则旅人为之裹足过客见而伤心者矣予以去秋来经旧馆疏棠老桂惆怅於四十年前忍草悲花感慨於五百劫後念祖宗勤劳不憚殊切谟谋倘子孙修复无闻有乖仁孝欲为运錡笑乏倒囊幸赖非止以同心尚愿诸公之合力祇园长者倘能量地以布金梵域神童何碍聚沙以垒塔况乎振上世中衰之业名较善于他工贻後人即次之谋报非贖于异日物力

归之一手事必可成功德及于衆身福均无量

衡山南岳庙募建斗母阁疏

地莫盛於南而衡当星纪神必尊乎北而斗作天枢慨自变起鸣狐冤血横流于赤社迨及乱生贗虎妖氛酿毒于朱陵林木之祸方深荆棘之悲已甚维迅扫于十一载丕扬允赖天威而消劫于五百年默运尤资神力此斗母宝阁创建之所由来而衡岳羽人奔走为之劝募也夫弘开一炁密孕九皇演尼丘化玉之符而王称孝弟说耆闍布金之法而主制兵戈西兎东乌自转两仪之轂左龙右虎独持七曜之衡用神光而大靖邪氛以生气而潜弭杀运丹灵峙为长离之镇摩利支开普化之祥道自无殊地应有合矣但不闻鸡犬徒传仙好楼居而遥集龙鸾那见神能露处不遇聚沙之童子缘阙何得九重倘逢助木之山神丹台即成百丈惟衆仁人挽回气数立开金错之囊则大慈母税驾河魁坐涌翠瓔之馆苍龙度厄销水火以骈祲赤彘垂光照乾坤而保泰德无不应福有攸归

募建巽阁专祠繆李二先生疏

盖闻忠义之挺生良关国运文章之蔚发犹藉地灵故一水称丁用兆衣冠之讖而二山名西聿开图史之祥维此延陵适当斗野境称灵秀旧为君子之风俗尚清刚素秉正人之气乃坤维实为盘固而巽位尚未崇高何以为向学之心且难副右文之化陰阳是卜取堪輿家言风木相资补离震间事上图杰阁奉开化翊运之神下敞高堂列文贞忠毅之主盖以首婴党祸虽百折而不辞并能力挽王纲致九死而靡悔齿牙尽脱犹闻攀檻之声支体无存但有渍衣之血倘无显祀曷以激励乎忠贞得此端祠始足用存乎模楷况郡大夫主持风教已有意于崇贤岂诸君子表率乡闾乃忘情于助义特为饶舌徧恳同心共谋不日之功长迓无疆之秀将见嵯峨画栋摩日月而对双峯耸峙雕甍挹云霞而凌万井英贤鹄起宁殊獬豸之山科第蝉联即在凤凰之岭矣

为藏山和尚募塔疏

藏山和尚白足清姿赤髭异品十年面壁曾窥立雪之传五夜入门得悟拈花之旨偶然着手妙墨无让于贯休率尔摇头新篇竟同于觉范虎溪大笑惟共三人鷺岭孤行独留一指腊才高于周甲道忽阻于建寅看九日之黄花犹存我相访三生之白石欲待他年只履空归去来无着寸丝不挂究竟如何嗣子??盼金棺而何有僧雏子子问铁鉢以无存匪藉大檀谁封广柳于是不辞饶舌覓一袈裟但得共为发心藏诸舍利上兜率界信高人毕竟生天归窣堵波非长者那能得地即交情以完禅智用厚道而结胜因行将双树参差长开淨域且见千花环绕更礼寒山

慈渡庵募殿小疏

赤岸分流山高五岭白沙涌浪渡险三潭鼓莫奏于回飈舟易同于覆釜乃有给孤善士义拯

迷津幸得知本禅师身登道岸花龕夜诵空惊怒浪横飞莲筏朝浮不畏业风吹堕伍胥请客直教唤醒醉人河伯娶妻肯令沉如浣女多生援手已注册於东华一把盖头尚浮杯于西竺林中风雨蜂王台何处传灯江上波涛狮子座谁来问法乃属丰干而饶舌用裨龐蘊以发心江类猕猴弘启赤华之社人如龙象还开紫柏之堂将成塔必始乎聚沙岂种禾乃几于生豆语应不妄福有所归

募修香界庵疏

锡山揽胜古有草庵金地从新兹名香界盖清江刺史亲荷锄以诛茅而苍雪大师自浮杯而证果者也塔升秀嶂久历经行坞出吉云恒多栖息冠九龙而直上独高龙树之风凌一鹫于孤骞是为鹫峰之境岂意纤埃之忽入几遭大劫之全灰兹幸梁汾居士偶返故山念彼楞伽山人实为好友解驂赎客脱才子於流离置驿延宾以名流为性命负信陵之意气而自隐于醇酒美人有叔原之词章而更妙于舞楼歌扇昔经斯地愿把臂以入林遥指兹峯可同心而藉卉何其半生遗世曾不染于微尘遂尔一笑凌云竟永辞于幽壤偶因残墨爰展遗型听横笛于斜阳心伤向秀奏鸣弦于流水梦断锺期将留幻影於空堂用表知音於来禩乃有晋陵之仙尹见义勇为更得申浦之贤侯闻声助善共捐廉吏之俸用表亲仁兼全良友之情尤堪化俗但义举何容独任而胜事必赖衆擎用告同心共为协力山神运木便成七宝之台童子聚沙即是千花之塔檀施勿悵茨福攸归

为熊邑侯建书院疏

广陵实为重地江邑更属要区当水陆之冲轮蹄交错值疲敝之後呼应艰难况叵测之人情陰阳莫辨且吹求之吏牒左右安支是以一日难居肩荷者视如传舍千夫莫措铨主者指为畏途时则旄钺重臣皆栽棠之召伯至于檐帷循吏有拔薤之龐公尤幸真儒来为仙尹如邑侯熊公龙山硕望鹤泽英流射策以掞日名高莅官而戴星绩懋狱不苛而市不扰吏治咸泽以文章子言孝而弟言恭听断恒先之教化清矣不为沽激故其清常湛水壺明也不事矫故其明有同水镜机务无嫌于旁午剖决如流簿书不混于刁丁毫厘必察革火耗之羨入而润不染于脂膏罢差役之追呼而怒不闻于需索严莠民之罰而白望潜踪絕嚣讼之风而苍生乐业修义学于四境化美文翁讲

圣谕之六条功同卓茂是以徵催孔亟閭閻无困苦之嗟车马虽烦井里有豫游之庆一钱不选咸知暮夜难干五袴长闻返觉阳春不逮人真如父纵是怒而皆慈姓可名儿但有恩而无怨德难缕悉聊以玄黄为公子之裘功匪笔书惟愿清白留後人之法原因善政而更怀善教之思诚以仁闻而更冀仁言之益况乃堂依杨柳欧阳之旧宅犹存则有岭号梅花何逊之清风未远特为讲院共迓文轩俾月吉而常临时闻读法庶风规之长见获遂瞻依但受泽多同而庀材殊急既衆擎之易举共效子来将合力以图成而永敦民俗矣

募建西来阁疏

盖惟金山独峙砥万顷之银涛宝塔双悬镇千寻之贝阙是以龙轩遥驻宸章灿日月之辉犀管亲题睿藻壮江山之气则苏子瞻之留带未足为奇而张承吉之闻钟无能称善者矣然在上方而眺北固有杰阁以号西来窗中纳千岭之柔岚檻外收一江之胜赏昔年締构曾因赐紫高僧此日摧颓无复留丹佳境是以斌如开士不憚饶舌而效丰干而我小阮庭生亦欲发心而同玄度但慳囊未启谁为助木之山神而妙果将成必赖聚沙之童子则丹梯百尺即仰睇乎慈云而绣拱三重便遥观于法海将见施无不报应知福有所归矣

为天续上人募庵疏

跨鹤城中何妨飞锡渡牛河畔雅足停车则有天续上人半偈清修三乘妙悟传五叶之法竖拂子而随参作一枝之栖放蒲团而不下布狮子座三千那得容身立蜂王台些子如何着手虽道人之汉语犹存不了之缘非长者之唐捐难助无边之果用为饶舌共恳发心似西域之贤妃甘输柰苑若东方之童子更舍旃林则一把茅得以盖头而三更枣可寻歇脚矣

传

家茂才声远先生传

愚尝流览前编遐稽往哲甘公朗鉴得陶谦于缀帛之辰桓子英标识安石于抚尘之际未尝不慨然击节愿为执鞭以为知己难逢得人匪易也乃至谢家池草若灵运之爱惠连杨氏竹林如兄昱之知遵彦则论交一门之内而流声千载之余尤其难哉亦云罕矣余忆当初岁偶尔远游乃家声远先生辄相期许号以龙文仍为獎成勉其骥足而深知未报徒思腹痛之言笃行难忘聊纪躬修之迹弗慙鄙制爰阐幽踪先生讳凤鸣字声远安若其别号也少有隼才长多异操甫受书而名传乡曲未弱冠而声振胶庠当世业之中衰难谋二鬴值亲年之既耄俱在八旬宋处宗之窗前鷄堪入馔王休徵之沼上鲤每就烹遂使垂白含饴虽茹荼而不识将乌戏彩觉啖菽以逾甘迨侍疾有类伯喈累月何曾贴席及持丧实同处默频年犹自居庐以事死而若事生惟思学孔由孝亲而能孝祖还欲报刘五十六年耻求凰之易节百千万日守牧犊以终身此皆敦笃天伦良可挽回风俗者也是以棘闱屡蹶未遂显扬梓里咸瞻共钦孝义豫州刺史为陈纪而表闾河曲诸生就王通而列舍至於田间认履笑而不言畦畔锄金挥之弗顾置幼安之器汲者忘争劝雍伯之糜饥氓待饱义熙之後不复五斗为怀正始以还但有一编自适臣言忠而子言孝曾无矢口雌黄诵其诗而读其书更复娱情飞白精思八法长画被以成穿竞乞千文辄填门而未倦每偕支遁终朝共赏山泉时约戴逵镇日惟论书画是以西京耆硕奉仲举为端人东洛羣贤推彦方为长者良有以也岂曰诬哉既而梦兆白鸡慨三良之陨露身骑黄鹤叹一笑以凌云运值康熙年当己酉孟秋下浣卒于里居子长顺长循二君具象贤之德孙翹京翰京等辈怀绳武之思而翰京如京犹能飭行立名好文服古聚书能读知王顗之有孙留砚堪传识范乔之继祖信虞诩得寬和之报而杨奇守清白之遗庆既有源施方未艾也

丰南内史曰我

国家肇修人纪首重天常礼官时有褒扬史臣亦多纪载惟义夫一节渺矣罕闻忆我先大夫稚圭公既失太淑人荥阳氏鰥鱼廿载遂絶念于云荼哀鴈三秋竟终身于霜蓼与兹伯子并号大儒而一命未膺双贞不显呜呼五伦始于夫妇岂可阙然百行俱在诗书斯为卓尔不独缅怀於知我实亦慨想夫古人矣

又道人传

又道人凌姓名畹字又蕙歙之沙溪人也少负儒才雅怀逸志鹤非鸟伍即傍白云松不林生恒依丹壑诗如常侍遇得意而旋吟画拟右丞时解衣而不倦然性惟絶俗心在寡营郭忠恕之戏写风鸢非徇贵客李至献之能图水特岂赠世家巷内无人曰斯世何堪入眼胸中有竹谓此君犹是知心以是四壁长贫一筇空老虽近三皇之丹竈未厌搜奇乃访五老于香炉恒思选胜飞絙翠岭多康乐之所未经蹑履赤城实兴公之所曾赋晚爱隋桥之月遂至携家久甘范甌之尘因而没世家侄楞香念张堪之遗孤仿原陟之厚义敛而丧葬贍其女妻盖君本高人实多侠槩曾留张俭靡惜破家尝哭李膺无忧及祸兹以交情而获报讵云天道之无知耶

方烈妇仇氏传

妇姓仇氏歙人方本素之妻也手剑成忠周称烈士曳裾起誉汉号硕儒昭代历有闻人近世齐为编户妇生怀淑德少具令姿从女塾以授书在公宫而习礼史开范传长羞蔡琰之篇诗诵卫风独爱共姜之赋下早岁之玉台空悲荡子压频年之金线恒为他人慈母为之痛心孝女因而屈膝贞能不字诚何怨于漂梅死且靡他敢有伤于穠李迨德耀之嫁已逾十年及荀采之婚曾无三月舞鸾青镜犹未稳乎双栖别鹤珠弦遽分飞而独往岂丈夫之志果在桑蓬惟女子之行自甘荼堇望刀环而无日谁怜机上流黄合钗股以何时不念楼前织素无珠可卖供餐成巧妇之炊有土堪包筑壠代孤儿之泣八年胥浦俄惊鵬鸟之来千里练江特买蜻蛉而至青囊不验已无分于齐眉白刃可挥复奚辞于割股嗟天倾而莫补叹海竭以难填泪欲成花即是断肠之草魂能化树将为连理之枝感姑妇之慰留勅家人以环守药名独活苦不由人虫有寄生孤谁似我贫同种蒜艰难回广柳之车事切封榛隐忍涤荐葦之釜久无夜哭门前不听乌啼忽起晨妆窗下翻疑鹊喜邻姑束緼初祗讶其闔扉老父得书早已闻其挂树粉痕在壁终还陰氏之屍锦带留牀遂宛庐江之颈于是里人罢社邑令式闾题曰贞妇之祠表以女宗之墓如生斑竹在土而已有泪痕或化彩云带雨而尚闻香气猗欤烈矣不亦美哉嗟乎綠绮幽情芳年越礼黄花妙句晚景貽讥已甘包蠹之嫌宁论委禽之巧三年倾国空怜息妫之无言五夜失声偶为江郎而唤觉稍徘徊于俄顷即隕落其生平兹独漂摇风雨存定志于经年跋涉关山返遗骸于远道然後从容就尽慷慨完贞斯有大过于人岂可无闻于世爰为濡墨以待书彤用箴顽懦之风并厉子臣之义尔

周太夫人传

盖自芸瓜负米亲承黄玉之书泣笋号松特纪紫金之管孝之为德岂不重乎然手不驱蚊恼

濮陽之忍痛聲能感鶴聞處默之銜哀厥事可風其人足敬似中郎之侍疾七旬無暇於求衣若申屠之慕親十載何心以御肉惟吾式燕實無愧焉因其孝而遂得其慈感其子而并傳其母此周太夫人之所以傳也太夫人系出周宗產于真邑伯仁雅量代着汝南公瑾名家世推江左靈儲嫠宿地當躍鯉之津教本國風詩咏鳴鳩之渚生而守禮志不事夫庸人幼即知書名有同于博士時無逸公炊方夢白彈用續膠石氏入門九族咸知見重少君歸里三黨由以加親兒鮮衣芦寧識柳公權之為異出姬多累葛豈有周太姥而無是言于是方進懷恩為耽書冊高柔見愛益篤瑟琴而太夫人富不為驕貴而能下衣無火浣曳大練而猶華釵少明玕選中璫而獨恕至于宮修采藻日以未逮為悲野飯翳桑時以不周是患先河義重捐多金而祠構翬飛待渡堪傷出余資而橋橫鴈齒感遺言而嫁鰥誼重夭桃見枯骨以脫驂恩敷廣柳則助義無妨于典珥施仁不憊于抽簪是以海內徧乎休聲域中稱為隱德公之得此多內助焉迨乎日出當心海填無力風亡其匹誰憐宛頸中宵鶴有其雛未可捐軀長夜付冢兒以箠不戾三從撫兩稚于提携何慙再起豈知麻姑轉盼俄見塵揚遂至漆女傷懷果聞天墜救無披髮爭操室內之戈禍在剥膚莫厝突邊之火伯之隕矣嘆大厦之將傾予何歸乎悵危巢而已覆鄉關播越八百里處處驚蜀道之難親戚凋傷三十年人人利齊奴所有太夫人聞雷不震涉險如夷動者持之以靜中流之砥柱常安急者應之以閑當局之機關獨妙紛紜自解若芒刃之斬亂絲神色無驚似輕裘而臨大敵卒能潛消衆變默劑羣情全破卵於湯火之中出覆舟於波濤之外堂前畫荻總是泪痕燈下丸參無非苦味慰之以義命何殊身自教兒束之以詩書不謂母能兼父六婚孤女頻年不倦傾筇獨撫遺孫盡日還為授讀念世難何辭身瘁顧吾力之已殫謂陰德有似耳鳴信其宗之必大訓兼文武劉殷之七業俱興教備慈嚴泰嫫之一門無忝仲以文章啟事行登鸞序之班季以黌術致身亦入鷹揚之選歲當癸丑月在仲春嗟二豎之弗臧痛九原之忽渺羿妻歸月徒聞搗藥之宮织女還星但有支機之石當乘鸞而欲逝一心惟念前人迨化鶴而難留片語不關他務賢哉此母允為巾幗之難貽厥後昆是作閨閨之范爰述其事是為之傳

丰南內史曰世風不競人紀罕修士在恒居爭夸奇節時當變亂輒易素心震雷有兢兢之傷樊圃着瞿瞿之刺而茲終養以和獨全其大存栢舟之雅操貽桑土之遠謨詩曰淑人君子其儀一兮母有之矣彼喪匕以貽羞循牆而失步者亦烏足道哉

紅鵝生小傳

高士橋西是孝尼之故第讓王祠側為彥博之名園槐柳交陰蟬聲一巷松篁遞响鳥語四時蓋其間有紅鵝生焉生夙負英姿早懷壯略緣奉鯉趨之訓遂忘鯤化之圖陶元亮之家兒罕求聞達王孺仲之嗣子不事聲華用孝全貞固其所也于是覃懷六籍極力四聲得北苑之精傳旋為閣筆有西崑之麗句特妙題籤襞古錦以為囊篇裁芍藥鏤青瑤而作管手浣薔薇金粟重來蘇舜欽之遙追太白玉簫新制姜堯章之低唱小紅歡既以古而深賞復因奇而富錚于古器辨乎周禮之文威斗遺模証以漢台之記王將軍之庫內若具五材李公子之筵中無非三代苟其堂中賭茗不妨貴買徐熙若至袖里懷珍必至狂呼米芾矣而且尊同北海惟醉詞人坐擬西園徧辭熱客杜司勳解官之後始訂忘形嵇中散僵卧之余還為納契雖牡丹香發長思功父之家而修竹清風不減元卿之徑至若酒旗歌扇時迎桃葉船頭側帽輕衫獨往

梅花阁上遇方山者谓为豪士望陶岷者有若神仙而吊古殊多问天还切过埋剑之地怅君子之不存游响屐之廊叹美人而安在杜鹃月冷欢少于悲麋鹿春深今犹似昔凡经游于蜡屐悉寄托乎彩毫文为生焉情使然也又或玉钩斜畔惆怅飞萤铁瓮江边荒凉战马寻西陵之旧事两峯未改烟云访南国之遗踪六代徒存花草莫不临风酹酒对月兴歌抚长剑以歔歔鼓哀箏而慷慨昔阮籍之登广武时少英雄孔明之卧南阳人思管葛含悲吐曲触绪言愁见之或讶为狂识者独伤其志矣予与生游同山泽好缔林泉爰以阐其幽怀用待传诸好事也而生架蓄瑶蟠恒多问字屢随银鹿颇解挥毫墨沼流成独得琅琊之秘黄庭换得长怀县之高故自号红鹅生云

吴母郑太孺人双节传

盖惟史官所载务阐幽光女子之行尤崇苦节若乃髣髴矢志出百计以存孤截耳明贞守一身而济蹇斯有裨于人纪咸宜表于家乘则郑氏孺人为不可及矣粤考善濡叔祖具国土之英姿厥配汪氏太君有淑人之雅操而孺人同操箕帚屈奉巾箱虽络秀本自士流而长怀门户故康成实为名族而甘就衾裯自挽鹿车用佐良人之画频调燕瑟能和大妇之心纵阁异东西礼则均于采藻即饁分前後而事总切于条桑鍾郝堪仪喜怀珠而并产齐梁非远痛载宝之不还日出徒嗟天倾不补鞭长不及况在疚之??巢破难完有未亡之藐藐他方遗橐齿既易于鲸吞同室操戈涎复垂于虎视况长男之先逝至嫡妣之继亡乌失侣而长啼鸾抱雏而独宿多方巧诱有怀欲动乎贞姬密逞凶谋不利将施于孺子时则绩勤文伯龟手何辞烛灭徐吾誓心靡改画欧家之荻总是泪痕丸柳氏之参无非苦味虽频惊于风雨每自凜其冰霜调护维殷察神明之既定敦勉至再知志气之有成爰出洸澣之微资加之脱珥助其桑蓬之壮志勉以将车遂能化犊为龙养雏成鹤重兴旧业譬夏后之一成力奠颓基若周家之九鼎太孺人诚惟保子而仍保其子之子仲震公谋足貽孙而更貽其孙之孙使非一线之能留安得四通之累致传之典册可称巾幗之程婴矢在咏歌是谓闺房之李善矣迨至三传以後复寻二姓之盟则我周嗣隐君亦有荥阳佳配早称栢士出圭组之名门雅号针神具帟帑之淑行殫心进乳曾无叱狗之声洗手尝羹岂仅烹鱼之事会伯也失尊人之意暂出涂山至女兮感君子之行长悲湘水兵戈既塞鸿爪雪而难归琴瑟无音鹄啼霜而弗偶而氏强为笑语每忍泪以承欢力谢言挑欲毁容而秉节恒依绣像虽阒阒而不窥自着綦巾即糜羹其未饱灯前顾影历百千万状而未改丹忱镜里含凄凡五十三年而竟成白首事传戚党谓双贞并出一门庆笃宗祔幸二烈流芳两代绮偶游楚地获友文孙前既属其祖姑後亦为其丘嫂言而足信可风励于後昆行实有徵用仪型于末俗爰抽兔管弗揣不文竚待龙章同期有耀

马伯元先生暨元配周太夫人忠节合传

盖闻烈士效忠秉丹忱以弗二贞姬守义矢白首以靡他是以运值昇平勒景钟以着绩时当丰豫安帟幕以成家若乃劲草之遇惊飈人嗟板荡抑或长松之逢寒雪衆叹风靡则国尔忘身独甘劳瘁心坚励节不虑漂摇乾健坤柔实相成以不朽臣忠妇顺乃各致以长存心有异乎道惟一矣若伯元马先生及周太夫人者则见之矣太夫人宝林世胄镜水名宗裔出绛侯世有弓裘之望家原公瑾人传圭组之华生有兰标早奉班姑雅训长多蕙性无惭鍾氏芳规

奠鴈而配参军庄而有礼挽鹿而归司隶孝本于诚满座宾朋酒浆不匮终年慰问筐筥无愆乃先生投笔从戎慷慨际时之志弯弓破敌雅多靖乱之才一出而图吾军三迁而帅其衆璇枢拊髀遥闻貔虎之威琼岛销魂尽慑鲸鲵之气真将军从天而下丑类岂有遗乎诸反侧望风而归南人不复叛矣鞠躬尽瘁食少有似乎武侯效力忘疲星陨遂同于宗泽维时天倾莫补日出当心未亡人欲相从于九京藐诸孤尚伶仃于万里干戈阻絶难归广柳之魂山水崎岖莫返维桑之骸而太夫人手瘖心碎泪以尽而血流昼画夜思人屡危而天相身经九死竟完穀于覆巢体备千辛乃归魂于故壠况时当改玉既伏莽之未除而家且卖珠复牵萝而无策凋零井邑每常叹于呼庚劳攘舟车更多虞之旁午白头二老将不免于饥寒黄口多儿正有需于教诲仰事之与俯育所赖伊谁外护之与内调其艰实甚太夫人手封马鬣十指几至不完力护凤毛三餐亦为少进堦前画荻总是泪痕灯下丸参无非苦味含水茹蘖凡四十三年补漏医疮有百千万状既老而不懈虽病亦不言是谓竭妇之功而复代夫以为子遂能备母之教抑且兼父以为师所以懿训维章六龙争为奋甲徽音弥着一鄂于以腾霄泽及两邦并有神明之誉恩覃万姓益弘清白之仪以致天赐鸾书人钦鹤筭堂中紫绶拜义成之封堦下文轩赐建昌之号世之宠礼行及无穷天之报施宁复有艾夫妇以德胜而持户更复多才女以贞名而立身实多苦节吾无间矣复何加哉迨及属纊之时犹然伏枕而泣出篋金而修先墓传遗令而置祀田斯岂庸辈所能实为丈夫不及耳爰纪其事以告诸来

赞颂

练溪文虞江隐君像赞

莲峰毓秀橙里孕灵继考城之閎闕承宋代之簪纓早挺岐嶷之质幼多孝友之声期文章以振誉念怙恃而伤情傳介子乃弃觚而叹端木賜则结驷以行其为人也本多才而多识其御事也亦必敬而必诚雀一中而知为俊杰凤再卜而许以和鸣梁家之配既叶陶公之业益兴千万里而不辞况瘁三十载而甫就经营齐人服仲连之义楚国知季布之称有妇焉能相夫而教子惟髯也信迈羣而絶伦方严慈之克济何凶闵之洵婴赖虎头之妙翰存燕翼之芳型写古心于古貌扬令德以令名将庆貽於奕叶昭百世而流馨者欤

江氏四世五节妇赞

盖闻髣髴矢志播雅咏于柏舟截耳明心纪徽声于竹简然青陵台上鹄不再鸣采缕窗前鴈难重繫曷淑二寡但传武库之文华义三贞仅见永初之记未有聚苦节于一门绍幽芳于四代如我歙之江氏者也江氏系分伯益胄衍文通家风素着于柴车世德聿光于芸阁乃星辰照耀固神貽忠厚之祥而霜霰漂摇亦天笃孝贞之气谁云荼苦益显兰馨粤考明初元称成化始惟江夏倡大义于靡他继有荥阳抱孤贞而弗二或三珠在握而弥伤宛颈之心或一綫仅延而益结齐眉之痛乌啼门外处处秋风鸾掩镜中时时夜雨盼黄姑于天上悼白首于人间斯固可匹美女箴貽馨妇诫者矣尔乃时当嘉靖复见贞姬系出宣文爰生懿质杜韡淑德早作继于傅家苟采妙龄遽含悲于陰氏抚其异出皆有絮而无芦逮及所生并种松而成树望藁砧于山外五夜含辛泣络纬于灯前六旬周甲亦云酷矣不足多乎若夫积庆将开凶

洊至天倾莫补日出当心则有方氏孺人者来从德里迨事严姑叱狗无声偕鸾有志鸟称比翼宁呼婆饼之焦虫取阜螽不禁女衾之抱爰择贤媛以事君子遂得淑女而产俊人儿难识父几同赵朔之孤妾以无夫自是韩凭之妇同磨笄而不可抚破镜以相怜螺赢封泥或谓形之可似鸳鸯照水但在影之能双岂必须眉乃称婴臼长将血泪欲并英皇足笑褚公问黄罗而奚在堪同王女把白玉块而不离是诚无愧于礼宗允足再传于巨孝而应全翁性切哺乌诚通乳鹄燃龚明之顶朱袍遂以延年剖五钝之羹白髮因而愈疾是以路公求状柳子题铭天旌两节之门人号衆芳之里济阳之裔盖至是而益昌矣虽然石窳貶封国有旌崇之典延乡宠锡礼存汤沐之仪凡此贞姿金宜显赉乃素门寒族既以请乞为难而弱质颓龄又为格程所阻礼官莫详其姓氏女史罕识其仪型遂使陇上芳姿但化相思之树海中穷羽空填精卫之波湮没良多可胜三叹爰是详其淑行用以备夫旷闻赞曰

猗欤德门实多女士厥有黄媛守德弗二迨及于郑益为其难保持如綫母力克殫维宋之子既贞而慈黽勉鞠育备着令仪及方与万泉清玉洁孝事君姑庆貽来哲凡兹五母懿教克彰弘宣圣善裨益纲常有泉匪清有石匪介凛凛贞操名光函盖彼臣奸君彼子怙父尚闻此风宁无心忤我为作赞以告後人谁司彤史永扬德芬

家贞女汪氏赞【原名宝珠】

予族孙炯然元聘汪氏者裔出平阳家原水界荣华累世信席上之堪珍婉娈多姿爰掌中而不离少而陟岵早丧严君岁及抚尘惟依大父从蹇修之约盟久订於丰溪就内舅而居身乃随於繁水而年方三五尚未当笄地隔半千犹虚纳币炯兮命促方埋玉以兴嗟女也心惊遂折钗而兆梦贞鸾未偶其何意于双飞寡鹄长悲誓相从于九死情原未解乃有性而无情礼尚未成辄因心而作礼扉间粉字已办还陰堂上白头空怜赋卫每闻改聘即欲捐生絶粒投繯既痛其身之可惜毁粧易服益信厥志之难移於是一灯夜绩惟同阿母篝灯半镜朝窥不想仙郎合镜塔前剖股叹露祷之多诚榻下承顏念水餐之独苦匪朝伊夕力为扶持积日而年躬亲请膳玉仍在璞宁知价值连城珠未离渊自可光还合浦当今

上庚申之岁周贞姬甲子之龄洵正气足以感人致清风遂能变俗合四十五年之久以孝存贞使百千万人之多因诚得动青衿绣服拜送於荻港之滨彩榜金书迎返于柳干之舍坟前洒泪草木为枯室内藏形庭除不出梦中虽见犹然未识容顏地下相逢谅亦转多凄楚迄今而又逾十稔久且未免於饥寒至此而益励一心贫乃更坚于风雨未经作妇百年忍痛比殉烈而尤难若令为臣一旦颠危定效忠而弗二使当异代犹将遐慕斯人幸在吾家更得亲观奇事乃有忝为族党置若罔知且闻独拥膏腴弃而不顾斯则自弃伦常之外宁能复徼忠厚之貽某苔水陈人隋桥逋叟然少登史馆与闻风教所关老返乡闾喜见贞良尚在伤哉贫也未能请恤以

龙纶慕而书焉或可垂光於蠹简为之赞曰

有美一人得气之正金石之心冰霜其性性与时乖心难命任世处其艰力持于定白髮靡他

青灯自映蚁羶弗慕蜗争罔竞宛颈终身秉怀益劲视彼纤夫百年朝菌尘息谁多荣名罕尽
我作此赞弘昭贞佞用示後昆毋斲尔敬

茅士可天女散花图赞

彼何人斯维摩居士而非维摩即维摩氏是二非一是一非二无法可记不可思议是花非花
花落何际破除诸有行所无事人我不存空色非异不生不灭多生咸济作如是观如是如是

罗母叶孺人壽颂

吾乡之有罗氏三君子也才堪鼎峙如瞻韦室之星品合珠聯并列王庭之树而季子临思尤
与予常敦文酒之好数为山泽之游每叹何物宁馨得斯异质遂至今时淮海乃有俊人而前
此十年获为吕庭之叔夜曾为数语忝作鲁国之奚斯始知泰岳出云爰能致雨醴泉沛泽必
有其源则壽母叶孺人者是矣太孺人懿德天成徽音日懋兰常在谷以不植而偏芳李欲成
蹊乃无言而更蔚虽顾恺之史未能纪其二三即刘向之篇何足言其万一其为女也闻弦辄
辨慧每叹于中郎借硯能修文可续于班令而姊娣推为婉娈保傅服其温恭则孝着于家此
其始矣其为妇也挽鹿而归提瓮不辞其悴烹鱼以进馈食靡懈其勤琴瑟无噍杀之音机轴
有箴规之益则敬存于室又其至矣至其与人也有礼有法佩璫时解于延宾何有何无方舟
弗忘于恤患三党无忧举火百口乃可名桥以此为和和可知矣若其守已也既明且哲保家
於数载之前亦淑而贞持身有百年之恨捋荼而若忘其苦画荻而弥尽其心以此为节节靡
加矣是以教成而业广道在而名彰耳目固以神明福祿深于日月今之距昔又十载焉太孺
人之龄愈高三君子之名愈起而丰溪逸老愈见其昌看东阁之梅花犹存香雪挹北堂之萱
草更见清风伏朱鸟之窗中聊窥阿母望丹虬于筵上复覩麻姑敢辞擘菡萏之笺用以献葡
萄之醞驻顏有术宁须问三祝之旧文注籙堪期愿且更九如之新制乃为之颂其辞曰坤輿
毓秀离曜垂芒月为陰德宿有婺光爰当北陆载降南阳诸梁衍????越国流芳惟兹淑媛用产
瑶房玉侔纯粹珠比温良闻诗汉殿习礼齐宫裳衣窈窕行佩从容在水上语有林下风言归
君子作配名宗裔华梦鸟誉炳乘龙琴调司马案举梁鸿鸣机助读判荐留宾翁媪相贺娣姒
维均乾餼罕怨鍾釜多恩薛家有凤王氏咸珍训惟以义教每由身养人以爱持节为贞辞多
取寡戒逸甘劳恪安义命理谢纷晓能书百忍独化羣器祸因智免量以荣高行遵恕字吉取
谦爰百年无爽介祉是徽鮐背矍铄鹤髮婆娑含饴自乐强饭益多长膺家庆永保天和孙枝
蕃庶子姓骈罗兰馨厥颖桂挺其柯百龄未艾千载奈何屠维届岁应钟发声启青纱帐驾丹
轂駟宫开驻景台筑怀清赤霜绣帔紫电晨纓桑田笑指桃实欢呈永须介福长享遐龄

林蕙堂全集卷十一

卷十二

<集部,别集类,清代,林蕙堂全集

钦定四库全书

林蕙堂全集卷十二

湖州府知府吴绮撰

文

祭四安石神文

维康熙七年月日知湖州府事中宪大夫某以牲醴之仪致祭於四安镇水中石神曰惟神肇作人形不知所始托为神识未必无因徒窃日月之灵乃知江河之崇而屡沉粮舰致耗国储太守代帝宣威为民司命不难赫然震怒效赵昱以求蛟聊且告以精诚学昌黎之徙鳄念尔为妖于水次无非求食於人间特遣具仪用申明信尔其潜踪水府使舟楫以安澜庶可奏绩天仓免雷霆之霹石如其有识尚或无愆

葬凌忠介公告墓文

仰惟我公星岳降神清风独立浩气常存时为午未寇躡晋秦狂呼莫应义愤空陈伤哉不戢兵叩帝阍龙髯洒血麟趾蒙尘天惊海涌雷走星奔家存靡国君丧何臣公时恸哭宛颈而死书报慈亲训贻幼子平原握爪睢阳嚼齿魂绕皇畿骸归故里瘞玉无缘帑金空赐榛莽一棺星霜二纪廉吏难为忠臣不祀嗟彼残贼崇墉特起我来公郡拜公道旁公子葛帔夫人练裳见者陨涕我心用伤爰谋窀穸此地实良佳城永固碧血用藏西台有泪北斗无浆日月浮云山河夕阳公其披髮问彼太苍

太白亭落成告孙山人文

忆予童岁见先大人一编手把朝哦夕呻拜而展视曰君诗文疑仙疑侠不子不孙岂余今来拜君之墓遗土一坏凄凉道左草白霜枯叶黄风堕山空无人挂瓢何所爱感予怀特为君葺白石为门青松作室建亭翼然在墓之侧有春有秋可游可息聿成先志以待後贤乔松汉代桃花晋年沥酒一觞颂诗一篇赤城霞起君兮在焉

黟县啓圣祠上梁文

伏以人伦明于亘古而先产治人之人圣道揭于中天而早生毓圣之圣自尼山应祷主教兼
主治之权而泗水却流作师代作君之统苍鳞绕绂三千子赖以提撕赤雀衔书数万载因而
振摄然先河而後海星宿出自本源而立地以观天覆载难忘奠丽匪父匪母万年开长发之
祥为公为王历代修独崇之典况兹北野之古邑实为南国之岩封四山圍列以环溪两水交
流而若绩人文世显邑多飞盖之英地气隆崇里有鸣珂之彦然夫子之宫数仞既无类于杏
林乃圣父之室三楹尚未安于芹水荆榛偪处难为多士之瞻棖桷倾颓莫慰圣人之孝况一
行抱器犹存元子冠裳三命循墙独备上卿彝鼎委禽实原从父遂毓秀于昌平乃虎久着备
关且建称于邹县功德实有所自典礼岂可缺然哉维我族孙实当秉铎爰请各宪特建崇墉
舍其旧而新是图谋于衆而独为任翬飞鸟革焕然阙里之规模龟伏麟游宛若淄坛之气象
右当圣殿金声玉振而同赓左傍伦堂夏诵春弦而不辍前临重岭四时之岚气长来後绕清
洋一派之澄波若带香生曲沼如传蓉镜之芳山对梓潼似映桂宫之巖斯又仰协于地灵而
下徵于人事者也若问寝若视膳文亲之晏夕长安或钟鼓或几筵宣圣之神游较近凡同景
德悉听徵歌

抛梁东霞灿扶桑曙景红一自朱薨开胜地伫看石照起渊龙 抛梁南一道清流绕翠岚此日
棂星添碧瓦上林春信又重探画抛梁西梁安画栋与云齐瑞气好看增胜域名贤结队陟丹
梯 抛梁北剑气笔花争吐色惊传赤电绕城居海市楼台胜兗国
抛梁上虹霓直吐三千丈曲江骏马或争驰染将柳汁宫袍上
抛梁下明珠宝玉皆无价银袍都带玉炉香他年好把瀛洲

伏愿上梁之後奎光遥映斗宿聯辉周道常平名士弘兴于东序唐文初变有人得继乎左台
少圣之谟济济进皇家之俊从公于迈蔼蔼多王国之桢席坠三鱣先生自此升矣榜开五凤
学者得无意乎

碑

安丰場华周二王神庙碑

盖闻祀先利物有功与德者斯崇祠重维风惟忠与孝者弗匮故诚存一念而英爽亘乎累朝
道济当时而利益昭于百代均国典所必重而民俗之由隆也安丰为宿莽之区历代鲜荐苹
之宇而华王之有庙也则郑君所创始焉王世本谯人生当汉季少工经术本有志于扶倾兼
善方书乃多端以疗疾辞徵辟而不就品具高风视分剂以无差心存妙解湔肠剖腹一丸时
下蛇虫养性除疴五戏常兼熊鹿神奇罕测具存陈壽之编罗网无端遂及魏武之难虽书焚
狱户帐丹笈之弗传而散授神楼服青粘而多验在昔魏晋之际得门人吴普怀师谊而始祀
于芜城近今庆历之间有土民王某感神庥而别祠于淘境方家瞻仰咸奉醴以告庶姓祈求
得刑牲而荐祉但附庸金地初则俎豆之不专而错处尘衢继又垣墉之未广民之听也神其
吐之郑君系出康成由来乐善人如龐蘊本自好施乃因遭疾之获痊仰蒙神佑遂欲崇祠以
修祀爰与衆谋公同善之怀钱百缗而未足鼓当仁之勇钟万杵而不辞辟地开基手除荆棘
庀材作室肩荷梓桐遂得鸟革翬飞告神工之克就龙章凤质庆庙貌以维新夫上扁鵲之陵

土能愈疾入神农之谷草可除疴而况苹藻之勤修时无废事必有威灵之显应仰藉宏庥矣又以里有周王世为宋之孝子梦徵龙育少秉灵姿性切乌伤早多懿行奉慈言而远涉将祈福于婺溪闻凶讣以长号竟殒身于衢道孔圣公感之而挽救胡舟子奉之以货船翊应正烈之封着于前代雨阳疾疫之禱显于累朝特为传写诣厥故乡备列威仪肖诸前殿昔郭公侍膳尚且山号孝堂考叔怀羹犹复祠称纯孝况断肠以痛母致毕命以从亲用劝敦伦良堪化俗呼图勒之鼎故庙此其宜哉狄仁杰之毁淫祠吾知免已然合其前後已昭神圣之规模而计及久长必藉僧人以守护爰招缁侣更启法堂鹿苑东开丽云霞于金榜鷄园左辟启日月于银绳舍敞赤华月满恒瞻瑞像房开紫柰清风不杂凡香室是维摩问法堪横师子筵修圆觉听经常到雉儿拈座上之花径里三千薈卜制山中之漏池边十二芙蓉固已四衆灯香方便眠鱼之席兼之三餐粥饭现成养鹤之田不必投斋更向洛阳寺里毋烦乞食常居舍卫城中此则共赖佛光将以永邀神庆以斯济世可卫国而庇民以斯宁人可厚生而正德君之致力可谓勤矣君之用心可谓密矣建袁双庙当必显驱虎之灵作头陀碑实有媿雕龙之彩尔

曲阜顏氏家庙忠孝碑

盖惟运由五德以相嬗不替圣贤之裔位以千年而得正聿昌忠孝之宗然日照月临正气咸资于神诞而山辉泽媚清风罕见于家传缅想斯人盱衡当代则河间太守顏公父子其人也公家原复圣胄虽古而愈华代有名流文在兹而未絕与闻正学居七十二子之先独受遗经在六十五传之後拳如鲁国方总角而偏奇舌似常山每读书而知慕金门射策广川具繁露之才玉殿挥毫曲水羨凌云之气初膺大邑随车即种甘棠屡典名封迎刃俱成偃草雷霆在手历盘错而无伤冰雪为心处膏脂而不润路留遗锦民当绵竹以无欺道见缝裳贼过朝歌而必获而薛宣强项不拜督邮贾谊拊膺耻同絛灌是以举旛阙下曾明大令之冤题字屏中独重神君之绩非长孺而不可俾治股肱使希烈而何辞宁涂肝胆兹则星精欲殒天步将移甲仗连营中山无可完之垒鼓声动地瀛海不沸之波鼠尽空城尚扶病而煮铠雉倾残堞犹贾勇以登陴国事将危遂置身谋于不问人伦自识岂云天道之无知毒甚燎原总是丹心自热惨闻阖室惟余碧血难灰而长君孝靖先生清宵妖梦早徵易箒之不祥远道飞书空叹单车之莫挽望云已隔心惊两地传烽乘雾维遥益痛孤城受矢粉身靡惜挥爱弟于壕边折足成伤遇游兵于道上如林戈戟书生慷慨而直前若画须眉戎帅仰瞻而加敬似秦廷之痛哭血是泪痕若荀氏之长号喉应气哽妇被割而罔恤徒感心香儿既病而难支谁怜弱骨丛披荆棘穷昼夜以跣行路塞豺狼望山川而袒泣躡天踊地得残骸于焦土之余斂死全生拾完卵于破巢之内遂使持名元老嘉叹以为罕能雪涕旅人传闻谓之奇事乃先生力穷匍匐负广柳以归田意絕揣摩守寒蓬而闭户伤哉仲也痛天序之中零念此季兮勉月征而益笃哀衔朱雀类刘俊不过南航诚感白鸟似王裒曾无北坐停云朗咏弹宗子之一琴过日清吟拥邳侯之千卷带经陇上将畎亩以终焉柱笏山前谢功名而已矣道旁守剑乡里传王烈之风井畔分泉父老感管宁之化龄逾周甲慨猿鹤之空存岁值逢辰叹龙蛇之遇厄阐幽光于圣代虽传褒德之封振清议于礼官尚乏易名之典河汾澄学门人窃号为文中彭泽高风国史允传乎靖节諡曰孝靖礼不然欤嗟乎柴市归魂非有劝忠之子睢阳嚼齿曾无并命之儿兹则墓号忠贞可一門而含笑泽流文史比万石而何慚贤者能世其家君子克昌厥後六龙夹日李供奉或是谪仙双鹄摩云杜司勳岂非才子某论交有素景行无私题郭泰之碑斯为

不愧作秀实之传此必可传爰刻贞珉用书前烈永存家庙以告後人

歙县西溪南仁德社庙碑

原夫崇卑既位两仪垂育物之仁广大无私四序有报功之典盖高旻降泽即委职於黄輿而庶彙敷荣必托根于赤甸茫茫下土爰存牝马之文膺膺周原用笃勾龙之祀菁茅分其五色圭璧用以式灵俎豆徧及万方琮璜因而荐嘏轩皇立制创始春秋嬴帝宜年行兼伏腊与厉山而并重禾黍设於周京借蜡日以俱隆粉榆传之汉代苟其三辰弗替必以劝农是则五戊咸遵因而祈谷者矣矧余故国实号名封聚黄山白岳之灵具丹竈砂泉之胜都称天子山川应牛斗之辉里产大元井邑衍龙章之绣家传隆古风俗本自让王世际雍和礼乐观乎季子左台公登朝珥笔文章自作一家垄塘君卜地成庐忠厚相延百世人多才子岂惟孝绰一门代有英流何数弘农四叶然苟为令族而里独着於西豪裴属蕃宗而居共推夫中眷非藉麻于灵主宁易致於康功也哉粤考大典於吾乡原奉正神而有社灵分歙土秀擷丰溪聚山水之幽奇当田畴之沃衍名威有赫已将及于千百年福蔭维多几渐踰于三十世田歌豳鼓祭赛无旷于鷄豚妇饁夫耘昭报不烦于猫虎春而风夏而雨若或凭之趋之吉避之凶吾无间矣至於宜男灯火屡应兰徵祈女香烟曾分樾庇龙文密应未殊洛水之祥鸭脚重生自比上林之兆故由今溯古虽几历夫废兴而自公及私曾无衰于舛蠹何其岁时既久乃至梁木将颓庙貌长崇其何侵於草莽灵功欲坏宁无恫於几筵爰有倡首者汝渐周裔启芝翰京等诸君弗吝捐金而就义因而应事者宜修啓龙其旋咸为庀木以宣劳百堵咸兴竞奏登登之响两堵克敞欣观穰穰之规当康熙平治之时值癸亥丰亨之岁由已而戌计功之成也仅六閱月维士与农乐神之妥者有千余家既鸟革而翬飞亦禽恬而兽息於是恒占高廩屡报神仓四邻结宗会之欢万井笃蕃厘之庆将见陈孺子之为宰天下维均岂必张司録之当官府中不入而已哉夫周之言礼传帔舞之文魏之作歌记方坛之制兹考於古不既协欤绮也浮沉乎寒暑陰阳流浪乎东西南北未能乞一日之醉远效山翁时复作千里之吟悲同越客割黄羊以赛福固所望乎得白鼠以衔又非所冀也聊应宗人之请敬告後昆殊愧往哲之词弘昭茂祉呜呼过威惠之庙者寇亦避其风雷谒丰泽之祠者人尚邀其雨露尔

方大家新筑堤桥碑

盖闻兴废之有关其地者则详其始末以告诸来功德之可及于人者则纪其物力以传诸後良用昭其匪易将以示夫毋忘也予家自唐代迁居以来历年八百余载由始祖卜地之後得世三十余传在歙邑之西栢比而处跨丰溪之上聚族而居溪滙丰乐衆水之流更为环绕堤当天马诸山所注遂有崩冲庐舍每为不宁井里因而多患曩有节母程太君出其组紉所积训其孝子介石公倡为畚鍤之谋特新桥益加修埂千峯揖翠桑柘不减於秦人万树浮陰桃柳几同於西子乃岁月既久遂阻塞其北隅而啮蚀维多致奔冲于南道冯吴惨酷莫可胜言黎庶灾伤难以尽述而明卣淑配方氏大家闻而动心遂为勉力斂簪珥之费重戒纓耒减盐米之餐还谋土石补其疎而密亦固听鼙鼓以相闻因其旧而新是图属畚鋤而不倦千夫云集如趋龙首之渠百堵雷殷并运鱼鳞之璧始於已迄於未凡胼胝者三年肇於北达于南作堤防者数里由是狂澜获砥耕作遂其安恬即或暴涨惊流堤岸无忧溃决是役也旱涝得

以启闭而【阙】不缺望于一犁也屏障特为藩篱而沉竈产蛙不罹灾於三坂矣洪潦弗沦于马鬣而垒垒者无夜哭之魂飞流不断乎羊肠而贸贸者无途穷之泣一举而功收乎四善一日而利济於千年不其休欤是可传也况芍陂之绩翔自伟人蒲坂之工由于杰士而兹方媛本属女流柔比少君入室祇能挽鹿孝同龐妇登堂惟解烹鱼乃柏舟既励其贞操而萱寝更高于义举前有功而莫继後何以传乎内有美而不彰外无以劝矣予曾叨逸史复忝宗人敢谢不文自乏珊瑚之架遂忘厥事用留琬琰之镌爰树以碑为之铭曰

堤之下其水汤汤堤之上其衆穰穰六轡载驰两车用将嘆有以溉潦有以防维耦十千食我农甿维此硕人厥世曰方俾我後昆于斯堤也同貽庆于无疆

重修梁醴陵侯文通江公墓碑

盖闻事有异同志气感平生而自动时无今古文章历旷代而相知爰览遗编尚怀前哲则醴陵侯江公其人也公以彩笔知名金貂应?赋诗沮逆屡抑雄藩建议匡时预知强敌绦衣独立朝纲弘振于南司皂帽先归物望特孚于北海言其风采既振一时相彼天章允符五色斯固足以凤观昭代虎视累朝者矣尔乃建平之际不无械系之虞昇明以还屡遭鼎移之痛运逢天监爵拜醴陵还思素宦之怀遂为行乐之论岂其才之果尽也抑其遇有难言耶夫士在当时名垂後?才华既难以自抑运会又欲以巧逢天实为之庸可易得哉公墓至今千有余载田桑屡变不随绦水浮沉陇树空存尚有秋风萧瑟陵名下马已无酹酒之人祠叹瞻乌絶少题碑之客今则裔孙世栋来兹土而雅具永思适其兄倩程坝佐斯邦而颇多惠政爰陈祭祀采芳藻以登筵共效勤劬辟寒榛而开道遂使龙门更矗马鬣重封康成玄塚奠者识为名儒供奉青山过而呼为才子因俾立表以告後人用志斯文是貽来者呜呼一坏残土似染墨痕三月飞花疑分笔彩寒山寂寞夜台知向谁家杯酒凄凉词客还应识我为之铭曰

德水逶迤神嵩嶽 肇诞鸿文允襄骏烈云卷霞舒珠光玉洁安石梦鸡庄休化蝶经千余年历十二叶大劫靡灰洪流弗啮世泽濊如孙谋诒厥思起悲风采从明月宿莽披霜荒榛断雪鹤表重高龟言永协孝思无斁视兹丰碣

鸳鸯墓碑

乙未秋仲言游霅溪有以野禽见饷者中得鸳鸯二只义不忍食乃命童子瘞于岷山之陰明霞墓侧享以并蒂之花荐以连枝之果酌双溪之水以酹之而为之碑曰维此匹鸟字曰文禽緑首红衿纹翎绣臆朝朝宛颈生来未识相思处处俱飞夜去何尝独宿暂分蓼屿不堪回顾频频才隔菱塘已听相呼唼唼霍家池内睡酣舒夜之莲韩氏坟前戏上合欢之树遂使幽姬意动荡子心回效比翼以恒双愿同心而勿替岂身膏乎鸣镝遂命尽于惊弦锦羽横披尚带情人之血朱丝斜绾难聯倩子之魂何可供我盘飧乃令试之刀俎于是瘞之重坎刻以贞珉无复濡于在梁聊以完其同穴若令写之图绘须登苏蕙之机化作澄泥亦是秦皇之瓦

说

金液丹说

此丹本自异人传于秘授珍同丹雪似神女之银奁美胜玄霜得仙家之玉杵不待虬脂满合可徵愈疾之奇实则鸾血成丸颇着广宗之妙试而辄效鲁单豹因以驻顏用此无方李犹龙曾为益髓主人不敢自匿聊舒同善之怀诸公幸用相珍并得培元之力尔

诔文

许仲容先生诔

仲容许先生者予友念修立臣师六之尊人也系本子将仍传月旦人同叔重久擅风华而孝友本于性成仁恕由于天授少而负笈尽窥东鲁之藏长好披图独爱西铭之学诚通求堇让表推梨蔡中郎七旬何心解带第五伦十起犹媿安眠指百口以名桥合三宗而待?时逢认履不妨徒步而归即遇盜菰翻欲奉身而避邻家卧犊长待饮于管宁渔父获龟得全生于毛宝焚券非关于市义造车恒望以借人以故石氏佳儿皆能数马荀家诸子并可名龙乡党化其清操途多守剑郡邑钦其硕德巷有式庐终身无污玉枝晚岁独摩铜狄方其生也邦君修几杖而乞言迨及溘焉邻里见旌幢之入室召隐居于天上夫岂偶然迎柱国于生时吾无间矣绮交深孔李谊笃荀陈每独拜于牀前尝共趋于庭下恨当易箠之日匏系一官欲希磨镜之风芹怀五载兹值仲宣归里始知灵运生天奉席无因题旌有自乔公墓畔宁忘腹痛之言郭泰碑边应匪心慚之作诔曰猗欤耆德伟矣令仪明珠比誉璞玉含姿橘怀陆绩被共姜诗书题百忍台号四知分餐有饫让畔靡亏光风被物膏雨济时智高失马仁渥纵麇庭齐珠树坐长金芝制崇更老礼重耆颐玉棺天坠绛节霞披龙章待贲鹤驾难期青瑤永刻黄石专祠千秋是仰百代云思

郑隐君诔

隐君讳【阙】字伟然歙人也少而岐嶷长为模楷闵子骞之门内初无间言万石君之庭中惟多雅节临深履薄庸德而复谨庸言婉色怡声养体而还能养志轻纨不御美好弗入于怀蔬食自甘淡泊欲明其志读书而惟求大义略似渊明居市而但本至诚爱师卜式是以好行其德靡倦于心焚阮裕之车尝能市义毁冯驩之券匪以徼恩而爱出物先施由亲始似薛包之让产恒问有无若孔奋之遗衣无分远近事兄如父谊每笃于二难抚侄如儿情更殷于十起训诸孤以诗礼开塾无异于鲤庭率羣从以俭勤倾囊用资乎马磨分餐给廩怜女弟之孤贞赠葬资婚助贫宗之屡空崇几筵以报祖捐千金而庀梓材修俎豆以敬神扩百亩而施柰苑竭股肱而罔惜在国如家推心腹而弗疑宁人负我於是积劳成疾痛霜露之不臧与物多忧悲日月之云迈猿鹤起高人之怨龙蛇为君子之灾泪洒重泉怆恻题碑之客魂归故里凄凉执紼之人媿不成文爰为之诔其词曰

莲峯崒崒练水渊淳爰多间气用产奇英既孝而友亦廉而贞声闻于国德迈于庭心乎何广耳也若鸣潜修弗怠华誉乃盈彼苍不吊厥算弗灵庆延五世怆结九京

方隐君诔

之屏方隐君系由环岭诞自石川世传曾闵之风家在崔卢而後生而穎秀曾见探环幼即伶仃空传与硯孝能求堇偏深令伯之情贫且弃觚遂有介子之叹繫牛成讼几致遭冤奠雁求婚还惊非偶踉跄归里堪伤任氏之儿老大完姻始得孟家之女新嬪不辞夫提瓮雅善烹鱼夫子乃遂其牵车弥通结驷人皆赤手乃三徙以居陶军岂苍头忽一成而兴夏漂摇风雨葺牖维艰起灭波涛停舟匪易而卫公子之居室不待苟完郭尚书之求莹先期得吉尽哀尽礼翬飞首建於崇祠致爱致恭雁啄无分於别?犹子吾子也第五伦之十起宁私是人非人乎陶靖节之一书常诫攘鸡不怒翻成饮酒之欢失马无忧不入忘机之虑难尝欲急有纓冠而无闭户之时事在必为多隼击而少鷁飞之势是以盜慚王烈人服管宁下泽停车咸叩头而呼长者太丘行县争举目以看伟人薛凤齐肩或闻诗而闻礼荀龙着膝亦教孝而教忠言有壶觞久入耆英之社动成规矩行登耄耋之年而鸾鹤俄来龙蛇忽悼痛九原之不作卜五世其必昌唐宠遗贤用表方干之墓汉旌有道爰题郭泰之碑诔曰

练水鍾灵?江着德屡蹶而兴当穷靡忒筌路维勤帷帟可式孝启弘规厚传遗泽德懋化乡龄高杖国一笑凌云重归鲜日爰树丰碑以传懿则待彼龙章弘兹燕翼

鲍母王孺人诔

鲍母王孺人盖鲍君瑞生之母也宗出树槐性成毓蕙幼擅睢鸠之德长归挽鹿之家运值中微尝亲佐餽时方再造独任鸣机孟德耀椎髻以前偕鸾有志桓少君提瓮而出叱狗无声帷里篝灯识程朱于正学座中挥麈呼嵇阮为异人江鲤一双自跃姜家之水灵雏五色长依薛氏之庭绘剪髮之图宁存金钏挽留宾之酒独解罗襦而镜掩离鸾琴弹别鹄玉树凋零早衔悲于伯仲金戈抢攘遂窜迹以丧亡看敬亭之山徒怜飞鸟望扬州之月谁止羶羊乃季也贤哉母兮天只赤眉初定即为扶杖之时白首言归不废停机之教为门户计朱公宁矜于累金存忠孝心定远岂嫌于掷笔秋风锦袖犹虑蛩吟春日板舆频传燕喜含饴玉砌玩兰蕊以婆娑介酒瑶堂庆萱花之婀娜东华益筭孝子方切于祈天南岳归灵仙娥遽迎而返月乘鸾何处水隔三峯来鹤无期云迷四极呜呼斑舆不降慨方朔之心劳画扇空存悯王修之骨立青镵一束殊慚陆子之文彤管千秋自有刘生之传诔曰

西池降德东海修仪风清玉案月静金徽俭传曳练勤着支机白眉克绍黄髮是宜人方恤纬天不慙遗班留妇训曹失母师乃昌厥胤允显于时谁箴女史此无佞辞

史蕉饮故妻李珠僊诔

维康熙二十四年九月十八日李贤媛卒于家春秋十有九此吾友史子蕉饮之元配也媛姓李氏名正芳字珠僊家原姑射冰雪本得于神人系出晋阳星宿实根於帝子二分月下前生雅合吹箫七夕桥边弱岁先知织锦不作庸人之妇愿事伯鸾得为才子之妻爰归司马未谙姑性先洗手以调羹独解郎情遂同心而绾髻河梁匹鸟能从枕上论诗京兆双蛾每向镜中

得画弹琴而窥春鬓蝉影弄其轻风把卷而看晨粧虾须明夫旭日擎篝灯之纸坐对挥毫抽插架之籤笑看泼茗焚香浴砚红窗之韵事偏多脱珥收书画阁之良朋独好於是常为交颈小亦比肩绣佛像前并下三生之拜玉儿𡇗後私为五夜之盟慧以情生慧多而情愈密才由德发德厚而才愈藏然而杂座争喧敛袂偏能不语卷帘深坐窥窗每若无人咏絮原工篋内曾无完藁调丝最惯壁间常挂余尘妇信难为频拭低头之泪郎能善事宁瘞有恨之疴遂使续命无丝招魂有纸愁如落叶竟同落叶飘愁瘦比黄花不共黄花耐瘦凄凄断雁影寒五夜之霜寂寂哀蝉泪冷三秋之雨非花非雾访仙岛其谁能为雨为云除巫山而不是懽无一载况多离别之时合未逾年半是呻吟之夜嫦娥奔月窃妙药以无归婺女还星隐神光而难合心伤别鹤空怀同穴之情气尽啼鹃但洒呼天之血缕金裙褶莫寻断梦於稠桑渲粉绡图惟忆芳姿于穠李缘斯多感聊以述哀谀曰

哀此硕人生多逸性体若珠明姿如玉映既温而恭亦慧而静诗自宋传礼由班训及尔采繁迨兹流苴挽鲍宣车赠秦嘉镜鸳盟非缘鸾吡实命香与蕙消影同梅尽悼感孙荆哀生奉倩剑合何时环悲靡罄

墓表

有明御史仲渊何公墓表

何公仲渊名弘仁越之山陰人後陶介山僧大猷号昙约者即公也家本稽山县大元之仙客世称学海抱子朗之异才献书即擢贤科射策而登高第初制桐川之锦雨辄随车再弹梧水之琴花仍满县始则城修百雉崇罗令之墉继亦岸刻三犀筑贾侯之堰吏在水而民在镜清不容知冬有日而春有风和能得爱陇间听讼频裁召伯之棠山上题碑并长莱公之竹是以蝗投隣境鬼遁殊方邳邑祠韩或陈觞而致醉馆陶争魏皆投牒以请留既而鹿走秦原马浮晋渡痛靖康之失守急用说言值建武之纷更爰求劲节于是栖乌之府非正士而不居避马之台惟嘉猷以入告任伯雨半载而一百八疏悉中机宜田表圣一时而七十二封未经采纳囊矢终难于告庙投鞭还至于断流舟覆厓山问赵孤而莫在途穷蜀道持汉节以安归永夜狂呼血洒伶仃之泪颠崖直坠命捐辛苦之軀而心不忘君纵百伤而未絶魂犹恋国虽九死而还生勉从父老之言暂易浮屠之服骆丞惊窜曾来灵隐寺中潘阆潜奔竟出延秋门外朝朝痛哭溪边碎读离骚处处哀吟井内独存心史伊蒲强饭宁知周粟堪殮藉草无眠直恨蜗天不旦高人有陶靖节来或相从处士惟杜景贤知而不问万山昼伏时共猿号一旦西归遂成蝉蜕而遗书在篋不及妻孥露寝无棺难忘君父杨王孙之裸体自有深心史子鱼之陈屍终完苦节呜呼作雪庵之偈松阳无让菊阳读文山之歌信国何如鲁国望西山而莫见蹈东海而不归时有斯人可廉顽而立懦公之令子况修行以成名忠孝能世其家今古罕渝其志是可表也岂不悲哉

原任丽水县令田公墓表

田先生名绪宗字衍文鲁之德州人也望贵营丘身隆介岳汉廷题柱世传京兆才名宋室献

书人有祥符直谏荆华独茂槐本相承曾祖奏赋南宫鸣鹤振一台之响祖父传经西序雕龙
敷两代之华先生贫号书农学推经圣雪高洛下羣来正叔之门雾合华陰并集公起之市爰
称之曰夫子是不媿于人师迨及

世祖之九年始对

大廷之三策牵彩入仕遂得縉云制锦当官尝多膏雨然而山高櫟木夙为伏莽之区岭遶莲
花自属成丛之路鲋以穿而易漏蜮能射而难稽先生按籍如神持衡不爽燃犀独照字莫溷
于刁丁害马先除案无忧乎旁午斯则振衣得领吏相戒以难欺发刃维劓鬼亦惊而欲遁者
矣尔乃堰当西郭水滙东瓠分四十八支之流溉百千万亩之地岁在久远日就污莱先生凿
龙首之渠力为修复筑鱼鳞之垒手自灌输比义欣之开芍陂曾无重费若番系之引蒲泽倍
有成功斯又利及乎千年德流于万井也若夫整琴笙于板荡葺簧序于榛芜俾邺侯之规制
重兴而鱣飞于壁水逮文公之英华不坠而鸾舞於醴泉比屋闻歌春有弦而夏有羽盈郊起
颂民在镜而胥在水不三月而政成将期年以课最而玉棺忽坠宝舄难飞朱邑祠前竟有招
魂之客羊公碑下还闻堕泪之人莱竹空生望神君兮不再召棠勿剪无慈父以谁依呜呼一
轭长留史册永传乎遗爱二龙并御家乘懋显其义方伯也南国文章海内奉大苏之学仲则
东京制诰宫中知小宋之名天道岂尽难知吏治良堪弗朽宜昭茂绩刻以贞珉用启後贤绍
兹芳轨

墓志铭

吴隐君仁先公墓志铭

公讳【阙】字仁先歙之丰溪里人也延陵公子登车开礼乐之传左台大夫珥笔肇文章之
体门高画桀代有名贤室富青箱时生硕士公幼而朗润长益权奇慕相如之为人仿少游而
处世早怀大志具国土之楷模多负豪情耻小儒之章句傅介子弃觚而叹燕雀安知端木赐
结驷以游馵鸿无爽痛家声之中落拟振前谟慨世绪之孤存何辞远道过会稽而探禹穴帐
金简之靡存由吴苑以返蜀冈谓宝泉之可致四通得地朱公因以移家亿中多谋管子何妨
问业贪廉互用取与务当乎人心盈缩相权进退每观之天道飞霜暑路曾几何时凿井山泉
已成无筭然而性成倜傥意在流连读计然之书非图拥利善海山之策岂谓居奇百口为桥
始成吾志三宗举?不待人求悯孤女之未婚频为嫁鰥悼遗婴之不育时复抱雏薛邑多逋屡
毁冯驩之券隣人不借尝焚阮裕之车轳计千头恩施广柳廩舖万户惠起翳桑脱尼父之骖
聊资累土赠曼卿之麦不憚空舟他如完破镜于乐昌舞鸾重配返亡珠于合浦坠雀还生而
且横水编桥非惟济蚁因山植树常为放麋排难聊城鲁仲连何辞射矢持丧洛邑原孝先岂
待驾车虽白玉四环乌足酬其陰德即彩毫千管未可罄其惠心斯可谓有济于时好行其德
者矣尔乃喜惧不形于色得失靡介其衷树下息陰时为乡人而饮犊竹中伤指不惊隣父之
盜菰叔度汪洋陂泽莫窥其际季方仁恕閭閻咸化其风得季布之言黄金非重服仁轨之行
白璧无疵当其好义乐施妻子挽回而不可及乎财亡产落交亲讥讪而益豪常鄙齐奴散之
不早还怜龐叟去此何迟是以万竈归诚一乡载德虽龙蛇在岁占为君子之灾而鱼鸟怀恩

爰动行人之恻羊叔子碑曾洒泪匪在襄阳董仲舒陵可奠浆长闻巩洛望鹤归于千岁逢青
眼以无期见马嗣之五常美白眉而有立高原是卜遗蛻用藏魂无所而不之何必阡名原氏
德有貽而必报应知兆在杨家铭曰

灵壤环互佳气郁葱牛眠用协马鬣是崇惟我哲士爰有陰功天赐其吉地运以隆丹崖霞起
碧树云封千秋永利閼此幽宫

瘞兰铭

姬楚人姓马氏兰吹其小字也玉台在郡家邻行雨之乡绦帐为村身是扶风之後李络秀本
出名门梁緑珠才当弱岁言归于我用遂其家时予方苦于茹荼而彼早安于集蓼长随滌器
不教怨起白头每共弹琴独爱声调素指谓夫子岂长贫贱知长公不合时宜迨乎献赋金台
簪毫粉署栖同鷄树索米十年官似马曹怀冰一纪嗟东方之割肉虽不饱于细君怜西阁之
同心贵长随于大妇三更拥髻樊通德恒伴伶玄五岳儋书随清娱偏依马史而苔华初盛兰
梦再徵徒以抱痛于乘鸾遂致伤心于化蝶成仙无药空怜奔月之娥思妇有花难覓返魂之
客黄昏细雨洒红泪于犀帘沧海明珠念柔情于雁柱爰以年月俾其子归厝于广陵之西山
呜呼春风杨柳难寻隋炀之陵寒食棠梨尚祭朝云之墓为之铭曰

吁嗟之子厥修孔孺窈窕蛾眉参差燕羽薪仰槐添屋牵萝补美助琴瑟芳齐佩黼大运忽终
修期用沮令子青云美人黄土嗟彼下泉以永终古

林蕙堂全集卷十二

卷十三

<集部,别集类,清代,林蕙堂全集

钦定四库全书

林蕙堂全集卷十三

湖州府知府吴绮撰

亭皋诗集

五言古

拟今日良宴会

芳条茂青陆名彦盛东都相逢巩洛畔列坐高李徒玉盘进华食朱瑟扬妙歛罗衣舞春烟欲
进娇含矐主人前致语努力为欢娱良遇不得再荣名难有余请君视皎月倏忽翔金乌

拟明月何皎皎

天末敛余霞娥辉澄素练虚影入房栊庭花静如霰我有所怀人皎然若相见但恐在远道阴
晴异乡县踟躇步前楹飞鸿落清怨何为久离居阻隔欢与宴

拟庭中有奇树

条风振迟日珍木发奇滋亭亭百尺干枝叶相扶持岂无琴瑟用冀见鸾凤姿羽仪邈难即荣
落亦有时芳华不自荐葳蕤当为谁

拟结客少年场

豪杰推三辅轻肥重五陵经过向燕市横帟飘长缨劒怒白虹出酒激浮云蒸所得在意气赴
急如秋鹰大息顾两儒矩步趋时名笑覩荆高侣狂歌变徵声

古意

长安二三月朱楼临广衢上有良家子蛾眉扬青矐君子远行役既嫁还独居下顾见游女婉
变相驰驱明璫携素手日夕飘华裾中心岂无慕时命固有须伉俪分未足琴瑟义有余东邻

视彼美未聘其何如

客秣陵送孝威之壽春

天末起寒云凉飈动砧杵爱此秦淮秋後先作行旅故人敦素盟授馆得羣处萧条白板牀一灯夜中语两见明月出行歌互尔汝何来岁暮心催君下西楚譬彼两黄鹄乘风一轩翥徘徊顾山椒零落在毛羽忧心从中来默默如何数壽春争战場今古具楼櫓君去得所依长吟入军府嗟哉沿江屯衣带亦成阻我去苦未能新寒薄絺紵离魂难奋飞翻为悔欢聚

又

摇摇河上舟萧萧?傍草明明残日中云是远行道携手上河梁凉风吹窈窕相视长叹息凄然念綦綰日月难相知危疑速人老豺虎横四達掩户恐不早胡为久行役东西学飞鸟子归会有期子行宜及晓母将王粲心依依向刘表

中林堂望月次芝麓先生

落叶满天地秋残无定声爱此寒兔魄当轩凄且明君子重良会酌酒写我情欢笑良有以叹亦无事成周游历广榭踟躕步前庭萧萧月中影宛若池上萍离别既以远敢不怀令名浊醪古人意盃尽聊共倾

又

河汉邈无极大道直如髮作客不得归畏见牀头月徘徊怀远情矫首望天阙但忧尊酒空坐令芳华歇贵贱会有命持刺欲何谒请看天上星安得久不没

赋得流萤夜聚书

虚馆易成陰华牕黯初夕高人寡所营夙好在羣籍爱此丹鸟光飞飞向瑶席入幌似流辉临编如弄色方粲更生藜遂映长卿壁持照不自私微明欲相益匪不慕高翔愿依君子侧

折杨柳

杨柳未成花春风满妾家送君辞妾去折柳捐芳华芳华宁可久误妾青闺守蛛丝网钿筝蝶粉尘歌袖柳花今复飞不见紫骝归相思无处说还梦入空帟

塞下曲

日暮黄云飞天山夜传箭男儿好身手结束事征战劒血污金鞍袍花染成茜势絶无援兵投

幘目如电不恨死沙塲所恨君不见坐令刀笔人议论明光殿

野雉词

野雉备五色耿介异羣鸟偶有稻粱怀翱翔出林表猎徒山中来弯弧正夸巧尽命锋镝间离披堕丰草羽毛匪不佳一误失衆好徒羡双飞鸿冥冥入秋颢

咏史

窦氏耀朱纓霍家骤华轂势极不自持翻如未尝足岂知天道微龙亢固多辱意表发奇殃颠覆累厥族东门邈难期华亭恨相续何如曳尾龟全生在溪澳

采桑篇

紫陌春风路柔条压春树晓起自携筐盈盈采桑去非直为蚕饥畏郎无好衣银钩正欲采惊出黄莺飞莺飞何决絶踏得桑枝折宁知桑树中更有离人别

督亢陂

荆卿西入秦手持督亢图雪耻用盗术托智无乃愚不知壮士意成败匪所虞杀身表不平要以明区区匕首一得力六国无丘墟英风振天地博浪心相符谁云荆高侣落魄但酒徒

楼桑村

炎精既凋谢中山独後昌昭烈龙準姿卓犖生遐方古老传此地昔有百尺桑下?潜龙宅上碍高鸟翔西蜀既发迹羽葆增辉光至今不可见行野空旁徨因思南阳事豁達同高皇崎岖成鼎足大运良可伤咄哉陈氏子帝魏真荒唐

黄金台

烈士爱立名宠利非所求胡为千里足而以黄金投将无徇薄俗匪此意不綢我来吊遗迹踟躕寻高丘失礼地亦异平楚苍然秋伤哉楚童瞳矧印生仇讎

张华宅

张公晋人杰博雅诚多才依违事悍后乱至遭嫌猜徒能识宝劒不悟坼中台岂非当局人席宠迷素怀兹地乃遗构岁久成蒿莱梁栋不可恃华屋安在哉同时有张翰秋风遽归来至今大湖濫祠庙何崔巍

贾岛峪

房山一深峪曰有唐诗人贾岛昔寂寞狂吟惊贵臣高秋吟落叶岁尽祭诗神遗编骨尚瘦千载传苦辛才奇命不与遇困名独伸匪逢昌黎翁灭没同灰尘苍蝇附骥尾知己良足亲哀予不复见老泪徒沾巾

刘司户祠

神奸弄大柄威慑唐公卿刘君草茅士对策抒不平含毫鬼神泣下笔风雷生主者不敢视弃掷鸿毛轻身虽窜遐域身歿珥朱纓庙食历数代光与日月争当时得意人或同腐草并乃知千载事所重非科名

感遇

清署寂无营垂帘挂朝旭庭有百尺槐团团盖苍蔚上枝拂云电下枝蔭华屋凡此尺寸材蒙茸托其族既免曠阳焦又得晚风谖根株得所依神志曾无辱愿言永垂阴庶保岁寒绿

又

丰城有长劒雷渙测其精荆山有顽璞卞和识其荣智者不虛赏微物昭令名嗟哉斯人徒忽与草木并所冀遇君子寄托抒微情肝胆不敢贱躯命固所轻斥鷃在枋榆无藉难自行苍蝇附骥驥乃陟千里程

又

岱宗高不极肤寸润方州渤海广无际吐纳资万流古之至德人动为物所求伟哉李元礼列坐羣贤优昌黎特後起贾孟皆从游一顾亦云偶终古称骅骝所以重感恩烈士身为酬耿抱知己心日月无穷休

雪後望西山

朝出城东门极望西山际积雪冒层峦凝陰覆松桂一白亘遥空幽翠偶亏蔽山上尚重寒城中落新霁为想古岩人袁安正高憩嗟予客金门四见朔吹厉策马度深泥絕壑徒流睇何时老云麓梅花两扉闭还共同心人煮酒聽鹤唳

岷山

我闻羊叔子登临俯襄沔如何来兹邦有山复名岷出郭既不遥入林亦匪浅高树瞰碧波古径缘苍藓亭下老石尊顏李昔流湏清风邈难即盛德固所緬愿言泝流光幽芳或可搴

道場山

郡阁望南山城头入晴翠乘舟泛湖滨所望乃其背策杖至山椒旷然辟幽邃清泉泛瑶碧古刹拥蔚翠旁有伏虎迹莓苔绿无次拾级上层峦放眼乃无际烟中数飞甍云边认归樾浩然吴越间秋色落吾屐乃知玉局翁爱山固有意

法华山

吴兴清远区西北富丘壑长松列崇冈十里送芒屨杳霭化人城幽奇虎头作策杖赴岩阿苍烟满丛薄亭影落遥空湖云澹寥廓下泛九曲池泉香流羽酌水底漾仙螺枝间宿灵雀徘徊不可极爽然遂吾乐

抒山

望岭陟迢嶢沿溪入葱蒨遂至夏王村复越黄蘗涧三癸遡遗踪登高足忘倦清流绕芳原晴阳叠层巘山谷乃不殊云岚时互变东南烟华生城郭了如见遥思顔平原夙与开士善高唱茗花间尘外有遐羨

毘山

毘山视诸峰小大若邾莒崛起无因缘翻耻与衆伍我来陟层巅危楼势飞翥四顾见诸峰环抱反若俯晴溪绕其足淡荡百花渚所惜高木陰何时就斤斧坐讽吴均篇慨然念时遇

东林山

放舟凌陂塘泝洄访灵迹言寻贝锦峰云是东老宅画榴不复见葛井鲜行汲蹑屐登山樊旷然得所适平楚浮霁烟山云共秋碧振衣火炉顶清泉泛瑶席黄鹤何时来临风欲生翼

碧岩

弁岭如率然碧岩乃其腹栝栢衍陂陀苍苍满椒麓石磴几盘纒重崖互回伏当其登顿时一上一换目屡憩始得達旷朗见晴旭下视七十峰波里夕阳绿飞沫洒明珠悬泉挂寒玉幽池出云飞蜿蜒骇灵族凭空一舒啸乃信世尘促

学士山

玉湖浸春烟柔岚翠相接遥睇学士山与岷适屏列遇赏若争高嵯峨况自别地僻行无踪榛莽不容屨絶顶老苍云环坐席可设茵染莓苔纹足底过舟楫一经高贤来霞上迹不灭春物正骀荡清晖共怡悦归来丝竹声萧萧在林樾

栖贤山

高天淡若阴春风动林藪我来问寒条倚楫龙溪口山路平可驰梅花拂我首蒙蒙雪色中风香互先後十里无停驂马上劝行酒我闻管仲父栖迟在兹久古蹟不复寻飞英落金斗

丘路

仙踪罕近寻武陵邈难即岂谓南郭间乃有避尘迹便娟修竹园窈窕幽人室方春桃作花夹岸绦英积溪山多艷姿鷄犬带霞色頽光静相照永日不知夕入望无浅深但觉世情隔遐哉柴桑翁作记有余忆

登龙山絶顶望太湖用康乐韵

春色生东南良辰引孤眺屡陟蜿蜒背排云入苍峭振衣覽震泽一碧与霞曜泠泠林樾间鱼龙聽长啸我时栖山樊久处欲忘妙扞萝快所覩得免猿鹤诮既愜丘壑情弥羨沧洲钓举手望烟客相期发幽调

和澹心雨中见寄同用少陵风雨暗荆蛮五字为韵【选四】

古涧入深竹白雪相无穷我来拾瑶草晏坐青桂丛曦髮弄寒雪幽翠生微风

又

莓苔长卧阁浮萍冒庭础俛首视八极怀抱不能数所赖有素心烧灯共深雨

又

故人隔河渚相念如平生贻以琼瑶字读之增古情乃知千古事不在高与荆

又

独处少良覩久居无壮顏人生贵自适何事眉睫间终期五湖里驾浪同鱼蛮

读长儿粥饮诗因示之

簪组岂不乐忧患多所招曰归逢岁俭况乃无东臯饥来不自得时复嗟汝曹余贵妇增叹炊稀仆渐骄赖闻哲人语冻饿生贤豪金门已云远臣朔尝自嘲折腰虽不遂扣门徒用劳园花待春发得酒还逍遥

咏史

裊裊岩边藤鬱鬱
澗傍樹人生各有為
因緣在時遇嗟彼漢馮唐
失意亦以數文武豈無宜老
壯失所據所以慷慨人白首
多顛仆棄置等無才憔悴亦多故

又

曼倩少讀書蓄意匡時難待詔
非其情金門等糲散滑稽良有因
神仙豈非玩囊粟苦長飢誰
能濟屯渙割肉徒歸來細君得無嘆

又

廣漢本循良治郡有奇氣
遇事乃風生身命兩無避
剛直為禍媒高明遭物忌一蹶不復伸
殊非聖王意當代亦已矣徒為後人氣

送冒巢民歸雉臯

入夏在三月江湖尚春色
良友多奇懷為樂不可極
胡為忽言歸徒令衆心惻
驟別兩情深余歡百憂積
人心不能靜世事殊未息
蛾眉一見妬豈在得與失
舉手送君行髮白難再黑
我身非冥鴻安能避矰弋
有約且復來流光共相惜
飲酒聽清謳葆真庶無斁

擬古

燕趙多佳人容光鏡華悅
有美獨空谷所懷在貞潔
含嚙揚清謳被服日馨越
願言御君子歡愛兩無歇
胡為不見知坐廢桃李月
將無金屋人蛾眉更奇絕

秋閨曲

塘上芙蓉花秋來何裊裊
辛苦向西風紅顏不知老
用因見古人情為韻奉送孔東塘還朝

性拙與時悖早歲辭冠紳
閉門絕塵鞅寂寞江之濱
偶然值文舉到巷停朱輪
一笑出蓬戶如覩骨肉親
并坐梧桐下高談多異聞
得句輒心賞有文常共論
相過每相得無間夕與晨
乃知性情合夙昔固有因

又

君子負奇節聲名滿華甸
偉哉聖人孫不復伍時彥
文章媲韓歐經綸羞管晏

天王幸闕里講道數稱美
大用方有期試可在明練
咨汝乘四載疏濬任所便
往來江海間遂

与鄙人善天地自非常吾侪日相见

又

大道鲜常经行止会有数汉帝召贾生归应受宸注行当馆清要驰驱满皇路独我意拳拳留君愿少住君亦同漻然低徊念心素况我年既耄何时更星聚惜别在河梁临波不能度矫首指云鸿翩翩各千古

又

人皆以禄富君独以官贫辞家二千里宠遇成苦心餐饭不得饱而独罗衆宾贤劳不能息而独谈奇文新诗溢囊匣曾无钱一缗宁知碑没字阿堵堆埃尘胡为恋朋好离别感更真嗟哉此何世乃复见斯人

又

仲冬天气肃雨雪道难平况复鲜裘褐悲风闻鴈鸣骊歌方在远慷慨登王程别酒既满铉别泪还沾纓遥望见天末乃有白玉京君今从此去行行重行行梅花不可折柳条空自萦云何当此际而不伤我情

小孤山

大江西南来日夜万千里惟此浔阳口吴头亦楚尾何年苍龙盘奔涛屹然砥翠壁挿浪生丹峦向天起杳霭絶跻攀云波互奇诡上有神人居绰约世无比昔云藐姑仙想像或若此谁能望彭郎相思满秋水

石钟山

江尽欲成湖有山如列障对峙两青苍嵯峨百千丈我泛轻舟来心目忽俱畅巉峰不可攀悬壁但能望一石各一色万石乃万状树木役鬼工楼台架灵匠云岚恣奇譎江流莽滔漭潮至声始鸣风来响逾壮舍楫蹶层峦天水迷所向始信髯苏文相与共奔放恂恂白云中飞仙在其上

游忘归岩和王文成公壁间韵

赣江有灵境日至日益好晴雨冒高云远近絶羣岛我来後人前已让前人早振衣多所怀尘襟詎能扫

过景凤山精舍访王汲公

闻山辄意移况复良朋在忻然荷篮舆携手入香界花气落盘觞绿阴满襟带良会无近情高言谈往代举目睇层云秋山若相爱莫惜秉烛游离鸿渺天外

题灵山道院

憚暑不成行故人留我止携襍入山家栖息良有以倚檻赋新诗衔觴亦云屡荏苒送长日烟华发红蕊明月忽复盈秋深入池水舫楫章江湄振衣还欲起岂不念懽爱行役曷能已龟勉赴前期云山自兹始

别池上芙蓉

池上芙蓉花似解人将别当我欲去时红英正奇絶临风故婀娜映水转鲜洁我本相思人对之徒怅结酌以一杯酒芳华愿无歇

崧台社中送江眉瞻太守还柳州

人生当仕宦远近皆王程游子复何为而亦万里行相逢各意外宛若水上萍临风道心素慷慨同沾纓欢言未几夕乃忽事迈征聚散亦有期亲爱殊非轻别离在天末讵能如平生送子一杯酒中有今古情此邦虽遐僻子厚昔所营山川或未移黎庶甫离兵相望有景风努力崇令名

咏古分得东坡

东坡本奇才天子曾见知多才亦多忌流窜无余时崎岖岭海间但和渊明诗才奇不得发聊复工文辞文辞多怒骂益为祸所基当其嘻笑中时时亦含悲嗟哉古今才遇知乃见奇零落付春梦徒为妇妪嗤因之念往事慷慨垂涕洟拂衣兮归来归卧南山陲

登衡山

炎德莫能殫神宫位丹鸟高峰七十二翠 在云表我从罗浮来耽幽恣穷讨舍楫陟层峦一径入幽渺上有千尺松下有百灵草芙蓉迴难攀祝融奇未了旷观东南际庐霍一何小宛如大海洋青螺浮浩淼云壑互灵谲气候换昏晓佳晨发奇怀遗世欲忘老徘徊弗能去振衣苦不早乃闻李邕侯半芋不得饱忧生金紫中何如衣白好

集梅旅看庭中秋色各得五言六句五首用秋色无远近为韵

名流多逸致暂住亦成幽即此一亩宫林泉恣远游天风下庭树叶叶生高秋

又

衡门不数武披衣共晨夕酌酒聊为欢论文互相得爱此石上苔青青古人色

又

秋花何烂漫颜色纷且都幽独以自媚一一红珊瑚笑问东篱菊曾逢醉叟无

又

盛夏艰雨泽枯槁惧不免如何此中花红黄入秋眼夕阳娱酒人会心不在远

又

置酒临前除鲜华自相竞况值白露滋玩目不能定迟暮岂所伤获与君子近

送程山尊还里

程子我好友卓犖负奇气赋诗务高言饮酒得真意今秋来广陵我亦从吴至望衡在同巷披衣辄相诣醉醒既不殊歌呼各有致胡为似黄鹄青云忽高逝执手向旗亭踟躇揽征骑人生怀远情动静必有寄挈艷岂耽娱乘时贵行志愿言崇景光春风或无异

送汪扶晨归黄山

广陵一片月凄其泫秋露赖此今古人言情托词赋汪子云霞姿文采宿所具今年过竹西披襟日相遇慷慨向江海纏绵在朝暮饮酒岂不乐赴义鲜欢绪忽归莲花峰复以故人故旧好尚不忘而况在心素以此感同人惜别重相聚置酒曲江滨揽袂隋堤路送子以远心斜阳独延伫

乔东湖来自新安以黄山诗见示有作

我本黄山人不向黄山住终日念黄山云泉结心素子从何时行担簦最幽处匝月烟霞栖愴然得真趣示我一编诗灵奇莽回互万壑与千峰尽入行间贮问君何能尔不复知其故相持辄大叫羨极还成妬

林蕙堂全集卷十三

卷十四

钦定四库全书

林蕙堂全集卷十四

湖州府知府吴绮撰

亭皋诗集

七言古

青山下望黄将军墓道

霜花入江江树红半江落日摇悲风此时客向青山路遥见松楸窜狐兔推篷指问黄头郎云
是将军神道处将军束髮事边疆浴血榆关四十霜射鵰并挽双飞鞚回马常持半段枪曾经
转战乌桓贼手戮长鲸襄水赤上相频分卧内符诸侯竞屈辕门膝手缚渠魁未报恩渔阳鼓
入延秋门西京已下仙人泪南国还招帝子魂马渡琅琊从此化将军定策同王谢岂知艷曲
号无愁亚子空呼李天下天下龙髯痛未消临春明月响琼箫中?厮养横宫锦丞相家儿插坐
貂就中更有陈留子宫门夜半传黄纸尽逐元丰旧党人半闲堂里烟尘起传檄言诛刁与刘
武昌杨柳作边愁岩疆已付中行说壮节空思祖豫州将军义愤填怀抱洗日虞渊何足道一
朝失计在移军清风小用临江啸倚劒空持南壁天北来烽火照甘泉横江零落千寻索下殿
仓皇七宝鞭此时将军镇姑熟宫中夜到驱黄犊紫髯怒吼阵云昏虞歌夜泣蛾眉绿平明战
鼓动江鸦裹创犹呼御赐騶鸣弦岂意来鹑尾拔刃空闻叱虎牙可怜魂染胭脂血蒲首归来
事难说几年墓木拱白杨夜夜犹然叫鸚鵡我闻此语心伤悲为指江涘之高垒当年庙算列
四镇此地实为君封陲痴儿不了公家事模糊颠倒山河字骂贼不及雷海青弄兵窃效田承
嗣将军抗表建牙旌讨逆应先李茂贞一喝逆流万人死摧枯拉朽无坚营楼烦出射弓矢堕
锦裘绣帽如雷火紫电横飞灵宝刀红冰臆结连环锁至今白骨满苍山折戟犹存战血斑?子
无成悲广武词人多恨哭江南吁嗟将军复何有从来运数多阳九留守魂游宋氏河监军泪
滴唐家酒吾徒意气岂能灰当时所用违其才夕阳下山黄叶雨江风??魂归来

戴尚书银印歌

尚书戴公渤海英谏书早动承明庭勲业已过杜元凯诗篇不数刘长卿有时点笔画丘壑丹
崖碧水云烟落不将彩绘竞声名但取经纶寓盘礴此时四海渐无故天子神明托豪素上苑
羞图宋帝鹰中林爱写宣皇兔闻公名姓识公才勅使频教供御来百尺鹅溪图海岳千番蜀
纸画楼台画成催进翔鸾殿展看遥闻

至尊美已裁宫锦赐天衣宸章更使朱提链

御制丹书四字篇上言米芾画中禅下言烟峦世所少吁嗟汝说真其传印凡大籀一十六螭
钮龙函裹黄袱天上中涓一骑来人间忽见云霞簇诏曰作画尽教铃赐汝子孙宝无失小臣
此时适在旁亲见君臣契如一我闻蹇夏当年曾有此纠缪绳愆传国史又闻宋室郑介夫流
民作绘讥当途元宗昔日好观画 为进比干图吁嗟大臣爱君固有道笔墨微茫存典奥
公权托讽岂无因公平公平何以报

报国寺双松歌

昔年曾读燕台记闻有慈仁松特异古老宁知种者谁离披转失栽时意于今时世已沧桑双
树犹然拜梵王乍见但教生错愕频来还许立苍茫苍茫意气何奇特耳目之间从未得天矫
不肯上苍天拘怒何时穿白石石裂天荒不可支横拿侧出如相持坤舆震坼盘双蜃海水翻
腾走万螭左者斜窥右者仰上出雕甍下玄壤翠涛横舞觉风来碧藓平铺看月朗月朗风来
年复年霜催雨折见前贤大夫不受秦官辱君子谁从晚岁传我来看松敬松表欲语松奇翻
莫道荒唐如读漆园书纵横似见张颠草吁嗟双松兮双松松兮何始将何终楼桑已斧庙栢
吾欲持此归鸿蒙

送髯孙赴粤幕

铜马门前横晚照年年别泪沾春草丈夫牢落忽从戎送君又出渔阳道忆君年少读奇书楼
畔停车玉不如珠勒游曾同白下持毫诗拟过黄初此时意气凌霄斗醉挽胡姬弄杨柳起舞
时闻越石鸡雄篇不换长卿酒无端憔悴向长安蜀道偏歌行路难势去田文空感慨愁来范
叔只饥寒飘零巷北连茅屋细语空堂夜灯绿幽愤难教鸛鹄知途穷却向铜驼哭一朝杨仆
拥戈船十丈牙旌下九仙揖客将军称大树登台宾客爱红莲美君掷笔心偏壮拂拭吴钩笑
相向飞檄应教百郡传凯歌会令三军唱我泛葡萄持玉钲为君倚筑歌吴声依人漫作思乡
梦失路宁为出塞行君不见陆郎夜策羊城骑橐内黄金鸣得意又不见伏波高柱矗云中椒
殿还论新息功男儿致身会有处安能老向东湖住潮轰战鼓打崖门月照零丁人未渡韩柳
文章儋耳诗送君南去日相思手中但有长纓在莫恋花田饱荔枝

送稼公南归

京雒多秋风行人踏黄叶嗟君磊落不得意告余欲向芦沟别君家代住麻姑山万里楼开碧
玉阑挥金只说论交易拔剑宁歌行路难行路难长安道朝百年暮难保君来独抱书一囊五
侯座上能昂藏秋入寒山寻贾岛晚披荒草哭昭王爱才淝水陈参佐为君特设南州坐梁园
佳句最先成燕市高楼常独卧咄咄长安多是非酒酣拂袖忽思归言寻雪水乌头舫还掩秦
淮白板扉

房砚歌

吾家阿咸能好奇示我古砚光陆离云是贞观房相物孟津宗伯曾临池我视此砚质颇古刻篆回环蝌蚪伍翰墨相传几代人莓苔尚积千年土千年山骨斲秋烟几代词坛喷玉泉试看龙尾无他润把似鸛睛让此坚因思仙李飞龙见房杜乘时逢主眷朝携镂管上瀛洲夜草麻音归制院此砚曾经傍伟人琉璃为匣锦为茵张家赐铁不足数卫国结邻非所珍贵重应言世无有宁知更落尚书手红烛筵前五凤成青藤纸上千蛟走两转风华未易论一朝沦弃委篱根野人已作尘泥贱过客谁知琬琰尊岂期今日遇吾曹拂拭重教染兔毫乃知隐见皆时命人辱人荣固无定昭陵玉匣漳台瓦此日漂零无见者何如此砚点寒星还近扬雄旧草亭乞归为作陶泓传更勒鸾台小字铭

龙槐篇

兴诚寺前双古槐离奇鳞鬣长莓苔黑窰地僻少人识我看飞腾时独来嗟乎托根贵有处此槐若向名园住应知车马客纷纷不数慈仁两松树

羽林将军歌

羽林将军虬髯郎手持白羽挽大黄一朝射虎三十六空山猛兽俱摧藏白首老人前告汝此是羣彪非是虎前头有虎方食人一吼会令落尔弩

捣衣篇

龙城八月霜飞早月射榆关照衰草佳人夜半梦征人惊起月中伤远道殷勤机上拂流黄含怨含娇下北堂双砧不敌离情重双袖频将皓腕扬罗袖低还举砧韵多凄楚万里青天雁语哀一阶黄叶蛩吟苦初徐後疾意难舒乍重还轻力渐无班姬空作闺中赋苏蕙谁传塞外书塞外征人年复年闺中思妇泪潸然五更试聽响犹彻一夜定知愁未眠此时月落满天涯此时离客正思家中亦有鸣机妇为聽寒砧泪似麻

韩绣行

天上云襄隔银渚吴宫丝絕难重数泖水曾传顾氏娥苏台今见韩家女韩家女红称最奇刘郎珍重不轻携官闲画舫陈乌几酒罢巾箱出紫绋鹤纹素绫不盈尺八幅神鍼留异迹设色如开张藻图写生欲夺边鸾笔第一梅枝第二兰幽香拂拂指头看唐英偃雪魂俱淡湘佩临风影不乾三为古石四水草玲珑荡漾皆天巧辟邪僵卧莓苔深沙虹跳掷苹花老五六蛱蝶飞秋华碧畦菰菜茁霜芽次七灵芝光烂漫次八老竹形敲斜内中此君尤叫絕碧干萧疎才几叶潇湘江上一枝风簫笛谷里三更月後题小楷字难扞玉篆铃朱更絕伦都无彩笔临摹迹况复金鍼点缀痕虎头家制多曾见霜禽露卉生宫线一朝斂手作夫余尹邢并坐应低面刘郎刘郎诚快哉此卷从何覓得来请君更展红牕帙烂醉冰堂綠酒杯

忆昔行送友沂居忧还楚

忆昔君来?水侧虎气龙文时莫测船里孝廉书等身车中洗马人如璧此时有客倾佳酿相逢
不觉惊瑜亮得意宁教余子知心期已在诸公上从此城南日相见酒社诗坛携手遍雨夜同
聽越石鸡清秋共炙君苗砚交情冷煖杯中酒尔我相看称耐久阮達嵇狂两性諳指困分金
无不有无端草草入长安路近朱门行更难槐市横经方接席薇垣奏赋又弹冠朝朝点染红
菱纸联骑鸣珂趋建礼玉殿空簪西省毫金门但索东方米似尔羞联虎榜名教予益悔蛾眉
洗屈指行藏十载中两人青鬓看成翁卢骆文章慚四杰刘冯时命慨三同荏苒齐瓜时渐及
蓼莪但尔仍垂泣里人罢社为神伤孝子还乡犹骨立为形为影忽分离况复身当执紼时送
君独上潇湘去此世知心复有谁

送仲潜南还兼讯同社诸子

十年不到康山路梦里江云隔春树忆昔当年庑下栖赁春早得皋君顾此时廷尉绾金章高
名大节凌天阊君家兄弟富文藻马氏白眉称最良伯也论交具鸡黍晨夕追随呼尔汝与君
接袂不多时把酒谭诗独心许待诏无端同曼倩离怀岁岁惊飞电潞河双鲤不传书渔阳匹
马还重见见君不为名利来取卵危巢事可哀万里艰难归赵壁三秋慷慨上燕台燕台芜没
堪长恸昭王死後黄金重紫阁何人解设罇朱门到处长题凤怜君意气转相投匝岁浮踪每
共游寒灯岁卧山中寺短筑狂歌市上楼狂歌醉卧日相看似尔浑忘归计难岂谓秋风生短
褐却教明月照征鞍高粱鞍马纷斜照丈夫小别何堪道心事宁须儿女知图谋肯使英雄笑
为我传言旧酒徒五陵同学漫踟蹰长卿已倦游梁兴欲向康山更结庐

唐先生歌赠惟一赴靖安幕

唐先生唐先生古寺栖迟岁屡更雪中独裹平头幘月下空炊折脚铛一朝慷慨别高秋为言
身欲向南州早岁途穷常哭阮半生计拙只依刘我谓先生且自寬年来世事正多端马空冀
野徒留骨鯖废侯门已罢餐吾徒结客自肝肠意气须教比雪霜请看花发安仁县犹有风清
孺子牀

高士庵次谢在杭韵

去年曾扫莓苔迹今来又着登山屐木叶犹余宿雨斑溪光故绕秋烟白老僧开阁为传茶依
稀记得留题客凭阑遥望郡楼遮落日徒怜飞鸟疾

鸚鵡曲

鸚鵡賦送黃祖邳中才子多辛苦頭風愈檄只偶然黃絹題成終見忤誰言老瞞能愛才橫槊
耽耽氣如虎狂生不容早自知快心且弄漁陽鼓嗚呼王粲淒涼公干囚鼓聲至今疑未休

韓侯釣台

秦鹿夜走咸阳宫卯金亭长称英雄真人云起芒山里大将星分楚水东年少飘零不得意带刀蒲伏淮陰市市儿骄笑如不闻河边自作垂纶计当时终日理钓丝败项平吴世岂知一旦手持刑马券十年身是打鱼师至今高台临大道行人犹羨韩侯钓假令当年功不成荒荆空自横斜照噫嘻丈夫须有才有才不遇徒蒿莱请看云梦藏弓惨犹胜淮阴乞食哀

长歌赠何德峻

朱雀航青溪垞我昔见君髮覆额张南顾北日追随管华笔砚常同席荏苒头颅三十年秋风并作长安客落拓君才过马周嗟余困顿扬云戟犹忆当年共被时荒鷄起舞夜何其长纓欲遂纵横志彩笔同书絶妙辞风流豪气人争羨斯人合上金銮殿岂知今日总无成须眉改尽何郎面酌君酒为君歌人生得意苦无多请君试看几年内朱门华毂生风波劝君酒君莫眠莫愁湖上有吴船不如烂醉鍾陵月笑倚文君綠綺弦

友沂席上迟髯渊不至即送归泖上

堂上深灯悬急雨主人送客清觴举此时京兆有田郎离思遥如隔河渚去年戴笠记相逢驱马长安紫陌中媿我萧疎同庾信爱君才调似张融醉歌燕市情何限倒把吴鉤照人面丈夫意气许千春等闲直觉肝肠贱何为夜半忽思乡梦到机山旧草堂杜羔且问归来路苏武频沾别後裳殷勤赠我一端綺千丝万丝箇篋里感君厚意饮君心愿君明岁重来此

吴伯子歌赠星子

吴伯子吴伯子濯魄冰壶应有此掉头不肯揖王侯论心直欲轻生死忆我儿时岁丁未菰城初忝麇符佩君来不屑润脂膏登台独爱南山翠三年形影未曾分跋烛官斋夜论文看残庾亮楼头月写尽羊欣白练裙宦海颠危似累棋一朝宾客异云泥翟尉庭前空噪雀孟尝门下少鸣鸡广霞先生能急难鵲鵲惟尔同忧患举幡博士拟相明贯械都亭亦何憚往来风雪曹娥渡痛哭狂呼感行路党人无意动星占破涕苕川再相聚嗟乎一贵复一贱须臾改尽知交面几人曾救李陵书几人解射聊城箭多君意气凌嵩华笔墨还能妙天下清吟常和谢元晖逸致每同嵇叔夜萧萧短褐独能留南北东西一蒯緌有时闻钟宿古寺有时策杖升高丘田间推骂寧为辱大小槐安春梦熟吾侪久已浑荣枯诸君枉自劳翻覆吁嗟浮云亦何有花前且共衔杯酒会须携手上青霞却指乔松是吾友

定交篇自锡山至阳羨访陈其年作

凉叶何萧萧秋声不能已我念同心人秉烛夜中起带醉言登阳羨船披衣便访龙丘子蓄意含情二十年荡桨扬舠三百里是时闻君方卧病文园秋雨无人问到巷方教市儉疑扣门并少儿童应空堂尘冷燕泥深满地寒蓬不知径直入狂呼道姓名君惊跃出还相认共道相思历岁时西窗烧烛杳何期忽闻命驾论心素顿使交衿慰别离龐向林间邀德操季从牀下拜袁丝宁须鸡黍方情洽自是文章有故知文章当代谁堪敌淝水姿东常并席一朝零落叹琴

亡此道茫茫谁复识尽读韩欧那辨非争夸迂固终难匹晒腹曾无郝氏书登坛浪拟韩侯帜
如君才华世无对笑视融修尽儿辈读书日破万卷余挥毫坐使千军废骊龙探出衆皆惊鸚
鹉题成人未醉怀藏锦绣亦何多笔架珊瑚独无愧世上公卿岂异人如君偏自叹长贫屋头
天近翻无地门内秋多不见春几年裘敝长安道昨岁衣沾洛下尘原无狗监难逢主不是龙
门肯置身吁嗟君才鬼所妬无我江东应独步从来豪杰不孤行文有渊云诗李杜我遭磨蝎
既投闲君叹穷鱼亦何误同在江湖各有心天生瑜亮宁无故再拜重申縞紵交云门胶漆古
非遥千秋事业惟心许一代风期属久要马卿倦後还能遇方朔饥来转自豪况今

天子重文藻肯令才人老草茅噫嘘兮肯令才人老草茅

弹鱼歌

古人在官如在山鱼鸟自得江湖间偶然一事亦有意所以弋射非等闲南园五月新水平一
时鳞羽俱生成中有巨鱼最贪饵跳掷常使波涛惊上客由来擅神技霹雳何妨一轻试金丸
脱手不闻声朱鬣惊摧杳然逝我闻阳鱗为大族宓子当年曾治国看君此举良亦然却令旁
观叹神速转眼波恬碧草香飞觴烧烛宴东堂五湖烟水緑不尽鱼乎与尔还相忘

画梅歌为金亦陶作

我生适当冰雪中长年傲?轻春风不肯低头学桃李自顾颇与梅相同所以爱花得花性尤爱
寒梅清影映孤山种後岂无人庾岭写成谁折赠耿庵先生冰雪姿一生独与梅相知每闻落
笔高寒处常似暗香浮动时我昔求之不能得梦里月明空有忆似我长怀处士风多君正得
先人笔闭户闲房春草深茗炉书卷坐长吟有时得意不得意挥毫似入罗浮林一枝两枝东
风好千株万株春雪晓珠明粉净四山空月落参横岁华老我闻画竹有成竹渊明爱菊人如
菊君今父子爱梅花应知累世能遗俗我住江南春复春每逢吹笛暗伤神何当乞写含章树
长见林间月下人

闻其年以博学弘词荐为赋短歌

陈郎五年不得意青衫颓落凌云气忽闻

天子下徵书乡里小儿叫奇事兵兴以後文章贱牙郎估客乘高轡尽谓黄金可致身公卿那
用张华研吾侪有字何堪煮贱卖长门人不与妻儿大笑乃公痴何如且学扬州贾陈郎本在
泥涂中一朝走入甘泉宫掀髯脱却犊鼻褌乃知吾道非终穷吁嗟小儿小儿汝莫嗔当今天
子重才人

妾薄命

妾薄命命薄复何言忆昔与君初见日青蛾红粉弹朱弦岂知欢处君心变千端要好翻成怨

说尽相思君不知别从桃李选芳姿芳姿任取金钗列但愿蛾眉都胜妾

研山草堂歌

闾閻城下雨翻盆杨花柳花春色昏客子冲泥自相过研山主人方闭门主人本是长干客乌衣巷口曾相识老大犹牵?上船飘零更泛湖边宅我闻主人年少时胸中万卷蟠龙螭无双风度张思曼第一才名杜牧之初闻陇右黄巾乱江左高谈尚清宴才子新传白紵辞诸公竞爱青?扇共许云霄可致身彩毫题徧曲江春谁言诸葛非名士曾见相如赋大人余子区区何足数桓伊长笛祢衡鼓终生弃繻直寻常乘风万里须臾取那知世事剧堪怜荆棘铜驼起暮烟尘生东海悲辽鹤日落西川哭杜鹃撇却罗衫岂无意东篱早办黄花计慷慨长怀吊古心颠狂不改凌云气忆我相逢白下秋庐江宾客盛南州何人最倒中郎屐独尔同登庾亮楼更值长沙贵公子二十四楼明月里仰天大笑烛花红斫地哀歌剑光紫几年梁苑兔园开四海羣推授简才不信飞鸿残雪散空教归燕夕阳来黄土可怜埋玉树晨星落落知何处谢公棋罢北邙田羊生箠折西州路江头岁岁哭西风手把奇书叹转蓬酒人对影黄垆在词客伤心白发同苕霅扁舟须我友水嬉共折南湖柳爱山台上夜烧灯韵海楼中春对酒行路俄惊蜀道歌人间怪事逐年多刘郎不作秋风客内翰还逢春梦婆短梦乱山堪一笑貂蝉撇向邯鄲道廷尉张罗有雀飞魏其解印无人到多君相对眼还青醉中痛读离骚经君既移家石湖墅我亦寄迹沧浪亭两人意气长相得更向柴桑数晨夕将儿同上朗陵筵呼妻直入龐公室墙头过酒日相娱奇字传看世所无积有篇章招漫叟浑忘岁月老潜夫潜夫漫叟时相见閱尽从前古今变冷暖交情尚莫论轻肥世态宁堪羨况今之世乏张华鹤书何事来山家岂无马骨金须惜纵有龙泉眼似遮海内茫茫知己尽空山种菜安吾分素軫犹知处士情青樽且拨先生闷君不见阮籍尝登广武城城边曾见古人行事去英雄徒感慨时来竖子忽成名又不见处仲衔悲唾壶缺夜半长歌眦欲裂老骥长途力未衰壮士暮年心转热吾侪学道日徜徉肯似前人动激昂元卿竹径新抽笋且卧花间一草堂

过南康值陰晦风驶不得登庐山舟中遥望有作

湖雨湖烟失昏晓片帆去疾如飞鸟半日过尽彭蠡湖一生漫说匡庐好匡庐别我岂忘情我忆匡庐殊未了待得看足罗浮花归来与汝五老为六老

章江歌赠别丁鴈水观察

章江江水连扬子雪浪奔涛四千里方伯连州半是谁才子逢时今有几田郎当日说丁郎画省曾含鸡舌香誉望独高孔北海文章不让沈东阳几年从此存怀抱遥睇郁孤春缥缈何期此日得相逢云气如来瞻紫帽知余山水旧情深秋到常同着屐寻有时并坐竹中榻有时共鼓花间琴示我新诗竟盈尺展看霞光纸中出英雄坐屈千人军奇杰横排五丁力朝华夕秀不足言玉声金色定谁先长松独耸破海雾江花一笑含春烟吁嗟此道真樵久文士相倾靡不有虞山景陵低复昂信阳历下君知否多君大雅轮独扶一代荆榛手剪除衆步不趋趋独步人无弗有有所无棣华有客能相和挥毫竞落真珠颗轼辙连镳出锦江机云对屋俱参佐

今年双桨过炎州江边相爱即相留赠余白叠裁凉袷饮我清瑶破乱愁因君留止白鹤观尽日追随了无倦奇文欣赏耻雷同新声共倚同称善旗亭列拜有双鬟兄弟能如晏小山淮海屯田送讴唱南唐比宋如等闲共言此道亦茁轧蛮语参军殊刺刺吾侪须作凤皇鸣何事巧偷鹦鹉舌言已大笑还相持尽倾三百金屈卮人生意气苟相合生死贵贱同肝脾况今

天子崇风雅侍从长杨并班马急须持此悬国门莫使文澜任狂泻如君此日多盛名时人共说春陵行相辉花萼并壮盛竚看珥笔登蓬瀛笑我崎岖过岭海姜桂平生犹不改未能弹铗动诸侯只恐梅花久相待饮君酒为君歌壮心一往无风波人生聚散亦有数会当离别将奈何将奈何与君别腊尽南荒无雨雪信旗风里寄诗来如君共看罗浮月

端州访砚歌

俊人安能如德人端州之砚精绝伦我来访砚如访友蕉白花青期不苟至宝谁知果难得山骨云根人不识市中顽质钝且坚高价无端滥取钱鸬鹚有眼知何在蛮笺象管无光彩吁嗟良才不可遇人生荣辱宁非数砚兮砚兮来与俱相携且着空山书

七星岩题名歌

山水无日无人游游人去尽山水留今人古人春复秋青山日笑人白头我今放浪来端州七星岩正在东南陬势如北斗星光侔峰峦绵邈奇且幽神剽鬼削非人谋我得此山如朋俦朋俦到此还绸缪徘徊日夕恣穷搜愿得名姓同山丘磨砢苔藓相雕镂记人记事详复周手书大字如龙虬吁嗟人来人往水中鸥当时岂无公与侯只今磨灭如蜉蝣谁其知者空悠悠吾侪但得忘百忧新诗美酒同唱酬传与不传非所求何必千载垂无休天风谡谡吹破裘相与大笑凌沧州

江南曲

江南三月杂花生江上游人春眼明琪树家家栖海鹤垂杨处处带啼莺就中最爱长洲苑江草江花照人面红粉偏多时世粧青楼晓雾杂衣香吴姬家在横塘住卷帘正向花深处十五弹箏不解羞玉钗罗袂映春流少年宝络桃花马见此徘徊肠断者醉倚黄垆看数钱琵琶一曲心相怜

读秋笳集有感呈徐健庵同年

檐园主人爱才客画舫楔饮虞山侧两行菡萏烛笼明十斛葡萄瓮花碧持觞中坐忽无欢座客同歌行路难似闻猛雨穿窗入觉有西风拂面寒手把一编双陨涕为言此向迢递寄冰天万里雁头书雪海三年鱼腹字我时闻语益凄其传看知为季子诗长笛吟成关塞怨悲笳吹动故乡思关塞故乡轻一别父子弟兄长决绝处处都非梁苑云年年空望吴江月吴江旧事早伤心年少才堪赋上林酒畔篇章鹦鹉笔花前词曲凤皇琴自言扬马宁容让乘风好破宗

生浪射策何堪余子间成名合在诸公上那知天际有罡风未到蓬山路已穷命薄早怜逢市虎才高翻悔学雕龙咄嗟彼妇谁为此痛哭无由诉

天子狱吏三章屈未伸流人一去生如死凄惶岭外草萧萧回首黄沙望度辽子卿岁月非为久定远关山未是遥二十余年沉黑海身居禹载尧封外山川总异梦难寻面目都非魂枉在乐非其乐悲非悲忧从中来复何为哀歌泪下三生误长叹声中万事非似此犹然盛文藻鸳鸯翡翠行间巧公主坟前怨落花都尉台边惜春草不为流离减异才应知天意本昭回屈平远放骚经作李白长流好句裁今古才人同一局当时那解怜珠玉姓字唯须後世知文章莫向秋风哭读罢主人为我言索来此册非徒然人才可许风尘妬书卷须为天地传我闻此语咨嗟久从来此道需朋友词工海日岂虚称人有云龙方不朽可怜交谊近来轻车笠凭谁念友生荣枯久已难同类患难何缘更借名多君厚意谁为报坐客传闻共相告人间若此重绣囊塞外肯容长皂帽况今

天子选英流衮衮诸公在上头如何闲掷双雕箭不自添修五凤楼嘻嘻世事真难问铅刀尽鼓龙泉钝富贵多缘夙世因飘零自合吾侪分酌君酒为君歌劝君且尽金叵罗桃花不得东风力落尽春红可奈何

寓楼聽雨

天意欲无晴楼高多雨声雨声多在梧桐里声声送入愁人耳愁人竟夜欲无眠雨止还闻啼杜鹃极目烽烟方满路男儿落托无归处烧却兵书掷蒯緌猿臂少年今白头

檐蛛叹

蜘蛛张网大于毂日傍雕檐求果腹有爪有翼不敢罗但取微虫遂其欲翩翩蝴蝶从东来偶因花发暂徘徊无端忽被风吹上悞触罗网何其哀吁嗟蝴蝶兮蝴蝶文采轻翩诚可悦一身已自饱贪饕金粉尘紫同败叶蜘蛛之腹方皤皤持竿小儿三两过竿碎汝网砖汝腹蜘蛛蜘蛛尔奈何

赵双白招饮蕲屋歌

五月梅黄清暑天我时来放泖湖船天水才人赵二火为予设食开华筵赵君本是漳南客采蓴却泛吴淞宅结友偏能爱冷人作诗不肯从时格长卿四壁都无有脱衣换得临邛酒伯通庀下日高吟新词婉丽如秦柳忆昔相国江夏公歌?正气骑飞龙西台恸哭走万里独收碧血归茆弘君是奇人好奇句十载幽栖长闭户不知谁肯荐凌云我又摇摇载秋去

秦松歌为黄仙裳赋

黄郎着书经岁月平生磊砢多奇节谡谡长存傲雪心岩岩独具干霄骨终年聽松不得志虬

干龙鳞得松意却从泰岱忆秦封与松相望未相逢吁嗟秦松空自好黛色苍髯长夭矫一自当年号大夫至今草木嗟虚拘何如空山得自在千年以後为仙腴松乎松乎谁知已顔生画向澄心纸黄郎展图日相对一片苍烟白云里

送曾青藜归光福山

南丰曾子人中豪机云与吾皆久要十年以来各奔走人琴泪落新亭酒今年与仲为客同握手扬州夕照中扬州旧是莺花地四海宾朋多意气酒国词场有战争袒臂轩眉无次第多君壮志时激昂龙章凤质如嵇康玉山不改澄波度彩笔长分皎月光予独沉吟甘寂寂爱君顾我同晨夕不待云门奏曲终此心自许胶和漆吁嗟友朋离合皆有数当时岂少相逢处肝胆须从末路知论交却悔平生误明年邓尉梅花开我欲浮家更一来愿君汲取三万六千顷为我酿作葡萄醅

题顔修来吏部从

驾

十月长杨肃气增上林狐兔避霜鹰汉家羽猎谁陪从共说相如在後乘相如今非临邛客星宿源流传究国论诗不让杜陵人献赋直登扬子室遭逢

圣代有辉光珥笔薇天第一行扈輦独围红鞵带承恩常佩紫荷囊休源独诵金华殿叔则清通谁不美一朝传写向人间虎头彩笔何郎面依然意气欲超羣文采风流冠六军岂有棘门还按轡须知司马自凌云嗟予在昔依香案紫禁黄扉曾染翰草制频教女侍传填词数被君王叹一下蓬山二十年梦中无复聽钧天赤龙已去冯唐老空羡延之白马篇

诗永鏤板向为巨贾攘取崔莲生转运命使送还赋长歌以谢

风诗久陵替大雅其何如一时攘窃此实多谁其蠹者非白鱼嗟余沦落无善状十载着书多激忼窃谓三唐已後无诗人拘儒此语诚谬妄李唐以来朝数更各有风气各性情蛩鸣蝉嘯厥有候凤凰岂为鸚鵡声是以编摩时最久删诗断自三唐後非唐实欲以存唐黄钟瓦缶原何有一时传写徧西东梨枣资成赖钜公谁识漫藏当丧马翻从寄贮失雕龙江淮鹺贾胷无字蜨丸鼠璞空多事只疑万卷贮曹仓犹似千金在秦市幸逢宪节驻?州夏泽春膏徧地流心清但饮广川井公暇还登文选楼忽闻此事即大笑汝曹那识陰何妙葱肆宁须插架籤泥涂不是谩觴道遂教秦璧返邯鄲合浦明珠去复还既如良友能重遇又似名山得再观海内同声争叹羨护持风雅真稀见况复仍镌彤管编闺房今古开生面吁嗟平山之堂高百尺江上羣峰环黛色堂前杨柳比甘棠犹是庐陵亲手植醉翁去後千余年清河三戟生大贤平山所产复来此平山平山非偶然

庭桂

扬州七月桂花发填街溢卷闻芬芳儿童采折竞入市百钱乃得枝头黄我家庭桂开独晚八月已半才吐将夜闻猛雨恐零落呼童张幙为遮藏也知得酒须得月更言惜花当惜香笑为山妻留一朵与尔痛饮需秋光薰染襟袖尽奇馥何必迟早争低昂

惊蛰日置酒于守中堂梅花下为短歌以纪其事邀长白同作

人间已负看花约来与山梅同寂寞此花昨夜忽全开雪影离离生绿萼相携绿酒向花前共道此花胜去年五木呼卢挥大斗绕屋寒花如映手花兮花兮甚有灵将开未开吾眼明肯为酸风还闭目独爱此花看不足想见山空月上时江南江北寄相思

将进酒

将进酒酒满金屈卮劝君且饮莫须辞人生忧与身相随堕地一声先是啼鼎鼎百年惟恐迟功名富贵须臾时何以解之惟醇醪古人今人不相知伊周贾董皆尘泥渊明太白真龙麝君今不醉将焉为君今不醉将焉为

林蕙堂全集卷十四

卷十五

<集部,别集类,清代,林蕙堂全集

钦定四库全书

林蕙堂全集卷十五

湖州府知府吴绮撰

亭皋诗集

五言律

集芝麓先生寓园

雨过双扉阖花残景乍清心怜三月树气尽六朝莺吟缙迟分笋谭深费煮羹前期还共惜濠
濮少人行

又

携手同心素春庭向晚开小风翻砌药初月上宫梅醉好从人习情多耐客来翻愁离别处憔
悴是青苔

又

藤萝看石上今夕又焚香木榻经年改罗衣半夜凉寸心同寂寞一醉小行藏?愤情何极萧萧
鬓已苍

种菊诗为坦夫赋

篱槿悲摇落凉从此地新浅深皆作致次第似含颦露下庚申节天高甲子人相看同脉脉烂
漫属天真

又

幽花无俗性寒至转便娟身世黄农後平生青女前岂悲时已暮所得地犹偏萧瑟陶公意孤
吟费酒钱

次韵赠伯紫

之子非今士萧然一褐宽空山吟欲响古道哭无端石瘦池痕浅霜高水影乾远游诚不偶相语爱新寒

雪後送芝麓先生游淮上

拥褐方怜我并州又送君江干多断草雪後见斜曛帆影藏书卷衣香乱水云逢迎天下惯严武况斯文

又

淮水从来胜龙门此暂延绣丝新漂母青桂老游仙吊古千秋泪相思五噫篇河梁差足慰联句有金钿

次韵寄力臣

客心愁不极日夜大江横芳草人何处梅花云又生忧危观意气聚散出才名潦倒杨亭酒登楼念子荆

赋得送秋兼送客送友沂还广陵

一夜悲风起江山又送秋白杨摇短策黄叶打轻裘律向何时暖人添此夜愁萧条望天地江海正同流

又

我已悲秋矣秋归更若何寒云生涧壑斜日老藤萝吾道非耽酒人生正荷戈好将风雪意料理到渔蓑

又

日月成何事元冥改素商园林添冷落道路一苍茫雁失吴天信蝉轻楚客裳殷勤两携手惜别在他乡

又

柳渐无堪折新寒况古城衣宽?日路酒急大江声天远何堪问云多不肯晴河梁闻晚吹相送重行行

题姑山草堂赠稼公

斯人乃抱?抱?竟何之用癖聊存志全生或在痴天高晋井字云老石门诗相见长松下孤怀不自持

秋霜

青女司时令严威渐次侵雁寒归国信虫急到牀音薄曙愁相见微阴悞至今布衾眠不稳惨惨向晨心

秋江

凉风千古恨江水日悠悠枫叶吹何急苹花冷自由天容吴地濶山入楚云浮击节谁堪想中流有豫州

秋村

秋光随野濶霭霭见孤村新秫齐登垄晴溪各到门青天高雁隼黄叶散鸡豚荷蓀逢邻叟相携老瓦盆

秋圃

凄凄时已及除架爱晨兴天老匏瓜种霜轻扁豆藤土风宜九月吾道在东陵抱瓮诚闲事劳生媿未能

秋牕

三径乾坤在萧萧此闭门摊书横菊影洗砚入蕉痕白衿吟方健青山梦自温疎棂曾不掩一半夕阳昏

秋灯

灯穗摇深碧荧荧向晚阴似将孤客影照入壮夫心吐焰回金盃低光动玉琴草堂犹不寐留得伴闲吟

秋扇

怀袖凉风起君王重岁时尘埃自不惜篋笥尔何辞色冷秦宫画心伤汉殿诗明年有炎暑翻恐费相思

秋柳

杨柳如名士逢秋早自伤初霜情袅娜斜日影郎当眉眼分明甚心丝断续长谁能怜岁暮翻似早春黄

秋棠

秋卉如春卉秋将半已开小香笼蟋蟀疎影立莓苔泪似相思种看因欲睡来凭阑怜少妇芳砌几徘徊

秋蛩

秋到易为响此虫非自鸣常因孤馆夜故作战场声百草霜何苦三更酒不平谁家机杼畔悄觉晚寒生

秋燕

且住无多日翩翩舞素晖祇缘时序改宁是羽毛稀杏垒成功退梅梁隔岁归乌衣犹自健云路敢终违

同鹤问玉少小饮望江干夕照

万里清秋色临江晚眺开天风吹放眼云影下空盃鹭傍鱼?宿鸦随客棹来萧条事行役落日一登台

真江晓发

远岸闻人语鸣榔复戒行帆开栖雁路船出打钟声白月前林小青山昨夜晴沉沙何处问空见早潮生

泊燕子矶

归棹临江渚维舟就古矶沙痕环白舫山势学乌衣市小争沽酒村寒早闭扉登高愁极目烽火认斜晖

漂母祠

兴废经千古荒祠此复存可知逢世事难得受人恩屠钓通侯贱壶飧老妇尊偶来凭吊久不独为王孙

甘罗城

千秋称利達早贵说甘罗即此留?堞犹然枕大河古钱春雨出贾棹夕阳过广武悲何极苍茫一浩歌

咏萤限韵

物化关天运宵行点夕扉自从芳甸出长向玉阶飞照久如生彩明多或用微兰膏有时歇愿取续灵晖

又

傍础荧荧出中庭炯自看何曾窥桦烛竟自惹罗纨入暑心宁热经秋色不寒隋宫徒好事芳谷影弥漫

郊园小集聽曲

紫陌纷车马芳园竟少隣诸贤同胜赏二月正良辰影静花如霰丝寒柳作人况闻清吹发檀板度阳春

又

云净飞鸿路天涯蒋径开竹深看骑入花动识莺来风细横瑶笛泉香接羽盃不知京雒客何处更登台

立春後二日偕友沂入南苑

芳春趋府事仙苑得同行御马鸣残雪山莺睍早晴地遥知路密天近觉云生羽猎何年赋相如自有名

又

上兰多胜赏出郭见韶光紫幃宫车小青旗店酒香乾坤销战鼓岁月老书囊莫讶归驄缓敲诗过野塘偕芝麓先生友沂髯孙饮祖将军园亭

挈榼寻芳墅争嘶白鼻騮古藤溪畔叶晴絮酒边花午衿临风爽春旗过树斜醉中逢野叟犹说旧侯家

裕斋对月共用余字时先一夕月蚀

三径芳樽合晴晖映绮疏今宵怜顾兔昨夜失鲸鱼天道微茫内人情患难余一觴聊共饮吾已辨盈虚

读书道院山杏盛开

避迹辞车马藜牀道士家门开因放鹤客到却寻花久坐谭逾爽官贫酒莫赊篮輿归不远村树隔残霞

偕胡伊人小饮步月至水次得安字

月色经今古清宵共尔看纸牕中夜晓玉笛一秋寒醉许深杯共情因小步寛溪乌方绕树三匝未能安

饮汉石寓斋得孙字

纳纳乾坤内文章我辈存弹棋消胜负命酒得寒温雨细桐无响霜高菊有痕不知秋草色何处送王孙

入直

紫极当天纬黄扉近外朝两窻分日月三殿共云霄柳密金铺暗花深玉漏遥鸡栖逢丙夜展转更无聊

过御河见冰泮有感

几日条风至皇州景渐融河水消独鹿春色到卢龙竹箭非难渡兰舟未易从乡愁不可极采采梦芙蓉

喜晤存永

忆昔扬州陌论交遂盍簪十年稀见面万里独关心月冷悲弹筑天高哭断琴平生风义在老泪湿衣襟

闻开仲歿于湖上

二仲当时径今唯孺子来几回看旧咏一哭尽多才猛虎行谁咏苍蝇吊可哀幸闻收傲骨有客在湖隈

送人归里

关塞雪初尽大河春水生送君归薛荔值我忆柴荆浪稳怡鳬性云高出雁声故乡烟树外立马一含情

七夕

天地方如此江山又早秋玉绳低宿燕银汉指牵牛去住凭槎梗行藏笑柳州余心甘用拙瓜果复何求

又

儿女平生意兹宵信奈何仙人施锦幄小妇赌金梭邻杵星前急乡书梦里多更愁河渚下罗袜易成波

又

不知霄汉上果否鹊桥横今古秋多怨人天夜有情风飘珠露下月傍彩云生独笑羈游客流年暗自惊九日芝麓先生偕友沂招同绮季胤倩集龙槐精舍用重阳登高四字为韵

秋色登临见良辰步履从轻阴来急雨远黛出羣峰寺古庭槐秃城斜御柳重他乡萸菊会三岁此相逢

又

节物方萧瑟诸君兴倍狂笛声摇暮靄杯影送残阳落雁风无次寒蟾晚更苍旷怀难自极不为学长房

又

寂寞东篱後篮輿此一登尘闲知地迴木落见山层促席催歌板成诗借佛灯从来矜眺覧卜夜许谁能

又

岁序移今古江山复我曹树从前代老月为酒人高戏马知谁是归鸿望转劳黄花消息在余兴托霜螯

长安月

明月东南出光先及凤楼千门方送晚一笛早吟秋露叶鸣宫瓦霜花点御沟九衢车马迹凉

影共悠悠

忽忽

忽忽常无思秋来自鲜欢祇缘安薄命不敢贱微官夜永清觞浅天寒紫褐宽子云方执戟奇字与谁看

初冬

秋色既云暮客心殊自遐晚云低一雁早雪喜羣鸦砌拥敲窗叶篱荒对酒花故园书不至憔悴向京华

美人晓起次紫来

日映鸾纱薄美人春态生鬟偏钗影重脸印枕痕明索镜看残靨焚香解宿醒无端思昨梦悄觉两眉横

美人照镜又次紫来

晓起忻慵半盈盈鹄镜前黄因一夜淡红向两边妍量髻安珠纈留花衬宝钿粧前看同伴时世许谁怜

傀儡

傀儡缘谁起居然号郭公衣冠原自偶嚬笑一何工技尽灯光里身忙舞袖中漫嗟生气少土木是微躬

扑满

自入邹生札型模实未殊空虚宁有待盛满不堪虞腹胀彭亨豕胸藏朽烂蛭可怜蹉跌後中抱亦区区

风鸢

一綫儿童力凌风托野飈竟忘非羽翼顿敢恃云霄侧目疑文燕昂身趣早鵬只忧风势猛高处转飘飏

假面

髥饰何堪尔人形亦偶然无端增点染转拟混螭妍狞许村駮畏娇容妇媪怜谁知真面目遮却在君前

文官果

佳名因供御此种自齐州脂绿蟠蜗尾房青剖雁头脆分山栗早嫩占楚莲秋草木诚何事居然第一流

银桃

不意绥山实于今改素姿洗曾经玉井尝合在瑶池巨核珍鳧卵寒浆沁蜜脾西京徒有托霜後渐离离

频婆

梵域传佳种初秋实转新平坡原不误上苑自堪珍甜益清霜味香生小月轮何劳汉川使还与问江滨

葡萄

乱藤宜插架绿?避炎蒸珠帐深留雨晶丸冷泻水露枝乘晓摘霜蒂傍秋凝谁愈文园疾凉州釀一升

壽叔携具偕仲潜东只饮慈仁松下

寺古多奇树虬龙偃碧苔为看松上雪同覆月中杯坐久春裘薄诗成晚磬来寻芳仍有约风信漫相催

又

我媿狂司马君能杖繫钱银尊闲寄傲玉版小参禅树懒云横地震高月到天晚闻清吹发歌串复珠圆

小集分得斜字

客思临流合频来侧帽纱夕阳楼影动春水縠纹斜汀煖鳧初浴烟轻柳未花陶然今古意濠濮兴非賒

仲潜移寓分鸥阁次东只韵

旅宿谋看月移居就此楼城阴孤岸迴山翠小阑浮浴马春潮急听莺晓树稠故人曾有约分席与沙鸥

长椿寺夜坐对月同仲潜作

爱寂投僧宿君来亦不还残春生静夜明月老空山幽境能相许尘心自不闲淡然同小坐风叶打柴关

长椿夏日次芝麓先生杂咏二十首

金马浮沉日云林托卧游披襟来紺宇开户认丹丘绣佛瞻螺髻沧洲美虎头颇闻匡阜客莲社总清流

又

兰若无今古庄严浩劫前蒲桃归汉日松树过秦年白日生新事青霞续旧缘诗人有姚合来许共秋眠

又

岂敢攒眉去名山夙有期闻钟凉月下移榻小风时草密麋踪少林高鹤梦迟支公心不厌松麈夜同持

又

燕市尘空扰禅扉一径深古碑前代字清磬故人心卷幔悬残日摊书坐晚陰耽幽惟我辈况此愜栖寻

又

日到招提路羊求亦共过屐声惊鸟雀灯影话藤萝醉以安禅减诗因遣兴多终须婚嫁了放眼向山河

又

未易辞车马乘闲得任真坐思千载事长爱百年人白月留僧定青山恕客贫可怜沧海里吾已见扬尘

又

自笑孤云在无端出岫来饥驱方朔米愁损少陵盃香穗三生结霜华两鬓催官梅东阁下慙
负好花开

又

閱世纷多感年来不自安羊肠非诘曲马首尽波澜路失燕台废天高蜀道难五陵逢侠少琴
筑未摧残

又

故里经年别而今梦亦稀江沉浮鲤信春老饭牛衣旧雨空相忆秋风未易归红楼长独倚翹
首看云飞

又

信宿萧斋静遥遥隔禁钟息交过九夏匿影向千峰鰕菜销官兴蘼蔘感病慵金茎谁与赐仙
露不曾浓

又

急雨朝来过晴烟送夕阳疎牕横乱帙高笛倚胡牀庭树摇残滴瓶花落细香所怀曾不见别
思绕鱼梁

又

至亦聊乘兴长为竟日留献花人扫塔鬪茗客登楼伏枕闻朝呷题诗谢贵游西峰何处好一
眺蓊门秋

又

缩地诚无计寰瀛岂有图旧游怜屈宋离恨隔荆吴日暮羣鸦集云凉一雁孤梦中人不见晴
月拥黄芦

又

举世谁相识庐江感最深门生能荷屨夫子爱弹琴櫻笋同春讌茶瓜共晚林追随多胜赏懒
慢自难禁

又

近鼓离鸾操衫痕接泪寒君心潮有信妾意井无澜金钿凭谁访瑶环忍更看赖逢开士说愁绪一为宽【予方丧姬】

又

灯火长安刹提携忆往年授书儿渐长襦被梦长悬映日争红药牵衣礼白莲抚今增百感不必夜闻鹃

又

久闭墙东户傍人谓着书岂知朝事懒实与世情疎步缓云廊寂吟高月牖虚季鹰真作逵先我忆鲈鱼

又

舍宅人何在篮舆我更来夜行龙井过春笑虎溪回薈卜香曾悟蜉蝣语漫哀谁能同逸少结侣上天台

又

世目荣华组余怀幸少营拙宁甘马走贫不媿蝉清西塞曾垂钓南阳久罢耕何时乘薄笨柑酒送鹂声

又

古院浮深绿檐阴午欲齐槐香蚁入梦竹静鸽来栖洗砚晴云湿笼纱醉墨低宁知孟东野冰雪句长携秋夕芝麓先生偕绮季苕文友沂周量贻上紫来诸子集筑影斋得残秋二韵

秋至易为感况兼离别难酒寻燕市饮月共庾楼看坐促兰觞密更深桂蜡残起闻鸦绕树三匝正求安

又

共作京华旅清宵为尔留蒲桃杯借绿老树客同幽落木啼蛩晚凉云拂雁秋相思不可极明月照重裘

闰七夕和家玉驕

良期难再遇匝月此仍过鹄记重来路鸾骖旧渡河寻欢宁厌数得巧不辞多独有伤离客惊

秋奈尔何

闻雁

候馆敲孤枕飞鸿度夜阑
逼天声易响入夜语犹寒
道远求朋侣风高惜羽翰
莫伤归计晚归客计犹难

闻蛩

古甃经行少寒蛩咽露频
何曾催织妇偏是近愁人
苔浅吟难稳莎凉怨或真
离怀原不寐宁用尔如嗔

闻砧

九月严霜急长安未授衣
谁将思妇杵又下窠家机
夜静声相答更残力渐微
独怜寒已甚还寝梦罗帏

闻落叶

落叶浑疑雨萧萧晚吹时
敢辞雕岁月犹暂托阶墀
带露敲虚牖因风想旧枝
飘零复何恨吾亦鬓如丝
石仲生先生邀陪洞门芝麓两先生伯紫友沂同集金鱼池夜看水月

寒益襄阳兴临池夜举觞
冰虚全化月沙濶迥如霜
浮酒银船滑分羹玉筋香接
?真倒着忘却到胡牀偕星
?紫来骏公丰台看芍药归饮祖园

寻芳客思同结伴骋花骢
挈榼穿深翠停鞭见早红
千畦分晓露十里共香风
别路逢溪墅班荆兴未穷

又

驱马过林丘名园绕碧流
人知非晋魏客自得羊求
布席听黄鸟挥觞谢白鸥
醉归花压帽衫领暗香浮

忆竹

记得西园路晴溪长万竿
翠深长似雨碧重欲成寒
蒋诩游常共王猷坐自看
不知京洛客谁与讯平安

忆梅

何逊扬州梦尤怜东阁枝见常当岁晚香独在寒时雪老无蜂觉云闲有鹤知江南词客尽惆
怅是春思

忆兰

崇兰何处密湘澧旧曾游谷远琴音寂江空佩影秋蜂须知种异燕尾识香浮尚忆王摩诘黄
蘂赏独幽

忆桐

旧隐南牕下亭亭有凤条青琅初引露碧玉竞干霄扣石宁无响为琴不待焦鵕雏栖宿在秋
至漫飘摇

忆笋

颇忆簍簾谷胸中饱渭川猫头能竟尺犊角早胜拳鋤欣春泥脆盘烧晓露鲜平生差免俗真
赖此君贤

忆芋

沃野称山郡青乌复几区羹宁称玉糝饭欲比琼酥博士霜盈亩山僧雪拥炉那能啖半颗领
取廿年图

忆菱

本是江南客年年聽采菱白纖咀脆月红嫩剥甜水水叶肥堪咏湖莲冷漫矜谁言鱼刺史作
饭我犹能

忆杨梅

旧有南峰种金婆异衆栽日精鲜满笼火实大于杯冷沁吴儿齿红分越女腮茶花堪并饷消
渴待君来

长安柳用大复韵

垂柳长安陌飞花日暮天弄陰摇晚月疎影挂春烟繫马曾堪忆啼莺剧可怜灵和当日事凄
絕画阑边题春晓亭次芝麓先生韵亭在蕪水绿杨桥为东坡解鞍处杨传人比部所建蕪乃
芝麓先生旧治也

兰溪何处是雁齿占鸥沙尚有苏公路能栽潘令花晓风新杜宇春水旧胡麻为问桥边草青
青几度斜

又

闻说当年事清风一板牀烟霜存感慨诗酒付苍茫百战青山古三春碧涧香漫同宣武叹攀
折恨垂杨

又

赖有扬云在红亭集酒兵解鞍山月小浣笔野溪明乱定生江草官闲梦楚蘅双柑真不易寂
寞为流莺

又

髯公残醉後君更几回眠此地犹前日吾侪动隔年晴烟开宿鹭老木响啼鹃岷首逢邹湛还
知叔子贤

入天宁寺送徐子星给谏不值

招提穿宿莽侵晓露初曦古塔倚残雾轻旛吹早晖尘劳怜地僻客久爱人归已复闻樵唱萧
萧入翠微

送雁市还湖上

京雒不得意言归寻旧湖一身随敝马六月尽长途倚????投诗卷留琴别酒徒将予江上梦送
子过东吴

又

每别常多惜兹行宁用嗟时危难结客身贱重离家夜雨生芦草秋风足藕花湖头好诗句一
为寄京华

醉後宿采友堂纪事

一醉迷归骑言留高士家夜寒知卧月梦醒独闻花残墨朱丝暖余香锦带斜支机谁可问空
拟泛秋槎

慈仁寺访鹤问玉少不遇

有约扣禅关良朋杳霭间偶来斜日晚独对古松还残磬归僧定高云让客闲留题在蕉叶空剩墨痕斑

重阳後三日再集采友堂叠前韵

元卿夜启关蜡屐集花间月静羣鸦息天高一雁还世情逢酒淡客计向秋闲更有西山约枫林叶正斑

庚子九日偶醉采友堂漫题

偶然乘兴至倒帙醉花前不问王猷竹如登安道船繁筹倾緑酒细雨密红弦不觉闻三鼓归途覓玉鞭

采友堂又叠前韵

惭愧渊明菊还来秋蕊前有人横玉轸召客泛银船酒梦三千笋春愁廿五弦金吾方禁夜未敢辄遗鞭

紫来过斋头共看次岳作画

谢客柴荆掩孤心耐岁阑径怜羊仲到画共虎头看素几寛晴日疎花媚晚寒门前九逵路车马自无端

送程石门

似尔犹卑伏天涯更此行云连关索岭月照武侯城捧檄安时誉题诗寄远情莫嗟为宦薄吾道有长纓

又

滇海烽初息君游慷慨存过家夸彩綬仗节到辕门远徼功名壮他乡姓字尊故人相见後频与问饔飧

邸後初成小斋寄何德峻

纪闰当中夏槐天暑未侵小园初卷幔上客正弹琴砌药余红浅檐藤接翠深坐来多逸事相望在披襟

又

避人通後圃疎懶度年华适意随红粉摊书就碧纱吟风听檻竹待雨种亭花独有离羣思萧然日又斜

病目

盛暑难为病萧疎只倚牀无聊思旧雨不住问残阳药裹从妻惯谈谐喜客长谁能复多事青白效嵇康

西园避暑

炎日永如年追凉就輞川树深东阁坐花照北窗眠卷幔通新燕摊书听暮蝉远山能不厌飞翠落尊前

又

避迹西园去幽深客少逢移牀当片月拄笏向千峰风动池边芰云阴田畔松披襟同一眺长啸转从容

又

别墅无烦暑萧疎对夕阳莺啼春後急鹤梦夜来凉酒绿高梧密冰红细李香不知陶靖节何事慕羲皇

又

岂是襄阳路真同习氏池垂杨横晚笛深竹响残棋湖海容支枕河山老赋诗莞然成独笑闲步小风时

七夕偕敬微集西园期雨微不至

西园曾有约莫负一年秋遂载花前酒同登月下楼星辰儿女事河汉古今愁不信张公子真为翠黛留花朝前六日吴船小集兼送善伯南归得迷芳二字

偶有元卿径来闻二仲随离人将折柳稚子为烹葵酒煖幽怀密花疎望眼迷此行能且住相约聽黄鹂

又

空阶犹积雪客到欲寻芳兴剧同挥麈谈深屡易觞都忘牀上下略似水中央拟赋文通别愁

心益渺茫

燕郊清明

韶华春已半景物自幽燕结束驰金勒妖烧哭?钱柳沿沙磧短花照墓碑妍行乐吾生事宁为旅思牵

又

帝里多春色风光徧四郊碧回芳草路红拆小桃苞火向官厨乞球看骑士抛盈盈何处女陌上自相嘲

又

久厌尘中骛春从郭外行寻花荒圃远煮茗石泉清塞北犹披褐江南早卖饧最怜当令节遇物动乡情

送硕林归徐州

徐卿怀旧里驱马去彭城楚汉千山路江淮六月程伤离杨柳尽招隐桂丛生为念蛾眉好高楼月又明

又

几载乡关梦持觞此送君归装沾塞雪游棹入江云辞赋存孤赏图书许共分隰西谁复在凄絕是离羣

许原文大令以酒炭见饷

官冷烦朋好书来动草亭乌薪分石鼎綠酒泻银餅未必因人热聊堪免独醒岁寒诸计拙醉眼向谁青

题古石

雅士无凡赏高斋我所闻独怜燕市月犹贮浙山云幽许梁园赌奇从米袖分遥知长啸处终夕伴香芸

又

老石何年物頹然倚砌梅自生濠濮想曾见汉唐来古雪眠枯树凉云渍瘦苔凭谁能一拜醉醒共裴

送箕山

李子真奇士论交历岁时别离燕市酒歌咏华山诗问字人多有挥毫我独知送君江上去明月寄相思

除夕

今夕仍除夕长安已四年试衣儿渐长剪彩妇无眠夜尽椒觞畔春生桦烛前坐闻钟鼓动佩马欲朝天

墨妙亭和辰六

墨妙传遗好亭空不可寻寒梅前代树老石古人心过眼云烟冷伤怀岁月深披榛无断碣惆悵付闲吟

韵海楼同弘载子壽作

危楼临废圃犹是昔年余官舍俱为客前人独着书窗分山翠入幔卷晚云舒鲁国英灵在凭栏或启予

圆证寺同长庚诸君小泛

幽境应难到乘闲偶共来乱香迷竹树深翠出楼台苔色疑留屐泉声欲泛盃白云如有约日暮重徘徊

洼尊亭同楚畹作

曾闻唐左相此地往来频今古留残石湖山为酒人竹开孤径晚花发五亭春我不来同醉应慚头上巾

道場山次燕孙

苏公池上过伏虎旧名存吴越双峰出湖山一塔尊乱云横石磴夕照满渔村郡阁长相对应怜月一痕

法华寺画壁

苍松一径远松里化人城古壁多云气沧洲无世情红螺浮水见白雀占枝轻共拂残碑字襄阳亦此行

过鸳鸯湖

二十六年前高楼尚宛然旧游空岁月新事到山川础石埋荒草帘珠坠野田凭栏更无处渔唱起寒烟

憩虎跑寺

一径入深树古藤当道傍寺围山霭翠泉带岳云香花药虚堂静茶瓜午梦凉坡仙有遗句传写入奚囊

鹤洲草堂偕季默坦夫

放棹寻鸳水停桡问鹤洲荷高香入槛竹密翠遮楼有石都能瘦无溪不占幽鸟鱼浑自得尽日为淹留

又

水部诗应好东山许客俱一园开两径孤阁见重湖着处安棋局随行得画图再来知未厌留约与沙鳧

夜宿西湖次子壽

为爱西湖好中宵上画船水云双塔影花气六桥烟酒坐随鸥鹭渔灯趁管弦神清翻不寐晴月共娟娟

法相寺

胜地留遗蜕招提古木横佛容人乞子僧强客题名竹笕飞寒溜松窗坐晚晴沧洲吾不厌卧对约秋清

岳武穆墓

老桧何年尽荒祠此尚存名成三字狱家破两朝恩俎豆秋携奠旌旗夜返魂谁知千古事惆怅不堪论

凤咮泉

絕壁何年凿清泉欲满池客来花外屐僧鬪雨前旗笋熟春斋洁蕉深午梦迟谁能招陆羽清话为传薺

半月泉

清流堪濯俗半窦欲成池信是无穷处常于未足时雪痕翻蠓眼天影泻蛾眉同地看双派形全已致亏【别有米泔泉已竭】

过横山

胜日寻佳地横山路不分竹连高下岭松住往来云木老秋将脱钟寒午一闻清言真未厌倾倒为诸君

归云庵拜孙太初墓同燕孙作

何处覓榛关林中宿草斑残碑生白雪高士有青山春浅花犹梦天空鹤未还托交怜异代惆悵夕阳间

孺山拜徐孺子祠同澹心辰六

孺子何年隐荒祠此地留野人忘姓氏残碣纪春秋天净孤鸿急山深万木稠却怜题榜误无复旧南州【榜书南州高士士误写峙】

五峰万玉庵墙角得古梅树特为出之

吾道宁言命寒花亦有时可怜当殿树犹是隔墙枝岁月空山老冰霜衆岂知护持烦净侣珍重为题诗

赠雨青上人

支公能好鹤闭户托香林庭树一何静湖光相与深帆开知雨霁磬响落檐陰我自劳劳者逢君生远心

瑶席池

为访坡仙迹行来一衲随闲吟能送日深坐独临池水碧花交处霜红木老时归从郡楼望岚影正参差

典裘

出都有三裘至广陵友人复以貂赠燠哉范叔可无寒也丁未秋尽付质库一以毛脱独存湖山风雪披服间尚有鲁灵光也幸矣

贯酒曾为尔官贫近复然贱酬增仆耻勤曝益妻怜深厚聊思貉奇温定属绵如何五湖长不及敝秦年

质珥

予少更多难内子备极流离乙巳夏

覃恩封宜人拮据为具六珈云报也丁未在郡亦付子母家成儿周堂日不能备礼服焉北门之诮赖德耀其庶免乎

象服邀

天宠相酬幸有端

恩荣才五马驱使及双鸾翠减花奁空珠销绿鬓寒琴台同一笑廉妇亦为难

解带

丙午过苕川仪凤桥解金带助舆梁之役旋复置一围腰未燠而以急废之嗟哉万钉九钁亦有神命?

芍药闻前?围金忍见辞非关留镇寺不暇去题诗望失裴还日思添沈瘦时黄银谁更赐空自记犀毘

熔杯

乡俗往来多用卮斝近习务作伪以赤堇胜大抵不及三钁耳然蕉叶匏子急中尽付冶工存篋中者皆不材也何若竹根木瘿称耐久朋矣

乐圣平生志衔觞竞鲜终宁言真羽化只是费炉熔耿雪成何易陶巾漉未慵瓦盆翻自得长占酒泉封

次韵送徐公肃游闽

丘路桃千树春来色自妍那知分手处即是看花船作客添尘袂留诗当别弦十年吾党泪今日共潸然

又

暂游非得已 骊唱况重听 命酒辞铜岬 看山过幔亭 弟兄眉总白 天地眼长青 应有相思梦 随君到紫溟

方庵小憩

触暑湖干路 香林访索居 因开高士篋 多见故人书 花净知秋早 山空得雨余 尚怜吾道在 支许自萧疎

立秋日小饮吴山

道室临平楚 闲来遂远情 城连秋岭绿 江涌夕阳明 羣动浮烟色 孤怀坐磬声 自怜随世役 终日困尘缨

又

万木登高尽 孤台倚曲廊 风传遥浪急 秋报衆山凉 石老峰争瘦 林深叶易苍 开樽同一眺 清兴几能忘

壽谿堂和尚

我爱高僧传 惟君似远公 一筇明月下 半偈藕花中 坐上言谁答 溪边笑每同 偶来参玉版 挥麈对烟丛

归云庵夜泛同愚山阮怀诸子

山晚离城远 寒新怯暮游 乱峰争落日 一径入深秋 清兴因官懒 诗名借客留 何时能解绂 终夕对沧州

游东林山

石磴藤萝上 宁辞着屐劳 砂灵双井冽 天旷一亭高 翠樾迷荒塿 山花引浊醪 清风不可见 孤磬出松涛

寻幽

寻幽无宿约 乘兴过山家 秋色鸥边路 斜阳雁外霞 翠深遮寺竹 香递过船花 近郭鸣笳鼓 红灯点鹭沙

与云止

但有相思在何妨迹暂疎黄藤烟寺酒红叶雨牀书西塞鱼同钓南山豆共锄终焉吾有志归
访卜田居

湖上遇星胎即饮寓楼

不减狂奴态相逢老益亲青樽闲过夜红袖晚留春欲叹翻成笑无才幸有贫两峰霜叶在烂
漫属门人万玉庵古梅诗【康熙丁未行部雉城游万玉庵於墙外粪壤中得古梅一株濯而
培之繚以粉垣使近堂下用赋一诗爰记其事庚戌罢郡 过其地意且复沦丛莽而芳条转
茂则邑侯韩君子久以石栏护之倍加爱焉嗟乎金城之柳宣武见而伤情东阳之槐仲文攀
而陨涕甚矣卉木荣悴之故其感於人心者深矣兹梅亦何幸而复保其岁年也哉复作诗一
章并前制题之於壁庶後之君子有所观感也夫】

得树当年事重来憩鴈堂岁时空冷落草木少炎凉载酒人还到巡檐思转长不须忧剪伐仙
令在河阳

泊八里滩

渐远青塘路篷窗懒更开山烟孤塔迴湖色乱帆来吾道存书卷余生托酒盃寄言鸥鸟伴从
此莫相猜

姜及生水部招饮家园

名园堪日涉清讌此时同云月登台处湖山闭户中帘阴秋树碧弦语夜灯红更有追陪约还
应似谢公

坐来翠阁

小楼秋纵望日日到斜曛自拂乌皮几闲书白练裙见山如得友与客共看云为问南湖水还
容月几分

和寒食即事

独坐摇吟膝空思赋远游载花青雀舫对雪紫髯裘五载依山住全家为酒留终须浮舴艋分
席向沙鸥

再至长兴

乘兴何妨再寻梅入雉山雪如随客到春不让人间送酒思纖手闻歌破老顏乌衣羣从在相得竟忘还

偕张僧持茅天石诸子庚邨看梅

雨後春阴好寻梅到野塘客筇随乱水僧磬出寒香涧石留余雪山烟动夕阳宁言来已晚吾自惜年芳

又

偶然南郭路老眼忽为明惜树成孤赏留花爱小晴此中谁放鹤几日又闻莺欲折无堪寄春风漫不平

鹿柴庵同僧持作时僧持将归白下

将离逢胜地去住惜年华白髮俱无语青山不当家同僧参柏子留客饭桃花且住何辞醉同倾盞内霞

饮丘路桃花下

怜春不惜醉屡憩野人家芳树争初日晴溪隔乱霞到山朝饭笋归阁夜分花胜事心相得宁忧鬓欲华

雨後再过塘栖

程急无容泊怀人梦草堂菰蒲双?濶橘柚一村香客思随云黯渔歌带雨凉平生离别意多在白鸥乡

伯通招讌宁远堂观剧

良夜开佳讌红灯照薜萝湖山词客在烟月酒人多胜事应如此清歌且奈何宁须更投辖山简自婆娑

和人寒夜即事

激楚生豪况寒灯夜独亲冰霜孤剑影山水一琴身懒爱陶元亮狂呼贺季真不知今夕意谁复两闲人

湖上寻无公次韵

别院烟波上幽栖见古风到门双白鸟夹径两青桐夜色闻钟後秋声闭户中支公多逸韵将鹤寄诗筒

送辰六归广陵

作客沧江上含凄并此辰云飞歌舞地花焰乱离春别绪添中岁才名属後人艰难吾道在前路慎知津

秋日集翁苍牙草堂

清秋多远思小艇泛城隅此地犹三径吾侪共五湖晚云归涧树夕照隐江蒲醉听菱歌发还教彩袖扶探梅邓尉山夜入万峯禅院寻瑶如禹存不值过宿听松堂

寻芳宁惮雨静夜陟高峰积雪明樵火乱香摇梵钟隔林灯语细入坐酒声浓借问停桡处烟花已万重初八日由王家庄至董坟马家山看梅

雨止晨烟破看花路不遥鹤随登涧阁蜂引过溪桥湖水照逾淡山香吹不消兹游清兴好归路一诗瓢

水哉轩和尤悔庵韵

出岫原无意日归何不然一家杨柳国六月芰荷天野鹤闻高咏沙鸥看醉眠烟波於此足莫向世人传

同诸子城南小步

小步郭西偏闲情亦偶然柳丝沽酒市兰叶载花船六代青山外三春白鸟边归来仍我辈作计好留连

又

一醉宁容易今朝醉颇宜红桥春水上白袷晚晴时草欲催歌发梅因待酒迟海鸥能对客不必主人知

宗梅岑过访

人忆少文贤离居复几年归来双燕後病起百花前小饮携蛮榼长吟鬪蜀牋不须论往事一醉且陶然

卧疾锦树亭寄怀辰六

离别寻常事与君独不伦半春花过眼深夜月当门老觉亲朋重贫知科第尊上林应有赋传
寄锦沙村

慧泉和立斋学士韵

合在中冷上虚将第二传润沾十万户清彻几千年欲证茶仙佛能分酒圣贤如何争汲罢雪
乳更淳然

咏玉兰

谢氏何年树香从楚畹移照人无月夜对我欲晴时皎洁原难并芬芳复待谁偷看疑是雪蜂
蝶尔何知

晚过赵处士寓楼

初晴宜着屐谁意?烟鬟游子方闻笛幽人正启关斜阳红断雪高月翠空山倚槛舒长啸乾坤
几客闲

集惠山天均堂

梓泽人何在宁知此论文亭流二泉水楼贮九峰云疏凿安春草繁华任夕曛吾家有康乐幽
兴本难羣

陈集生携樽招饮高汝敬山斋

救时无善策行乐任吴天为载听莺酒来寻放鹤船玉钗过碧树金管沸红泉莫便伤春莫西
川拜杜鹃

又

岂谓莺花老偏於鱼鸟亲吟诗消永日贯酒送余春风雨三更梦江山六代人不须同漆室歌
舞向西神

再过赵处士山楼

春晴殊不易小霁遂寻幽野雪才分树山烟忽满楼壶觞临水得步履趁花留归路谁相识新
来拜醉侯寄畅园杂咏卧云堂【至知鱼槛共九首】

路入幽香远斯堂敞翠微花深凉客梦树古绿人衣对月浑忘醉看山不爱归晚来巾带湿岚气未全稀

栖元堂

洛下传名种空亭竟绝尘谁家犹滞酒此地独藏春金粉无寒色楼台有丽人相看知解语酌酒向花神

杜鹃书屋

幽馆堪遥集回廊窈窕通石高偏有势花晚自成丛夜月凭谁听斜阳作意红可堪春渐老惆怅对东风

鹤步滩

才过石梁尽旷然心复开梅花今岁晚一鹤几时来渚净飞黄叶矶空长绿苔高吟人不见清影自徘徊

石径

漓岏不觉远此日我来游屡转路疑尽独行心自幽高林终日雨飞瀑四时秋小坐寻苍壁题名在上头

三叠泉

绝顶名泉注奔流向此间云飞千尺涧雪溅六朝山迅急欲何似琤琮知未闲独来尝倚杖清听不知还

嘉树堂

为堂宜近水似此独悠然万绿午忘日一泓波浸天拥书堪永坐看奕任高眠沧海新词好微云复几篇

宛转桥

一道朱阑影横斜界练塘自然成鴈齿何必似鱼梁红袖连春色乌纱倒夕阳宁知羡鱼者愁绝在中央

知鱼槛

入门无俗境仙客水为家三面清波动千章灌木斜就阴常聚叶争食误吞花谁更知鱼乐蒙庄兴自矜惠山德水亭傍大树为风所撼或请伐之澹心作留树诗因次其韵

陆羽煎茶处江南独此亭有人如水洁得树与山青岁久烟霜古天空草木灵遭逢真羨汝摧折我曾经

又

本是何年植栽培复再新湖山原有主风雨信非人应共花开洛宁忧梓化秦请看多事日此地独阳春

园居

园居宜永昼雨止兴犹清一鹤照新水乱莺啼早晴赌茶书共检看竹坐常横独有耽诗癖年来太瘦生

和留仙韵赠苏崑生

两生今独汝念往倍情亲刘表呼鹰日苏耽化鹤人贫常怀旧感癖不受纤尘花底闻高唱凄凉未老身

喜僧持至夜坐秋水阁

江海方萧瑟逢君得自然论文今日共同学几人传鱼戏水中月鸟冲岩下烟红桥一相送山磬发遥天其年僧持淡心集生过访寄畅园同家枚吉暨潜儿小集涧中分韵

无客意不适客来生远心松阴分小憩涧响入微吟老树闲中古名山醉里深幽情知乐极横簾晚披襟

又

离居因爱静远涉喜过存新竹香三径晴山绿一巾流觞疏水脉脱帻卧云根诗就闻疎雨微凉倒酒尊

同僧持饮高汝敬山斋次香海韵

积雨闭深翠故人同在山泉香家釀美花静客窗闲江海羣居外烽烟一醉间酣来发长啸涧响共幽潺僧持香海汝敬小集嘉树堂分韵得十一尤

南轩宜避暑坐久益成幽溪色忽生树泉声多入楼客期明月共天许夕阳留莫问山亭路烟钟湿未收和淡心访南邨惠麓山房过憩寄畅园韵

不意此相见把衣临水楼地幽偏耐雨人澹竟如秋宿鸟啼烟翠飞花送瀑流碧山烽火外分日思同游

又

嗟尔来何晚翻令缓我归一江春水隔十载暮云稀侵晓常携屐辞春未改衣时艰难寄迹莫便欸人扉

又

莫问英雄事年来但听莺何堪今日耳犹是故园声山水无人境烟花不世情遥持一盃酒相劝隔重城中秋夜偕又?前民山尊湘九集扶晨寓斋分得亭风二字

清宵不易度屐齿破苔青微雨月中夜凉花秋一亭酒贪浮蚁醉歌杂乱蛩听人事方无定灵均漫独醒

又

旅次欢场少高歌且暂同乾坤杯影外晴雨烛花中夜迴孤台月秋清一笛风谁怜远游客明日又江东

焦山

江海争雄处岿然压乱潮世犹知有汉山肯不名焦树色无今古波光变暮朝时闻清吹发磬响落层霄

宿再公房

不复言文字山僧致颇殊辞名因悟得留病与闲俱摘豆朝飡客浇花日课徒有谁来问法秋色满庭铺

松寥阁待月

高阁收羣爽烟波尽此间何人能便去有客愿长闲夜色月终古潮声秋一山乘风思羽翼仙鹤几时还

三诏洞谒焦处士遗像

寻云穿石径峭壁倚苔痕在昔无庐住于今有洞存三徵犹不出一梦复何论欲问幽人事惊涛拍海门

遇吴羽士小憩双峰阁

探幽宁得倦絶顶叩禅房但觉此中旷不知何处香秋多山正紫江冷树先黄赖得逢修静萧疎共夕阳

霏?石访瘞鹤铭

古碑不可读半堕在江滨空有轰雷石谁为问水人龙宁知识字鹤自不谋身搨徧昭陵本兰亭总未真

登甘露寺凌云亭

古寺干戈後登临未尽无寒云千堞绕细雨一亭孤壁影迷黄鹤江声老赤乌天风吹我去惆怅是东吴

雨中登多景楼

多景留题在凭栏忆昔游谁怜千古恨都作乱帆秋山陡云生屐天空雨入楼不须频北望花月自扬州

北固山下寻狠石不得

抵掌传斯地遗踪没乱丛兵戈销铁石山水记英雄垒散荒烟黑旗飘野日红想当埋竈处磨削任儿童

望金山

年年频问渡欲上渺无从不信名山路难留倦客踪帆樯随雁鹜钟鼓骇鱼龙会挟袁綯至狂歌最上峰

九日雨中集心远酒楼分得十一真

密雨艰遐眺寻秋意未伸楼能留剩日酒不负佳辰树老怜人换花闲爱客真只愁骑马滑倒着白纶巾

九日夜集葛川书室得风池二字

登高不可出向晚过墙东节物无人外秋声在此中
艷歌双鬓白浊酒一灯红遥想龙湖畔惟多落帽风

又

重九真难负闭门当此时有杯酬岁月无地不山池
秋许闲人得诗防俗客知谁怜篱外菊开徧战
場枝前民扶晨山尊湘九过集锦树亭分韵

半日不相见叩门呼老龐懒云秋入屋寒雨夜连江
酒国全无事诗城未肯降莫将离别恨容易到西窗

蛟门招同孝威豹人鹤问小集

有客来从远前期向草堂园林新辟迳花竹对衔觞
世事闲中过人情醉後忘也知文字饮絶胜管弦?

又

别离经几岁相见复今年客子头俱白先生意独玄
花香生酒畔鴈语落灯前骑马宁愁滑蟾光正满天

和友人韵

雨为新寒密山斋不肯晴钟摇诸品静纱护一灯明
虚牖怜风度幽溪待雪平赖闻禅客语挥麈说无生

宿卧霞阁寄前民扶晨山尊诸子

避俗爱逢幽凭高忽此楼乍来诸岭霁独立大江秋
远树分晴靄斜阳叠乱流故人俱逸兴惆悵不同游

月夜同念昔及季儿登卧霞阁

画檻凌空出清宵露气冥江流千里碧楼倚四天青
岸水全疑月檣灯远乱星凭栏歌一曲人在梦中听

独树轩为许石园明府作

老树何年得亭亭欲出羣晓光江日上秋色县人分落榼能供酒乘阴好论文我来频徙倚高咏不如君陆冠周寻父丽京先生道过真江以诗见赠依韵奉答

双鲤凭谁至开扉夕向阑展书欣示客得句胜除官遇惜年华晚才增骨相寒怀中字不灭肯借俗眸看

又

宁须如束皙更作补亡诗性至浑忘险情坚转似痴难从豪贵说应得鬼神知好我非无故惟忧爱所私

又

历涉终无恙悬知孝思灵少年头欲白举世眼难青问道过蓬径忘餐坐草亭曲应惭白雪犹得藉君聽

又

弃置烦明主端居笑不才如何万里外偏为一人来山水交情远冰霜旅思哀徒传知己语怀抱暂时开

又

天涯何限路终日但栖栖是处询遗叟频年别故妻无家应自苦有物岂能齐句里殷勤字遥怜带泪题

又

新篇传示後高咏未能休莎草他山上梅花旧陇头父书空忆国客帐枉封侯那得程乡酒为君遣四愁

又

闻向真江去依然叹莫容危途难跨鹤浮世薄雕龙尘灭囊中刺歌残庑下春纷纷鴈门雪欲往更何从

闺中杂咏

作画

绣倦调铅素还疑绣未真谁称李公妹独爱管夫人山水催情晓莺花借手春玉奴赢一笑吮墨梁朱唇

鬬草

三五怜春日盈盈罢浣纱分畦揜腕玉着地展裊花强识无名叶先寻乍吐芽偏夸诸姊妹今日让儿家

窥帘

花下谁相待含娇隔翠筠惊鸿时半面飞燕不全身秦女初乘雾甄妃本隔尘谁言难得见遥见可怜嚬

度曲

小院花陰寂春娇试曼声当风吐字怯向月转喉清只许琼箫和频看彩扇倾周郎能顾误无语漫多情

奕棋

摇扬铜池日风光合剧棋得先从婢学偷劫怕郎知憨极推枰数娇多下子迟金钗赢取在不放小猧儿

叶戏

叶战南唐戏偏宜在丽娟慧心能合纵好语爱团圆锦赌冲时夺花争散处先漫言情似纸轻薄更堪怜

走马

紫燕来金埒娇姿捧上鞍花前回辔易柳下举鞭难翠重愁鬟侧红光怕镫宽凭谁夸出塞莫作蔡姬看

秋千

寒食盈盈侣相将效半仙红裙柳陌外彩索杏楼边腰细如奔月身轻欲上天下来垂绣带曾不动珠钿

扑蝶

蛱蝶从何至双飞小院深
绮罗三月影花草一春心
故惹香纨小还过绣户
陰轻狂知不那引？
复相寻

教鹦鹉

翠羽能相伴聪明爱不羣
传茶消寂寞报客致殷勤
骂逗檀郎恼呼教小婢闻
春来解人意惟
有缘朝云

过惺寂上人

偶尔维孤艇寻幽过竹房
松杉前代老橘柚晚庭香
问法携红袖探书出锦囊
清谈能竟日山
鸟共禅牀

过施子里村居

言寻扬子宅步履过林丘
柳色行三径梅花卧一楼
地偏春独早人静月同幽
更有南溪约相
迎是白鸥

朝爽台

山气当秋霁朝来望独賒
人情澹丘壑天意爱云霞
放眼欲无际旷怀寧有涯
王郎信多致挂
笏岸乌纱

饮江深阁

挈榼过芳墅花深户转扃
春非尘客事月在酒家亭
破雪山争绿矜风柳渐青
醉乡欢易足莫
负草堂灵雨後同士雅季儿小饮月榭共用来字

晚霁登重榭临风酒一杯
夕阳高树见春色大江来
水雾依山敛吴云入楚开
不知天际客闲
却几楼台

秦淮夜泛

儿子谙游性呼舟古渡边
柳陰双桨月花气一船烟
夜覓闻歌地秋当载酒天
胡牀思旧事三
十二年前扶晨山尊嵎宾来自广陵小饮桃叶河亭分得吹字

作客长怀远欢游少定期
月中人忽到江工笛初吹
桃叶可怜地菊花宜醉时
今宵不同饮几
夜又相思

不寐

孤枕双眸炯呼灯更倚楼月添千里思霜白五更头秋醉不得梦夜吟聊免愁依人诚计拙吾道总悠悠

水楼小饮徵事因忆仲儿

客夜难为梦偏宜浊酒杯破寒孤烛在聽雨一瓶开秋尽花仍淡江空鸟不来呼童检唐韵坐久句还裁

金陵旅怀

鍾陵不可到再到益伤神白下多秋色黄初少旧人世清江上淡客况雨中贫为语秦淮柳含烟带早春

题扫叶上人山楼

修竹亭前路频来兴不孤万山分旦暮一阁尽江湖客至摊书卷僧归入画图淹留常竟日幽鸟坐相呼

过隐仙道院

问法来仙院门开是处幽云高双鹤去地静一麋留有竹皆分径无山不向楼月中金磬响时听步虚游

句曲晓行

夜来初过雨曙色未全分羸马冲泥出荒鸡隔浦闻远山多受雾寒日不驱云衰草埋翁仲溪边认古坟

鹤问招集寓斋得秋字

作客仍招客多君意气稠能闲翻为雨得醉即宜秋落落原难合悠悠未足谋赖逢知己在相对且忘忧

小亭

小亭无四壁秋色满回廊落叶和烟瘦黄花待酒香云闲寒自碧树老晚逾苍物候原如此何烦宋玉伤

林?堂全集卷十五

卷十六

<集部,别集类,清代,林蕙堂全集

钦定四库全书

林蕙堂全集卷十六

湖州府知府吴绮撰

亭皋诗集

五言律

送长儿之濱江

长自多身事兹行难汝留依人携敝篋拜母过扁舟去住凭黄耳悲欢话白头好将隋苑月吟向洞庭秋

又

远涉程难定到时当早秋白云孤烛夜黄叶乱山头彭泽分官米湘江并客舟及时须自力归计漫淹留

示长女

不作淳于叹温柔汝最宜从夫非俗吏有女似佳儿慷慨乌乌曲殷勤燕燕诗辞家四千里见母定何时春社前一日小集凤观书屋同王渭公梅复林暨寿潜威喜两儿分韵得天字

老友能乘兴相过不待延春风词客事夜雨酒人天鱸茗分瓿煖瓶花向烛妍莫嗔童子嬾醉榻任高眠

咏合欢梅子

东阁花残後青青早在林谁怜俱软齿曾不异酸心止渴能相得含滋好共寻摘来同笑看越女更情深

紫骝马

龙支千里种越?九花文逸足能追影奇毛本出羣宝鞞呈满月玉勒舞回云不恨惊香气长嘶
未报君偕又万及仲季两儿饮梅冶侄南斋花下

爱尔南轩好衔觞坐晚风藤阴书卷上花片酒杯中说字逢扬子围棋让谢公漫怜春渐去烛
影夜犹红

中秋後五日讌集赋得月上浄疎林

黄叶忽成幽烟光澹不流兔寒千里晓鸦梦一天秋何处犹吹笛无人独倚楼谁知云外影河
汉自悠悠

将返吴门诸同社携具过送

为别又此日故人还论文酒从花下共衣向雪中分寒月有佳色离鸿多远闻今宵一携手相
望隔江云

又

愁思宁堪道为君意暂倾白头人几个红烛夜三更去住他乡梦炎凉故里情不知隋苑外何
处月偏明元日次澹心同用令节成吾老为首句

令节成吾老今年赋索居感怀新事满到眼旧人疎披褐为吴咏支门读汉书东皋春事好终
荷北山锄

又

令节成吾老轻肥任友朋世情连夜雪心事隔年冰击缶歌杨恠衔杯学信陵平生风义在轻
薄亦何能春日过西禅寺访南水上人分得冬先二韵

铁马招提路新栖物外踪赖同幽侣话多与故人逢草稳吟春屐茶香坐午钟因知莲社约不
必在庐峰

又

小憩逢春霁前期不偶然楼台灰劫地鉶鉢雨花天结客生幽兴安禅足少年虎头方纪胜兹
事已相传【顾樵水修吴郡名胜志方订予作西禅寺诗】

其年云臣偕南公过访

云霓一亭孤人来入画图春风生草树才子半江湖酒谢无穷事诗添未了逋赖逢支许在晴月照菰芦

虎丘社集即席赠林使君

尽日高轩过留看画桨停雨来千嶂白山洗六朝青丘壑诗情远莺花客梦醒薰风在明发还续采茶经秋日集高澹游斋中即席得湘斑二字

摇落逢斯日羣贤在草堂爱花容我老得酒笑人忙黄叶催诗卷青山入醉乡最怜窗外竹萧飒似三湘

又

幽居延胜赏碧藓屐痕斑时事惟看奕秋声共闭关啸歌终日好争战几人闲此夜闻高咏谁为山水间

写闷和悔庵

故里重归日谁知鹤姓丁炎凉悲螻屈出处愧鸿冥诗酒贫何有干戈老未停离骚今懒读不爱楚人醒

又

尽日空斋坐徒为梁父吟相随怜破研独枕谢文琴马敝因知路乌寒为择林从来堪怪事不到住山心

又

久矣无相识君犹望世亲那知齐物论为有絶交人中散三更烛元规一扇尘百年终役役暂息树边身

忆内

白头宁有咏为别又残年惯病能谙药长贫不看钱寄衣防典酒支枕梦归船为语闺中客生涯误草玄

虎丘社集再赠林使君

闻有梁园会嘉宾足胜情移书招野鹤携酒就山莺花爱千峰密尘怜一雨清莫忧骑马滑江

上櫂歌声

延光阁

一径入深翠小楼当户幽不知初月上偏爱夕阳留倚檻忽长啸揽衣还独游美人终不见含睇向芳洲

东莱草堂

故土复何在慨然登此堂梦随孤鹤远秋入乱蝉凉客鬓销中岁诗情老异乡凄凄望蜃市东海正栽桑

碧鸥池

乱碧浑无次晴波欲映霄寒添孤月迴香浸百花摇柳弱穿敲石荷高补断桥谁能醉山简骑马不须招

响月廊

幽翠偏相引廊回曲可循斜通入竹径长见向山人屨冷吴宫晓台荒汉苑春何如桐影下清啸倚栏频

渡香桥

一水分明镜长虹偃绿波美人飘袂去稚子折花过倒影日将夕凭栏秋奈何予怀空渺渺愁听采菱歌

采莲窝

白露方秋满红衣尚可攀因君重濂水使我忆庐山密叶经霜裂香心对月闲涉江谁可寄木未几时还

人日饮学在清瑶屿

春到宜谋醉相邀就辋川酒香开胜日花事闰今年情共他乡密诗从远客传黄梅能作意还向月婵娟

寒甚

昨夜新寒剧东君或未知雪狂宁得久花好故教迟翠幙午犹下清尊晓不辞相依庭畔树冰缀欲开枝

晴

晓色亦何异开轩见物华雪消花得意风定燕还家万蛰欲相见一寒应有涯踏青知己好芳草绿裊斜

云卧

偶至即成醉醉来横一琴常因听雨夕忽起住山心夜永闻花发春寒借酒禁半闲吾自足拥被一长吟

檐园

名士无尘想幽栖向此间随行双白鹤对坐一青山得意即成旷抗怀长自闲我来如入剡系艇欲忘还

春涧书屋

一水萦新绿轩窗相映开有时摊卷坐无事抱琴来小醉听莺卧长吟避鹤猜百城知不假人在碧云堆

湄园杂咏

与世原无益萧疎性所宜孤云宁有待明月不容私山水交情见文章世变知啸歌聊尔尔吾道岂无时

又

晨起观诸动秋来独倚栏断桥残月破高阁早霜寒瘦渐于诗近荒偏与性安萧然能自足随地水云宽

又

献赋非吾事窥园且自由壶觞三径晚丝竹一江秋白社通游客青山稳醉侯如何王给事深锁谢羊求

又

疎窻当水曲秋气晚犹澄古树红无次寒山翠有层倚船商女笛隔?酒人灯小坐浑忘卧高吟
我尚能

松陵道中遇雪

作客身难静残冬又离家云低都着树雪骤不成花受重舟频侧吹多缆故斜依人无好计寂
寞向天涯

涌泉庵

荡桨不得路到来如在山桥横一水外磬出百花间香静欲成悟翠深长自闲高僧清兴在玉
轸理潺湲

过殿闻秋水轩观荷

作客宜闲步池莲爱晓红放怀孤屿上送影一亭中花密全无水香多不为风宁知鱼戏处叶
叶自西东

再赠双文

得句如相待今宵意自亲花前微醉夜月下浅粧人淡极翻成艶欢多反作颦可怜狂杜牧失
计为寻春喜念昔士雅及季儿至自广陵分得南字

世路多艰阻归心正不堪碧云生日暮白鴈过江南客泪花千树家书字一函谁怜絺綌者寒
至最先谙

江干晚泊

秋晚逢孤泊江干朔吹生霜高诸岭翠霞净一江明枫叶翻鸦影芦花出鴈声年来惯离别空
恨布帆轻

平山堂社集

偶尔成三过于今复此间欢场轻白首才子重青山古树知兴废寒云见往还谁言一杯酒千
古几人闲

又

鼙鼓今何世仍开六一堂晚风吹落木秋色在斜阳诗酒多新事烟云老醉乡江城灯火动霜

鴈满雷塘

雨声

晚晴疑不雨忽自夜阑时信欲将春妬终怜被月欺草黏初吐甲梅湿未繁枝声岂殊常听偏
伤百感随

同燕孙念昔暨仲儿小饮

春半欢情鲜持杯眼暂青狂吟灯一壁薄醉酒双瓶雨雪连人日乾坤老客星偶然成独啸寂
寞是扬亭

苦雨和汲山韵

三春无霁色极霁亦微阴日月坐相失江湖空自深园荒行径没壁坏漏痕侵着屐多余兴谁
同入旧林

虱

回跼宁烦辩原名混沌迟喙微偏善嚙腹大但容痴絮里何曾觉禪中不自知莫因头暂黑竟
忘白身时

蚤

偶尔称毛隐人兼痛痒攢善全惟一跳巧嚙有千端但恃身偏捷难容目暂看不知汤火里求
活更艰难

蝇

竟日盘觞内知从何处来不忧拔剑逐常喜覆瓿开覓臭真无忌趋羶亦有才幽兰非不好高
举似相猜

蚊

岂谓曾知礼潜身扇枕先狂吟当日暝饱食待人眠翻掌不能觉剥肤殊可怜西风有时至利
喙向谁边

喜晴

已谓随春尽宁知霁色鲜共看搓柳地犹有惜花天江海应何极星辰岂偶然农家同望岁翻使寸心悬

又雨

偶霁农夫喜连宵竟奈何惜花春梦短听雨夜吟多芹润泥黏燕杨疎水似鹅荡舟空有约门外即曾波孙汲山王武徵景州歙州汪左岩乔孚五刘瞻六冒青若江郢上秋水暨赵倩念昔邀饯空翠阁即席留别

芳墅同携手登高是别筵挂帆非得已对酒岂徒然山水五千里楼台十一年莺花殊旧日飘泊笑樊川

又

人与春同去明朝水一涯朋情多旧雨客梦懒看花碧柳隋皇院红蕉越女家南云长极目江月几回斜

雨後新河晚泊

辞家未两日几度见阴晴江以烟逾濶潮因雨不平蛟龙才一瞬乌鹄自三更那识孤篷里思从何处生

弘济寺访蒲庵上人

远涉停孤舫寻师过碧岑门从幽径掩诗入乱山吟云起不离壁花香常出林归来应有约秋月话尘襟

石 河纪事

水宿因风泊程遥望转凝戍亭春卖酒鱼舫夜分灯沙鸟鸣难定江鱼价转增离乡心未远笑语梦犹曾

姆下河晚泊

水国程难定维舟不问津犬迎归店客鸦避落帆人烟柳孤邨晚江花四月春未能随鹭浴聊濯往来尘

午日集遗山秋浦楼得云留二字

远游聊且住令节慰停云共倒青华盏分题白练裙笑言当永画醉醒共残曛忆昨兰舟上犹然念少文

又

久作三年别今当五日留江山犹故土节物已他州雏燕晴偏语凉蟾晚更浮不知长命缕谁更系南楼

游杏花邨以雨不果

亦有樊川兴寻春老渐疎偶同听雨烛竟阻看花舆山水逢佳士烟霞忆旧庐莫吟魂断句霁色晚来铺

钱广文介臣招集绿依亭

官署能留醉幽如野客家碧高池漾柳红净雨过花棋局当窗遣栏干点笔斜郑?敦旧好分赠六班茶偕遗山目天赵客惟隣暨仲儿过隣家荷亭小憩

会心原不远濠濮比隣深露叶向人坐风香吹客襟蜨狂花不次蝉静柳长阴幽兴知难极相将更一吟

江雨

暑溽原知雨飒然惊骤来落帆争就浦倚棹忽闻雷水气龙腥过山光鸟背开遥看江一白飞洒乱珠胎

过南昌见滕王阁被焚

来访临江迹焚余剩败椽可怜彭蠡水难救祝融烟帝子名空在才人赋自传西山与南浦无计更流连家远凡邀同目天澹夫介远暨仲儿集芙蓉庵小憩

作客情难遣精蓝暂取幽野桥花碍帽小院竹藏楼江近易成雨林深长似秋芳馨无可折空望暮烟收

又

南浦知何处兹间似故乡多年苍桧古竟日白莲香野水流残照山云送晚凉乌衣有同调弥觉笑言长

南昌寓中喜晤澹夫侄

忆昔论交日相知各暮年他乡多险阻异国共留连老不因人热贫宁取世怜惟应一杯酒相得是陶然

澹台子羽墓

来访名贤迹荒阡对水湄一生无捷径万古有遗碑下马因君拜斩蛟宁尔为北邙多少塚无复後人知

登石亭寺钩天阁

滕阁灰飞後登临独此楼江声非一水云气杂诸洲天远晴连雨风高暑亦秋故乡烟树外倚槛思悠悠

南昌晓发

远程难惮暑纜解早凉天鸟语喧村市蝉声送客船殷勤留後遇轻薄信前缘一笑存吾道终归沧海边

江晚

风便难为泊前山夕照衔江声双画桨月色一蒲帆大暑空题扇飞尘欲染衫家书灯下发计日到鱼函

十八滩舟行杂咏

垂老仍为客关河路转长终朝依枕簟三夏尽舟航扣户词偏拙离家梦自伤荔枝应正熟行役向他乡

又

炎蒸无计遣卧起一篷窻白鸟栖常独黄鱼钓自双柳烟思旧国花月梦春江尚觉人情懒因知病未降

又

半生经险阻此地乍来游非意当滩石无程逆水舟同乡惟赖月异国不禁秋只有还家梦应偕波浪流

又

闭户无长计崎岖向远途独行愁岁暮多病益身孤戏幔双蝴蝶迎桡一鹧鸪茫茫前路在何必问征夫

又

入夏情无似秋来更若何江湖多岁月鱼鸟共风波饮酒杯空把钞诗字屡譌新凉寻敝褐真自羡渔蓑

又

作客浑无可年高兴更消老为时辈弃贫任里儿骄坚卧连秋夏孤吟了暮朝悬槌怜十指何计慰迢遥

又

野戍遥传柝孤航泛远踪山风秋舞鹤滩雨夜归龙事过方知险身闲转觉慵片帆犹未歇何处采芙蓉

又

詹尹何从卜风波此一身月随游倦客滩吼梦余人蟋蟀依黄苇鳬鸥老白苹罗浮香雪在过岭若为春

璧园诗和丁鴈水观察韵

剪棘非耽寂园居辟软尘树从经岁老花为得人新消暇如增日和神以当春大夫频退食清啸动江津

又

开径偏宜曲为廊不厌长竹深阴接汉石老态颓唐兄弟逢连玉宾朋坐衆香主人能吏隐应有异书藏

又

为有江湖兴看云意辄怡但能为圃好岂恨得山迟白傅摊书卷苍生看奕棋宁须夸鲁直兰斗种黄薤

又

名区知有待小筑傍廉泉受月庭能扩迎风牖或偏华觴挥緑醕逸操响红弦何爱窻扉上金缸照列钱

又

杯泻中山酒炉分小岷茶论文常废食留客几忘家高义怀陶简新词讽棣华讼庭无事出白鸟当排衙

又

以我珠江去方歌行路难此时过月榭尽日对烟峦卷轴频传玩图书共借看小山丛桂在招隐忆刘安观庄弟至自和阳鴈水招同讌集分得流深二字

远客来无意樽开意转投弟兄逢北海宾主共南州深坐非因雨清言欲过秋请看城下水章贡正同流

又

屡入西园会兹宵足古今星辰双剑合风雨一杯深老树吟边影幽兰梦後心莫言容易别秋月坐相寻

会波阁

止宿因朋好金亭偶借栖树凉花气足雨密水痕齐帘动鱼儿影书翻燕子泥爱他清漏永月到画桥西

又

水檻尘缘少终朝自掩关砌风生雾縠邻岫露烟鬟柚子黄三寸苹花緑一湾羊求时共坐清话未能还

又

泛泛方无极宁知到药房红裳莲半谢翠带苕交长棋局尝凭檻渔竿插卧牀平生空忆楚未审异潇湘

又

仙院无凡吹秋声在薜萝江云催曙早山雨送凉多一帙能销暇三卮足养和主人偏重客皂盖已频过

留曹大行石间夜饮曾波阁分韵

良夜难忘酒君来兴未穷乡心逢节动客意向山同晴月曾波里秋声老树中吹笙还缥缈鹤背有双童

测上人以方竹杖见赠赋此谢之

高人无俗况异筱出东林渐老得禅气能圆非道心孤怀存矩步夙好快幽寻感此殷勤意提携念德音

八月十三夜

泛迹任孤舟逍遥可自由江风犹带煖山月未成秋望远怀乡鴈忘情愧野鸥晚来方倚櫂一笛起中流

南安客舍水阁对月

浪迹浑无定投林似暂归桥横沙路曲月出水烟微凝思看鳬浴含情待鴈飞谁怜砧杵夜万里共晴辉

又

借栖还觅静水槛得徜徉倦鸟夜三鼓凉蟾秋一牀连江溪易绿近岭柳迟黄明日重阳是登高爱此乡南安邸次喜遇张寄亭并晤查德尹邹白庵

故人何意见倾盖况多缘姓字曾相识诗篇重所传路遥身莫主归早客如仙独怅无杯酒黄花正满前

过大庾岭经张曲江祠

水尽南天日惊看鸟道悬一门分楚粤五岭各风烟松古云千尺茶香路两边始兴功业在野叟尚能传

又

盘曲登青嶂篮舆一径斜艰难寻荔子惆怅为梅花海暖曾无雪峯高半隐霞鴈飞真不度行

客自忘家

又

南徼兵初罢登高望不穷天低云自碧霜薄树难红香橐奔羣贾油幢倚上公可堪车马迹影乱夕阳中

又

垂老为行役凄凄百病身无聊因作客不定是依人路到难辞险家遥多念贫停车最高处云气满秋旻

舟中立冬

放棹当初夏冬来尚路岐月圆凡七见火合已三移海气连江近天时就地宜老人方苦热捡历待寒期

宿长寿禅院招隐堂次元宗上人韵

为厌嚣尘杂闲寻水竹居白云无尽处明月正来初花落僧归晚钟摇客梦余清谈能不倦并坐一牀书

又

智者无禅相云山待客看天高青桂老池静白莲寒身自何年隐心将此地安知君有深意得此暂盘桓

十一月初七日愚公伟公过集寓斋

客里犹思客求羊日往还清吟寒烛下发兴煖杯间地远双鱼少云高一鴈闲谁怜今夜月犹作翠眉弯

又

草草盘觞会酣余意转赊谁知人去国同作客思家寂寞天边镜徘徊海上槎罗浮如不远辜负是梅花仲冬十日偕同社诸子集家观庄寓斋分得十蒸

佳宾盈邸室好客尔犹能送酒倾蛮榼分笈擘剡藤梅过游兴懒月上远怀增愧少池塘句挑?夜半灯

上弦月

坐望清辉起含情待北堂兔肥思补缺蟾小欲流光盈手虽难掬如眉已渐扬潮生能有信规影漾波黄

下弦月

迟迟光始见已觉兴蹉跎几望时无及仍圆夜屡过叶稀萸半减花老桂无多思妇徒增怨其如团扇何

嘉鱼

式燕传风雅兹能称此名凌波身自洁出石味长清少骨偏宜酒无鯉可和羹季鹰如得见岂作忆鲈情

又

老饕惟果腹鳞族见斯奇近腊宁因社生端欲比夔贵将鲙并质细与鲫同肌杨柳沙边路空嫌结网迟

菩提树

阶下菩提树双柯百尺斜子圆将似玉叶老欲成纱曾共高僧渡长生梵客家唐碑空自古无树复何夸

灵山寺听泉

旃林尘事少过雨一亭开境静声难隐泉高响自来百盘穿冷翠一道下惊雷童子烧红叶烹茶日几回

立春夜同準庵坐月

岭表俱为客清宵逸兴同月高花槛外春入酒杯中乡思风前燕游踪雪後鸿胡牀频徙倚漏尽意难穷

元日顾辛峰过饮浴砚斋分韵

才与梅花笑趺然闻屐声幽人不厌寂客子最宜晴天地留诗卷江山入酒铛共言新岁好花发五羊城

夏宁枚孙殿扬过集分韵

作客无停迹能来且共谈年光双白鸟春色一黄柑旅馆山同静村酤兴转酣嗟余亦梗泛莫更诂江南

题自参上人莲聚精舍

岂是维摩室轩窗是可人焚香将过日得句为逢春老树曾闻法幽花不受尘谁知莲社里有客字遗民

赠郑愚公州牧

超然爱仁表相遇岭南春诗肯从人好官因玩世贫途穷无可泪舟小不容身万里归何计凄凄别路尘

怀古楼

化城无近想蜃气一何奇白月留前代青山是旧时身高难自下意密许谁知王粲凭栏处斜阳多恨迟

招隐室

秋风开一境幽绝已无伦薜荔难为伴菰芦大有人波光摇素壁花影隔红尘?帐空相待岩边老桂春

木末

禅扉尘不入露冷众芳稠赠客红分手思君白满头临波空影淡到?乱香浮莫展离骚读愁多是九秋

云半阁

孤阁凌空出栏杆倚古藤但容云借住每为月同登烟海碧无际寒山青有层此身真百尺豪亦我何能

雨中

冲泥山屐少竟日掩柴关天忌三春好人偷一雨闲荷烟承柳影松溜长苔斑独喜乌皮静香烟袅碧鬟

又贈堦庵

已整浮湘楫还为几日留江湖八月路花木两人秋有事凭苍狗忘言任白鸥乾坤应未老策杖待同游

涟洲江口

孤舟无定泊野宿就江湾雨欲驱残暑云能补断山墟人沽酒出溪女卖鱼还更有浮湘约劳生未易闲

南华寺礼六祖塋

曹溪流未断紆道谒南能密树青千叠寒山绿几层泉清犹满鉢焰冷尚留灯老矣还乘兴凭高杖古藤

蜈蚣埭

晚发难依堠维船絶少隣乱山寒伏盗野火暗疑人猿鹤空相怨豺狼不念贫茫茫更何处吾道在知津

长沙客舍喜遇辰六至自益阳

忆别秋江畔何期五载违犹怜亲谊好不悔浪游非宦薄才宁拙天寒梦屡归洞庭烟水濶应共片帆飞

登龟台山

雨过寒山静晴晖在石龕金英秋剩把玉版午同参江白鸥频下天青鴈欲南谁能更西望带月一停骖

十九贤祠

地已多贤胜崇祠启碧岩波香生苻藻云气老松杉醉酹三升酒闲停一片帆异时偏有感仙令莽初芟

留公滩舟中别辰六

五载得相见岁残归梦频云烟难赠客山水解留人路以愁偏远官因傲始贫河干一分手努力待阳春

泊下簾

泛楚宵停棹遥遥野水边灯明沽酒肆歌出打鱼船梦不因鷄醒归终让鴈先计程犹自远月共客心悬

兰溪镇夜雪

楚江当岁暮夜永觉寒生櫓滑波声溜窻疎雪影明吹灯闻鴈过支枕数鸡声世难归途险频教客梦惊

迁居种字林有作

懒效灵均卜因携抱朴装鹤驯能负笈龟老解支牀过雨移山竹留春障海棠从今花下醉酌酒寄襄阳

入岁

入岁青阳改残冰尚满途寒迟花气候愁短梦工夫得句思才子闻歌忆酒徒重城灯火在谁得似僧孺人日云卿东湖星子弟及仲子寿潜小集莼蓴舸分韵

晨夕南邨近能来絶送迎青山生远梦白月见幽情岁事钗头燕年光柳外莺清言知不厌坚坐度严更

又

早岁初开径留宾倒玉壶盘供水後韭屐破雪中芜寒较他年甚晴逢令节殊浊醪应自足何必过隣酤

元夜遣兴

岁历惊初换日昃又及中月因寒夜白灯为早春红箫鼓年都有烟花夕不同梅花清影下幽兴欲无穷

泊三师以菊芽作茗见饷因答以诗

幽菊生篱畔高僧采摘良遂教霜下叶先占雨前香焙学龙团火烹宜蟹眼汤感君持赠意拭目待文昌

雪中蒲庵和尚过访

雪里无行迹闻君扣荜门笠敲幽桂影衲重老梅痕得得知犹在悠悠复几存
临江有片石归计好重论

晴

风雨妨春兴何来此日长暂晴添月色乍暖逼花香眼暗还开卷心闲且进觞
故人无远思着屐为残阳

雪後登南城楼小憩

雨雪常疎出登高发兴新江花凭槛霁烟柳傍城春榻借书经客斋留问偈
人山僧能不厌莲社有遗民

花朝喜晴是日惊蛰

霁色佳辰好山窗尚薄寒草痕将次第花信已平安粉蝶经时见银蟾着意看
欣欣应有望春事待凭栏

梅岑月樵偕顾书宣过访

旧好思宗炳能偕二仲来留连当竹坐徙倚值花开老觉贫交重清知俊友才
不嫌山径浅频得破苍苔春分日僧持偕长君元子小集种字林同书先星子及仲儿
寿潜分韵得杯留二字

良朋来意外老更爱追陪快读新诗帙同倾浊酒杯竹深三径雨花发半春雷未下
重城钥樊川旧往回

又

正值庭梅放诸君且少留湖山生远梦师友忆前游并坐青瑶席闲披紫□裘惟应输
少俊词赋总风流

武陵以诗见寄次韵答之

江水如衣带云何万里遥愁新迟旧约梦短畏长宵雨密应难出春寒未易调谁能仗青鸟
一叶渡松寥【山名】

又

忆昔泉亭上残秋订故知月凡经几见花不解相思屡别何堪老重逢岂厌迟春来梅信好喜

得陇头枝

赠卜者

我亦行吟者逢君詹尹俦垂帘非处市挥麈共登楼
旷览因观运高言足散愁行藏休更问吾已任虚舟

初夏和毕正持韵

春归芳墅静深坐似山家莺狎当窻柳蜂喧夹径花
雨微犹见日云薄不成霞已分墙东隐栖迟老岁华

不复

不复寻车马园居览物华管弦春试酒闺阁晓分花
饌减留林笋炉香焙菊芽长卿词赋在那到五侯家

又

小墅怪三亩栖迟仅自宽竹烟妨箬帽草露湿蒲团
公辅难多岁神仙有大观吾侪经计熟心静莫求安
顾书宣许送牡丹时过不至诗以讯之并柬月樵

春事行将尽良朋约竟徂赤栏怜早计绿酒笑空储
那得沉香咏难成蜀锦图也知蓬径里原不称名姝

园居

园居逢首夏霁色散茅堂新叶各层翠乱花同一香
林深莺自便巢就燕争忙觴咏于焉足春明梦久忘
庭前芍药盛开江夏君偕诸女治具小饮

四月名葩放疑春尚未残花留青眼色人耐白头欢
迳笋方离锄江鱼正入盘山妻能不倦把烛劝重看
夏日前民正持允臣小集种字林分韵时望子有粤中之游

昼长宜偶坐独影笑难双听履穷愁减衔杯客梦降
梧云晴拂槛花月晚分窻何事仍相送闻君欲下沆

夏夜

盛夏琴书懒闲心入暮清暂凉难胜暑骤雨数成晴
菡萏穿丛叶梧桐滴剩声最宜新浴後叠

雪短衫轻

悼狸奴

白老能多慧相驯五载余食惟分饼餌力可护诗书
觅主常登榻依人每绕裾也应须灭度特为诵如如

和放翁立秋前一日韵

雨过梧桐院香生杜若洲蝉声初向晚蛩梦已先秋
身老疎千卷心闲笑五侯北窗应渐爽得酒复何求

六月十四日和剑南韵

老爱青山稳闲知白昼长乱云收竹影细雨坠莲香
秋近愁残热晡来受嫩凉红藤能作伴曦髮坐林塘
丁兰皋陈鹤山毕正持偕家闻玮小集蕤芎舸

却暑宜谋醉为君倒玉瓶风回蝉续响雨过鸟梳翎
竹色迷三径桐阴绿一亭此间无热客谈笑可忘形

斋中遣兴时正持方过京口

细事能娱日凭栏昼午时狸奴扑花影凤子戏莲枝
泥妇常赊酒辞仙不爱棋遥思渡江客应有玉山诗

淑时正持集蕤芎舸分韵【用唐人起句】

酒熟思才子开扉得遇君挥毫过急雨浴砚起凉云
暑气坐将尽秋声匪一闻吾侪多胜事未可比羊欣

再得十五咸

触热思良晤相思信不凡小轩真似舫高树尽如帆
世事杯频把交情字满缄数来知不厌秋色在松杉

谐石移居入城赋此志喜【先是旧居被焚】

天不因贫恕多言岂足言君真如靖节我欲贺参元
灰烬无余橐图书更满轩最怜幽巷好渐远市尘喧

又

方有离羣叹移居得素心披衣应不远策杖可相寻玩月城无阻谈诗酒自斟祝融原有意晨夕为知音谐石移居未果山来力任乃就感而有赋并以为赠

甚厚嗣宗意谋居为仲容秦灰徒自爇梁庀尚能春客有停轩过人因问字逢望衡吾最便得句即扶筇

送敦七之东淘

海国鱼盐地胡为复漫游鷄声连夜雨鴈影一年秋酒为幽人索文因故老求知君意良厚浮菊待归舟

红桥泛舟分韵得二冬

幽人同逸兴买棹辄相从芳草香孤屿垂杨绿一篷日能明远水云欲补遥峰谁送归舟晚平山出梵钟

龙兴寺

偶访垂纶地聊为兰若游半牀醒後月一磬梦中秋风雨空怀刺云霄漫倚楼故人辞我去无计可迟留

隆庆寺夜宿

作客无常主僧房暂得安长松晴昼雨孤磬暑宵寒灯影吟边静杯心梦後残何如桐月下夜起独凭栏

漂母祠

一饭胡为者英雄更觉难古今双漂絮楚汉一渔竿祠讶千金小碑怜百战残此人能识客何必丈夫冠

澄江道中

九龙山色远独坐更推篷秋霁忽成雨路遥还未风溪流冲?簌村火乱鱼筒申浦前途是寒村杳霭中十月二日钱饮光自龙眼杨香山自武林余广霞自吴门宋既庭自昭阳至与余为五老之会夜集皆可堂话白门旧事因成一首并示昉思

宾主合成美今将四百春老应为过客壮且不如人朝暮齐梁事秋冬晋宋身嗒然聊一笑杯酒任吾真

广霞昉思逸庵香祖同过分韵

拨闷思良友相将把翠涛秋为词客瘦月向故人高杜牧名犹在陈登气本豪今宵闻雅唱逸兴起江皋同广霞昉思石霞翔九饮殿臣兰雪斋

引疾辞高会同来话冷斋醉歌忘世法卧起适幽怀落叶迷深巷寒花香一堦离羣非客意猿鹤信吾侪

和广霞韵赠了如上人

为别时真久重来径转幽僧年知过腊客况略如秋有兴还高咏无谋作远游门前小桥水不共大江流

寓斋偶题

闻说池亭好来栖一片云水深藏野獭冬暖聚残蚊隔巷鸡声接隣墙树色分山矾红子在磊落倚斜曛

又

未是蓬蒿径居然仲蔚家主人能爱客穉子解看花榻静分寒月窗虚倚暮霞自怜身泛泛犹得占鸥沙

赠昉思

欲别翻无语新诗为尔陈聪明长累物忼慨不宜人妬益蛾眉美贫教虎气驯士龙君好友归计且逡巡语山泊三二上人过访次语山见赠韵

高衲同相访临溪卷钓竿竹阴开户密松影上衣寒有法应难问无心孰可安何时能着屐香气拂林兰

喜季儿来自均阳

闻乱嗟来晚来欣在乱前信迟怜梦误世变喜身全远见喧门外欢言杂酒边幼孙初未识一见把衣牵

妇病

竟夕难安寝呻吟共掩关长贫成白髮多难在红颜梦短愁能续忧深思不闲暮年无可慰悔
不学痴顽八月二十八日宁孙年二十矣于其诞诗以勗之

问年非少小两见汝当旬失父存孤影休官长一身弃繻怜体弱与砚笑家贫何计能相慰含
辛有寡亲

又

吾尚余诸子汝惟称独儿那能分手足渐已具须眉旧恨三冬雪遗资一卷诗兰成当此岁射
策已多时

十二月念八日夜雪

望岁长思雪今年苦不多才看飘槛砌竟欲满山河岐路虽无叹寒溪岂易过遥怜江上客谁
许着烟蓑

二月三日夜坐有感

湖海气犹在春来如不胜百年频览镜一夜共挑灯忧为而今甚穷怜自古曾吾侪同寂寂不
醉亦何能

晓寒

春至偏难早晓寒犹似前着书防薄俗向火觉衰年残冻迟花候连阴费酒钱经旬不暂出草
色到窻边

二月五日见月和马高陵

好友惊重见清辉尚宛然漫怜新隐约犹是旧婵娟较甚初三出先期第二圆揽之不盈手徒
倚小窻前

偕高陵念昔登南城楼次韵

登高同远眺雉堞倚精蓝春引山僧步云留野客探晚烟明海曲春树点江南遥念垂杨下须
携酒与柑

忆吴兴用仲儿韵

水嬉长入梦斗大有孤州溪绕樊川馆山围鲁国楼
光四坐入林翠一帘收不爱元郎句嵇山记夙游

又

云水最多处我曾于此居一堂千岭树百姓五湖渔
听讼山中寺行春花底舆南柯才梦觉秋雨卧相如

又

一郡无多地苍苍千万峰水花多是藕山叶尽为松
不系家家舫相闻寺寺钟宁知虹卧处潭下有蟠龙

又

记曾千骑拥三载有余情着水心常冷看山眼尚明
鱼虾喧晓市麋鹿绕春城怀土非吾意徒怜去国轻

又

无端惊短梦挥手谢云山雨散三千客烟深十二鬟
林泉心自远湖海气难删斟酌平生事嗟予好是闲

平山堂杂感和苏江陵韵

千载关情地频来绕砌行过江山翠近倚槛暮云轻
游女矜粧束山僧少送迎莫愁浮棹远春水正渟泓

又

此地山光好春来二月时微风响铃铎残日在罍罍
慷慨仍怀古苍茫独咏诗所思曾不见天末碧霞披

又

尚有先生阁都无帝子楼乾坤千古换江海一亭收
杨柳存枯枿荷花记胜游坐深明月起帆影认瓜洲

又

昔日徵歌地今为般若田残钟生落月孤笛起寒烟不见深宫树难开陆地莲宝钗耕後出泥蚀问谁怜

月下

春色无昏晓闲庭晚思生路多千柳弱月静百花明止酒心长淡敲诗气暂清老妻能不卧笑语答棋枰

又

爱月长坚坐更阑兴未阑杨花归日暮燕子宿春寒白发愁多故青山梦未安谁能高阁上闲杀玉栏干

次日复饮花下喜上若归自北都

不厌清宵坐街觴春树边漏深看月夜酒熟养花天老子多遥念诸甥与内筵欢然此时意佳句若为传

蹴鞠

轻薄由来惯虚空不自持转旋宁有定腾跃亦何奇社匝花围日场搓柳软时可怜差一瞬抛掷岂堪思

秋千

漫道西戎戏春闺剧有情双弯愁露滑一搦趁风轻鬪险裾难捉争高髻渐倾不知平地看女伴几相惊

风鸢

何曾具六翮一线出儿童逞势将凌汉凭虚但藉风天高孤哨响星小一灯红只恐罡飈发飘零欲坠空

鬪鸡

五德今何有惟将勇占场昂头声自厉怒目翅还张金距原无敌红罗未易偿更怜笼着後毛血为谁伤仲夏十八日扬尔公招诸同人平山堂讌集覩壁间欧苏二公词有感分得删覃二韵

多君能好客有约傍禅关破壁乾坤在高堂今古闲文人难白髮才子重青山始信当时句长留天地间

又

三过存遗迹兹来更快探风香常自北山翠不归南柳为经年古茶因得水甘还怜荷芰路回棹夕阳酣

冬夜闻鴈分得乡字

永夜方无寐征鸿叫早霜声遗孤枕冷影过一灯长塞上无繒缴江干有稻粱不须愁雨雪兄弟共他乡

初宿黄子湖

晚岁甘幽僻谋居就水涯庭虚容看月地敞足栽花老鹤宜三径闲鸥共一家夜来清梦稳不复听城笳

六言律

夏日园居即事

睡觉流黄簟上披襟醉白堂中风起乱翻荷芰月来先到梧桐相如不愁赋尽文举只虑杯空俯仰乾坤一笑吾与造物安穷

送余广霞归吴门

与我梁谿同客送君吴苑先行山中二泉正冽湖上诸峰早青鬪茗半囊诗草采莲一路歌声迎门应呼骥子三径秋来已成

林蕙堂全集卷十六

卷十七

<集部,别集类,清代,林蕙堂全集

钦定四库全书

林蕙堂全集卷十七

湖州府知府吴绮撰

亭皋诗集

七言律

康山闻梵偶然有作

画栋凭虚天祭开下方遥傍妙高台人闲每向云同宿山静时闻磬一来箫鼓不将明月去松风能送海潮回坐余更觉多深省欲向南宗觅辨才

寄怀浯溪夫子

酒湿青衫半泪丝灯残独掩一编时未成国土羞言报不遇名贤耻受知千里高情吟荔子三年官况问梅枝吴公去後循良少怀旧长沙不自持

送晋人赴幕

萧萧春树莫愁湖犹带霜痕对板车风雨十年黄叶梦莺花三月白门书孤身作客常依马浪迹逢人说钓鱼从此屋梁明月色酒旗诗卷为君疎

登清凉台

布衲乌巾集胜流登高层折共寻秋半江落日千帆乱六代荒烟一壑收红叶有声钟出寺白苹无浪水移洲凄然数尽飞鸿影故垒萧萧指石头

与云止有怀晋人

珍重离心赋索居有怀同在闭门初才人好梦留杯酒乱世深情检旧书白衿夜寒听雨烛青山秋老种瓜锄东来流水无消息肠断滇云万里余

夜坐

凄凄撼撼子云亭冷月阶除夜杳冥恋砌霜蛩悲戍笛隔河秋犬吠渔灯松依老石疑人立蕉舞凉风入梦听衫苧可怜萧索尽不堪和醉读骚经

云止所持扇是晋人画雷峰图索句题之

倚櫂南屏过几年白莲香里读书船六陵旧迹闻鶗鴂三月离心拜杜鹃人与好山争远梦花埋闲雨误春田青谿两两烧灯影又卷遗图问酒钱

偕师六登鷄鸣山寺同望台城

过雨鸣鸠恰唤妻谢家双屐破春泥湖生新水花痕浅山带荒城柳色齐白袷有人参宝志黄油无梦问金题菊田二月僧归晚荷锄相逢在古堤

赠菊人

披草相过取数频断桥凉雨两闲身因贪夜色留深树自爱秋风为古人忍酒寒心惊岁晚抱书归影失家贫时时笑语东墙子此世如君尚荷薪

偕玉少鹤问小饮南郊

晴原携手共幽寻一醉旗亭感慨深芳草乍为经雨色垂杨渐有向春心莺花细碎吹箫梦湖海低迷击筑音同是彝门屠钓客不堪红袖泣遗簪

赠子尝

问字扬亭意共亲空城戴笠正逢春水霜古道销闲梦风雨前山悟往因客里有怀惊岁短乱中无媿喜家贫韩门自有高轩过贾孟诗篇总後尘

赠仲木

冷冷天风吹白须相寻常在酒家胡生怜东海空波浪老向西来得道途碧管细书豪士赋红灯醉舞剑仙图不堪故里尘埃满马散黄金长乱芜

寄怀云孙孝酌

梦上江边访客船寒潮凄咽又经年骑驴未饮兰陵酒买鹤曾衔蜀道牋苏晋沉香薰绣像张凭画舫载金钿何时得向湖滨路共问吴瞿种药田

赠子房

一夜春风动薜萝送君归去理渔蓑青山有事高天近碧草无言古路多入市几人工击筑还家终日看悬梭闲来莫向嵩阳过醉倚桐江可放歌

寄怀沂公江如驭少

海岳庵前长碧苔羊求日夕好怀开非关诗酒全无故自是渔樵亦用才十里青山供隐几隔年黄叶照衔杯修琴卖药何时到独鹤长饥向钓台

赠小有

到门五柳欲留莺已听先生索酒声未易途穷仍作逵最怜身老更多情人间风月愁无赖枕上公侯梦不平劝尔学仙知路稳白衣何事废经营

偕公狄于一汉公集晦中斋头

堂前书带杂兰荪客到西园酒正温阜帽有心人满座青山无事月当门庭边老鹤前生影篱外寒花旧日恩最爱康成多韵事十年醉墨展秋痕

柳凤詹先生招同梁仲木社集雨华庵赋得垂丝海棠共用花字

红雪垂垂谢傅家小桃开后几枝斜丽牵紫玉相思树软挂黄荃没骨花自倚柔风偏袅娜若笼轻雨益韶华酒中请补夔州作为遣山僧护绦纱

江上访新亭旧迹

金气苍茫接大荒新亭无处吊兴亡中原旧事云千叠南渡羣贤酒一觞山路乍回秋草白江流不断晚云黄停舟欲尽登临兴今古难堪几夕阳

邀笛步坐月

露洗青溪红树枝一痕明月照人迟今朝岂少横吹客当日难忘竟去时水气乍凉鱼更跃霜花欲下鹤先知云鬟怅望倡家女画桨临江有所思

莫愁湖听雨

秋烟秋草弄寒螯独宿平湖水气凉一夜汀鸥游子梦百年海燕美人堂新寒但觉罗衣薄急响虚疑玉佩长却忆藕花红落处当时七十二鸳鸯

同云止过石公房

寒蕉拂拂与窗齐老碧新香坐欲迷一鉢软烟梧子饭半锄凉雨菊花泥闲支短杖调饥鹤学定空牀过午鸡却愧好山徒结梦明朝秋句不堪携

乱後过广陵忆旧

华表归来转自伤独行官道起悲凉残兵卖马归荒垒老姬擎浆倚破墙三月游踪生蔓草六朝遗祸怨垂杨雷塘历遍无人问只有青山识谢郎

悼友诗

邹建之【名苏邑诸生能文善书死於兵】

自是梁园授?人堪悲冤血溅泥尘苍天不解怜才隽黑刼何曾赦贱贫几日醇醪归後想一编奇字梦中身西斋尚有留题处眼见银鈎泪满巾

赵子璘【名璘府诸生家贫嗜学性不谐俗死於兵】

登楼煮酒只今年再过双扉锁暮烟身後有人嫌调冷生前无事许人怜文园命薄终怪遇昌谷才高亦累仙从此茱萸湾畔路不堪回忆李膺船

高申伯【名孝缵邑诸生有隽才城破时自经于文庙】

陈东痛哭已吞声南望惊传系短纓蟋蟀河山归宰相蜉蝣风节在诸生丹楹一代名无忝白马三更梦不平却忆射书城下者夜台瓜葛好班荆

挽董少君

少君名白字小宛桃叶名媛也姿穠转玉品贵埋金鹤失意于离羣鸳有怀而慕侣吾友辟疆闻声晋渡覩面苏台灯下团纱醉眼曳留仙之带江边画桨同心偕续命之丝乃雅韵难谐情波更折三生有石遂坚匪石之心离恨无天欲作问天之想转车轮於午夜瘦尽灯花驾艇子以秋风来逢月树遂使当时才子竞着黄衫命世清流为牵红线玉台重下温郎信是可人金屋偕归汧国遂为佳妇闲心向月并嚼红箫巧笑将花同临碧镜香分博士贪烧鷓鴣之班书学夫人戏问鸳鸯之字扇松风于林下静影如吹咒桃雪于庭前天心自浣新橙未擘纖手訝其香留弱蕙初承小睡疑于花乱斯可谓独秀青闺恒芳彤管者矣尔乃楼通西阁琴调大妇之心饁进北堂羹谳老姑之性过华亭而听鹤乱中存赵氏之书入皋庑而依鸿病里伴龐公之坐十年织锦巧在丝前五夜弹箏韵流弦外而惊鸚鵡之梦果有不祥葬鸾凤之身于焉速化死而可忍弥留椒蕊之筵去必有归恍惚莲华之国某偶游射雉恰值骑鸾见奉倩之神伤

为安仁而气尽云高巫岭不遮伤逝之心雨入巴山尽是悼亡之泪展银钩于遗墨覩旧日之
钞书省瑶佩于生绡见春风之出画闻其语矣为之泫然愧乏八义之才聊代七哀之赋青牛
帐里想入梦以氤氲紫玉坟边当闻歌而宛转其词曰

憔悴春衫杏子纱潘郎二月葬梨花愁能无泪天将老死到多情月不华抛散珍珠思闇扫丢
残铁拨在琵琶莫言爝烛因灰尽想到当年油壁车

又

半夜巫山结冷云鰥猿寡鹤不堪闻情销软玉芙蓉障香碎泥金蛱蝶裙粧为好多都是恨愁
从想极转难分可怜一片桃花土先筑雏鸾几尺坟

又

空有迎仙八宝台凄凉义髻覆尘埃已无翠被容贪梦谁向红窗肯爱才松柏忍堪犹并结芙
蓉从此不双开苍天未解怜殊色欲倩灵均问凤媒

又

麻姑去後小姑闲独剩双成又早还此日若教居海上当年何事降人间青丝有结宽腰带白
玉无心认指环地下果容长见忆也应愁损旧眉弯

又

折得寒梅向庾林无人能办惜芳心等金身上花终始埋玉山中树古今转妬白头能薄幸不
关红粉失知音此生倘遇鸿都客阆苑应知次第寻

又

帐中环佩望迟迟肠断春蚕死後丝儿女何能知古处英雄谁信不时宜支离白月长生语零
落红牋小字诗莫怪东阳新病沈十年吾亦为花痴

又

月路云阶信渺茫愁人夜起合欢牀娇心欲尽原非福薄命无才或可长雕玉枕沾花瓣粉缕
金箱叠藕丝裳痴魂不逐梨云去肯向巫山魅楚王

又

响屐难闻下玉除茂陵琴倚马相如长怜病起能看月最忆粧成好读书澹菊似人徒有影幽兰无语竟先锄年来欲更修眉史特为红颜赋子虚

庚寅元夕後二日于皇初度

台城杨柳向春舒郢客浮家感岁除学道近怀齐物论逢人偏爱絶交书孟郊无地能驰马李白多才但钓鱼几度逢君双鬓改满头风雪赋同车

又

相离相见句同新憔悴青衫又此辰八载弟昆愁里事十年名字客中身天教磨蝎传才子客许犹龙叹故人浮世好须沈醉过陶家樽酒莫辞贫

又

中宵自起坐渔矶风动高天指少微知尔独行应不悔感余相念未全非一时浪忌称衡鼓四海谁添范叔衣寂寞着书堪永夕天涯岁晚闭柴扉

又

葛衣高步向西京褭刺长干踟躕行老去不侯非骨相乱来多难属才名酒人竞拜黄河曲歌者翻愁白雪声怀古漫伤年岁逼马周前此未公卿

又

离居终日赋愁霖拥鼻无聊但苦吟谁肯以贫原尔傲不堪将浅遇人深老依绣佛悲虚鉢路失空山哭断琴泪落一灯谈往事琅琊当日果知音【谓雪蕉也】

又

雪满长干客路寒春蔬犹剩七辛盘穷怜酒醉难消福狂笑吟成胜拜官新岁阶前疎鸟雀故人天上足鸕鸕头颅尚有星星在指点青云且自寛

长桥月下听吴人度曲

长桥烟影见残荷清夜红箫赌艶歌一片流云随客住六朝明月奈人何谁家独掩青团扇此地重携金叵罗莫说开元曾较胜过江桃叶已无多

芙蓉别业为定九题

少文高卧独成游小筑柴扉一径幽老鹤露多青桂晚凉蝉风紧白榆秋酒从锦瑟人边醉花
向金荃句里收欲把鵞溪闲点染辋川名姓好风流

又

拥鼻还为塘上行蓬蒿秋尽不知名草堂旧雨过苏涣木榻新灯照向平八月蟹螯催酿日几
家蓑笠过篱声墙东近事多难问闭户期君且听莺

送孝威归吴陵

京雒风尘不耐看送君五月发长安路归南国花初落梦到西山雪正寒燕市壶觞秋寂寞吴
州灯火夜团圞丈夫莫更随蓬转翘首云霄在羽翰

送人望归里

帝城骄马竞鸣珂才调如君返薜萝沈约情多原善病荆卿年少已悲歌黄河水涨看渔艇白
岳天寒拥鹭蓑自恨故乡归未得几年垂柳忆灵和

送亭彦归樵李

故人入雒转飘萍苏李河梁别袂青禾黍晚烟弹筑市芙蓉新雨落帆亭谁开鸂尾迎王粲每
忆龙头属管宁君去乡园何日返蓴丝应不羡侯鯖

杂兴

一望银河夜渺茫汉家宫阙锁秋光传闻高阁横鵞鹄竞买明珠待凤凰独树金茎连碧汉双
栖翠羽出炎荒人间桂斧空惆怅只羡萧何在未央

又

司马门前列骑横楼船万里赋长征黄金装剑南蛮使赤羽移屯北府兵海国虫沙多变化江
湖鳬雁亦生成乡园已自逢摇落极望愁听战鼓鸣

人日陪仲生芝麓两先生集龙槐庵

双树精蓝隔凤闌灵辰载酒逐华轮登台碧草犹含甲入馔黄芽已荐辛四远寒峰山有雪一
痕纖月气初春葛疆烂醉山公醒池上徒歌白鹭巾

送家右舟归里

才名久愧说平舆春至徒怜去雁疎紫佩乍分张氏剑黄金犹载马卿书满船山色看东岳一枕河声下北徐到日彩衣休久恋枚皋词赋在彤庐

陌上喜遇思旷即留止宿

离鸿飞雪各天涯下马惊呼见友齐旧雨三秋空短褐西风万里老麻鞋吟残幽桂迷仙岭落尽官槐过御街木榻不嫌尘迹冷一灯凉雪掩松斋

偶兴

滦河风急渐成冰千里携家感废兴花落平台闻过雁月明南苑见调鹰仙人夜泣金铜柱帝子宵悬锦绣灯几度醉骑骄马上白云红树见昭陵

姜绮季招同芝麓先生圣秋伯紫友沂诸同人社集寓斋

红蜡青觞坐晚寒酒徒环倚玉阑干天连埜雪浑无地月射晴冰欲起澜系马门前人正别啼乌江上岁空残送君仗策南州去万里归心托羽翰

送存永之大梁

世事悠悠未易论送君每复对离尊七千路外存师友廿四风前别弟昆笑指归鸿辞越峤醉驱羸马过夷门凭将今日梁园句一慰江淹别後魂

呈家梅村学士

开元才子蕊珠仙曾向蓬山领衆贤宫蜡送人归制院御笺陈事入经筵湘东丽藻三枝管江左繁哀七宝弦白虎诸儒方奏赋风流谁许并花砖

秋日马上见蜨

闲向城南白鼻騮玉腰惊出道傍花秋风渐老滕王画晓露新沾越女纱满地碧蒿横故垒一时黄叶过山家汉宫金粉都萧索送眼徒怜锦络斜

送家鱼山司李浔江

碧障遥通勾漏滨孤臣远去拥雕轮题诗酌水吾家事载石还乡异代人鸿雁逼天山桂晚鷗鹄啼月岭梅春独怜京雒相思泪不浣机云袂上尘

送芝麓先生奉

诏东粤

天门绦节映花明

诏下西台叱驭行元老一时争去就远人万里解逢迎伏波壁垒珠崖古清献图书昼桨轻止
驾无能空折柳扬亭谁识旧侯生

晓日瀛台

武皇别苑拟蓬莱太液波连玉女台贝阙九层云雾拥牙旗十丈早霞开仙人绦节吹箫下神
女青蛾倚楫来珥笔暂从桥上望百花春露点袍回

仲生夫子招游西山初至摩诃小憩

胜日芳原啖早莺玉壶瑶瑟快幽情绕城御柳垂鞭过夹路繁花送酒行断础寒苔春乍合小
窻残照雨初晴山僧已少琴聪在徙倚何烦问姓名

雨後入香山

白鼻蹄轻踏软沙雨余相趣过山家千寻絶磴凌寒木一道飞泉响落花鹿苑经行留碧藓凤
城回望起丹霞不知山色今多少但信空门未有涯

来青轩坐月

此地曾经翠辇停謁来深夜访山灵竹房扉启钟初絶木榻尘开酒乍醒露下诸天孤月白云
归大壑万峰青人间兴废浑闲事欲向生公问杳冥

卧佛寺

风榛露莽傍禅牀卧佛人传旧道场尘劫梦回原易厌香林乱过亦全荒猿乘夜月升高坐鼠
啸春陰走废廊犹有老僧能问讯袈裟红绽满头霜

玉泉道中

碧岩遥望见嶙峋举策空劳问古津宝刹千年成往事银河一曲属仙人芳林积雨回骄马蔓
草萦春锁石麟多少荒凉难极目斜阳无语送流尘

同友沂秘阁对月

紫垣霜落斗初横建礼门高逼太清月射琉璃天五色风吹环佩月三更青绶护梦经寒薄红蜡成花到晓明颇牧只今谁得似汉廷空忆弃繻生

退翁亭小饮

篮舆日涉兴难穷独扣山扉过竹丛谁把寒谿招漫爇尚留深谷号愚公飞觴送酒春蔬碧归骑笼花晚卉红不是夕阳催百鸟接?倒着向东风

喜玉润玉少至自广陵

移家新近郭隗台蒋径先逢二仲来字读故人千里札酒衔离客四年杯轻风过砌翻红药晴月当窗照碧槐莫羨市楼堪倚筑汉廷今已用邹枚

送陈昌箕下第归闽时以紫晶章见贻

北固风前一寄书十年犹自困樵渔多才莫倚中山管失路空怀下泽车醉客留欢金菡萏美人充赠玉蟾蜍凭君珍重凌云气狗监曾闻荐子虚

次酬介公

雁堂清暑旧淹留一听微钟忽四秋白石有歌怜甯戚碧云无路忆汤休空香夜散花盈鉢片偈秋成月满楼闻道经行多寂寞虎溪何日共遨游

白鸚鵡为芝麓先生赋

珠江南渡使星驰陇客全非旧羽仪缟袂夜寒思吉了玉笼春暖诵摩尼频看花放开云母数唤茶来恼雪儿不是主人怜解语奇毛端畏衆禽疑

赋得四月清和雨乍晴

春风欲尽楝花香海燕衔泥入射堂微雨洒红成径路新陰分碧到衣裳江山对酒逢高会樱笋行厨忆故乡最爱夜深清影乱一轮明月照绳牀

天坛树下闻黄鸝声

灵宫清敞碧云低栝栢陰森万木齐路入芳林孤骑缓天逢晴日一莺啼春簧娇弄初迁谷午磬惊飞又隔谿却忆故乡千树柳金衣常只傍隋堤

晓入瀛台纪事

瑶台高傍玉宸居蓬水环流映绮疏壶里明霞金螭镜中香露碧芙蕖银河织女朝裁锦紫府羣仙夜校书日夕鸡栖徒佩笔上林谁是马相如

送玉林和尚奉

诏归大雄山

才奉

龙纶拜玉墀乞归坚忆白莲池东林道重辞

銓日北阙深恩解衲时坐下真王参栢子山中法侣望松枝应知

圣世求弘济愿为苍生祝大慈

移樽望仙楼对雨喜紫来後至

紫阁凌虚栢栢齐娇莺愁啜隔林西不因避客携金縲谁意寻仙上玉梯南苑树连双阙暗西山云接太行低翩翩一骑青衫湿美尔先沾锦陌泥

雪中舞鹤

寒水一夕缀空林皓羽何辞暮霰侵絮拥谢庭方顾步花埋缢岭欲高寻蹁跹素袂珠尘散整顿霓裳玉圃深自是半生同皎洁白云难抑九皋心

咏水上美人

寒处偏怜皎洁多玻璃净滑试纈罗宓妃顾步浑无影湘女回身不起波岂有文鳞沉玉浦莫须灵鹊渡银河亭亭絶似芙蓉干斜倚菱花镜乍磨

入署拜椒山杨先生祠

排云宁计九重賒犹剩清风满署衙触佞角应同獬豸驱奸胆不借蚍蜉当年臣节何须补异代

君恩更有加欲谱遗忠难握笔先生原是古夔牙【时奉命谱椒山传奇】

又

留将正气与乾坤俎豆千秋此地存
筹国不堪言已验捐驱益信舌难扞
谁夸龙比为僚友已见鸾嵩少子孙
萃藻托交吾未敢

圣朝无事赋招魂

遥和阮亭迷楼怀古

寻秋当日怱同游此日看诗忆故丘
彩艗笙歌荒壠断玉鈎花草暗泉流
隋唐旧事云千堞今古闲愁雨一楼
为报子山休作赋谁家风景剧铜沟

又

玉箫明月迹全荒几度临高揽客裳
南去江声通璧社西来山色尽崑冈
乌啼老树春风晚萤散空田夜雨凉
一曲清歌劳感慨那堪游子更柔肠

又和阮亭访大明寺

潞河南望隔江烟七岁清明冷石泉
何处楼台留梵劫有人词赋倚吴天
残花着雨迷荒壠流水逢春入废田
客梦一时艰去住凭谁同问宝公禅

送近龙归省

五色莱衣染御香春明门外是河梁
暂辞渤海尚书省归拜汾阳异姓王
岛屿金戈民力尽河山铁券

圣恩长趋庭倘问中枢事愿助前筹靖玉狼

送张大光金宪视学蜀中

谈兵郎署几年同负弩重看蜀道雄
已信文翁多异政却怜譙秀少遗风
蚕丛驿路青天外杜宇江山夕照中
再过锦官烦借问浣花谁夺彩笺红

再游丰台

城西花事未全稀争访扬州金带围
晋国楼台惟绿埜谢家宾客尽乌衣
飞残野蝶仍相就游惯骄骢独认归
邸舍一樽聊共饮绳牀还对暮蟾辉

寿邢太夫人

韦家事业石家恩共庆萱花贺在门锦轴两朝封大国彩衣三世见曾孙云璈雅合分仙部寿酒遥知辍御尊自有羹梅当鼎养不烦雪藕送崑崙

红鹦鹉同吴州咏

蒙茸花羽见应稀日向雕笼弄早辉荳蔻香浓长独睡珊瑚恩重忍思归栖当绦幄知深浅语近朱楼少是非一自山头逢郭浩陇西枫叶尽沾衣

送文漪从军

风急卢龙塞草霜故人一骑出渔阳谁能更护诸侯使自许相逢侠客场青海射雕金箭落红楼系马锦衣香江东公瑾真年少莫误春闺盼绿杨

清明日马上看西郊新柳

塞北春迟异故乡清明杨柳尚轻黄偶因旷野移芳櫺初见柔条系客缰村店寒烟新出屋市桥官树旧成行低徊却忆隋堤路多少啼莺弄早簧

题奕先伤秋赋後

靡芜山下绿成丛团扇多情事已空神女飘零辞夜月故人憔悴为西风芳心已逐流莺去薄命徒怜换马同却笑相如真薄幸茂陵容易别惊鸿

雨後新凉

曦髮园林暑不支喜闻山雨过阶墀云陰北岭推窗见气爽南轩拂簟知润滴蕉光沾鹤背香残花片挂蛛丝诗成恰直鸣鸠歇犹是斜阳未转时

送井铁

风吹残叶下桑乾送别临岐更驻鞍马市金残台已废酒楼人散筑空弹黄河有路坚冰合白雪无声古木寒此去灞桥频北望新诗应爱锦囊寛

次韵秦淮四首

桃叶门临罨画溪门前乌柏绿陰迷鸾因并舞常耽睡莺爱成双忍独啼绿水歌微金管细博山香静绣帘低当轩素手盈盈出争道侬家旧姓西

又

一带朱楼映紫霞段师家世教琵琶碧窗晓腻鸂鶒粉红袖春娇蛱蝶花
边新水越娥纱当年记得吹箫曲明月宁容薄雾遮

又

面面疎棂傍水开赏心亭下足徘徊游人自坠金鞭去商女曾歌玉树来
五里雾迷煎甲火百枝灯照玩春杯小桃一向东墙发惹得游蜂日几回

又

垂杨历乱懒禁持乳燕啼莺顷不离月下有心寻舞榭落花无力惹游丝
高楼听雨帘长下短笛临风榻任支惆怅江关萧瑟後子山词赋可相宜

绿珠井

丽人生长共梧乡谁道杨环胜阿梁为昔高楼花委地至今寒甃水生香
银牀夜月生苍蘚金谷悲风舞白杨一曲新声传宋褱顿教横笛怨凄凉

我忆

春日春情结胜侑东郊景物恣遨游草堂千里紫叱拨柳色一声黄栗留
花落未落惜别酒人醉不醉闻闲讴我忆江南正如此萧条京国今何求

忆友沂不至

芙蓉折寄有前期青翰临秋信转迟直以久离长梦见可堪多难益相思
燕台马散空怀古衡岳鸿归定赋诗莫怪安仁近疎懒君来看取鬓边丝

又

兄弟情亲十几年当时踪迹两依然谁教别恨能如此总计欢情不似前
北阙寒云时入望西园明月夜常圆旗亭尚有黄河曲惆怅双鬟在舞筵

咏冰

皎洁同怜玉一方长安大暑出陰房杨家酌酒多围席白傅酬诗不计筐
雪已无肤全露骨月方成魄未流光缘寒独得君王重寝庙晶盘映蔗浆
【杨国忠张筵以冰围席香山晚年以冰换诗】

感事

无凭清梦绕天涯支枕宵分思转加半夜风灯窥案鼠五更霜柝过檐鸦饱经世故贤张翰冷
閱交情忆叔牙自是青衫堪下泪不须江上听琵琶

又

土室藜牀夜复晨深秋兀兀转伤神敢言磨蝎欺才子长愧穷鱼累故人碧草渐枯愁里色黄
花不醉病中身笑他朝槿随荣落何必风吹上绣茵

又

京雒緇尘改素衣每堪时事与心违生来食蓼浑忘苦梦里藏蕉久悟非湖海有人高卧榻江
山何地稳渔矶新逢隣叟曾相讯旧隐垂杨已十围

又

丛桂淮南落绦英飘蓬翻悔计无成十年未许归王粲五岳何缘到向平倦极祇留书作伴愁
多时借酒为名丰城剑气谁能识夜起闲看斗宿横

寿家彦升七十

紫芝歌远德犹馨池草于今有岁星岷岭客逢穿後屐石渠人授读残经雒中父老耆英社苏
氏文章族谱亭笑我雁行曾未识一觴徒欲寄仙醺【彦升时刻家谱】

寄怀广陵诸同社

茱萸湾下雨如丝彩鷁横江别夜知小草误牵游子梦落花重失酒人期黄云斥堠迷边笛青
海楼船拥战旗惆怅乡关消息断秋风白雁晚来迟

又

别梦支离夜当归客怀萧瑟倚园扉楼中绿鬓人相对台上黄金事总非有客浪投燕市筑无
家难采越山薇他时海畔寻渔叟莫遣羣鸥背我飞

七夕立秋与闺人小酌听雨

玉汉云深转素商曲房瑶瑟倚明粧只言风雨三秋剧却爱星辰一夜凉乌鹊影回桐叶晚鸳
鸯梦湿藕花香漫须更鼓乘槎兴金钿银盆忆故乡

上元後一日同子唐饮右舟寓斋即赠孙王二姬

晴雪初分火树光天涯深夜倚明璫朱丝试笔春毫暖红烛摊钱晚袖香小病似怜花熊浅微
嚙偏爱月痕长无端却听官街鼓走马还归典鷁鷁

右舟友沂挟琴姬过集寓斋时楼冈沧苇皆後先枉驾分赋纪事

帝城春早雪葳蕤三径初开屐齿随花欲恼人刘梦得月能同客庾元规背将银烛藏红豆停
却金卮看翠眉燕市此宵称絶胜更随飞盖记南皮

髯孙索年少遗墨

丛桂岩空晚鹤呼隰西当日老潜夫独留白石题高士尝写青山付酒徒笔塚已封芳屐冷书
囊犹伴旅灯孤多君为启明珠篋割赠西台恸哭图

中秋次米紫来韵

清商瑟瑟动高天晚叶还看桂树鲜撒烛苏公同此夕观涛枚叔又何年云流素影窥珠幌露
泛晴香入宝弦贝阙夜寒徒骋望霓裳谁复舞蹁跹

又

秋半银蟾正吐华空清入望淡明霞江头横槩徒怀古桥上吹箫独忆家紫塞霜高闻过雁红
楼风定绕飞鸦谢庄一赋堪凄絶何必身乘碧海槎

送鹤问

几年漂泊共长安送别如君意万端华髮可知游宦久绨袍不暖旧交寒云深碣石鸿书远雪
下夷门马迹乾犹喜陈蕃有悬榻他乡文酒足清欢

又

三匝求枝迴未安近来时事叹多端愁中作别难成醉闰後逢秋早觉寒买马台前金已贱画
龙图上泪空乾蛾眉有日当明镜且尽离觞此夕欢

哭友沂

秋老空悬贯斗槎岂知埋玉向长沙徒怜才子多无命始信浮生尽有涯旧事不忘丹桂树虚
名实误紫薇花高堂白髮犹漂泊何计为君慰暮华

又

南冠累累泣孤臣那更惊传远讐真半万里中双眼泪十三年内一家人嵇康被忌多因酒任
昉疎才转致贫从此山阳横笛处暮云春树尽沾巾

怀广陵同社诸子

作客金门岁月催每因佳日忆追陪青帘厌酒吴姬小玉笛临江越客来梦醒不堪闻落叶诗
成徒欲访寒梅只今羽猎求才子词赋何人继马枚

冬日怀玉少时客荣河

醉倚高台旧酒楼故人西望隔蒲州君归故里犹为客我对寒云始欲愁燕塞九秋凉雨落汾
河十月断水流青氍未必能谐世索寄双鱼不自由

送季沧苇归省

圣朝多暇可抽身拜庆南归豸绣新数卷诗篇留好友一囊谏草献尊亲门前折柳当残雪江
上逢花及晚春送客此时还自笑十年京雒满衣尘

赠松林寺僧

十年京雒几来游开士相逢雪满头犹记故人曾借榻独怜羁客又登楼花前对酒黄鹂晚树
下翻经白象秋惭愧子虚徒寂寞欲将心事问汤休

秋夜雨中言怀次紫来韵

灯昏红壁影漫漫倚遍高楼十二栏玉塞柳垂霜信早银牀苔湿雨声寒三年索米乡书远千
里还山客梦残莫指燕台伤往迹蓬蒿埋没已难看

又

车门旧雨少过从支枕宵分响更浓九月凉风欺敝褐一窗寒叶打疎钟宫开碣石空求骏剑
忆延津可化龙幸有南华齐物论不须惆怅为浮踪

送家方漣时以言事左迁

杨花榆荚满天津兄弟伤离况晚春当代人才惟卷舌寒家时论有批鳞云高白岳三花句路
稳黄河一叶身莫便早图安石卧转环应是起埋轮

送沈国望之任东瓯

绦帐堂前旧两生云卿今已出西清年年送客逢人笑处处看山羨此行雨过好歌传箬岭春来长啸坐莲城烦君更续秦郎句淮海莺花剧有情

梅花

西湖无处访遗民老树犹看照眼新全胜百花因耐冷才开一萼已知春天清絕壑尘难到水冻晴溪影更真却忆故乡何水部年年东阁为伤神

许天玉赴宜州令

月旦声华四海知西岩分綬岂嫌迟路经陇水难为别人近秦州好赋诗旧绩争夸刘仲偃清风常爱许圉师临岐更索吴船句怀袖相思对酒卮

又

羨君风雅自多端饱看西山始赴官边俗近羌浑尚?才人作吏且宜寬愿教驯雉随鸚鵡闻道栽花尽牡丹执板都亭逢谢客寄言池草正阑干【谢客谓右舟也】

初度示内

手把陶家金屈卮眼看潘鬓渐如丝酬恩不易惟存感射策无成亦自疑丽藻敢矜鸚鵡赋虚名实误凤凰池五陵裘马空相识笑杀东方割肉时

送家长庚奉使安南

圣朝典礼被遐方特借星槎出玉堂古贝林中宣慰册大罗城里贡名香还家賸有相如弩报国宁忘陆贾装独有水曹何逊在伤离空自折垂杨

又

祖帐羣公列玉津共看天马出埃尘科名早冠廷中士丰采还惊海外人铜鼓山川开旧路石门歌舞拜陪臣凭君更和云卿句遥慰长安别梦频

送友人南归

丰城五载剑光沉许报平安果有今数转雷霆知帝意频劳风雨识天心并州穉子还骑竹邺下词人更入林一棹春江烟水濶莫愁何日共幽寻【狱定屡经量减闽谪时久旱或雨廷讯

复值异风】

题春晖堂

研山园畔一茆茨犹记仙翁洒墨时翠幙柳风丝嫋嫋赤栏花日影迟迟逍遥直拟徵君馆幽寂堪吟刺史诗珍重江城柑酒在过江无地着黄鹂

送松林寺感旧次芝麓先生韵

祗林重到恨凄凄絕似桃花使客迷旧路已经添碧草故人无复对青藜风悲燕市骅骝散日落长沙鵬鸟啼即此河山诚邈矣黄罇宁待酒重携

寄程石门

频报双鱼系客槎多君情好及天涯郎官自恋三升酒仙令犹栽万里花莫为折腰秋忆秫可堪割肉晚还家相思恰似燕台月长向滇云照落霞

紫来于津门遇盗慰之

清风千里一归航舢舨宁期遇陆梁岂有金装烦祖约只缘书画累襄阳市中屡报探丸客殿上空求执盖郎如此隐忧应不细士衡何必问行藏

偕友人吴船小饮

幽窗晴月破春云小有盘觴及论文快事直须穷五夜伟人何意集三君红灯艷影藤萝色白雪寒铺荇藻文共道此宵非易得十年踪迹几离羣

送石潭归里

雪尽垂杨已渐深临岐折赠欲沾襟三同身世兼忧喜四杰才华半古今严譴原非

真主意贫归长系故人心东门一送飞旌远庄舄凄凉有越吟

送善伯归翠微峰

长安阅尽不如归送尔囊书返翠微乌谷老梅香满帙易堂寒竹影侵衣梁生妻子同田舍陆叟宾朋共钓矶他日池边看杨柳可容萧育暂相依

又

留得新诗出帝都掉头吾自羨狂奴三年客兴同琴酒一日归装入画图颇累微名幽事少欲成高隐别怀殊不知坐啸东房夜曾念吴船旧雨无

南楼晚坐偕德迈雨徵听玉先度曲

高阁平临绿野堂倚栏舒眺一苍茫檐花向晚垂凉月宫树迎秋动夕阳闲点红牙听水调醉歌乌帟舞山香寥寥李白今千载谁信狂夫老更狂

集六客堂

老人星散已多时遗构相传或在兹阶草绿迷来去径檐花红入浅深卮可知爱客能成癖也信为官不废诗高会一时称絶胜苏张何日更相随

爱山台月夜同楚畹子寿弘载辰六燕孙

郡台高峙弁山阳有客来同酒一觴夜静吹灯开画阁月明横笛倚绳牀四围屏障芙蓉翠满座裳衣茉莉香醉起凌虚问河汉不须团扇送微凉

又

免苑词英气若虹此宵都向画图中不分上下元龙榻共爱雌雄宋玉风彩笔干云浑未老晶盘漾月迴疑空当年六客依稀见最忆城南桑苎翁

太湖

春余闲放雪溪船乘兴湖滨静倚舷一带柳花吴淞雪千林橘树洞庭烟游姬荡桨闲相荅渔叟摊蓑醉欲眠赖得家家膏雨足儿童应许庆丰年

文昌阁谒筠塘陈公遗像同澹心作

朱薨百尺倚遥天遗爱曾经六十年故老漫夸人似昔当时真觉吏如仙桑麻原野秋闻鼓罨画湖山晓泛船苹藻托交重自感几回惆怅白云边

沈常山看宋时三桂

金粟婆娑倚暮霞寻秋因得过山家西湖风月谁为主南宋山川独此花少室三株空磊落广寒百尺任横斜习池一醉情无限归路香随白鼻騊

孝丰即事

方輿曾记古防风问俗来乘白玉骢山郭静开秋色里人家杂住水声中竹林绕涧园园翠栗叶经霜树树红赖得长官能爱物一时弦管徧新丰

又

城边流水似襄阳秋尽偏教逸兴长人踏乱红孤径外马嘶寒碧小桥傍画熊幡动沿溪影铜鹄鑪薰夹道香为语五峰诸父老凿山休讶谢公狂

灵岩

秋尽珠宫冷薜萝偶将车马暂经过清霜叶上丹黄半斜日峰头紫翠多山叟乞诗争笔墨野人遮道看笙歌不知鹄尾薰香处把似髥苏且奈何

栖贤看梅次燕孙

春初择胜过郊垧十里栖贤树下行香不藉吹无远近雪因能淡有陰晴何须梦後心方冷但觉来时眼倍明一笛斜阳微雨过谁堪归去不关情

龙华寺

几年车马抗尘襟乘兴来游祇树林满院碧烟疑晓雨入门香雪扑春阴半岩积素寒犹浅一曲流觴味转深归去郡斋应有梦虎溪何日更栖寻

丁未二月以事过雉城邑令叶君招同江在湄宗鹤问诸友罨画溪中登含清阁

行春偶过城西路得到溪边孺子亭一水绕从花下碧千峰齐向雪中青逍遥不觉浮兰桨卧起真如寄画屏应与湖山重有约武陵三月访渔汀

即席次见末

江湖偶得鸟鱼闲终日怀人对碧山雁羽离情方接席蛾眉佳句早推班樊川歌舞繁华後雪馆楼台杳霭间高会未残仍有约扁舟乘兴过苏湾

宿玄妙观得风字

无端旅宿蕊珠宫薄醉情怀孰与同湖上水添三日雨檐前树闇五更风秋将到处单衫觉梦欲成时半榻空犹赖故人相对语一声清磬蜡花红

湖上和方欧余先生

三年今夕住湖滨
匏系从来叹此身
杨柳多时风渐起
藕花香处月初新
高山欲响清霜操
佳句如餐瑞露珍
十只画船何处泊
直教西子笑劳人

次楚畹韵送阮怀游闽

故人一棹有心期
上客偕来忍复离
直爱玄晖同倚阁
可堪高适早能诗
弹琴欲送归鸿远
觅字惟凭独鹤知
看到武夷山色尽
水嬉相待未应迟

爱山台同愚山作

怀人长是问平安
郡阁相逢得尽欢
秋日碧浮苔水净
晚山青接敬亭寒
高台秉烛云初合
奇句当杯客共看
只恐骊歌催别棹
莫教容易倚雕栏

再次前韵送愚山

作客如君未易安
离觞虽满不成欢
云飞弁岭诗人去
叶落樵溪别梦寒
荔子直须随意啖
梅花不必尽情看
何时最是相思处
明月高台十二栏

闻瑞以诗见寄次韵酬荅并讯茂伦

栖贤霜落万枫凋
平子行吟不自聊
双鲤寄愁诗渐老
孤鸿破梦酒初消
凭栏韵海逢新月
弄笛垂虹咽暮潮
闻道虎头酣唱好
一编冰雪向谁骄

程石门至自滇南喜晤赋赠

湖上苔花拂水新
滇云飞节弭征轮
十年榻冷三更雨
一夜杯香万里人
别後军书劳屈宋
归来儿辈识荀陈
细看知己还相慰
梁月曾教入梦频

春日藕庄庵作

精蓝小构俗尘删
长为先生昼启关
穿户一湾环翠竹
开楼四面入青山
春城雨过桑麻润
午院香清鸟雀闲
不是东皇容漫叟
肯教高卧对烟鬟

藕庄庵招天石

春时爱客赞公房
小院人稀清昼长
几日忽惊荷叶大
一身都惹蕙兰香
因添白袷还知瘦
为写黄庭转觉忙
取酒更邀摩诘过
青山城角有斜阳

寿王烟客奉常八十

门前画戟欲成丛客望东山比华崧秦隶独传王次仲汉官犹记叔孙通彩衣捧杖多才子宝阁藏书自上公但是人间俱第一不知蓬岛更谁同

登雨花台【在洞庭翠微峰侧】

萧萧白雁晓霜寒曲折丹枫路几盘一片青山浮震泽十年明月忆长干水禽带日飞花屿野犬惊人吠药栏欲放画船归未可西风留我宿层峦

登微香阁步归元恭韵

步步青山面面湖湖光山色共萦纡千峰总被白云断一径全将黄叶铺鹤髮仙人能独往乌衣子弟更相扶登楼却笑狂奴态醉墨淋漓旧酒徒

集许玉晨斋

嫋嫋烟波十二鬟高人家住绿杨湾蓴羹入馔乡心美花药盈庭客思闲岂是林宗曾遇雨只怜康乐爱登山卜居何日同桑苎风日期君共往还

二峰庵看桃花

篮輿偶涉到香城伏虎岩边眼暂明二月最难迟日好千林都似晓霞生不因古径无人迹谁信穠花隔世情拟向刘郎问消息管弦吹彻紫烟横

中秋日沈常山看桂归泛碧浪湖得箫字

寻幽不觉晚峰遥红袖青衫共画桡秋树向人还六客古香留月已三朝闲呼鸥鹭同瑶席醉许鱼龙听玉箫今夜相思在何处乘风欲看广陵潮

秋日登学士山得歌字

断云寒树满岩阿今古登临我再过词客似同山水在酒徒偏向乱离多风吹白雁秋如此天近黄花晚奈何搔首斜阳正愁絶泰娘无赖复高歌

九日同黄九烟暨诸子南浔秋泛

佳会相携上木兰南林秋泛水云寛由来此日莫轻负向後欲游应渐寒秫米登场家醞熟蓼花吹袂客衣单此身虽健干戈满救世须多七返丹

感旧篇

孙廷评新斋先生

廷尉清风孰与论生儿犹有仲谋存山中芝老先生节篱下花开旧主恩独许邺侯夸小友长教漂母饭王孙而今杖履凄凉甚元季相看益断魂

赵尚书洞门先生

孔鲤庭前事未忘尚书清节动秋霜篋中剩有三千牍身後从无八百桑腹痛远难将酒过心知先已恸琴亡飘零两代归何处燕子春来几夕阳

吴学士梅村先生

江关萧瑟古今愁宗袞文章八代优雅志岂须题墓见余生端为着书留乱山短梦传佳咏落日高台忆旧游青史飘零华屋冷羊昙空自哭西州

赠沈秋涧道士

麟士高秋近若何流霞飞观隔烟萝闲游紫府长骑鹤自写黄庭不换鵞半院蕉陰研露早一牕梧影得秋多人间蛩触方酣鬪总向图南梦里过

赠东岩禅师

旅舍偏宜乡语闻与师相见好殷勤灯燃古院三更火衲补家山一片云挥麈不嫌同谢客烧猪何必待苏君道人合是忘情侣转笑情多不易分

偕辰六及大儿二儿虎丘探梅访扶辰汪子不遇分得明衣二字

东风吹客意难平蜡屐寻芳取次行野寺云深羣鸟散春山雪净一花明绮罗不断伤时眼草木长关吊古情却怪汪伦能寂寞修琴何事入江城

又

一片寒香欲染衣老人扶杖几忘归莺花渐向三春好歌舞宁知六代非逋叟醉来瑶笛冷真娘别後玉钿稀罗浮有梦凭谁到只恐浓阴隔翠微

回舟纪事

晴霜朝落楚江苹青雀东风懒问津修竹岭边逢盛度桃花潭上见汪伦当筵兔管千山老入座蛾眉一镜春城北徐君应最美共怜狂态总天真

陈伯驹黄处安招同曹秋岳先生暨沈仲连顾云美诸君子集虎丘月驾轩

海涌峰头昼影迟旅人偏与醉相宜薰风楼阁花千树斜日河山酒一卮金虎迹荒怀古处水犀兵隔忆乡时凭栏各有情无限走马宁嫌倒接？

又

河朔英雄彼一时天涯聊此畅离思干戈满眼词人老丝竹关心旅梦迟栗里放怀惟爱酒杜陵伤老不忘诗莫言小集诚容易何处乾坤更习池

又

离合宁烦象纬知快游惟合拟南皮六朝胜事高人社四海名山短簿祠白鸟往来随倚檻苍生多少看围棋酒酣欲问生公石明月秋风复几时

看奕轩偶成

几载栖迟赋遂初伯通桥畔闭门居渐能解事忽将老犹不畏穷偏着书报国恨无千铁骑还乡曾佩一金鱼丈夫失路寻常甚分付黔雷任所如

又

漫郎聱叟足平生絕意今年少送迎自分无才甘稼圃不知何事合公卿藏蕉梦向闲时悟种豆歌从醉里成惆怅青编半零落几人犹自恋浮名

又

传闻近事复多般甬里先生只闭关屋角檀萝非异国人间桐栢是名山孰看身世唯宜醉便作神仙且自顽只恐求羊更来往移家深向白云湾

又

天禄楼台总路尘归来犹及五湖春使君自是英雄客我辈宁为富贵人听水独拖班竹杖看云时坠紫荷巾平生况味谁能识漫拟当年贺季真

又

桃李无言亦有蹊吾侪宁复计东西聊栖孟德三更鹊莫听刘琨半夜鸡忽露壮心因酒动偶寻闲事被花迷南华独笑庄周误不信人间物可齐

又

携家惟剩鹤相随一笑花前问阿谁
偌大乾坤容不得无多岁月亦奚为仙方岂与蜉蝣觉
奇字难教獬豸知白首青山空叹息欲浇杯酒恨无期

又

车门旧雨隔青萝白石敲残夜和歌
天下可儿原自少古来怪事亦何多
蚁能骇客还相鬪雀肯依人未忍罗
眼底岂堪吾党在只宜西塞着烟蓑

酌朱望子

到门春树绿芊绵高士船从岸上牵
别後每同花入梦乱中长用酒为年
渡江莫叹王夷甫蹈海谁知鲁仲连
多尔新编投玉案杜陵今雨各依然

宿徐原一憺园

鸡黍情深不世缘登堂何意转留连
陶潜得酒浑忘戒杜牧逢花又着颠
池里塙痕眠夜月楼中山翠滴春烟
与君更有平原约六月科头坐辋川

程益言邀饮虎丘酒楼

新晴春色满渔汀小憩黄罇画桨停
十里水环花市绿一楼山向酒人青
绮罗堆里埋神剑箫鼓声中老客星
妙曲高歌情不浅吴姬莫惜倒银瓶

又寄益言

中年来自惜韶华春尽停云兴转加
乱世藏身怜一叶美人浮宅近三槎
画船桨泊鱼鳞浪酒市楼遮燕尾霞
总是相思最深处每堪张翰正无家

过顾云美塙影园即步移居四首

高士幽栖水竹边双扉闲扣即欢然
常开蒋诩花间径共坐张融岸上船
穿叶芙蕖经雨长弄丝杨柳受风偏
萧疎最爱蓬蒿满莫道雕栏不似前

又

一到高斋一眼明多君位置得闲情
谁题门巷称通德自写经函号净名
支榻正逢溪鸟下开牕时看岭云生
也知陵谷须臾过塙影何当似旧横

又

老树犹存隔代枝
衡门泌水足栖迟
闲从栗里频栽秫
耻向桐江再下丝
幽桂一丛看绕砌
芙蓉三面不编篱
曾闻红豆龙门叟
长把新诗说项斯

又

虎阜南头曲径迤
幽人偃仰绿阴垂
独收北海倾巢子
爱诵西台扣石诗
地许浣花留杜甫
天教学稼老樊迟
只怜乌鹄无归处
犹对疎星绕一枝

庵为徐松之作

庵闻说是仙居
水竹当年画不如
杨柳阴围千顷宅
藕花香护百城书
风流自昔归摩诘
节孝而今隐仲车
我欲相寻同钓叟
未知何处有鲈鱼

汪扶晨招集寓斋分韵

作客宁言心赏违
筵开河朔爱晴晖
蚁浮金醖分花坐
萤傍罗裙拂草飞
几曲清歌人尽醉
一身凉月客忘归
不堪更忆扬州梦
空笑当年杜紫微

偕菊人澹心寿平集念祖堂

每到君家即赋诗
林泉真与散人宜
渔樵天地论交古
烽火河山对酒迟
数就桐阴移晚席
旋寻莲子度秋池
江关萧瑟何须念
吾党行藏世未知

又

秋到吴山送早凉
共携尊罍向林塘
藤萝三面照流水
荷叶半边铺夕阳
满眼画图分北宋
伤心诗句入南唐
吾侪聚散关今古
何意生涯是醉乡

林天友别驾招集平远堂

犹记春归共听莺
重来偏喜桂华明
山河影在光宁减
岁序情多兴倍生
半夜松杉如雨过
满堂丝竹为秋清
主人刻烛先声叟
却愧探骊句未成

雪中饮唐朗思寺寓朗思谈及吴兴旧事

雪馆论交客思频
相逢雪屋倍情亲
三更浊酒春前影
四壁寒灯梦後身
父老未忘骑竹事
江山犹识种桃人
葛疆倘遇君归棹
为报霜华两鬓新

九月初八夜归鸿楼对月戏作艷体

东南皎月纬河横白雁天高夜几声染墨暗吟香壁字隔灯遥听画楼箏
他乡红蓼三更梦明月黄花一岁情欲效长房恐无术江关愁杀庾兰成

林蕙堂全集卷十七

卷十八

<集部,别集类,清代,林蕙堂全集

钦定四库全书

林蕙堂全集卷十八

湖州府知府吴绮撰

亭臯诗集

七言律

锡山访赵处士

小阁重陰碧桧遮偶寻高士步欹斜空山雨过欲成雪老树春还初见花
世外无求轻谢客人间多难重归家相看又是经年别肯信安仁鬓不华

夜饮惠山酒楼

碧涧香泉趁雪流荆高夜共沧洲三更白月人吹笛六代青山客倚楼
醉後漫题鸛鹤砚归来犹剩鸛鸛裘吾侪生计浑无定分付行藏任白鸥

过九龙峰下有感

寒林叶尽影初齐秀嶂排空隔乱溪梅发土墙山雀鬧酒香茅屋雪鸦啼
高云不共僧同住野草长教客自迷多少繁华无处问春来燕子定谁栖

将别惠山题寄畅园呈伯成明府

老癖难回是爱山名园将去复跻攀三冬雨雪今朝霁四海烽尘此处闲
泉响只从云上下春光先在树中间殷勤更寄周侯语明岁重来共掩关

携酒惠山访赵问波处士

高斋深处碧云重策杖相寻古涧东倦客闲谈如世外幽人远出只山中
孤梅已放初霜蜡残雪犹将夕照红我欲携琴来共卧小楼终日聽松风

梁溪病中

几日萧条漉酒巾伯通桥畔寄闲身
暂宽旅病翻因雨已为花愁却送春
书卷苦萦心上事带围留诉意中人
荒鸡夜半真难寐莫怪朝来卧起频

偕周伯衡倪闇公陈集生饮惠山酒楼

旧游何意首重回溪上楼台罨画开
十里寒花春事好两山晴雪酒人来
伤时不共荆高侣济世常怀管葛才
多少烽烟愁日暮江城箫鼓尚如雷

秦吉生招饮园居次周伯衡韵

春半相寻过溪溪隐囊闲坐看弹棋
山桃照水红舒靛天棘围墙碧放丝
未免有情欢赏地最难无事乱离时
沙鸥莫怪人频到爱尔林塘好赋诗

送周伯衡入楚

山入东南不断青柳花吹客去难停
三春诗酒分吴苑万里楼船过洞庭
谁欲竟吞云梦泽那堪空卧少微星
烦君寄语麀台客岳麓峰前好勒铭

绢美人

刀尺何人鬪丽华粧成金屋彩云遮
体分苏氏机中素命薄隋宫树上花
小字红绡原有意前身捣练复谁家
莫嫌尽日无言语越女伤心出浣纱

泥美人

弃置沟中已不辞偶然朱粉为君施
漫夸婢子言词巧应羡夫人和合奇
踏作落花原不可沾来芳絮更何时
独怜陌上倾城质只伴儿童几日嬉

绣美人

彩帙持来最有情绿窗新样自盈盈
心从火凤鍼边度身向春蚕茧里生
邺苑才高知态巧唐宫日永见粧成
敢言颜色天然好一线全凭玉腕轻

画美人

一幅生绡本自殊谁人亲见洛川姝
却将京兆朝回笔写出崔徽别後图
翠黛乍低浑似语玉纤如动竟难扶
凭君为问毛延壽多少黄金买得无

月下牡丹

何必瑶台见玉钗分明仙雾拥霓裳三更水浸楼台冷半夜露和珠翠香红袖吹灯偏爱影宝鬢临镜更添妆谁能续取奇章纪月地云阶枉断肠

送春

韶华东逝竟如何陌上空为缓缓歌期尔重来芳草换为谁将去落花多百年身世骊驹往六代山河杜宇过幸有深杯婪尾酒别离偏得醉颜酡

新绿

浅深芳树浅深枝消息园林媚影移看去最宜波瑟瑟染成应是雨丝丝未堪画就王摩诘早恨来迟杜牧之莫道浓阴方有待江东渭北正相思

晓钟

长乐花前迹已陈竹林残月听来频三千余年未了梦一百八声初向晨震起华鲸生海日惊催羸马踏街尘独怜未入王侯耳吹烛犹传按舞人

晚照

晴晖历历见归鸦一望长空散暮霞碧岭正当新上月红楼犹映最高花江湖明灭渔人网巷陌苍茫燕子家谁遣黄昏便相近挥戈宁许赤乌斜

能史阁观沈石田碧山吟社图

销夏园林事事宜摊书闲坐品茶时佳辰有客同观画盛代无人不好诗十老衣冠丁鹤远六朝风月杜鹃知独怜身世沧桑後展卷空劳异世思

夜起

酒醒匡牀客梦清揽衣闲傍石泉行一泓星影夜方半五色露华天正晴老树横桥山鸟宿新荷卷月水萤生四愁欲拟张衡赋一望星河空复情

元旦次淡心

紫陌尘从一雨清移家两岁闾闾城莺花已付山翁管烟水应无热客争三径竹松归靖节一牀书卷老虞卿而今已向崧阳去更取丹砂问广成

年来

落落年来已自甘见人真欲似春蚕饥寒自对小儿笑富贵恐为良友慙芳树无心生渭北梅花多恨在江南嵩阳卖畚无人识景略何劳扞蝨谈

漫拟

漫拟深山可远猜青林白鸟夜如雷此中大自有人在汝辈适从何处来贱卖囊书逢浊世苦贪杯酒念奇才英雄广武今何在醉後且登江上台

人日澹心招集宜睡轩次韵

草堂春霁一尊开又见将车捧杖来胜事最怜清夜好老夫真被少年催雨沾七叶才分荚月上三更欲到梅醉後不知街鼓报纱笼频唤复徐回

梁溪即事

去来无计苦匆匆缆引青丝思不穷倦客眼前扬子渡美人心上石娘风事当失意何能住语恐伤情且未终锦字频看正愁絶夕阳何事上孤篷

僧持香海汝敬小集嘉树堂分韵

山泽何期作客逢西园清啸日从容凉吹衣袖花间雨翠入帘钩树杪峯止酒偶知因酒病耽诗长恐为诗慵罇前欲说人间事闲指墙头六代松

闲居

潘岳闲居客懒通习家池上胜墙东溪云欲过忽成雨山涧自鸣如有风薜荔可当邻檻绿芙蓉偏是隔桥红野人不复歌招隐岩下新陰长桂丛

至扬州寄辰六

扬子寒潮送落晖还乡犹剩白鸥飞生怜亲戚都同命晚见干戈未息机有客谁知怀远志无家不必寄当归人间得意寻常甚老大何堪复采薇

中秋饮棣友堂

帘卷西风度桂华良宵深坐话天涯三年此地重看月一夜何人不忆家酒尸常逢亲旧好帽檐从任醉敲斜云鬢玉臂应相念岁岁虚乘博望槎

醉吟

东风吹送木兰船赢得扬州竟夜眠金管玉箫留醉客红灯白月舞顽仙前身杜牧应非是後世扬雄剧可怜欲乞紫云谁见与洛阳桥上有啼鹃

九日同岱观耕方瑶如诸兄弟集棣友堂聽女史琵琶

徧插茱萸又此辰旅中高会足情亲落将乌帽无他客湿尽青衫有四人月上且停仙市足秋高不老醉乡身苏州刺史还多兴玉瓮频呼石冻春

送岱观大兄归余杭

江关秋晚叶初黄老去相逢眼更狂谁许文章能絶代可堪兄弟尽他乡陶潜未稳归田计陆贾难留使越装我欲寻君待花信碧湖春酒醉余杭

集扶晨松竹山房共用灯字

观涛何意学枚乘去住于今总未能十月捣残隣院杵一秋挑尽故人灯着霜早橘香初好倚月寒梅影自矜逸兴酒边浑不减飞扬犹似脱鞬鹰

集听鹂酒罇喜遇穆倩孝威

良夜谁能更独醒鸕鷀消得付银瓶枯髯未肯因愁白老眼惟堪向酒青名士浮踪多旅馆诗人好句在旗亭不烦邓禹还相笑遥指归鸿向紫冥

夜集曹秋岳先生寓斋

阶下黄花剩素秋故人初繫木兰舟诗城客到声先壮酒国兵残战未休北馆此时当月出东山无事不风流诸君忍共晨星散一曲清歌且自留

张山来邀饮四宜酒罇得十灰

不辞双屐破寒苔为爱秋光就緑醅落日蟹螯新酒市春风燕子旧歌台凭谁天地能留句如此河山肯放杯司业文章今在否向君怀抱暂时开

题真州浣纱女庙

麋鹿千年上古台红粧遗庙碧江隈壶浆偶为逋臣困俎豆长因侠女来灭楚已忘巾幗恨兴吴空致属餒哀也知抱石多深意山下留鸡首漫回

立夏日纪伯紫陈春霖魏廓公茅天石暨季儿小集清啸楼分得阳字

黄梅将暖报韶光赢得花前漫举觞
兔管惟传名士会鱼羹偏近故园香
江分三派潮痕浅月出千峰树影苍
舞袖弓弯浑不见大堤谁共踏青阳

夏日清啸楼晚望

偶寄闲身不当归凭栏尝对水烟微
鸟追斜日穿虹去龙鬬惊雷挟雨飞
近海潮声秋隐隐过江山色晚依依
芦中鼓枻无人在憔悴乾坤一钓矶

湄园

名士幽栖郭北偏春来?屐好留连二
分明月吹箫客十里垂杨载酒船
花影红依书帙上山光青到酒罇前
锦沙一片真堪赏借与鳬鸥竟日眠

挽姜黄门贞毅先生

浩气凭谁剪纸招全归帝所信非遥
荷戈此日心犹壮攀檻当时血未消
茂苑土风非故里敬亭山色自前朝
江东词客精灵在泉下应须浊酒浇

投许石园明府

蒹葭入望碧云平花县来逢制锦成
客子偶寻明月好使君真似大江清
印牀自绕青山色判案长蜚白雪声
画省含香久相待早薰朝服上蓬瀛

卧霞楼对月

秋心一卷是离骚夜倚青天钓巨鳌
树杪云开千岭出江边月静一楼高
逢人未可吟新句避世惟须隐浊醪
此夕乘风无羽翼不堪长啸向袁綯

江干偶作

晴霞片片下烟芜独向寒江访钓徒
山水重来双鬓老古今相望一身孤
谁将松桂留逋客賸有菰芦着壮夫
满眼关河齐落木不知何树稳栖乌

许石园明府招集独树轩同王永公共用花字

偶到江干系短槎才人为政俗无譁
军书满案犹留客尊酒当轩已放衙
秋影照残三鼓月晚香吹乱一庭花
归来携得玄晖句吟向层楼送晚霞

秋怀

落木天涯入暮秋故乡仍自恨淹留十年风月空耽酒万里江山独上楼有字未能随过雁无家那得趁浮鸥英雄事往烟尘在如此乾坤已白头

秋夜

薄醉难禁漏点长几回支枕向空牀凉风动竹夜三鼓明月点花时半墙新梦不成如昨梦故乡无主似他乡芙蓉欲寄何由采白雁一声山水苍

旅馆

孤馆寥寥秋更清倚栏闲对暮云平管弦不解漂蓬恨门巷长闻落叶声客与宦情俱冷淡梦如月影少分明吟成梁父谁能识无限青山只自横

信步

皂?青衫信步迟儿童休讶鬓成丝身虽渐老犹能饭路或应穷肯怨诗梦里文章逢鬼笑酒边心事许谁知轻肥满目争年少我辈萧条未敢辞

寄挽王北山黄门

对酒苹洲别梦疎茂陵何事老相如两朝讽论多时贵一世功名半里居身後有人传好句病中犹自访奇书平生知己今都尽况复风流更不余

入门

入门休讶泪还垂一载飘零尽敛眉险道不堪过後想别颜偏向见时悲人间那得无愁客春去难为不恨时携手花前共惆怅此情惟有月明知

归看奕轩适广霞复林过晤长儿置酒共饮次广霞即席韵

径满蓬蒿夏亦寒淳于初出大槐安崎岖世路经千里憔悴人生是两丸饥凤早知难得饵沐猴何事不须冠掌中杯在聊同覆苍狗浮云冷眼看

又

风雪赢来客鬓苍浔阳松菊已全荒事当拂意愁何济语到知心慙不妨人许新诗传李杜天留高节付园黄请君试问金门客可似西窗醉索郎

元日次澹心

五十八年年复年沧浪亭上看青天何人大笑乾坤内着我长歌江海边夜雨久疎题凤笔春波新长钓鱼船兰台听鼓非吾事百尺楼头任意眠

哭家瑶如姑苏太守

乞麾四载地相连解绶依栖更十年无夕不衔看月笋有时同载问花船弟兄诗酒功名案吴越溪山去住缘黄鸟赋成人不见夕阳横笛又凄然

又

漫说人称大小冯却怜踪迹共飘蓬文章似我名犹累治行如君道亦穷地下堪悲惟皓月人闲不愧有清风虎丘山畔秋云晚泪洒羊碑木叶红

慧山

客散临邛不更招泉亭犹自傍兰苕三春槐火僧窗晚十里松风客舫遥陆羽岂知成酒德刘放何事困茶娇夕阳多少红楼树莫向山中问野樵

哭陈其年太史

谁传妖梦骇人闻痛哭山阳已暮曛异数三年曾近日虚名一代自凌云谪仙此日无遗女方朔当年少细君阳羨荒田无二顷不知何处垒孤坟

又

瑜亮同称旧辈行可怜为位寝门傍剖鱼虚报还相见下鵬宁知果不祥好友谁能归广柳诸生犹自重长杨可怜身隐名空在此日人琴转自伤

又

岁厄非关已与辰忧多如尔竟戕身传来直谓时相忌问到虚疑梦未真久信奇才无厚福可能名士有多人夜台不断痴情在一片梨云别是春

又

金门侍从尽高华索米怜君独可嗟半世不归因作赋一官如此竟无家单车有约言犹在白马来梦转睽满目英雄谁是操招魂空有泪痕斜

夜泊墅关同震修集生

客怀无计避严冬归近寒山正暮钟得酒未忘千万事有家仍隔两三峯诗能快意聊重把人
是伤心莫再逢明日那堪分手去一船残月晓霜浓

雪中过淡心

乱琼堆屐六花深披褐寻君快入林诗酒不关天下计渔樵长慰故人心中山欲拟埋头醉梁
父谁为抱膝吟人日已过浑未霁少陵愁思可能禁

送家子山赴淮

金昌亭畔雪如丝赠别河梁为赋诗从此倚门频有望于今失路复谁知辞家莫过田横国得
酒烦浇漂母祠只恐秋风动淮水故山丛桂正相思

与金亦陶

隔巷斜通水竹居闭门芳草在春初过从肯待期佳日欣赏何辞借异书不见古人多怅望或
谈新事一轩渠墙头浊酒能相共竹影西窗夜未虚

过淡心月波楼对雪次韵

小阁疎棂透北风拥炉闲对鹿皮翁谁教松菊留今日却笑菰芦在此中寒甚颇宜人事少醉
来难耐客心雄山茶独有知春意已缀岩冰破浅红

易田授至

握手闲庭破绿苔翟家门巷漫徘徊一千余里春江别二十四年今雨来乱後图书焚研客梦
中琴酒读书台掀髯一笑话畴昔跃马卧龙安在哉

顾樵水偕沈韶九过访次韶九韵

停云馆外绿芜平二仲过从笑语清新水到门初放鹤余寒压径未闻莺时难独喜诗无禁春
好偏宜酒有情闻道梅花徧香国与君坚订入山盟

花朝集殿闻秋水轩观演邯郸梦剧用长儿韵

雁齿横桥带曲篱留髡频挽画船移百花生向月晴夜三径过当风暖时别後最思人卓犖梦
中宁免事参差与君携手共今夕惟可拍浮同酒池

又

几年不见扶风客今日相逢坐水轩闲试繁弦招北里醉烧高烛看西园柳垂三尺燕初到梅放一枝蜂已喧偶忆旧游弹指过碧云芳草自无言

同维夏饮王廉州来云馆感赋

聱叟幽栖旧辋川入门花气自嫣然相逢南郭仍三月不到西川已八年梅屋藏书山窈窕竹房酾酒月婵娟白头莫叹漳滨卧茗熟香清更散仙

赠朱翁

塿影园东春树明老夫被褐欲忘名青山遮户人难到白发看花妇共行三径有时留野雪几年无事入江城独怜聱叟犹浮梗谷口何缘学耦耕

偕正持访学在不值

乘兴披衣趁晚凉空庭寂寂自相羊主人闭户桐花静客子入门荷叶香孤鹤过桥窥浅水一蝉吟树闹斜阳谁知白石姜公子抛却鸾箫几日忙

雨中送春

春去难教酒盏空才人相向忆春风何来山雨生樽畔尽引江云入座中千树有声全洗碧一花无语尚垂红相留不住还相劝莫似吾侪共转蓬

和高苍岩太守重过洞庭

人间多事正纷纷此地仙凡已迴分一水自围三郡雪万家同住两山云秋因木落方过半日为峰高不易曛闻道画船常宿处相随遥羡白鸥羣

孙树伯给谏招集虎丘分韵

频年秋色冷芙蓉如此欢场岂易逢词客偶携双蜡屐酒人同占一青峰飞香入琰常浮桂倒影当筵独向松却笑颠狂犹未减醉中挥洒字如龙

又

嵇吕情投不待招子荆留客坐终朝半鈎新月同千里一片寒山自六朝节近黄花宜纵酒天清红树好吹箫平原十日能无意肯向旗亭折柳条

寄罗景有广文

鸿爪东西十二年中间情事各依然别经雨雪留双鬓看破风波爱一瓊客岁长吟怜我懒当时同学许谁传故人独忆罗含好闻道幽兰尚满前

有感

桔槔终岁本忘机失路宁知事事非鱼已欲枯宁免泣麟惟不噬合长饥饱看世态嫌棋局冷閱人情爱钓矶抛却蒯缞归计稳潇湘犹有芰荷衣

得家信

世无刘表欲谁依羝触终难学奋飞八月江潮空有信一家雨雪正无衣埋头青史前生误转面黄金旧事非却笑残年无鸟雀杜鹃何处不如归

平生

从来不信事多端那识时流重好官松柏性情千古傲梅花身世一生寒投闲始觉亲朋少经乱还愁道路难昨夜君平曾过访寬心聊说蔗堪餐

艺圃诗为学在赋

念祖堂

万花深处白云居天水先生此结庐谁使范乔留旧硯直教赵括读藏书一池荷气秋犹馥满地桐陰晚未疎今日有人念遗泽凄然故土更何如

敬亭山房【贞毅先生以直谏谪宣州故艺圃有此以见不忘故主也】

平原昔日草还青避世何来老客星攀檻志高羣虎怒荷戈恩重一鸿冥山光未拟浮吴苑云气遥看接敬亭欲问忠魂空寂寞芙蓉长忆楚骚经

六松轩

虬干森森挂綠萝涛声入夜答清哦崔丞旧日应嫌少郑叟当年未足多已待化龙犹夭矫不堪巢鹤共婆娑主人珍重非无意曾历风霜未肯磨

四时读书乐楼

朱萸百尺绦云浮万轴缥緲贮一楼去矣不须休董谒忻然应自笑譙周东南日出珠帘卷上下漪涵碧檻流信是神仙居处异举家同住凤麟洲

绣佛阁

小白长红映晓粧花间朱阁磬琅琅为怜西竺三生果敬设南丰一瓣香苏晋清斋惟米汁龐公妙解共禅牀可能别有朝云在天女维摩两不妨

红鷺馆

岂是当年昙?村萧然一室拥琴尊庭花不尽斜阳影池水偏留古墨痕麤緑管轻朝露润硬黄牋膩晚香温不知玉匣飘零後谁把昭陵旧本存

香草居

澧兰湘芷自家传近复移居小有天睡鸭晚薰烧石蕊惊鸿新句写金荃软尘不到春山静宿雾初收夜月圆芳杜只今非往日劝君丛桂好流连

乳鱼亭

一曲青山俯碧淄小亭高峙白云深满池明月幽人梦千树斜阳故国心莫道枯鱼书自泣可怜仙鲤信空沉终朝独理任公钓濠濮谁能是赏音

送毕正持省覲

送君犹喜是归舟一叶蒲帆趁碧流柳陌十年常待月桐江七里最宜秋漫求浮世双青眼且拜高堂两白头但得新篇须早寄松涛阁上暮云收

酒罇小集同用晴字

雨止高斋远思生篮輿乘兴出春城地多幽趣偏宜水天为佳辰偶放晴溪畔游踪多系马枝头得意有啼莺但求霁色长如此莫遣重陰废早耕

支硎山

养鹤空传支道林法螺庵下路重寻山花容易成开落岭树萧森自古今百丈寒泉高士梦十年春雨故人心独嫌罗绮当三月瓢笠空怜入未深

虎丘

重经茂苑思苍茫海涌峯高迢草荒石上不曾留虎迹涧边空记淬鱼肠浮云箫鼓烟花冷春水楼船落日黄惆怅旧游人尽散吴歌祠庙总凄凉

送家伯成赴闽臬

一片朱幡挂海云攀辕父老正殷勤谁言寤寐劳真主几见英雄似使君曾有人丈消讼狱肯将民命博功勲辜惟到处皆传美独向青天盼鴈羣

春来

春来黯黯独凭栏思入今年有万端芳草生涯三月雨梅花标格十分寒愁中索句欢情少梦里寻人去路难已把金貂偿酒债不须高枕卧槐安

寄怀梅耦长

菊花枫叶一凭栏欲寄相思托羽翰笑我衔杯如左相闻君落笔似都官敬亭山色秋心满茂苑江声晚梦寒为问求羊更何在几人折屐好盘桓

偕姜学在游虎丘归饮酒楼

积雨开门读楚骚晴莺相引度林臬一春风日今朝好六代江山此地高红袖旗亭双弄鼓画桥花市一回舫可怜短簿祠前路青草年年似客袍

闻玮过访以内子新诗见示

寒深水国滞归装王粲登楼思正长一巷青泥来旧雨万家晴雪衬斜阳病中醉减鸬鷀杓愁里思分翡翠牀明日五湖烟月晚载将离梦到沧浪

偶成再用看奕轩韵

怕到城中礼渐生北山那要鹤书迎未除豪气我为我不合时宜卿用卿酿熟每衔金凿落花开独爱宝粧成从前铢两凭君算骠骑何如第五名

又

白衣苍狗总千般函谷泥丸谢叩关一事未忘惟绿酒十年如故只青山灵均莫叹人皆醉柱史曾言我独顽买棹直须随钓叟往来多在藕花湾

又

日日东郊荷锺随醉人推骂渐忘谁但言贫贱都如此肯信渔樵亦有为月下牛衣浑不免斗间龙气本谁知无端学得华山睡已失黄公夜半期

又

新年陶监眼初方每到看花兴倍狂掠水正逢新燕到采香常笑午蜂忙唯求筑室开三径何羨笼街过两坊自是暮年须养晦信陵原不爱壶觞

偶成三用看奕轩韵

才名空自拟黄初吴市吹箫未定居天下是谁非热客山中何处得奇书消除意气惟磨蝎酌付奸雄有鲍鱼千亩闲云半间屋焚香终日自如如

又

巧拙何须问鲁般人人身事不相关无愁可疗惟看月有癖难消独看山岂是风云避豪杰只缘天地爱痴顽炎凉怕作回乡梦一任茱萸绿满湾

又

东风日日满香谿偏是羁人独向西不啻谁怜泰山虎未啼空笑会稽鸡水深湘浦天难问云近长安日易迷但得当年南董在此生终欲古人齐

又

衣裁白苧系青萝春到还为缓缓歌懒折腰支怜性傲爱看眉黛悔情多荒唐神女因巫峡成就才人是汨罗满眼风波思往事肯将金紫换渔蓑

偶成四用看奕轩韵

终岁交游是麴生何人虚左解相迎惊传猿鹤成君子梦见蜉蝣拜上卿风月凄凉愁杜牧江关萧瑟老兰成眼前多少终南径充隐何缘浪得名

又

麴丝谁染柳条尘检点今年已暮春芳草不埋千古恨落花长送六朝人山中那用通侯印壁上空悬处士巾漫道霜华浑未实镜中今已渐如真

又

空檐袅袅挂苍萝小妇弹箏我作歌诗瘦只怜吟未稳酒狂应且酌无多步兵巷北常称阮书记江东旧姓罗待取鳎鱼春水上钓船横卧月中蓑

又

也知人事尚通方其奈余生傲更狂二十四番终日懒三千余岁几人忙林中避客抄丹笈花里寻僧过宝坊潦倒半生因煮字仙书何必访谪觴

偶成五用看奕轩韵

久?身世野云般解绂曾经白水关种柳常思陶令宅采芝犹是汉家山烟霞有兴都成癖木石无心不改顽自信枯槎终泛泛支机何意到银湾

又

一带春烟拥翠萝门前时听打鱼歌交亲散後欢场少风日晴时好句多邓禹向人空寂寂王忱何事不罗罗武陵偶趣渔郎去落得碧桃花满蓑

春郊和广霞韵

百花深处一柴门正是吾家角里村陇上有人同燕雀山中无事在鸡豚半犁晓雪春犹浅一笛寒江月未昏却笑先生方中酒乌乌犹自响春盆

过未未岭至上沙看诸园牡丹

春光草草兴匆匆竟日篮舆树色中花事正当逢谷雨人家多半住松风泉俱入涧声相乱石尽擎云势不同徧历山庄谁是主等闲开过牡丹丛

过天平山庄有感

闻说繁华迹已迷风光无复杜陵西海棠楼阁莺花冷菡萏池塘燕麦齐独恨画桥存宛转不堪粧院变招提从来天地都如此响屧廊边杜宇啼

雨止看花徧历诸胜

新诗催就见晴霞天许游人到水涯万里湖山初过雨一年冰雪又成花溪桥买酒吟鞭缓石屋闻歌醉帽斜遥想诸君正愁坐那知春在隐侯家

入山访俞无殊饮古栢下分得梅字

昇得籃輿鸟道来柴门斜对万花开义熙处士犹存柳和靖先生独种梅是处乱云随酒坐满身明月带香回路傍絶爱骑鲸栢曾见唐家雨露栽

同韶九坐寒香榭限韵并嘲松之樵水

索笑无端绕檻行满庭明月影交横人当桂树春相对天为梅花夜放晴万壑云归吹笛路一林香入煮茶声独怜瘦沈同高咏二客黄州梦已成

又

天淡云空絶点尘夕佳高处占苔茵楼台静夜浑无影明月空山若有人清极岂能容木客狂来真欲问花神临川屐齿年时懒不负东风是此春

过古法堂

支遁禅关掩夕曛钟声先向隔溪闻松陰晚送岩前日花气晴为岭上云客梦偶将山榻借诗题闲倚石幢分山童浪逐寻香伴笑说寒香惹髻芬

过灵岩访监公遇健庵同年

石径斜阳照古松上方清话晚云浓青山竹里徐陵到白雪花前慧远逢野鹤梦回千岭月水犀人去一声钟独怜陶令攒眉卧懒向岩边曳短筇

偕徐健庵同年李武曾姜西铭陈其年暨家志伊并长儿过访毛黼季汲古阁赋赠

访戴同为剡曲游红桥新柳繫兰舟六朝花草重三日四海文章第一楼扶病敢辞孤榻小多情只为异书留移家若许为邻并尽把牙籤借邨侯

梅花和余澹心韵

值得刘郎累一官巡檐真信赋诗难月当夜半常如晓风到江南不觉寒何处高楼能罢酒此时长袖好凭栏应知未是寻常种蜂蝶何缘得借看

又

谁道穷冬见艷阳一枝初放占羣芳何郎素面从来白荀令生衣到处香幽恨无言惟独笑春愁有客尽他乡美人去後梨云淡么凤横斜又几霜

又

清非有异瘦难同领得东皇第一风羽客醉游晴月下玉儿家住乱山中溪桥寂历横江驿烟雨迷离压钓篷我似广平心较冷欲传幽态恐难工

又

老干空存古蘚痕平生不近五侯门春来江上无多路月到山中各一村拟共芳心惟翠羽欲消寒色有青尊此时桃李浑无色独惜幽香为返魂

又

拟向湖边为结茅忽看春气动寒郊紫卿早得同孤性青士从来托淡交吟策寒摇烟外影酒旗香颭雪中梢吾侪心事能相得莫受人间热客嘲

红鹺馆小集赠陈素素校书

芙蓉窈窕画廊通枕茗炉香得暂同千树正当明月翠一花先为美人红【时池中初开一莲】扶头破梦新慵後拥髻情深浅笑中怪道玉郎痴絕甚只缘林下有清风

再过檐园

高斋清梦隔年余再到新看碧草除辟馆只思留好客筑楼端为贮奇书晴峰压檻青偏好老鹤迎门雪未疎宣室恐须前席问又抛丝竹入金庐

红鹺馆纪事

疎懒偏宜近墨庄披衣侵晓过林塘桐陰照檻客窗綠荷叶满池人语香江雨欲来鱼竞喜山风忽动鹤先凉不辞永日摊书坐索有隣家煮柘浆

星子招同梅圣占及潜威两儿小饮芍药花下

高斋不异过山家尊酒论文共日斜半世关心惟旧雨一春开眼为名花看逢暮景枝偏艷饮有深情量转加莫怪留连还惜别綠陰今又遍天涯

七夕过忆梅轩分得为枝二字

雨过空檐薜荔垂綠窗相对嫩凉时天边有女犹漂泊世上何人不别离岁月几年销马足文章今日误蛾眉请看银汉谁相见便是神仙岂易为

又

青衫红粉总参差说尽凄凉酒一卮今夜不如前夜梦无情聊作有情诗东隣儿女空求巧上界星辰未免痴怪杀填桥用乌鹊笑他三匝自无枝

送立斋学士还朝监修明史

忽听骊驹赴国门离筵重起酌金樽愿将异代无穷事为报皇朝不次恩海内徵输频岁急江南文献几人存应知宣室多清问前席何妨委曲论

再集延古堂探菊得如字

寥寥萍迹肯教疎况值秋声满索居皂帽生涯还似旧黄花消息近何如无聊风雨闲沽酒多难乾坤老着书今日季鹰 酩酊波涛犹未损鲈鱼

送高念祖赴登州访谈舟石太守

高风文章动九州一朝弹铗赋东游天心有意宁鳌极世事无情托蜃楼碧海扶桑看晓日青山落叶下残秋凝香深处同烧烛为道张衡有四愁

倚山阁偶咏

垂杨垂柳共鸥边尽日凭栏映碧川春水正添游女棹夕阳长在酒人船能言旧事樊通德爱赋新诗白乐天几度自吟还自醉维摩应不用参禅

登江山风月亭

高亭百尺水之湄尽日千帆过槛迟树色远遮司马渡潮声直下佛狸祠江拦海国波涛壮云入吴天变化奇闲看蛟龙争战罢风来万里纳凉时

送宗鹤问之官秋浦

水国垂杨挂夕晖河梁执手寸心违不教才子题红药却送先生上翠微山水有情人未老琴书无事道宁非金门曼倩知多少羡尔江边苜蓿肥

又

五十年来两不疑中间出处见交期惊看奇字皆零落博得除书是别离同学故人余几在渡江名士复谁知可怜选阁遥相望一样栏杆两处诗

泊燕子矶

一片蒲帆雨後归枯槎重繫旧渔矶八千余里江声绕二十九年时事非故国几人惊白发他乡何处稳乌衣只疑王谢贞魂在长恋斜阳不肯飞

过白孟新桥西草堂

梁武城边万柳凋双飞白板向斜桥先生晚日横摊卷童子秋风出采樵黄叶有情堆北牖青山无路认南朝登楼不道成惆怅废却江州酒满瓢

又

燕子重来旧垒荒清溪犹自绕柴桑山河六代云双屐风雨半城秋一牀草草盘餐存古道萧萧门径着斜阳归途莫怪篮舆晚儿子凭肩店火黄

冶城

蕊珠宫殿碧云端一宿云台客梦寒猿岭凄凉闻凤吹鍾山寥落认龙盘秋风尚觉炉烟在夕照空疑剑气残欲问茂弘公府处新亭遗泪倚栏干

寓朝天宫感怀

汗漫聊为故国游偶逢白鹤暂迟留云高古堞闲支枕秋满寒山独倚楼黄菊欲开难貰酒赤松须访未封侯等闲多少关情事付与长江日夜流

卞侍中墓

落叶萧萧古墓存传闻中夜泣贞魂满门白骨忠臣泪一片青山圣主恩古栢化身留劲节秋棠血染点遗痕只今四海羞苹藻苏峻何曾见子孙

九日闻诸同社集周处台帐不及与

城南芳树倚崔巍九日羣贤授简来黄菊有情高士酒青山无主孝侯台英雄独往多奇气风雅相关定逸才极目天涯已摇落敢将词赋更追陪

秦淮秋夜

采采芙蓉欲寄遥桃根桃叶两无聊凭栏有客思团扇隔岸何人响洞箫梦向青楼连夜月心随画桨一秋潮王郎已去歌声歇况复当年旧板桥

过藏山和尚寓楼题赠

柱杖高擎不语禅相逢幕府旧山边维摩室内文章座慧远池中书画船东度共传圆觉论北行先赋远游篇台城正向秋窗见尽日登楼各黯然

赠朱锡鬯太史

江左秋风拂羽翰玉堂仙客下长干文章早洗科名陋词赋宁言遇合难短褐登朝吾道重高车夹路世情看里儿漫作轻肥态燕雀何堪测凤鸾

白门感事

当年曾过石头城华发重来拥褐行废苑莲花朝暮事秋江桃叶古今情空怜归燕无栖处难听啼乌是怨声憔悴不堪还作赋近来萧瑟似兰成

雨中曾锡侯携尊过访同祀公穆倩孟新介兹小饮时独公在坐

好雨翻能破旅愁情深蛮榼益绸缪但令岁稔宁无月不道寒新始觉秋客有支公常独坐人非范叔并添裘吾侪落落谁青眼子固应为第一流

赠陈转庵太守

闻风久愿识荆州此日偕登庾亮楼似水已知清彻底为山独许柱中流竹根擎出盘觞古菊蕊浮来几席幽自笑狂夫多懒慢此番倾倒为君侯

偕周祀公王衡之王成公先渭求小集李董自斋头

冬初作客幸相亲草草盘觞意最真酒後莫思千古事花间独剩六朝人青牛引轡归途远紫凤衔灯夜市春我是淳于潦倒惯霸陵醉尉不须嗔

至句曲寓瑞像院喜菊人过谈

西窗烛似去年红雪後重来夜语同满地尽逢苍耳子两人俱化白头翁文章遇主常情外轻薄由他冷笑中说是玄真真有愧几年长啸五湖东

茅山

丹崖碧嶂倚云根三岭相连势莫论自是神仙有难弟不妨乡里唤曾孙青霓路接天眉近白鹤桥临地肺尊秦帝旌旗更何处良常徒记旧名存

再饮五亩居

园深桑苎尚余寒竹下频来戴鶡冠名士尽从闲里老好花长在客中看三升蜜榼春风晚一点樵炉夕照残归去不烦烧画烛林梢烟月正迷漫

上已家叠峰招同岱观兄暨诸子修禊南郊

隋堤杨柳几兴衰此地仍同少长来隔岸暮烟新草树绕城春水小亭台红英不分花经眼白发犹堪酒满杯俯仰古今俱往事何人知有右军才

岱观大兄将归余杭同社相留共用十幅蒲帆未许开

十幅蒲帆未许开夕阳携手更登台弟兄词赋空千古吴越江山几往回垂老岂堪犹浪迹不贫安得有奇才劝君坚向扬亭坐会有侯芭问字来

过田纶霞学使寓园

郭外春林带白沙过从终日玩韶华江山胜处须留客风雨频时独念花吾道行藏应有托人生忧乐总无涯清吟独有田京兆静对隋堤御柳斜

再至金陵和田纶霞

频年飘泊竟无成百不如人笑老伦学道几经居药市着书徒欲赋芜城原难富贵宁须悔便作神仙未免情五岳纵游何不可那堪重入旧瑶京

秦淮有感

雪静飘衣又几时凤城春树碧参差玉笙凄恻谁能听宝劒横陈别有期露下青枫长落叶春归红豆已无枝晓风残月江南岸柳七空填絶妙词

又

择胜城南地最幽双峯遥指翠岚浮不知事往花空发但觉云生树欲流金磬忽传千壑晓丹梯长倚四时秋老牛羞见南朝事独背蟠龙不转头

燕子矶同毕正持玩月

?定沙棠兴未穷小亭卮酒睇遥空长江到海争孤月危石倚天生远风来往岁时添草树炎凉身世老英雄渔郎已识波涛险一笛哀吟红蓼中

秦淮水阁同纶霞夜坐

桃叶歌声复几曾水楼清坐晚犹能朱阑过雨浮沉月画舫摇烟上下灯故国笙箫宜柳岸旧家庭院锁瓜塍临江小妇盈盈在一曲哀箏说废兴

登平山堂柬金长真观察

壁上龙蛇迹已销华堂重启傍迢嶢樽前楼阁仍千古眼底江山自六朝人似寒泉心更冽地当明月兴非遥独怜梁苑留宾日不及相如杂坐貂

简王渭公时方病目予亦有足疾也

榆火初新客梦寒掩关心绪总无端才言世态回眸懒略问人情举步难几日烟云空黯淡一春花竹渐平安吾侪郁郁终何事麴部相逢且尽欢

孙汲山及诸同社醺饮招集江秋水别业

江郎幽筑傍祗林三过重为越客吟灯火尚疑前日事壶觞聊见故人心摩挲老树犹如此冷落垂杨忽至今不是当欢反无绪从来怀抱为情深

送戴绣臣归里

天涯岁晏促归程送别如君客绪轻独往果然惊世俗一贫犹得重科名时流竞识苏和仲才子难留马长卿知有官梅诗句在不妨风雪到菰城

冬至同孝威楚执饮鹤问斋头共用杜句为首并嘲楚执

年年至日长为客作客于今在故乡妻子各分灯下影岁时空换镜中霜原无松菊情何恋赖有琴樽兴未忘饱我老拳君莫笑老夫真为故人狂

雪夜与南士话旧时兰姬过访在坐

夜煮东坡玉糝羹小斋深坐话平生风飘榭叶寒无赖人向梅花夜有情灯底最宜眉黛色雪中偏爱酒罇声竹林偶忆当年事犹记卢家住石城

喜庭表来自吴门集师六碧摩轩

车门一带掩青萝系马逢君暂和歌天上故交原自少人间新事近偏多离情欲共江云满归梦其如夜月何不是此宵还恋恋当年同学半蹉跎

春夜见月寄怀辰六

北望浮云接晚晖几年作客计全非多才未许消长叹有梦何曾肯暂归路失岂容常事料天高偏共壮心违从来京洛飞尘满曾为平原染素衣

又

判与梅花半世寒年来翻恨事多端老依骨肉惟相望贫泛乡园不自安避地只宜车马僻怀人长恐道途难君家幸少当机赋何不刀环子细看

壽冒巢民

只今天地爱痴顽名德如君鬓早斑四海声华王谢上百年风节顾厨间人情合听苍蝇笑世事终输白鸟闲桃叶桃根幸无恙肯将丝竹让东山

壽蒋前民六十

东郭先生傍水居比来高致更何如百年有道惟醇酒一室无尘独汉书客到刘郎长荷锄花开翟妇共携锄五陵裘马头俱白辟世知君计未疎

广陵竞渡

烟波此日渺愁予吴楚乾坤问卜居尚有垂杨留六代犹将角黍吊三闾蛟龙往事江湖外箫鼓新声战伐余独笑樊川初梦觉水嬉空忆旧游疎

闰八月十三夜

南吕增来玉管长上弦时候露华凉隋家桥上才过半苏子楼中恰正当白凤添翎初弄影碧蟾敲腹尚含光东邻娇女亭亭立拨断银箏雁几行

十四夜月

最爱秋光分外幽乘槎人又到扬州已经两度知应好未满一分何足愁岂有山河容空缺只缘风物重迟留殷勤为借吴刚斧明日还将七宝修

十五夜月

白帝重逢御转迟楼开端正暮寒宜庚辛节在天如晓甲戌年来月自知望满一百二十夜欢增三万六千期嫦娥莫悔多情悞赢得长生是此时

十六夜月

岂是黄杨厄闰偏倚栏犹自对婵娟今年夜色非常皎此夕秋仍似旧圆二八巧逢宵二八三千光映界三千相思忍作懵腾睡看取清波彻晓悬

十七夜月

坐待东轩望转劳冰轮初减兴萧骚将亏势反如将满渐久光才得渐高寒逼玉楼怜八九照穷银汉见纤毫徘徊莫起难圆恨賸得团圆已再遭

十八夜月

拍尽笳声夜欲阑桂轮迟上渐难安瀛州路近鲸波小沧海潮平蚌泪乾三坠阶蓂犹皎洁重开岩桂更高寒人生合向今宵醉百岁能教几度看

闰中秋集闵于天春星草堂同赋

西园秋闰好盘桓不是寻常把酒看人较从前多徙倚天于分外足清寒幽怜清桂馨香远老爱黄花节序宽此夜楼头还弄笛谁家红袖不凭栏

送辰六之任益阳

十载风尘困彩毫一行聊尔试牛刀地经才子风原美境有名山治不劳乱定最宜消反侧官闲宁必润脂膏衰年送客情怀恶沉醉为君倒浊醪

又

扬子蒲帆夕照悬楚云多处接吴天关心儿女三千里过眼情亲十七年岳麓晴岚来挂笏潇湘秋色入鸣弦黯黯不尽芜城意总在江郎赋两篇

又

斗大宁须小一州往年京洛敝貂裘题屏自可传当宁束带何妨见督邮青史几行他日在苍生百战此中留漫言五斗为容易曼倩今多索米愁

又

天马超然本絶尘持觞宁待赠言频能教惠泽传仙尹惟有清风慰远人考拙催科唐课最画图褒德汉恩新功名今古因时会骚怨还应笑楚臣

送金亦陶游黄山

灵境应从到後知己 瓢笠待归期忽闻高士探奇去是我名山入梦时直上莲花看日出独寻芝草被云欺避秦倘有遗民在为访轩辕洗药池

壽宗鶴问

马齿空怜长二春看君双鬓尚能新世间富贵无多语海内文章复几人綠酒好倾彭泽瓮素衣犹染洛阳尘吾侪兄弟多如此烂醉宁须负葛巾

移居凤观书屋赋谢诸君二首

松菊全荒笑一麾归来今又向江湄已无门外能来客莫问书中可比谁四海浮踪烧烛影十年残梦倚楼时投林倦鸟栖初稳録事休嗔助筑迟

又

潇湘欲去阻香苹留我知君意最真南郭聊为无用物东山终属近名人沙鸥迟去应犹晚海燕归来正及春从此浣花溪上路浊醪能载莫辞频

正月四日城南小步

策杖闲为绕郭行入春乘兴为初晴身如飞鸟投林快眼共浮鸥向水明乱竹丛中清磬发远山多处小桥横莺花不管人兴废俯仰何须百感生

社後二日集春星草堂看梅分得十二文

兰亭春气晓氤氲花底高人尽少文树似雪余惟五出月将香补足三分闲看彝鼎摩龙篆醉拂裳衣染麝熏欲向山公传雅唱探骊应已让诸君

感遇

行藏准拟泛虚舟岂意翻同雁鹜谋剑以有光难在匣钓因不曲枉垂鈎事多悔吝皆苍耳人是英雄易白头满地浮云愁极目花间莫上最高楼

又

唾壶敲碎气空昂转眼晨辉到女桑地险难通盘马谷身闲不上鬪鸡場无聊日月经虞夏多事乾坤有汉唐弹指声中成白发那能重作倚门粧

又

清霜忽讶井梧凋是处黄云起暮鵬扰攘齐门犹鼓瑟凄凉吴市独吹箫多忧未合成华首既死谁知爱细腰曲巷泥深人不过车声欲度转遥遥

又

空劳宋玉赋招魂博得怀沙亦楚恩豪杰难逢王处仲神仙谁识魏华存长携诗卷花遮路才挂鱼竿月满门一曲长歌人已醉也知漂泊信乾坤

又

见说鍾期懒听琴空教翹首覓知音着书有客曾投阁颂酒何人共入林梦里溪山成往事眼前风月负初心芙蓉寥落三湘晚憔悴难为泽畔吟

又

当年肯道数偏奇身世谁知两不宜误信读书应有此耻为束带复何之瓮头吏部真名士柱下先生是导师跃马刺肥诚未易又看闲过百花时

又

处处江山送夕阳柴门独立更苍茫违时未必因孤性逢世何须定靚粧栢以不材偏得壽兰虽无主更留香久知骨相封侯少麴部终当事酿王

又

扑尽元规扇上尘闲门聊且送残春已啖蔗非佳境何用遗柑达要津晓起谁为无事日秋来多是不平人气高湖海终何益只合空山老斲轮

又

芥子安能出坳堂不堪冷眼看当场谁教李白来天上又使杨朱泣路旁到处尘埃羞入洛几年词赋悔游梁麻姑见事知应晚东海原来合种桑

又

沙边着眼漫相猜旧雨于今已不来好事半从闲里过愁心偏向醉中回徒传宝玉能三献敢信明珠有十枚摇落江关缘底事子山归後莫兴哀

又

但醉宁嫌卯与辰吾侪今已任沉沦荣枯似我齐庄叟长短凭谁较李绅乞食院中披毳衲看
花池上倒纶巾从教推骂时时有忍辱由来是往因

又

几年泛宅百花洲今日逢君脱蒯缑入道未深犹有恨着书无事辄招尤弹成绿水安栖隐写
得青山学卧游一卷离骚两瓶酒鹿门相趣足高秋

春日取百花酿酒

尚方百末自谁传露蕊收来分外鲜沾趺青旗梨隄雪筠悬黄篋杏蘤烟醉乡修传成花史香
国移封得酒泉二十四番从此後东风长惹麴车涎

无题

一春惆怅似无情尽日红窗拥髻行宛转怕通金锁澁团圆嫌逐彩球轻才看月上歌先咽每
到花开梦不成漫道莫愁愁未尽仙山迢递隔层城

又

竹叶难为弱水船别离情绪又经年将萍入水前身絮种藕当桥两处莲丝化锦裙飞舞蝶弦
凄宝瑟怨啼鹃上元书札无方便擘碎成都十样笺

又

玉鈎台畔易黄昏十二楼高古洞门有药未能招月姊无桥空自赚天孙龙膏不愈缘心疾獭
髓难销是泪痕别鹤一声肠九曲神香那得返离魂

林蕙堂全集卷十八

卷十九

<集部,别集类,清代,林蕙堂全集

钦定四库全书

林蕙堂全集卷十九

湖州府知府吴绮撰

亭臯诗集

七言律

赠赵蓴客

赵壹风流客共传翛然鹤立似神仙爱蓴直走三千里种树今来二十年碧嶂高低横醉眼玉台左右倚吟肩如何更恋湖光好苏小门前又放船

家六益招同卢文子饮藻野阁【阁为陈徵君故居】

故人相见即轩渠风雨高楼坐啸余世上有心惟纵酒阁中何意又藏书六朝山水留蓴鱸一代文章重草庐此日荆榛方满目可怜丛桂未全虚

又

高阁嶙峋傍水涯西风百里听吹笳太丘长者曾题壁绮里先生近住家十万青蚨春买树一双白燕晓穿花吟成梁父还摇膝陆瑁湖边日又斜

赠张带三先生

鹤发垂肩已似银飘然终日尚寻春信惟前代留斯老那得後生如此人彩笔纵横曾未倦青尊潦倒竟忘贫闲来爱共麻姑语沧海何年见起尘

赠张洮侯【彦之】

平子翩翩逸世情披裘带索晚逃名高谈直上三公坐古调偏长五字城尽日不妨沾酒卧隔山长为看花行那堪又作河梁客何处双柑更聽莺

赠钱武子德震

屈指论交三十年仲文高致益萧然无家每就门生宿有句争为过客传百尺自高谁得上一寒犹在不求怜近来机事浑相忘鸥鸟羣游向海边

赠赵双白炎

闽客浮家?水湄孤踪不许俗人知春衣尽典缘沽酒晨突无烟独爱诗曦髮未忘文信国论心常忆郑当时如何忽作思乡曲撷采幽香絶妙词

赠答张带三先生

梦绕茸城复几年高斋今得话从前长司花月何辞老自主溪山即是仙连理尚留三径树分香犹卧一池莲北窗更放烟鬟入九点秋光到酒边

集钱越江轩中分得西字

谢家芳墅苕城西倦客来游路未迷八月风华当昼暖九峯烟树向秋齐昔时咸籍杯同把此夕邹枚简共题自是仲文情不浅鲈鱼特为买松谿

酬别鲁谦庵即用见赠原韵

旧雨关心近暮年访君我泛?湖烟三更夜话双椽烛万里寒装一砚田循吏已知清似水故人行更远如天无端忽鼓看山兴又损水厨买酒钱

留别?上诸子仍叠谦庵原韵

离别何堪动隔年楚江惆怅各风烟情多几见飞鸿雪游倦曾无养鹤田明月送人过?水青山留客绕湖天何时更醉临邛酒卓女炉边看数钱

机山

渺渺寒芜没断碑凄然倚楫向江湄思鲈不起秋风兴唳鹤空传夜月悲山水已随人变易文章不问世安危平原只有东头树犹见征衫入洛时

寄怀宗鹤问秋浦

闲房草色雨中新玉案长吟欲过春五夜正多千里梦一官难补百年贫溪山有待弹琴客花月无聊作赋人见说子才能折节烦君先扫半牀尘

江行有感

江上寒芦绿尽抽江边行客自夷犹鲜鳞入馔初离网飞燕过墙故傍舟潮打石头还带怒云连铁瓮不遮愁斜阳最是无聊赖难为齐梁顷刻留

扬帆北岸过采石不能登舟中以酒遥酌太白先生并望常开平战处

风激高崕帆转迟中流遥指碧参差人非文字难传世事到英雄亦有时西蜀奇才明月在东吴王气晚潮知兰成老去谁相识独倚扁舟多所思

游齐山和杜牧之韵

寻山有约兴先飞笑我前身杜紫微手挽藤萝还自上迹随麋鹿肯言归云因出洞成奇石潮欲连江竞夕晖便合挂瓢从此住不堪尘染陆郎衣

赠池阳太守喻武公

九子晴岚晓翠笼讴歌遥听满江东共闻童叟传新事喜见循良有古风为政谁能如召父读书争欲就文翁行春紫马寻常到长命欣看彩缕红

又

盖代声华美子才一时公望独崔嵬清能润物心如水响欲惊天手似雷野老共看持酒至远人还为和诗来应知名世生非偶高户何难及上台

赠别驾田牧园

金台旧雨久思存放棹春江及李门明月一年桃叶渡清风四野杏花村赐环竚见君恩重题柱原知物望尊何意西斋还对酒奇文卜夜又同论

雨中郎赵客偕家惟邻过访

为寻秋浦叩华扁几宿西斋雨共听双屐偶来三径碧一尊同对九峰青江山有恨人将老风月无聊客暂停从此颍川传故事天边新聚少微星

过池阳书院简喻武公太守二首

几年兵燹遍蒿莱此地争传绛帐开一代菁莪身自教千林桃李手亲栽筵陈广榭三鱣集洞启名山一鹿来常衮只今多雅化翩翩鹄起尽奇才

又

华堂百尺采霞披
洛风高道在斯谁解得民先得
士人能为父更为师
堦前月照春弦夜
席上云生昼讲时
从此东南人就学文翁弦
诵谢公诗

夏日留别宗遗山之粤东

离肠已尽更留连
此後音书不易传
二十余朝如顷刻
七千多路各山川
贫中送别非佳况
老去伤离异壮年
所愿琴书两无恙
犹能沉醉百花前

游湖山小饮归饮月下分韵

主人爱客为纾愁
挈榼聊为近郭游
乱蛩香樵径暖一鷄啼竹酒垆幽
江光隐映山光见
树色参差月色浮
归向西窗重续醉
满檐凉影烛初收

徐孺子墓

两京党祸遍君宗
独羨鸿冥竟可容
一榻久为千古墓
孤坟曾历累朝封
伤心地下生刍客
举眼人间卖菜佣
惆怅陈蕃更何处
蓬蒿空见卧狐踪

丁鴈水观察招同龚卫公钱目天暨令弟韬汝及仲儿游通天岩分赋

登陟来随叔子同
芙蓉百丈倚晴空
岩前布席原无雨
洞里披襟不待风
一刻陰晴山向背
百盘高下径西东
此时真有忘归兴
况值蓬飘在客中

郁孤台

望阙偏宜晚照开
篮輿乘兴独登台
万家雨过虹初隐
二水秋生雁未来
清猷遗踪空感慨
端明往事自徘徊
诗人最爱丁公雅
恨不同倾浊酒杯

丁观察社集八境台同家观庄陈纬云钱目天龚卫公暨令弟韬汝及仲儿分得齐庚二韵

有约论文上玉梯
一尊公暇又同携
此时北海心相得
往事东坡手自题
向水楼台天外迴
绕城烟树雨中齐
主人爱客情无倦
遥指疎林月上低

又

相将吊古意难平
况复登高感倍生
百雉远围秋浪濶
一鸿斜背夕阳明
悲歌不了孤臣迹
俯仰徒留过客情
胜地只因人更胜
笑他铜雀草纵横

水屢餉酒米以病未能踵謝賦此代柬

四海論交有幾人濟陽兄弟獨情親
平分客舍三升米寧問官廚一甌塵
知我晚憐身已老感君多為意全真
飢童卧起聞相告彈鋏馮驩近不貧

雁水招飲璧園分得才字

韓柳寧知異代才官齋清夏共銜杯
風因地靜非常好花為春多不次開
土行忧時還運甓子瞻懷古更登台
留賓最喜高情甚索句無煩暮酒催

家觀庄憲副至自和陽喜而有賦

西清聯轡賦同心王粲從軍別至今
二十七年分去就百千萬種歷升沉
宦途淪落詩空老客舍淒涼酒共斟
屈指故人仍有幾鬢華休嘆雪霜侵

雁水昆仲過曾波閣小集分賦

高軒一路紫蘭芬翠蓋亭亭靄暮云
濠濮興高還撒燭琅琊情重欲書袞
曾波得月光相射芳樹浮烟影不分
此夕凭欄意何限輞川詩句讓諸君

又

桂華初滿映芳汀邳下才人到水亭
藻荇渾如天聖道芙蓉却似楚騷經
此時有客心同素當代凭誰眼更青
只恐夷門車騎近畫橋烟笛憶同聽

鮑子韶招集蓮社庵分韻

花宮門外水潺潺絕勝東林足閉關
看竹王猷能共到聞鐘陶令輒空還
別離漸減中年樂愁病難期半日閑
却羨宗雷清興在傾殘米汁白云間

又

作客同為半道留一時酬倡遍南樓
正來鹿苑停云席又放羊城泛雪舟
十日酣歌欣遇趙半生潦倒愧依劉
獨憐花柳成辜負那得探驪好句投

留曹大行石間夜飲曾波閣分韻

客里風光此最幽披襟深喜故人留
榕陰滿地月初午荷葉半池花已秋
阜帽參差橋上笛紅燈歷亂水邊樓
多君更有高陽約同向青山號醉侯

王汲公招饮八境台即席书赠

两江烟水对高楼子晋还为载酒谋客里尚能招客隐人间同作避人游高歌共举梅花酿好梦难逢竹叶舟明日河梁须放棹津亭空忆夕阳秋

丁观察招集璧园饮古桂下时桂上忽生灵芝

欲去还留又几回感君情重每追陪日来坐待神芝长秋到难虚老桂开客醉异香非世赏天存胜迹岂凡栽地灵元自因人发为祝先生酒满杯

南安客舍送查德尹归海昌

九日峯前太瘦生相逢客舍两含情参军正欲携琴去词客还为拥棹行路迴三洲山瘴远楼高百尺海涛平清容轩里摊书卷賸可怀人对月明

九日南安登高寄怀丁观察兄弟

江城欲去更迟留令节来登最上头九日岭宜今日到万年人记昔年游酒思白社何时醉诗爱蓝田孰可酬此夕肯教容易过菊花犹是楚天秋

篋中检得尤悔庵见怀之作依韵却寄

长安遥望碧云多欲寄离情叹奈何见说赋蒙天子赏可能词付雪儿歌鸟虽已倦犹啼月鱼未成枯且过河着作一时班马在不妨身着五湖蓑

五马山

路近韶阳好问津林峦此地独嶙峋凌空萝壁疑无路絶顶茅居不见人尽日烟云长出雨非时花草尚留春安能荷锺随朱翌谷口偕耕号逸民

过回龙山

风静蒲帆远望纾挿天高壁翠何如山疑轩帝骑时返石是娲皇补後余岩畔谁能逢异客洞中应自闭灵书空怜行役难停楫不见秦人愧老渔

弹子矶

碧嶂横江似此稀巨灵辟得是耶非树从崖腹石中出鸟向山腰云里归樵客下看悬倒乳舟人遥指挂斜晖布帆南去秋风急十里犹能见翠微

观音岩

百丈危峰倚碧天遥看趺坐却依然崖前石长千寻笋海上波飘五色莲问法绀龙常夜至闻声白鸟向秋传闲云亦有皈依性日为金炉起篆烟

泊佛山访汪少参樊桐同年宅眷不得

离踪飘泊几经年倚櫂来寻益惘然万里还家何所赖一官遗骨竟堪怜孀妻有泪辞山郡穉子无金买墓田惆怅人琴多少恨此情谁为表重泉

王孝扬大将军招集西墅

秋静旗门卧緑沉西园高讌愜幽寻情多更觉银箏好坐密难辞玉笋深灯影煖回羈客梦月华清似主人心也知意厚无拘束一任樊川信口吟

夜宿招隐堂忆石公题壁

游倦梁园鬓已华避嚣聊复聽楞伽乡心得静浑忘客归梦无程忽到家地远尚留前代树春多先见隔年花远公飞锡空相忆怅望瀛州阻海霞

长壽禅院次韵答元宗上人

爱入青山听磬声逢师物外动闲情茶瓜暂许同支遁婚嫁犹怜累向平贝叶影摇开士馆墨花香满化人城从今月下频来往三癸亭前有姓名

至日旅中偶作用杜少陵句

年年至日长为客此岁蓬飘鹿苑中步席花前贪地暖凭栏池上觉天空半窗梅萼横霜影一鉢葵芽剪露丛遥忆庐山旧同社可能沽酒待陶公

至後一日梁药亭招集六莹堂分得八庚

不因人热转多情永日留宾坐欲盈香发自开新酒瓮调高如聽古琴声冬残碧草霜华淡春近黄梅月色清独笑淳于偏泥饮未愁鱼钥下重城

游五羊观

琪树萧疎甲观荒篮輿偶涉转苍茫人间那得千年鹤海上虚传五色羊断钮寒钟留古阁晚风斜日下空廊尉佗去後雄图尽朝汉台边碧草长

夜泊紫云洞

蓬飘何意更宵征月黑前山问水程
火烬寒炉知夜永暖回孤帐觉冬晴
炎方冰雪非常见远道风波只自惊
遥听桄榔声逻里荒鸡无力唤天明

夜泊天宁禅院

万里蓬飘到海涯萧斋夜宿自徘徊
湖山已与人俱远风雪如随客共来
一榻凉云孤枕冷半墙斜月小窗开
罗浮渐少梅花信何意谈空得辨才

登七星岩

层陂过尽碧粼粼多少奇峯倚翠旻
北斗有形山竞爽南天无尽草长新
烟霞兴剧归来日林壑缘除病後身
更欲乘风穷一目晚云吹上白纶巾

端州道中望峡口积雪

篷窗一夜动寒吟晓望千岩雪已深
峰不向阳常皎洁雪如恋壑更萧森
祇因路折偏迷眼不奈身孤益感心
赖有留宾戴安道何须回棹北山阴

邱社讌集遇柳州太守江眉瞻话旧

春水垂杨拂画船江头相送又经年
一灯白石吟边影万里青樽别後缘
子厚溪山争似昔文通词赋寄从前
横柑堂下闻舆诵归到南云向客传

沥湖舟泛

七星岩下漾揉蓝偶泛扁舟胜自探
岭外霜风饶绿树客中春色剩黄柑
武陵未许游人住辋水空将钓叟惭
三十六陂秋故在相看宁不忆江南

玉屏峰看梅

百尺危峰倚碧虚凭高舒眺夕阳初
云空却见花争放山静还宜雪有余
洞口猿归香缥缈山腰鹤下影萧疎
谁能更作罗浮梦么凤横斜坠玉蜍

夜偕愚公準庵及仲子看月

云敛晴霄桂影斜移牀聊复傍檐牙
老夫得月难忘酒客子临风忽忆家
夜半隣人歌白苧冬残异国见黄花
谁知一枕江南梦又听空林舞晓鸦

赠宋维清

清霜瑟瑟鬓华寒长铗由来未易弹
十九人中犹作客七千里外为求官
居贫未信从军乐任侠偏嗟行路难
漫道珊瑚空在手富春明月挂渔竿

客有问听翁何义者书以答之

炎凉时态眼难明况复容将口舌争
万事不须生计较一心惟合养和平
洗桐书屋秋鸣鹤搓柳球塲晓啜莺
更有翟公门外客任他来去不关情

又

牛马从教任意呼醉人推骂莫相扶
也知有进宁无退那见多贤遂少愚
今古事当全合算行藏天已预为图
浊醪一盏诗千首若得闲心对海鳧

留村尚书招饮观家剧即席纪事

碧幃红莲未易攀郑庄迎客夜初闲
席联旧雨情偏洽筵敞高云礼尽删
竟夕悲欢难自主一时嚔笑若相关
浣花独有龙鍾叟扶拜何堪剑履间

初六夜宿二癸庵

为避尘嚣就梵宫一宵清兴许谁同
四山绿净天垂釜万树青低月偃弓
岭外春来寒已少湖边波定影全空
此时身世知何处扰扰槐安叹转蓬

登束江亭望砚洲怀古

直下牂牁势不平苍崖夹峙失纵横
天低絕壁云无影水遶孤城浪有声
高寺寒泉来往路空亭细雨古今情
清风孝肃原千载一砚何由乃得名

元夜徐凤池顾辛峰郑愚公黄位北钱目天季伟公偕家观庄武登同集石濂上人招隐堂分赋得回字

岭外烧灯暖已回雁堂初启集邹枚
陶潜爱酒诗千首支遁逃禅茗一杯
香界有人看皎月春城何处碾轻雷
此中桃杏俱开遍消息江南未放梅

石公招诸同社集怀古楼分得八庚

忘机随地好班荆狮座聊寻鸥鹭盟
远客何劳寄诗卷幽人多是爱钟声
云因恋岫常思静雨

欲妨花不肯晴尽日留连宁足计酒炉禅榻足平生

雨中

深坐摊书昼下帘午余更觉客怀恹满怀山影暮云合一夜雨声春水添香印每从长日冷酒杯偏忆故乡甜傍人莫为逃禅怪支许由来麈共拈

寻朝汉台遗迹

五羊城下草如茵欲访遗台迹久湮上客何来真汉使老夫原是旧秦人雄图已尽珠江晚往事徒留锦石春惆怅函关千万里乱山斜日少停轮

珠江春泛

木绵花发共他乡极望羊城倚画樯树色晓笼山雾紫江流春带海潮黄陆生馆废金装尽赵尉台空玉镜荒却恨奔涛方日夜梅花偏隔岭头香

送友人还江南

离亭芳草杂蘼芜客里歌骊意转孤紫陌飞花初过马白门垂柳正啼乌往来路向东西别醉醒情因去住殊若到隋堤烦寄语郢州诗思满东吴

和长白题画不如楼

高楼百尺倚嵯峨宾客曾经此地过云拥万山开岳麓天交一水遶牂牁岚光自觉当檐满秋色偏能入槛多不是柳州曾易播谁留胜迹在岩阿

酬兰偶

多君雅志迈时人年少才高必有神问字偶然逢漫叟读骚偏喜近逋臣花间诗卷吟深夜竹里禅房过晚春待我荔枝同啖後倚门应得慰慈亲

喜晴

一春檐溜动长嗟暂得云开遇物华枕簟香清梅润减帘栊陰破柳风斜林间买酒留看月叶底扶藜剩见花明日板桥青紵下王郎应更系骄騶

题梅花泉卷子

西溪见说不寻常春到人间路渺茫万树冷云晴带月一泓寒雪静浮香高人尽日携筇杖幽客何年着草堂我欲移家更深处武陵鸡犬未相妨

清明旅怀

养花天气反如秋槐火初新赋远游卧病岂能还止酒思乡何必定登楼七千路外鱼书少廿四风前燕语愁却忆去年同上塚一杯犹得洒松楸

谒三忠祠

天水南奔祚已终成仁有赖见三忠魂归燕市原非死力尽厓门气未穷今古何人回劫数乾坤无地哭英雄苹蘩欲荐空多慨雨歇荒祠吐白虹

寿孝扬王大将军

岭外南薰拂大旗封侯才及弃襦时酬君志在长鸣剑破敌书来正赌棋竟日自临修竹帖三春人诵鬪茶诗遥知荀美方年少未暇登山覓五芝

又

鹄印光摇海甸安几曾三十始登坛起居八座方春晓筹画诸边每夜阑孟珙谈兵惟注易修期草檄未离鞍一时麟阁丹青画犹作何郎传粉看

和洗进士乔之见赠韵

老去难闲访戴身五羊城下驻征轮岂期白社容逋叟只合青山作外臣浪迹久为梅岭客忘机常爱葛天民花开不厌同挥麈除得醇醪未是贫

质既庸疎命尤薄抚时揣分忝窃已多作自解诗

检点平生信自然无才犹得荷苍天春花秋月将三万緑水青山旧二千妇胜刘伶能劝酒儿如通子好谋篇虽知结客黄金尽何用囊中定一钱

又

漫道衰年尚远游从来不解锁眉头未经海岳终堪恨才见莺花已欲留竟日逢人无俗语当时知己尽清流凄凉短发江湖上賸有云溪号醉侯

又

少年世事未关心悔别名山百虑侵读史误看循吏传探怀空谢故人金青云荏苒难通路白发萧条已满簪惭愧乾坤身老大文章空自望知音

孤踪万里五夜百忧交集旅怀率然成咏作自述诗

也知磨蝎困孤臣岂谓无官虐更频八口何尝逢稔岁一椽犹是共他人酒因赊久难谋醉篋为搜空任惹尘说向傍人应不信老夫原自耻言贫

又

两年湖海信全稀未有关心苦忆归庄舄已衰家更远彦升犹在子无衣奴忧多馁常求去友识忘炊不告饥顽钝独怜无所事一编时掩客中扉

又

不是云霄寄问疎从来懒作玉京书剩将朽枿留斋马卖到?编少蠹鱼尚有三丧须解棹全无一顷待挥锄买山自感襄阳意但恐山中累有余

鲍尔先招集片雪堂小饮

同是高阳旧酒徒有谁能似叔牙无歌残花月三千曲写尽云山十万图庭树手栽同汉叟沧桑眼见笑麻姑相逢今日珠江上独为知心倒玉壶

维清携尊坐月

岭南秋半尚炎熏客舍追凉载酒勤万里乡心悬似月三更人影静于云鸡头满把珠光滑龙目登盘玉乳分如此清宵良不易迟归应为惜离羣

端州赠伟公

南天秋半暑初微一片孤帆去若飞弹铗耻为宾馆叹叩门因乞父丧归熟思生计惟开卷看尽人情好闭扉我欲掉头从此别饥来犹有北山薇

家留村大司马招同诸子讌集锡祉堂兼送电发归里用其原韵

油幢高建海天雄清夜留宾有上公筵敞 璫歌扇碧杯浮琥珀烛花红千山粤峤吟庄舄一曲江南忆妙隆几度送归归未得惯催乡思是秋风

依韵奉酬家留村制府

汗漫天涯已隔年
尚书高谊上秋烟
班荆屡入三公府
种豆浑忘二顷田
自昔心期旌白水
从来身世任苍天
一人知我惟宗袞
更乞谁家买字钱

端州赠郑珠江太史

书带新抽砌草痕
玉堂归养掩衡门
乡邻罕识先生面
菽水常沾圣主恩
经岁避人寻好句
有时留客共清樽
投交最喜心期惬
古道於今谁与论

端州送家青坛给谏还朝

未归常是送人归
秋到河梁卷葛衣
剑佩还朝声自好
金装满橐计原违
愿教风采同中复
始信文章似少微
赠别殷勤持一砚
染毫应不负纶扉

泊舟禅山别邝无傲

归心日夜肯流连
为访高斋一繫船
人已忘情何有病
客来无语莫谈禅
秋窗试茗烧红叶
午鉢分餐煮白莲
从此长沙徒惆望
九疑晴绿隔湘烟

留别厂翁和尚即次见送原韵

秋半分江暑未残
片帆斜挂夕阳看
浮杯送客君非易
垂橐还家我正难
世事明于三夜月
人情险似万重滩
相期有约归黄海
莫惜珊瑚作钓竿

厂翁和尚同伟公兰偶及家武登送别禅山舟中望月分韵

岭南归雁羽难留
追送澄江赋远游
与子暂同千里月
为谁犹欠一分秋
碧天雨过云偏尽
翠渚风清露未收
不醉今朝应未忍
关河明日思悠悠

韶阳用许郢州韵

西楼无复舞轻罗
空记残碑立桂河
百粤江山兹地好
三秋词赋古人多
斜阳不断孤帆影
远水重闻倚棹歌
从此蓼花枫叶外
洞庭明月照曾波

宿良田

暂住篮舆息倦夫
板牀土锉乱茅铺
残灯弄壁争鼯鼠
细雨连山叫鹧鸪
樵鼓几声惊短梦
征衫一幅老长途
人生何事同桃梗
欲画潇湘泛月图

耒阳怀古

金州城下耒江滨细雨孤帆怅昔闻王佐未堪终百里帝图宁许作三分汉家霸业留残垒杜
曲诗篇哭断云今日木兰船上酒一杯应不为湘君

望岳

一棹沿湘九面分竭来苍翠散朝氛人言上下不同雨我见高低无尽云煨芋地罍谁复在采
芝石室客常闻安能直上芙蓉顶徧读朱陵古篆文

酬赠赵又裕司马

碧澜堂畔惜离羣十七年来始见君往事已同苔上水旧游今聚岳边云青峰数点秋闻瑟白
社三更夜论文方外谁人似司马可能张楚用吾军

次韵酬华容徐荆庵明府

扉掩都亭昼懒开一朝车辙破莓苔高台事往雄风散曲巷情多旧雨来每叹龚黄皆妄语终
输屈宋有奇才秋晴岳麓犹堪访倒载何辞烂醉陪

游岳麓书院偕长白仲子同赋

写尽潇湘听雨图何来杲日映菰蒲天开宿雾招游客地许名山属大儒鸟篆尚能存禹迹龙
宫空自锁仙都横经往事知何在欲访湖南旧讲徒

又

乱後山川竟若何此间遗构幸嵯峨千秋正席朱元晦一片残碑李泰和衡岳烟霞逢霁少湘
江风物过秋多夕阳好处徧怀古不独登临兴未磨

李育九守戎招饮即席赋赠

玄发辞家气激昂白头相遇坐熊湘三千里外共樽酒十七年来老战塲红豆歌摇鸦背月黄
花香点雁头霜相期空有寻真约鱼蒲云深石迳苍

题辰六署中云山涌坐楼

官斋无异草玄亭高阁嵯峨对列屏四野云光浮檻碧万峯烟树入城青元龙孤榻书常满巫
马单车辙暂停倚尽夕阳应自好知君一啸破苍冥

又

为政心闲身乃闲此中谁许共跻攀能清不愧湘江月爱静常看岳麓山丘壑自当功令外乾坤多在醉吟间公余试检云烟课七十二峯罗翠鬟

登见岳楼次辰六韵

候转吹葭霁景融偶经严邑访民风城头不断秋烟绿林表初看夕照红回雁千寻长隐隐离鸿几日自恩恩凭栏共指烟深处屈宋精灵在此中

又

桃花江水遶城边城上楼成甫四年抚字谁知当乱後登临同喜在春前频教白雪留诗句为有青山费酒钱天际遥看峯个个白云飞尽翠还连

益阳至日仍用杜句

年年至日长为客客里今年略似家闵叔累人宁易饱阮公怀古不胜嗟黄牛水远滩声小白鹿山高树影斜何处倚楼同有梦隋桥明月故宫花

过黄陵庙

鹧鸪声里倚兰舟帝子遗踪此处留粧就湖山三万顷啼残烟雨几千秋青枫叶冷鸾旗出斑竹痕深雁柱流一酹椒浆寒日晚苍云隐隐隔巴丘

黄鹤楼

天地寥寥赋远游此间楼涌大江浮涛声直下三千里云气遥连十五州霞表仙踪疑远鹤河边客舫泛羣鸥那堪陵谷无常处鹦鹉难容碧草秋

又

黄鹤矶头有所思檻前帆带夕阳迟当年吕叟曾吹笛何处崔郎更赋诗夹?江城多事後倚栏山水欲归时楚王宫阙荆榛里只许朝云暮雨知

归兴

李家门户任如龙归去聊为食蓼虫天下有谁思旧雨人间何处哭秋风短衣半夜青云外长笛一声沧海东与尔望衡真不远玉缸春酒蜡花红

九月六日偕周匏叶刘季英朱素臣舒奕蕃家大章小集克敏堂分韵

岂少侯家玳瑁筵舞衫歌扇夜留连那堪湖海皆相得同在风尘不受怜授简更当明月下狂吟都在菊花前药栏竟日堪乘兴粗粝何妨共百年

又

离索宁殊在远郊多君有约过蓬茅相看快意非常客可与论心即旧交尽却笙箫吹木叶杂供鱼蟹剪秋菱何堪更赋江淹别捻断云鞭细柳梢

夜集种字林听雨分赋

间中相得有诗豪晚向墙头过浊醪夜色一灯深竹树雨声三径骤风涛消磨往事苏门啸潦倒余生楚国骚莫更纵谈尘外事卧龙跃马亦徒劳

集种字林试紫霞茶柬栗亭

桐花满地暑犹寒雨後闻歌行路难远客寻君唯有梦才人遇主不须官紫阳旧业吹箫坐白下高楼倚棹看许我名篇应计日亭前刻遍翠琅玕

武徵携樽过种字林坐月分韵

结夏墙东少往还为君携具启柴关雨过残日初宜酒月到深林似在山入馔蟹螯秋信早垂檐马乳夜光间辋川更有南城约红藕花香绿一湾

七夕泛舟为卢宾三补贺花烛立秋前一日

浣罢溪纱出若耶西陵油壁正同车移来江左文章树共放河边吉庆花白帝明朝秋日好黄姑今夜漏偏赊临窗试取水弦弄应笑闺中有伯牙

七夕送念昔归楚

年时记泛洞庭舟今日闻君赋远游天上牵牛犹有别人间洗马莫须愁绿萍分影移歌棹红藕吹香入酒瓯若到故乡休久恋潇湘兰杜不宜秋

重阳後一日哭扶风君墓下

华表重归旧业荒烟霜满目总悲凉已无金屋藏春色但有青山送夕阳万里梦中来倩女九秋江上哭萧娘欲知多少伤心事一草坟头一断肠

又

三年真悔海南游一诀终难到白头失水鰥鱼原不寐覆巢归燕竟谁投言关骨肉应难吐泪
出肝脾未易收自是幻缘君莫恨人间华屋总山丘

虎丘拜东莱二姜先生祠

东海当年说二难雄文高节震朝端书将正史心俱壮读尽离骚泪未乾秋色已从吴市老斜
阳犹作敬亭看谁家兄弟能如此曦发泉台覓旧冠

又

霜落空山草不春荒堦倚杖拜遗臣龙门酌酒同携手虎阕攀裾肯顾身家国一时多难日江
湖千古未归人三桥华桷应非少谁共裴公可结邻

次韵答余广霞

孤影谁怜太瘦生老年羞更说才名大人不作弹冠梦小妇难为叩缶声两载暮云怀粤岭一
番秋雨过吴城几宵展转频推枕听彻虾蟆欲断更

又

路岐宁复问高低梦破方知醒亦迷只合行藏同虎鼠谁将得失问虫鸡相逢那有三生笑欲
去翻为半面啼始信南华原不悞从来物我自须齐

赠涛月

闲身爱向静中安小阮相逢意更欢自是管宁犹皂帽何须贺监不黄冠花于市远宜长对树
比邻多莫借看大洞经完晴月上一樽初熟共盘桓

江陰陆天涛明府招集署斋

秋尽澄江月影寒南轩煮酒坐更阑从他别梦长千里如此才名始一官秋水共知为更好着
书犹复向人看城头山色多飞鸟谁信金门索米难

又

访戴何来繫短槎士龙为政俗无譁官斋地隙常锄菜海国风清好种花月魄正圆人对酒秋
心欲动客思家谁知未了西牕话街鼓声声报晓衙

重游韩园喜晤尔铉

重过玉暎旧时堂好友相看鬓总苍
百岁欲同梅树古一年多为菊花忙
闻香未及开山馆谋醉何曾计客装
三十余年清梦在此时能不倒千觞

立冬前一日同集生玉亭游君山登望江楼

层波渺渺水飏飏乘兴篮舆到上头
风月可怜人自老江山无恙客重游
乌鸦向夕争归晓白雁明朝又送秋
望里金焦深不见倚栏谁更说归舟

送卢宾三携家归皖江

漠漠彤云雪乍晴蒲帆十幅出芜城
故人正作中年别才子偏高大历名
画桨月明横轸夜玉箫风和扣舷声
皖江旧是英雄地怀古应知有远情

俞锦泉招观女剧漫赋

十二楼中度曼声玉轻金艷影纵横
主人但谓清觞慢客子翻嫌绦蜡明
休唤奈何须烂醉若为看去莫多情
两行红粉重相笑犹记颠狂是此生

为史淑时悼亡

奔月还星岂易知百年欢爱一年时
好难都记翻成恨情不堪怜并作痴
彩帖绣余抛断线青编读後印残脂
巫山宋玉何能赋云雨荒唐自可疑

又

谁画刘家列女图当年挽鹿事原殊
从夫自信非余子作妇真难况两姑
艷似名花惟有影娇如弱絮岂能扶
海山浪说仙人在比翼终怜彩凤徂

又

才开奩子赠同心夏雹俄将并蒂侵
世上忽传卢女盃闺中欲碎伯牙琴
青山有恨能埋玉红粉无缘可铸金
惆怅竹西亭下水一回挥泪一回深

又

落叶哀蝉尽可伤返魂何处访稠桑
愁如碧草初经雨瘦比黄花竟萎霜
多慧只教心更苦无才或得命能长
祇今灯下多情泪犹点安仁白练裳

杂感诗和上若韵【三十首】

摩天渐陆一秋鸿物我由来事不同作吏漫夸龚北海着书曾学董胶东那知工拙分齐瑟莫为存亡问楚弓几亩黄花三径竹尽教残日付樽中

又

澣紵相传早得封宁知身襍酒家佣饥多懒向屠门过吟苦常从饭颗逢谁使老人为汉客徒因娇女学吴侬时时运甕成何济犹阻天关第八重

又

旧筑愁城渐受降三春花气扑瑶缸雕龙此日人无几扃螽当年客少双桐帽可能登广席竹灯尝自照幽牕肯教一曲琵琶泪弹向青山月满江

又

行行老骥敢嫌迟才子曾称杜牧之庙食久应賒远志水嬉今已负前期事当已去宁堪忆人到将衰总不宜赵壹囊中无别物频年惟贮浣花诗

又

中条山下驻余晖惟恐人过早闭扉吉了也知非得已杜鹃常唤不如归身无玉垒桑千树手种金城柳十围纵有终袍那得赠秋来欲剪芰荷衣

又

欲取珊瑚网自疎行吟空自笑三闾东臯有意聊谋秫北阙无媒且灌蔬乾蠹岂能成脉望残羹争得化王余常怜郑叟无先见臣老方知壮弗如

又

闲行曲迳数花须一任人催九月租眼纵欲青眸合洗发无堪白血难余云深不觉离鸿断天远谁知立鹤孤从此买将三尺棹五湖飞雪舞黄芦

又

几叠青峰对碧溪移家新住竹林西忘忧时取三升醉避俗常将一卷携只拟安身如尺蠖宁堪断尾学牺鸡饭余偶得簣簞句欲寄山僧手自题

又

小屋浑如画舫斋新年渐觉赏心谐客来看竹横棕拂儿为浇花湿笋鞋得醉应知天可问无
忧宁有地堪埋絶交读罢刘生论且与山中鹿豕侪

又

九衢终日起纤埃独把藜牀上啸台纨扇惊秋藏皎月香车入夜碾轻雷身闲即办兰和菊性
拙宁思棘与槐最美江头双白鸟一回飞去又飞来

又

四海茫茫孰问津几多踪迹笑梁陈芙蓉阁下回珠勒杨柳堤边走画轮俯仰未能同热客古
今谁解作闲人行春莫向江头去丞相从来易得嗔

又

朝衣侍史久无熏翠被闲来拥鄂君常为寒梅成艶曲偶因修竹作弹文懒挑灯穗三更月静
看香鬢一缕云客过莫教谈往事已无臧否不须闻

又

庾信园中种合昏绕篱花竹闭闲门落将桐叶云生影开到梅花月有痕爱酒只因能换骨闻
歌辄欲为销魂吾侪原少封侯相但合弹琴隐陆浑

又

陶泓毛穎日相欢岂料人间有万端美女何嫌遮翠钿神仙又见泣金盘马周向後偏宜醉范
叔平生合耐寒惭愧东风无气力等闲吹得百花残

又

路逢九折漫跻攀家住隋堤近小山黄老未须求道去红儿聊共踏歌还故交多是人千里寒
士安能屋万间最笑劳生难暂歇画船日夜过黄湾

又

离骚一帙度年年賸有文园卖赋钱但得种花兼酿酒那知成佛更生天蒲桃上架三更雨杨
柳搓球二月烟莫怪比来生计少痴顽原不许人怜

又

百虑皆从酒畔销渴羌从此不称姚任教老去频呼马谁信童时早拾貂山月自迎庐阜衲溪风能送剡川樵举头便见云霄近偏是人如万里遥

又

自分生来似苦匏巾箱尝自取书钞难求野老三年艾拟结山僧一把茅鼓到挝时帆自转瑟当弹处柱难胶千秋世事原无定扬子宁须作解嘲

又

历观前事爱东臯螺赢当前笑二豪且待数畦供菽麦安能一斛献蒲萄饥乌岂得头生角高鹄何须背有毛休怪临餐还辍食成应自惜薪劳

又

不用临风感慨多此中犹可免风波右军垄下人曾誓左相门前客懒过剑击长虹须痛饮箫吹明月好清歌桂花寂寂青天老未得无情奈若何

又

日转空庭树影斜更无尘梦到东华爱看仙妇奔明月却许迂生号幻霞雪後花开香玉蕊春来草放郁金香悬知富贵皆时命莫羨高轩叠鼓笳

又

闲榻兰亭写硬黄不烦宫纸赐银光小红歌罢声还啜太白吟成意欲狂幸得林栖同谢燕肯教刍牧任梁鸯楞严一卷心香爇便是余生却老方

又

悬车久拟罢宵征见说弹冠梦亦惊有累但须偕适越无才原不望登瀛尚留习气为词客未免机心见酒兵五亩闲桑春雨足教儿且共学归耕

又

晴窗晓日下丹楹笑杀淳于尚未醒片月屡经浮世白数峯犹对故人青前年踏雪游衡麓此日吟秋忆洞庭胜负何缘争未了博经真欲毁撩零

又

腰围渐减带难胜岂料闲情日更增赋就大言酬宋绢诗成小字写吴绫夜如紫凤真堪笑坐有苍蝇信可憎龙性独怜驯未尽醉中豪气欲飞腾

又

渐欲同为造物游半生疎放耻营求容头不碍高檐帽煖体偏宜大布裘緑酒有情能过日黄花无恙可经秋逍遥便得江头住敢负芙蓉几只鸥

又

种得梅花緑水浔虽无万壑是山陰每闻客到偏多喜惟恐人知欲更深学道渐空荣辱想作禅先断去来心自从庐岳闻钟後一见桃花悟至今

又

霜花着鬓白毵毵樗栎年来恐不堪幸值两朝文渐盛欣逢七国乱初戡垂杨晓听双栖鸟香草春縑五色蚕自是放怀应便是八公从古在淮南

又

朝朝看奕向疎帘紫栈成灰手更添蕙草雪消香满迳桐花风定月侵檐文章似我无余锦机杼如人独比缣坦率尚虞吾道隘袁公何必事矜严

又

端居原未远尘凡日下经籤已满函自许野人甘雪窦不知朝事爱冰衔春生蒋迳花遮檻秋到淮山桂满嵒葛被练裳时偃仰也应胜似白凉衫

丙寅元旦

画烛荧荧看晓粧闺人相见道胜常耐寒老子初围火学拜顽孙欲哄堂雪色正添窗外冻晴光偏送酒餠香也知增岁原为减犹喜吟髯未尽霜

寄怀家留村司马

忆昨羚羊峡里游官斋剪烛意绸缪辞家空负三生月【余入粤後马姬卒於吴门】度岭真逢两岁秋【余以癸亥九日度庾岭甲子九日出摺岭而归】交谊如云知我困臣心似水为人谋栽桑种秫烦深算一饱应知未易酬

又

多君意气胜襄阳德水亭前语未忘佩剑只因仍适粤读骚翻悔悞浮湘【余至楚当事颇以衆人相待】人情閱後心偏感世路分时思转长遥望南楼宾从在可曾对月忆中郎

书陈椒峰册寄留村

当代论交孰浅深偏於将伯感知音长怀海国春云谊未改泉亭夜月心赤社铭钟君振古青门荷插我从今闲寻旧好烦传语雾里看花欲废吟

小饮朱西柯四本堂

西柯不见辄相思步履经过未肯迟偶出寻师参玉板还来邀客鱸银丝雪晴修竹新成径春到垂杨渐软时为覓厨娘新樣法与君重约赌金卮

题毕正持松涛阁着书图

万壑清风鸟道纡倚栏常有緑云铺身如鹤立诗同瘦迳绕龙鳞岁久逋百尺未曾容客上一编应自与人殊知君避俗非无意不羨秦家五大夫

书云招饮看花时庭前芍药莺粟酴醾争艷即席步蛟门韵

好客常时不掩扉南园櫻笋正初肥香非一种蜂难定艷有千重蝶竞飞锦瑟横时名士醉彩毫摇处美人围不因置驿多佳兴那得脂痕乱染衣

黄孝昭贯酒过饮同谐石淑时正持分韵得八庚

清簾疎帘一榻横南轩久已废将迎人因无意成佳会酒为能賒得快情萱草开时看戏蝶桐花香里听啼莺不缘较字频烧烛那得留君待月明

送孝昭游武林再得十灰

见说西陵花更栽褰裳无计几徘徊忽闻诗酒催行去益令湖山入梦来油壁漫寻苏小约金装长忆陆生才竹西五月芙蕖好分付蒲帆缓缓开

送藏山和尚还中冷时以梅花家语见示并惠新诗依韵答之

空谷何来得好音锡飞今见下东林因寻老树穿幽径欲共寒花说素心有句直怜云未静无言应共雪还深西窗夜雨原堪聽拂袖谁教返碧岑

又

岁寒宁易得知音一卷传来是道林往日烟霜曾着眼此时冰雪有同心花将解语偏能淡诗到难名更自深我在罗浮颇相忆独惭佳句付仙岑

幽居书事

幽居幸远软尘红永昼耽闲卧一弓移石且留蕉聽雨推窗先借树占风吟残转觉蝉声鬧梦短徒寻蚁穴空纳纳乾坤无一事瘦筇长倚夕阳中

又

九夏何曾更着冠微颺才送意先欢闲人合在长闲地热客由他爱热官时雨陇头秧五叶斜阳屋角竹千竿山妻却怪多吟癖煮豆频劳劝晚餐

又

萧萧木榻倩龟支一啸高斋坠枕时引睡不辞河朔饮怕愁常掩杜陵诗书因悞信名终钝人以诚求计总痴弹指两年成七十也知学道尚非迟

又

小亭真似筑沧浪曦发篱边受晚凉足畏险巖常引疾眼羞轻薄未嫌盲桐花带露香飘檻笋箨摇风影过墙拟作槐芽聊一饱东田新麦麪如霜

又

世事升沉信夙缘生涯何事不由天经籤有课晨先起文字多逋夜不眠老友为谋栽秫地贫交常助买花钱支颐竟日无来往坐看山炉袅篆烟

又

曲巷泥深掩户荆老人畏暑澹无萦经旬已见苔千个昨夜又添莲一茎急雨更拖残日出断云还作乱山横西隣有客迟何事空费虚堂煮酒声

又

茂陵莫拟汉相如且就城东水竹居懒极那知身外事倦来时堕手中书敢期赤社衣冠伟渐喜青山笔札疎却笑杨郎空耳热乌乌扣缶独何欵

又

锦石船回欲养慵梦中无复景阳钟一椽已可容鼙叟十亩何妨号老农引分自安心易足感知尝恐报无从沥湖堤上篮舆软遥念芙蓉七个峯

又

老骥徒怀万里心山麋终是爱长林簪余短发犹非老选徧名山总未深天上有人摇羽扇市中何用碎胡琴一盂炊熟长腰米莫问浮生岁月侵

又

过从莫问笑瓜牛小有轩窗致足幽九月种花堪供酒三更对月最宜秋身如白鹤难乘轂心似苍鹰已脱鞲从此更饶烟水计轻肥宁共小儿谋

偶然作

得意失意非所知出户入户常迟迟一盘蒸桃红琥珀六尺竹簟黄琉璃飡饭难为老妻劝啼笑时被儿童欺百年鼎鼎亦何速跃马卧龙安足奇

一枝

一枝聊学鸟安巢棋酒春来渐欲抛闻见每嗟新事异过从渐少旧时交轻絺称体忘宫锦野?登盘胜美肴只有晴蟾无世态年年常为到林梢

月下观莲

玉沼田田倚绿云露华清夜暗香闻今年正得花三品此地原宜月二分凉影连宵悬雀镜幽芬到晓袭羊裙嫦娥自惜红衣冷欲为湘君下素雯

壽汤惕庵夫子八十

紫气遥瞻感倍深当年曾得荐鸣琴岁时自老怀人意陵谷难移知己心硕果久留宁用采神芝亲种不须寻钓璜未是磻溪愿一曲南飞且共吟

又

鸠杖婆娑引凤毛新秋棋墅乐偏饶客经盱水方知学人与庐山相并高河岳日星千古在臯夔巢许一身遭侯芭梦到扬亭远欲寄蓬莱换骨胶

金山和毕正持韵时方发帑修寺

一棹横趋万马奔多君乘兴探云根直临中峙莲花影俯蹋交流竹箭痕圣主正思天有柱神人聊障海为门蛟龙久卧知难稳莫把寒钟震晓昏

和伯御侄游平山红桥四首

经旬不出只科头美尔乘槎作胜游棋墅千家围曲?酒炉一带倚芳洲苹开画鷁依青嶂花夹垂虹枕碧流吟得新诗满怀袖可堪风雨一庭秋

又

歌吹犹闻满大堤玉箫金管郡城西綠杨影密江蝉噪红藕香深水鸟啼此地隋楼曾共醉谁人蛮榼更同携惟怜清夜飞萤地只剩凄凄碧草齐

又

珠帘画栋压人寰莫问茱萸更几湾自有醉翁凭画檻却教词客重青山春风别後龙蛇杳明月分来鸥鹭闲最是荷花独满把谁能邀客更重攀

又

行行策杖舍轻航此地高楼半夕阳千古文章时已远一帘风月夜初凉山光自足留人赏水调宁关故国亡满地秋陰凝眺远垂杨犹自带崑冈

鹤问来自秋浦喜而有作

罗刹矶头木叶红蒲帆何意挂秋风官无民社能轻出老爱琴樽喜暂同浮世暗销离别内故人多在寂寥中西窗一话非容易尽读新篇意未穷

九日集玉粟称言斋时鹤问至自秋浦分得支蒸二韵

堦前流水綠差差正是天涯木落时乌榜乍归江上客黄花初放酒边枝知交渐少原须重讌笑无多最可思尽日疎帘湘簟静不妨同看谢家棋

又

兴发何须折简曾偶闻高会拂苍藤花前聚首人无恙月下掀髯我尚能就菊巧徵诗一字卷荷狂吸酒三升吾侪亦信非麋鹿短发空怜岁序增

九日次书云韵

江山处处有楼台秋气偏从此地来千古伤心杨柳笛一时到口菊花杯迷花黄叶寒烟冷隔青峰晚照开惆怅昔人多不见步兵长啸首频回

和宋长白见寄韵

何日招携共入林一篇相寄似鸣琴岭梅湘竹同幽梦碧水遥山忆远寻逋叟楮冠栖北郭故人彩笔重南金分明丁卯桥边句赢得空斋夜夜吟

初四日蛟门招同书云志庵眉枢集见山楼次蛟门原韵

高斋花事乍逢春踏雪过从兴倍新幸得烟云娱冷眼肯将车马负闲身无多略似睢阳老有约还同雒下人堂上笑他批纸尾白头辛苦为丝纶

元宵後二日小集和蛟门韵

烟月能留渐老身烧灯又见一年新美人意重来清夜词客情多为早春纵酒不嫌添麴友爱梅长欲护花神先归岂是无佳兴灞上愁逢醉尉嗔

哭豹人二首

垂老空思对酒期那知缔好便伤离同言词客常天宝岂信徵君在义熙百岁才名贫病里两家儿女涕洟时寝门为位非常事可奈山阳笛又吹

又

年来耆旧尽沦亡屈指何期到溉堂奇字欲留周汲冢高人谁复鲁灵光龙蛇有几时堪惜猿鹤无多事可伤想尔凌云应一笑庄生齐物等彭殇

寄辰六

自愧冰清乐令般逢君驱马入秦关欲窥清汉无多路偶抹微云是此山玉镜早偕仙月皎金門长笑岁星顽祇缘文字成亲好漫拟浮槎到碧湾

又

去年一棹访云萝正值烹雌百里歌芳草未归寒梦远垂杨偏似旅愁多穷途授服裁番褐弱女支餐卖越罗兴尽不堪逢岁晏满江风雪独披蓑

书云招集种松轩看垂丝海棠步蛟门韵

燕燕营巢未乳时轻红初向画檐垂携觴最爱粧能浅烧烛还怜看已迟态欲难胜翻似醉情
缘不断更成丝碧鸡坊下颠狂叟无句堪酬绦雪枝

集种松轩看梨花

李艷桃娇百感生梨花开处更含情相看但觉尘心净不意能教病眼明压帽有风偏婀娜洗
粧无雨更轻盈多君买得青旗酒月黑何嫌到五更

二月廿七日武徵东湖彦昭夜集蕤芎舸分韵时西柯以事不至

小院东风放海棠浊醪深夜过隣墙忘忧只合归吟社投老偏宜入醉乡三月烟花半寒暖一
宵灯火各闲忙清明节後秋千冷不饮还应负艷阳

偶成

投老偏宜向薜萝春来幽兴晚偏多偶闻夜雨思分菊自引山泉待放荷爱静独为诸葛卧谈
禅惟许懒融过竹篱茅舍平生事何必曾逢春梦婆

喜霜溪移家至自白门

交深车笠共寒温浮世纷呶岂足论解组久知身有数谈诗今喜舌犹存红牙点拍词千首白
发烧灯酒一尊曲巷莫辞愁雨滑从来风义重彝门

怀蒲公和尚

问法常思访道林我来君去费幽寻始知六代名山地不了三秋上士心翠壁摩云堪纵眺清
江着月好闲吟如何韩信城边路^廿没蒲团未布金

次感怀韵

浮家拟向五湖东荏苒年华付断蓬独卧敢希高士雪远游空忆大王风心随芳草三春後身
老垂杨六代中惆怅鸣琴长在篋谁能挥手送归鸿

赠陈娄东

萧斋六月葛衣单客况於今且暂宽自笑酒狂犹未减却怜诗瘦更相看思君那得过蓬户似
我都忘着楮冠却笑玉山浑欲倒也随陶令两眉攒

赠东枢弟

曾与天公上素笺当时名字共聯翩嗟予白雪头先老爱尔青云志更坚梅里着书秋偃仰萧斋赌酒夜留连唾壶欲缺君休恨千里终当早着鞭

偶读吕居仁夜夜蒲团坐五更之句漫作二首

夜夜蒲团坐五更欲除豪气学无生秋穷最与禅心合人静偏教道念成呼婢不妨惊鹤梦求衣宁复候鸡鸣何如昔日趋朝早金马门前理佩声

又

夜夜蒲团坐五更而今万事不关情也知来去非真相便是虚空亦强名才说幻缘应是幻若教明镜向谁明六如已是非非想况复虫鸡那用争

澄江九日作

清秋重系剡溪船借榻萧斋意惘然岁序催人还九日江山别我已三年黄花插帽非吾土红粉持觞总各天笑杀白衣人不见凭谁酬赠酒家钱

澄江喜晤昉思过饮玩月

才记分衿各几年故乡相见益欢然秋残忽得连宵月寒近难逢此夜天烂醉共倾桑落酒朗吟同研衍波牋红么白苕平生好愿谱新声付宝弦

喜广霞乔梓自吴门震修自毘陵至偕赵翔九徐石霞邓少广诸同人小饮分韵

倦游无事掩禅关正忆停云感慨间月下忽逢双屐到花前犹共一杯闲晴开积雨枫初赤暖过重阳菊有斑同是羈心在摇落何堪不醉辄思还

同广霞饮石霞斋头分韵

清立幽栖似陆浑情深旧雨为开樽霜凝古树红连屋秋老遥山翠入门北海千觴随客倒南州一榻许人温何时得遂携家约尽出奇文剪烛论

夜读昉思诸乐府题赠

江城橘柚欲寒天邸夜挑灯拂宝弦信是读骚能协律岂知奉勅有屯田词堪洒血宁惟难事到伤心定可传我是青衫旧司马为君焚砚百花前

又

菊部於今少輩行
高音麗節譜宮商
一時側目看才子
几處低鬟拜粉郎
筆架珊瑚原有數
箏調玳瑁信非常
漢皇正想凌雲客
何事猶虛七寶牀

移居皆可堂喜翔九石霞殿臣見過共用迂字

高齋遠在水雲邊
一襖携來榻更迂
略涉秋冬時已暮
為貪朋好地須偏
遠池并種花兄弟
竟夕長淹酒
聖賢見說張衡能
作賦日同觴咏意
悠然

登君山

霜染柔嵐色更新
扶筇還共步嶙峋
地因朱履仍留姓
客有銀樽豈道貧
雪色滿天催去棹
江聲一路送歸人
長松翠竹重相見
多謝青山不厭頻

過漫園訪陳元伯即贈

室迕何須着屐迎
開門即有住山情
亭花影接池花影
林葉聲傳砌葉聲
官冷尚能容下榻
人閑常得共敲枰
不嫌剝啄驚栖鶴
日向桐陰取次行

林蕙堂全集卷十九

卷二十

<集部,别集类,清代,林蕙堂全集

钦定四库全书

林蕙堂全集卷二十

湖州府知府吴绮撰

亭皋诗集

七言律

杨香山郡丞招饮广福僧舍

白雁传霜夜气高
禅林相对首频搔
客中召客情逾厚
外同人兴倍豪
半世青衫伤艳曲
三更红烛引醇醪

与君同是飘零者
莫待西风读楚骚

喜茅天石至即和原韵

清溪曲曲绕黄田
每为怀人怅各天
孤舫江头来细雨
一槳花里话寒烟
当年宦迹空留梦
此夕乡心暂解悬
风雪漫漫人渐老
客窗犹喜对牀眠

石霞招同昉思侑夏殿臣集南山书屋

月华澄霁正冬初
偶集幽斋旅思舒
时历烟霜盘有柚
地兼江海食多鱼
游人遣兴千鍾酒
高士传家一卷书
此日欢呼须尽醉
临邛谁识汉相如

题定峰所着

笑看侯门耻曳裾
定山高卧灌园蔬
手披今古无穷史
力创乾坤未见书
传就滑稽应复尔
歌成乐府更何如
我来得此称奇絕
漫比珊瑚赋子虚

元旦忆家

吴天钟动见朝熏客邸幽栖与性宜呵殿惊闻朝士早焚香翻羡道人迟多情未免因乡里久
处何堪易岁时屈指古稀今日是心同枯木渐无枝

偶吟

信步宁知所以然不求禅解不求仙疎狂自在三千界顽钝于今七十年近日行藏惟酒盞他
时毁誉任诗篇双眸何意重清朗未了蟬鱼夙世缘

上元前一日雨雪和宋长白韵时有国丧

无数银龙战远空漫天飞舞各匆匆山河若为衔哀白灯火难因锡庆红万户烟花迷晓月九
衢箫鼓咽春风一匙社饭无穷事拥褐愁吟碧海东

又

茂苑羈栖鬢已华蕊珠天上望琼花闲庭有迹来仙鹤老树无枝着冷鸦贯酒未能空近市围
炉少绪欲思家龙门不遇钱惟演白醉频煎陆羽茶

春仲同菊人广霞集饮王大席广文署斋共用起句赋诗

三老二百二十岁就中如我尚随肩顏同单豹宁嫌瘦气较元龙或似前踪迹每于闲处合文
章犹幸在时传主人莫谓无兼味金谷何能及此筵

又

三老二百二十岁高斋同吸洞庭春青氍毹北无多客白髮江南尚有人饱识世情因岁久惊
看尘事逐时新饮醇且尽清宵醉莫恨金昌折柳频

道过梁溪访忆梅轩与姬人小憩

日归忽已及春残偶过蓉湖系木兰才子意从眉黛得离人都入画图看花因蝶胃停偏久柳
为莺来折更难桃叶明朝渡江去欲吟团扇向谁欢

顾书先招同宗梅岑诸子集饮郝园园即空翠阁旧址时孔东塘国博後至

襌穢何堪触暑游为君乘兴到林丘亭台已逐新人改风月难将往事留满引敢辞长庆老豪
吟不解杜陵愁况逢颖达能相好爱看青山共倚楼

同宾三夜坐

沿江烽火一闲身小院追凉远俗尘竹影干云天欲碧桐花满地月如银时穷到老惟思静世
乱还家不称贫四海茫茫谁可问与君聊进一杯醇

怀丰携具同诸子饮蕤芎分韵得乡字

子荆高致不寻常蛮榼携来坐晚凉桐叶碧喧过急雨竹梢红剩裊残阳隋桥正有吹箫恨漆
室徒烦倚柱伤金盃满前须酩酊肯教薄醉不成乡

送宾三归皖江

送君归去欲何之梅雨横江一棹迟客里依人原计短乱中回信恐家移路遥莫问三江水装
薄惟存数首诗我亦绕枝无可托月明空约再来期

萸江秋禊偕诸同社作分得十四寒

新凉宁不胜春阑觴咏于今仿建安二七秋时天气朗十三楼畔水烟寬湔裙岂易当银汉泛
酒犹能托彩翰我是樊川旧游客来迟无复怨花残

芜城秋望分得二萧

秋气西来草木凋紫藤携得上迢嶢三山夜月萤千个六代春烟柳几条帝子游残空有恨参
军赋後更无聊平生亦是途穷客广武何堪极望遥

月下

蟋蟀声声啼晚霜主人清夜宿空堂偶闻露滴竹摇檻坐待月来花到牀起舞不堪歌皁?醉欹
何处拥霓裳山妻笑把葡萄醞一字吟安劝一觴

送朱亶初广文内擢翰院

纶扉几日拜恩初负弩旋看拥传车宋代楷模推武仲汉廷词赋待相如青门柳密秋行酒紫
府花深夜校书到日故人应借问东篱菊蕊近来疎

中秋

桂魄圆时秋正中彩云销尽出长空五更欲满人人望四海谁知处处同绕地楼台皆似水沸
天弦管不因风况逢江楚波涛静烂醉何烦蜡炬红

中秋後一日偕东塘亶初其恭集克敏堂小饮分得书字

岂分蓬门驻轸车清谈聊复剪园蔬秋光暖剩凉回後月色晴添雨过初离绪欲求干日酒交情常检十年书莫言此会惟粗粝俯仰乾坤思有余

秋感

无端客思忽苍凉日日西风送夕阳二十朱颜门下老三千白发镜中长心空但觉云过眼面冷宁知雪作肠不梦春明缘底事堦前络纬正啼霜

又

绦节深居自九阍琼楼玉宇意空存身如鬪蚁时能战心似穷猿夜欲奔不热何嫌尘满甌长贫那得酒盈尊江南最是伤情地只合移家住陆浑

又

槛外声声落叶频新来鸡骨渐嶙峋乾坤独剩扪余腹金鼓空留醉後身四海难求生白处一时那得尚玄人昨宵对酒还长啸半亩寒花月似银

又

拟拜槐安竟未成苦吟犹赖送余更看残野马书空掩叫煞寒螿枕自横风雨浪传孤剑吼波涛时令画船惊百年扰扰红尘里矫首扶桑曙又生

丁雁水臬宪拒伪弃家奉

命入都遥赠五章

六年离思隔千峰每忆情高叹莫从岂谓烟尘能蔽日原知江汉定朝宗人间塞马真难料天上云鸿未可逢书至一时忧喜并乱中装薄问谁容

又

变起呼庚震九垓多君壮气独难回踉跄皂?兵间出辛苦麻鞋贼里来未死已知三不负无家宁有七堪哀羞看百草当秋後一阵西风一度摧

又

江干铁骑乱如麻间道潜踪信可嗟甘死岂知能不死全家应是为忘家泥涂踣躅人千里妻子飘零水一涯疏奏早知

天子识平原若此复谁夸

又

海立山飞在一时纯臣仗节岂能移题诗忍效王摩诘念

主还同杜拾遗好友沿途分短褐行人遮道看须眉良朋竞奏骊驹曲折柳翻嫌劝驾迟

又

种得甘棠絶世尘迁官原不出

枫宸能排万里滔天浪益显生平蹈海身自古乱离知国士于今忠孝得词人苍生均切为霖望环赐宁惟下汉滨

次刘季英登报恩寺浮屠

万壑千峰入望齐振衣横眺意长迷都无王气余江左只有斜阳过水西白马殿荒前代础赤乌碑换旧时题萧萧金铎风前语遥和台城野鸟啼

又

琉璃高峙百千寻远望锺山积翠陰劫火自留三月烬钟声犹带六朝音此时城郭堪悬眼何处风光足赏心独有雨花台畔草春来烟色未销沈

次刘季英江南春兴

秦淮烟月黯然收白鹭飞残出远洲青盖漫传前代恨乌衣宁复少年游半江春水千寻锁几夜东风百尺楼战鼓乱鸣浑未觉祇缘天子自无愁

又

水满清溪浸绿云铃摇九子不堪闻人才那用如安石国事凭谁付仲文陌上牛羊朝作队湖边燕雀晚成羣人间埋照非容易风味终须爱麴君

登海岳楼次王阮亭韵

大江日夜滔滔去吴楚乾坤有此楼南北风云随岸尽古今烟月逐年收袁生歌板成高调魏帝旌旗失壮游倚檻便须重作赋从来心事耻悲秋

甘露寺次石淙杨先生韵

北固青青犹似昔我来登眺已多年论兵慷慨留山月吊古荒凉拂水烟戎马难消亡国垒沙
鸥长避渡江船不须更覓高僧话白眼何人亦解禅

登崑山次高陵韵

扪葛攀萝一径微几年曾此扣禅扉苍岩笑我行将老白鸟迎人却更飞溪月自然能耐晚山
云何事不知归五湖多少秋风在欲剪残荷补素衣

寄江辰六

层峦八九绿氤氲何处支颐若所闻蓼岭自悬仙境月莲峰犹忆故山云客来共把青尊对吏
散还将险韵分见说江梅花正发一枝宁不寄殷勤

其恭偕武徵东湖高陵携樽过种字林为持螯之会

论文清夜更论诗剪烛虚堂此一时偶触壮心因泥酒未忘机事为看棋寒新孤雁空遗响秋
熟双螯好共持不是故人多雅兴长宵应便惹相思

秋感次东湖韵

寒梧瘦竹弄秋晖小径蓬生过客稀老子自应甘墨守道人无复想雄飞灯前酒竭青磁盏雨
後泥深白板扉尽日弹琴无一事双眸长送晚鸿归

又

屋角牵牛覆短檐笔床茶竈老江淹听残细雨惟烧烛过尽浮云不卷帘蓼苦自应难对酒梅
酸何必更和盐甘穷岂合将诗罪险韵时时信手拈

又

矫首鵷鸾满大都山中音信竟全无交游此日空三径骨相从来合五湖月上更怜秋水阔天
高何碍暮云孤香奁经卷年时好弥勒犹能伴老夫

又

黄金无复更游燕醉卧柴桑二十年止酒惟能成半梦催租真欲费全篇行藏但恐前人笑文
字宁须俗客传只爱山中好明月一回相见一依然

九日同人梅花岭登高分韵得十二侵

正见清霜两鬓侵快逢佳节且登临空传白雪无余迹不负黄花独此心短髮早知羞未已壮怀徒抱不堪吟从来秋色关天地一会龙山直至今

同人集克敏堂听孔东塘先生述石门山孤云草堂之胜以诗赠之

见说茅堂住碧岑当年出岫本无心鹤书未许听松卧龙阜曾劳拂莽寻遂有星辰知客傲只缘山月待人深一时举酒皆名士东望同登梁父吟

立春雨和高陵韵

细雨争春不让先潇潇撼撼搅晨眠红颜漫自矜佳节白发宁堪逐少年但得日供三雅爵宁须常看一囊钱试观来日如酥影渐到天街细草边

咏雁

蓼红沙白日相呼毛羽秋来性独殊万里乡关惟雨雪一生踪迹在江湖稻粱多处人情险芦苇深时野梦孤何似寥天千岁鹤芙蓉峰上顶如朱

张偕石陈鹤山携尊集种字林

高怀如尔信难俦春至先为醉客谋载酒竟过扬子宅倾囊不惜马卿裘偶探好句争传写共爱深情任拍浮从此西园称胜事南皮宁复羨应刘

寻梁溪周二娘墓为诗吊之次黎生韵

兔狡狐綏窜野榛倾城艳质已长窀可怜梅影摇寒月谁把椒浆奠早春情在空留金缕枕魂归应泣绣罗巾云英不嫁千秋恨肠断青衫我辈人

又

?陌荒凉?水清夜来常听怪禽鸣春残茂苑花无主梦醒巫山雨不行此日燕钗真欲化当时鸾镜已难明稠桑纵得遗裙在那有空庭勃 声

送季儿赴均阳兼寄辰六

雪霁天涯客路开楚山南望绿崔嵬苍头倚轡催长发白髮垂堂盼早来廉吏无家空恋阙离人易感莫登台此行若过南阳道好向龙冈酌一杯

重和阮亭迷楼怀古

当年清夜记宸游
劫火惟存莽一丘
作赋词人空雪涕
吹箫天子自风流
旃檀有法长开院
杨柳无情不上楼
却笑兴亡等飞絮
一番东涧又西沟

又

总是繁华迹易荒
台边秋露湿荷裳
风光处处花埋雨
春色年年草满冈
千步画栏人事改
一声金磬客心凉
可怜怀古情多少
费尽诗人百结肠

访张次籛深柳堂戏书所见分得二萧

城南春水碧迢迢
高士幽栖近板桥
草色多情邀客醉
柳丝无力倚人娇
波堪掠燕方三月
地有啼莺自六朝
入坐一时皆善赋
绿烟深处挂诗瓢

闰上巳

已敲槐火过云龕
谷雨花开色正慙
浮世几逢春百二
佳辰又见日重三
湔裙水上添新涨
捧剑波心异旧谈
寄语永和诸胜客
茂林修竹更须探

漫成

幽境时无客过从
禅关犹得暂从容
闲寻径笋遥惊犬
偶插瓶花故惹蜂
睡起避风门欲掩
吟余待月酒初浓
山僧似识渊明意
庐阜于今不打钟

冷松邀集记扃轩时有歌者茵姬在座

程郑门高不迓宾
桃花潭水遇汪伦
菰芦江上传佳话
樱笋筵前有丽人
短烛三更闻急雨
清歌一曲舞轻尘
习池倒载寻常事
长笑同欹白鹭巾

送冷松先归新安

彦章南去布帆斜
麦秀风高下白沙
我为忆家聊作客
君将送客反离乡
关远出千重树
山岳晴分一片霞
先报故园诸父老
好排鸥鹭待归槎

五月二日同人集克敏堂送药亭归海南东塘还朝南村入九华山修志分得十二文【时与会者十五人】

榴汁初成酒色醺
一时河朔共殷勤
星辰象合天长聚
江海情多路暂分
风雅几同周列国
云

光如见蓟仙君可堪更作阳关曲一叠离歌一处闻

端午後六日携家小泛时尚有竞渡者

江波新涨麴尘初兰桨浮家兴偶舒稚子都随书画舫老妻偏爱水云居柳丝上下争啼鸟荷叶东南有戏鱼谁问沈湘千载怨只教年少鬪鳊车

竹醉日小集冰持肥园寓斋共用韦端己韵

一片帆吹荷芰风重城人聚桂堂东笈凭银鹿时时送酒换金鱼夜夜同谊合不知交似漆醉多常笑卧如弓何堪跋扈飞扬意未肯当杯作老翁

又

不教花圃欲连壕独爱幽栖遶雪涛赤日不来松竹冷绿波新涨芰荷高舟停槛外常寻戴酒泻林间好读骚漫说辋川多胜事辋川当日少吾曹

步宗梅岑韵题贾孚远西山别墅图

不爱红尘过碧山二分明月屋三间偶因野竹开疎径却倩寒云为闭关驴背新诗逢客问鸥边残日伴僧还我来欲访歌骚处遥指隋桥第几湾

虎丘姜贞毅先生谏草楼

青山无恙是君恩小阁嵯峨倚夕曛当日避人焚未了此间报国气长存文章岂愿传千古忠孝由来共一门却怪杜?如识字时时槛外洒啼痕

楚烈妇挽诗妇以饿尽节

乱起黄巾国步艰深闺就义萎红兰丈夫志在戈空挽烈女心坚粟忍飡天日尚留前代愤冰霜犹作异时寒崇坊永表千秋劝填海魂归掩映看

咏雪拟东坡义尖二韵

一阵严寒旋旋添堦前夜积水晶盐彩笺染墨愁毫秃红袖翻香露指尖饥雀有声迷冻瓦归鸿无影落空檐痴童漫自携蛩榼不见临邛卖酒帘

又

密霰随风入谢家梨云碎剪作冰华鸳楼莫认重栏迹兔窟难寻古路义庭筋倒垂光灼灼帘旌微动影斜斜灞桥恐有寻诗客欲种林逋绕屋花

又

陰重翻怜晓色严襄阳驴背独心忺遥看极浦沙千里晴见危峰翠一尖豪客围炉争按曲美人呵镜懒开奁宁知尚有孙康在捡尽寒斋字几籤

又

疎疎密密势还加尽把人间捷径遮西岭风高添鹤栅南湖水厚搁鱼叉何人更掩凝寒户几处曾停逐热车我是袁安初学懒敢同高士卧烟霞

又

飘飘寒影透疎帘渐觉晶莹满四檐缟带千行翻素练锦鞋双迹印红尖寒多更觉吟肩瘦冻彻偏宜饮兴甜只爱渔翁江上去一蓑新被白云粘

又

何处飞来六出花梁园一夕望偏赊远山带雨分层壑老树摇风出半叉压损竹梢妨着屐扫同梅瓣好煎茶登台把酒叫奇絶此日乾坤寂不譁

仲冬念八日家巢薇侍御过集种字林偕高陵念昔仲子分得鱼歌二韵

满径寒蓬赋索居淹留惟恐绿樽虚豸冠忤俗名偏重鸿羽关情谊不疎此夜笑谈干象纬他年踪迹伴樵渔欲知别後相思事检尽松窗几卷书

又

张衡愁绪近如何此日相逢且放歌天下尚留吾道在雪中谁许俗人过青衫几载伤萍梗红烛三更点薜萝待得梅花消息好金牛湖水麴尘波

舟中闻雁仝正持作

孤客伤多正忆羣中宵愁听思纷纭稻粱有恨音偏苦江海无家迹又分岁晚那堪千里月天高尝隔万重云红楼亦有笙歌侣醉向灯前似不闻

送汪舟次太史奉使中山

谕蜀何烦美马卿
緋骖夹道送君行
装从南越台前盛
文向东坡海外成
岛屿岂期才子见
波涛终为圣人平
独怜异国相思处
万里蓬壶月又生

东淘访旧不遇

小楼灯火夜横陈
梦醒扬州几换春
十载浪传天上信
一生常负月中人
歌成白紵惟余响
泪裹红绡点暗尘
海角茫茫空徙倚
愿留香穗种来因

将发东亭留别淑晦

访戴时维剡曲舟
感君情重为迟留
幸当潦倒逢青眼
莫道英雄易白头
五夜鸡声常对酒
几人猿臂早封侯
相看各话平生事
老气犹能压九州

过俞锦泉流香阁观剧

无限春风上袜罗
洛神曾见赋东阿
偶停残岁青帘舫
来听良宵白苧歌
座上狂夫多小凤
屏前仙子尽长蛾
紫云不识今谁是
但倒金尊唤奈何

锦泉席上赠长君陈芳

萧瑟江关久索居
偶来花下一停车
燕莺队里逢名士
歌舞场中得异书
年少谁能过贾谊
多才应更似相如
子云得从长杨猎
头白犹然较石渠

立春日毕正持携尊见慰分得八庚

春入端居草未生
感君挈榼重将迎
人如昌谷宁无叹
客似高阳独有情
忧以醉忘终是暂
慨因叹触更难名
持杯为向梅花语
莫倚寒窗惹不平

江夏君视女未归元夜不寐有感

六街箫鼓正喧阗
酒醒中宵竟不眠
风便漏声传枕上
月明花影到牀前
紫姑漫说今年胜
青帝难教旧梦圆
闻道重城灯火盛
一时如向客心然

二月九日登南城楼看雪仿禁体

容易登高为傍城
雪中披?步峻峥
眼难极地那言旷
身欲近天方觉晴
六代烟花都寂静
万家楼阁转分明
清寒更有添豪兴
湖海从来气未平

上巳日雨中言怀

一雨无端节序更凄凄恻恻暮寒清酿成草色何劳远落尽梅花不肯晴南苑几人曾扑蝶西园何处好闻莺春来算有愁难浣莫为湔裙傍水行

兀坐

兀坐西斋戴鶡冠半春萧瑟已无欢寒欺病骨分千痛雨入愁心并一酸芳草渐于行处密好花羞向闷时看新来检点吟囊事客梦荒唐笔蕊乾

送叶井叔归里

隋桥垂柳布帆欹梦得衔觞感路岐客况不堪沽酒少归装偏为买书迟雪堂水涨鱼肥日月观花深燕乳时两地相思知未免可能重寄四愁诗

送吕半隐

曲江当日手亲题老向荆南独杖藜菊自晋花犹满把瓜留秦种渐成畦难将往事论苏李賸取高风似阮嵇遥望故乡休下拜杜?仙魄不重啼

又

隋堤杨柳画溪藤两地论交得未曾笑我世情随日淡羡君诗兴逐年增因耽白社寻庐阜爱写青山为武陵今日相看须进酒小花蛮榼可三升

用看奕轩韵示内子江夏君

一字媒成一笑初牵红初事下田居能传嬴女吹箫曲自答秦嘉饷镜书青眼独看云里鹄白头长饌井中鱼谁怜四海浑无有台上横琴独晏如

又

委巷由来不治生堂前空有鹿门迎丈人正得黄承彦夫子何如马长卿窥牖早知才具远停机偏识揣摩成天衰志气凭谁信扫得饥寒即盛名

又

行路难如蜀道般弃繻曾共入秦关年年割肉逢春社日日将眉画远山解佩时留佳客醉敲针初得小儿顽乘风破浪非吾意却过明湖学士湾

又

十年全踏软香尘岂料能逢洛下春南内一行称命妇东方千骑拥仙人簪簪竹笋供青案罨画银花点绣巾势位一时安可忽那知蝼蚁竟谁真

又

剖得麝符向两谿持盈常恐夕阳西荷锄每欲全埋鹿推枕何曾待听鸡烛秉研旁秋泪湿香焚台上晚烟迷东风吹醒东坡梦只羡堦前玉树齐

又

敲佩翻成负戴随含沙宁复计云谁刚知王子终难免好忆虞妻不可为患难输君能学道清贫似我独心知高山流水音空在赖有蛾眉锺子期

又

年年老屋要牵萝爱尔秦声和醉歌不骂章惇心自远曾教许允智偏多看山共坐蜻蛉舫典酒频销蛱蝶罗剪得支硎云一片灯前为补旧时蓑

又

疗贫那得有奇方劝我逢人莫便狂眉黛瘦来翻自解头皮留得岂须忙闲开修竹林中馆老爱菩提树底坊只有不平洗未尽呼儿还涤掌中觥

用前韵赠澹心

风度看君似太初玉兰花里近移居喜闻天下多情事偏覓人间快意书竟日横船惟放鹤有时弹铗尚歌鱼茂陵不少雕龙客作赋文园更孰如

又

春风春雨乱愁生纵有高轩不肯迎南面拥书谁是主北窗支枕莫相卿新词独许柳三变老友无过陶九成近与长沮还有约耦耕偏爱不知名

又

着得奇书有几般手携常自访云关挂瓢桂树生公石压?梅花邓尉山乱後久?甘寂寞老来全不减疎顽金庭何处容偕隐更欲移家销夏湾

又

石城乌榜泛云谿歌吹扬州古竹西十里长堤春试马二分明月夜谈鸡东山别墅逢花住北海清罇对酒迷今日羊昙空折箠白杨高与画楼齐

又

水嬉湖畔日追随授简当时更有谁得酒只全名士共无钱安用好官为三年玉局人难识一片冰壶尔独知短梦乱山今已觉东篱还订菊花期

又

宁知隔巷接藤萝日日花间共和歌皂?有心词客在青衫无恙酒人多买成江上新鱼具踏破门前旧雀罗我有离骚向烟雨隣家应更借青蓑

又

举世求圆欲毁方市人争笑两生狂苦耽竹叶连朝醉一见桃花尽日忙浪荡每寻平乐馆风流谁羨永丰坊劝君莫洒西河泪三万六千时举觞

戏拟无题

秋千过後落花初青粉墙围道韞居红纸半题吟剩句绣床横叠读残书箫缘少和难招凤字有相思莫剖鱼谁遣锦江春水滑扫眉今见女相如

又

也知才调不虚生何意偏将薄笨迎世有伯鸾应得汝人非司马敢呼卿含啼暗掷金条脱选梦难求翠织成惆怅仙鸾隔烟雾教人愁絶是空名

又

种得离愁似草般春来到处映花关那知弱海三千水竟隔巫阳十二山思妇泪残花欲死望夫心在石非顽莫愁艇子无消息盼断秦淮第几湾

又

灵犀初解辟芳尘斜倚箜篌度此春一世不成如意事两边齐作断肠人瘦来不稳珠腰被画就犹藏绣领巾买取余杭仙媪酒碧桃花下唤真真

又

小姑生长住青谿仙树菁葱玉洞西空有闲情随海燕不堪文彩对山鸡人前作别情难语梦里相寻路易迷已负罗浮好花信垂条惊见绿陰齐

又

莫拟当年旧苧萝伤心不唱采莲歌才生红粉须眉薄愁在青衫涕泪多锦带暗联鱼子纈画裙羞卷麝香罗五湖肯逐鸱夷去一舸何辞着短蓑

雨中过丹问闻六堂看梅

爱花不惜为花行着屐冲泥倒玉罍穿径已知尘欲静开轩正觉影同清雨中漠漠幽香远夜半垂垂艳雪明我拟借君堂上卧巡檐三日待春晴

西柯携尊同景州东湖维式诸君见过分得十灰时潜儿将有楚行

春尽俄惊远棹催南邨犹喜素心来忘忧最爱狂奴态赋别还徵上客才竹以蔽尘将径绕花知弄影向灯前伤离老眼无奇字莫拟杨家有浊醅

书云先生招饮看花时庭前芍药莺粟酴醾争艳即席漫赋

老为花狂更复谁名园曲宴喜追随三春胜事称婪尾一苑香风叫画眉步障紫丝空烂漫地衣红锦最葳蕤主人爱客能行乐颠倒难将烂醉辞

再叠前韵呈书云先生

未到高斋香满扉俄惊燕瘦与环肥檻前鬬酒杯频倒座上题诗笔若飞月照紫衫迷眼色花争红袖逞腰围最夸郢客阳春奏不羨当筵金缕衣

次仲云侄韵答赠

羣从君推玉笋班新诗引我一开颜经时不减三年迹过日堪销九夏关当代凌云应北阙谁家咏雪更东山陈留竹下多佳兴尽倒葡萄莫便还

梅书师六舟次叔定蛟门同家剑宜小集花下

衡门久矣谢车尘蓬径何期拥簪频檻外繁英多艳友座中佳客尽词人酒逢欢饮偏宜夜花为迟开賸得春多少竹西池馆在谁家索句最清新

飯後

皓首日归百未成盘殮终日意难平老妻早报蒸梨熟客子谁知种菟清与世何功甘饱食于时不合但徐行无端苦覓惊人句揽镜频看太瘦生

夏晚

千山返景欲苍茫倚杖柴门到夕阳云为随风成厚薄天因釀雨故炎凉间中胶漆惟欢伯老去功名付睡乡屈指几朝秋渐爽桐冠蕉帔竹匡牀

梁雪立秋日有约泛舟辞而未赴

从来癖性懒衣冠触热何堪泛碧湍南郭赏心人自好北窗跂脚意常安风摧高叶辞金井雪沁甘瓜剖玉盘此际秋怀正无赖白头那及少年欢

得鹤问书次同孝威赵客见忆韵

两年落尽粤关梅望远频登赵尉台郴水云迷千里迴洞庭风送片帆来贫归但有花盈迳远梦难同酒满罍深谢诸君能见忆新词絶胜贺方回

又

拟下惊涛惶恐滩便来邀笛更寻桓可堪少妇乘鸾恨竟失良朋鱸鲤餐碧树常牵三月梦黄花犹耐一秋寒武昌泛雪能乘兴欲问齐山路几盘

中秋坐雨次伯御见怀之作

桂华着雨又经年独坐虚斋忆汝贤三五难寻湘女梦十千空负酒家钱楼台但觉和云冷箫鼓谁能唤月圆幸得一篇青玉案徘徊高咏曲栏前

送家仲云归里

高天霜落木初飞送别河桥指翠微作赋最怜人善赋思归常羡客先归向平婚嫁随时遣阮籍行藏与世违子去须为余料理丰南犹有旧鱼矶

送家伯御归里

东阁官梅渐作花延陵才子又还家舟过锺阜山千叠门对丰溪水一涯笑我暮年方解组如君佳句合笼纱为传逋叟思乡梦长绕燕峰几片霞

次石屋禅师韵

无事身如一叶轻闲过竹院畅幽情遥知明月禅心静长看浮云世态更忍草悲花堪坐对清泉白石共经行空惭扰扰尘埃内门外时时金磬声

送亦韩弟廷对之京

圣朝虚席待凌云才子名成冠一军两制久传中舍诰三唐初变左台文官梅度雪枝争发繁杏临春蕊渐纷相送此时无可赠吾家风节古来闻

送云逸侄归里

骊歌初唱客将还送别隋堤柳一湾四野寒烟过赤?千峰晴雪望黄山协来吉卜怀应喜携去哀辞泪欲斑从此南陔须再补澄溪家住白云间

无题

暖从寒际见春恩香雪蒙头问酒尊花解依人多傍槛月能留客向当门煨残早喜蹲鸱熟梦醒虚怜小凤存或是野人思献曝朝来常自倚藜根

元旦立春

胜赏今年并岁初东风吹出晓云舒青龙幡下三元会白兽樽前五谷书彩树辛盘吟未了红椒粉荔乐何如酒人赢得多佳兴醉向梅花思有余

予目失明遇方君青来以金针治之因得复明作诗三首

每羡庭中鸡犬行频年触柱废将迎何期元化非常手竟得长康未点睛残帙乍开逢旧友好山重过忆前生也知天意多相警青白从来悔太明

又

左丘何意启重翳信有神功破世迷岂可开眸容宝屑果然刮目用金鑱空怜子敬惊相待且喜昌黎手再携却笑几时云雾里那知歧路别高低

又

敢言盲目不盲心银海何缘五色侵与世冥顽原自昔看人轻薄又从今翻忧识字还多事但恐劳神是苦吟惟愿随君周海内尽教肉眼受灵针

早春杂咏初四日偕家巢薇同作

一东

浮踪正拟住墙东兄弟情欢此暂同彩笔红笺新节气椒浆荔粉旧家风经旬饯腊知春早四日逢晴验岁丰箫鼓一时喧里巷可堪高咏在花宫

二冬

融融赵日已辞冬有约开樽向鹭峰萸叶数枝迎节早梅花一树受春浓人因爱客频扶杖僧解留宾不打钟共说谢家饶胜事池塘草色渐茸茸

三江

鲛冰片片断春江丽景初生照石幢此日香清开竹户有人诗瘦对松窗炉声沸雨停幽鹤幡影摇风吠小邗携手正须迟访戴肯教离思动吴艭

四支

牡丹岂复画燕支爱尔能为绝妙词青眼幸当无事日白头同说少年时江湖身老名空在山水情深意肯移渐喜东皋能破冻一犁春雨未嫌迟

五微

空说当年杜紫微鸕鶚啼道不如归蓴丝未厌吴侬箸荷叶宁为楚客衣天下有心常击筑人间多事莫开扉五陵得意皆年少裘马翩翩马自肥

六鱼

过河何必叹枯鱼已见韶光到敝庐度岁正同人磊落当春宁肯气萧疎花香燕尾频移榻松长龙鳞独着书宣室漫言思贾谊老人今已办柴车

七虞

太平今已是唐虞愚谷犹来本自愚漫道芙蕖似锦字可看薏苡似明珠 将东海常衔石敢向南山更捋须耕凿独惭无以报元朝遥拜倩人扶

八齐

庄叟空言物可齐闭门聊复卧灊西池中草长鱼初暖檐畔花开鸟便啼时事何须忧水火故人今已判云泥闲来欲访逍遥谷两袖春风六尺藜

九佳

倒餐甘蔗岂云佳懒漫原知世不谐烂醉已忘归丙舍 眠无复听庚牌清宵看月挥松麈侵
晓浇花湿笋鞋独有风情殊未减高冠时挂美人钗

十灰

梦断东华意已灰檐前猿鹤漫徘徊新春不了前春恨旧雨宁同今雨来十载宾朋多草莽三
春花月几楼台人生荣落寻常事甘向深山老不材

十一真

谷口行同郑子真湖边箕坐看忙人忍教鸥鹭频相待却喜禽鱼渐可亲竹叶醉来能耐老桃
花深处不知贫闲中懒作淳于梦未到南柯即欠伸

十二文

几岁临邛只卖文欲谈前事向谁云弹琴不爱同中散誓墓曾教学右军百岁声名甘老放一
时心事触微醺风光却向人前说占得扬州月二分

十三元

贞下看看又起元檐前长自负朝暄吟残芳草春生展开到梅花雪满轩杨氏才人多白凤王
家童子有青猿一门词赋吾心足书画何须更纳垣

十四寒

栖迟宁不探春寒渐喜山中日月宽次第已看花婉变起居先报竹平安香浮盞内新开瓮露
滴窗前共染翰多少楼台好风景莫教闲杀玉栏干

十五删

赋得新诗手自删苔花生涩傍门关方期客泛郎官水又见人过学士湾富贵难求终岁饱神
仙赢得一生顽卢郎空有逢时法不向终南更往还

一先

似奕都求着着先宁知冷眼在枰前诗成白傅吟花下曲爱红儿度酒边百尺几曾容客上一
寒端不许人怜请看庭畔桃和李青帝来时即竞妍

二萧

镜中双鬓已萧萧
髀肉于今亦渐销
充隐不须栽薜荔
漫藏何用覆芭蕉
才人胜事归梁苑
高士新篇在灞桥
试问鸱夷随梗泛
何如吴市好吹箫

三肴

莫贪椒醑与兰肴
早结山中一把茅
独往不须频问路
倦飞何以竟归巢
饮当醉後难握棋
到残时劫漫抛
贵贱人情吾已晓
一觴惟合对穷交

四豪

羸螺何知是二豪
樽中常自有葡萄
成仙那用多寻术
避世宁容更种桃
莫羨汉庭徵四皓
独怜吴地有三高
春来莺燕浑无恙
啼血谁怜杜宇劳

五歌

酒酣斫地漫高歌
一笑曾逢春梦婆
宁更以闲为寂寞
何如将壽补蹉跎
江云渺渺飞黄鹤
草青青放白骡
归去来兮监湖上
此间应不畏风波

六麻

不求槐棘问桑麻
人事从来似抔沙
南亩只教多种秫
东篱犹有未开花
谢安携妓身将隐
陶令休官鬓已华
料理百年无善计
一琴一鹤且移家

七阳

亦愿挥戈学鲁阳
双丸何意向人忙
李家那得千头橘
召伯犹存几树棠
陌上花开应缓缓
田间麦熟正穰穰
春流但可容吾濯
清浊何须苦较量

八庚

半窗梅月影庚庚
只合安闲过此生
栽得藕花留宿鹭
种将杨柳待啼莺
熟思惟可藏头卧
饱饭还宜扞腹行
抛却砚函同笔架
从今应不受虚名

九青

柔岚几叠到门青
春半新蒲绕绿汀
折得花枝贻内子
分来菜把向园丁
耦耕切莫虚农月
垂钓终须老客星
自有珠光能映水
安能熠熠比秋萤

十蒸

洞边花发似霞蒸鼓棹仙源我尚能隋苑韶光夸上苑延陵心事在东陵天清应有衔书鹤地僻全无点玉蝇他日临风更相忆裁诗莫惜剡溪藤

十一尤

拟向人间絶怨尤拂衣何必慕丹丘已教纳月多开牖却为看山别起楼燕颌几时归絶塞虎头今日画沧洲苕萝若有人同在艇子何烦问莫愁

十二侵

久谢尘污莫再侵碧山深处已投簪吹毛不少泥中剑焦尾谁知爨下琴赤日上天宁有意白云归岫本无心螭头虎尾君休问釀熟梨花好共斟

十三覃

风雨时行化已覃泥蟠尺蠖亦心甘江河世事人难料丘壑生涯我自谙陶令门前多绿柳戴公园畔两黄柑安身更有逃禅法弥勒应来共一龕

十四盐

逢君我窃慙无盐欲书长蛾转自嫌最美格高如谢朓独怜才尽似江淹扶头酒醒花连屋义手诗成月满帘把向五都人索价也须一字值三缣

十五咸

有怀无路问巫咸独赋新篇日满函桂树词高留白社荆花梦好隔苍崑离鸿欲去翻愁网骄马将归更弄衔只剩惠连诗句在朗吟犹胜把春衫

偶题

絶似神仙陆地行诗瓢画帙酒经程长松未改凝寒迹野菊曾知去国情自是青山多宿好重将白水终前?五陵此日多轻薄皂?惟应避後生

又

花发阑干笋出篱春来踪迹似丘迟一钱不爱惟留客万事都忘只好诗梦破那堪推枕日棋高偏在拂枰时人间蛩触多心事说向先生总不知

又

浣花溪上一村孤欲倩茅生更补图自爱娱情松与竹都忘辑瑞谷兼蒲红儿歌舞非他日白
傅勾留是此湖却笑丁郎无傲骨等闲轻拂相公须

又

吴市谁知梅子真飘然此日剩轻身白衣岂必携官酿红袖偏宜拂壁尘泉石可留天下士烟
霞絶胜世间隣篮舆醉後谁能舁儿子门生共几人

林蕙堂全集卷二十

卷二十一

钦定四库全书

林蕙堂全集卷二十一

湖州府知府吴绮撰

亭皋诗集

五言排律

初春友沂邀同仙裳定九诸子泛舟平山得杨字

山川不易好终古念垂杨正月人初暇初春景正芳遥怜几两屐共负一吟囊飞盖随王粲交衿集谢庄挂瓢牵杜若吹笛上沙棠曲岸吟朝旭浮桥践晓霜水渐鳞始跃寒峭羽犹藏苕芾鸚哥绿芹芽燕子黄娟娟分鹭影的的入鸥乡毛女逢挑菜秋胡问采桑停车寻月观响屐看雷塘指点遗墟矗低回舞榭荒可怜隋大业不及鲁灵光覆辙羞秦帝雄才慕汉皇鬪鸡千帐锦养鹤九州粮赐柳称官姓收萤选夜粧龙船飘彩缆犀管溜绒纒一镜柔情误三更艳曲忙才堪酬结绮几见起阿房尚忆当全盛何曾讽太康有山皆绿酒无水不红廊驻马临邛客调笙下蔡倡越罗裁翡翠赵瑟画鸳鸯绣幕留张硕珠灯醉沈郎林陰惊宝弹莺语落银牀金粉矜时俗烟云互渺茫地闻连建业尘已蔽渔阳石碎天心缺岚枯岳势凉凤凰辞故岭麋鹿爱欢塲宫竟迷仁壽途空认蜀冈紫苔铜雀瓦青草玉鱼璫怪鼠啼棋墅妖狐鬪射堂耕夫终落落游子或依依广武悲何极新丰泽漫忘兴衰信有托慷慨实非常遡涧频回棹泝波为举觞寺生前代想僧剩六朝装拂碣思南宋摹碑记大唐诗存名士影钿拾美人香我自难成醉天应莫遽凉惊飈僵鸟雀斜日古牛羊望望暮烟碧迟迟暝色苍曹刘争壁垒苏李又河梁雪暗鸿归处星稀鹊绕方横琴流素徵倚剑发清商杜宇宫花湿琵琶墓棘长开元客自老德佑史难忘去去聊弹筑行行且卖浆桃源失晋魏兰渚徧潇湘凭吊徒挥涕城鸦噪女墙

集金鱼池

胜地环芳沼佳辰洽令俦莲塘晨露爽槐序午风柔遂有襄阳兴言寻濠濮游朱鳞方竞跃金鬣正羣浮睡影斜晖乱噉花夕景稠客心同杜老吾意学庄周布席临丹檻移觞对碧洲风轻知柳直香静得荷幽藻影流文裕水丝接素瓿仰瞻通帝阙高览极皇丘急管分诸伎华尘散五侯醉归殊未厌清咏若为酬

午晴至丰台芍药花下

过雨芳林晓高楼景物新云开成小霁山午带余春遂骋寻花骑如逢洧水滨分畦同鬪冶异
畹各含颿泣露枝全弱迎风态更真夷光非一伴飞燕有千身彩暎残霞绚香翻宿雾匀信堪
称艳友何必赠离人留借朱丝障归簪白麝巾明朝夸盛事传语徧城闉

壽秦卹王相国三十六韵

莘郊当辅乙崧岳早生申淮海文章重琅琊閎閎新凤仪恒在岭龙跃已离津单父琴歌韵桐
乡俎豆亲挽铃通鸟诉击笏断蛇蹲吏畏徐宗说时称卢子均含鸡登锦署鸣鹤上丹宸聚米
知无匹论兵觉有神露帷施曲盖霜钺拥雕轮朝誉尊裴度军威慴寇恂士腾悬帜影敌避属
车尘柳肃辕门令莲香幕府人列侯趋玉帐八阵望纶巾方叔鸿猷壮元公骏业伸膺图逢圣
代调鼎用纯臣盛吉持朱笔栖筠佩绂纁东山聊凤驾西院遂持钧九伐咨洪礼三留拜大真
瑶环酬旧德金筯锡殊珍鵷尾开黄闥鸾坡接绣闥掀髯谈国事造膝请斯民共羨纱笼賁还
观水镜抡松高宁让直桂老不辞辛却簿空资限平衡待隐沦升台招駉駉入画宠麒麟病为
苍黎痛恩烦赤帝询劲缘横豸角逆匪触龙鳞会见回天力兹逢降?辰黄锺传始律彩线近初
晨牛驭迎函谷熊飞起渭滨燕山森宝树漆圃颂庄椿设幔瀛洲客挥觞雪苑宾诸昆忻共籍
小子幸依邻覲德瞻韩久怜才说项频一阳初遇复千岁渐宜春愿得浮琼爵长言奉锦茵

花朝月下限字十韵

芳菲传令节春事自今齐不谓花前赏还分月下题韶光初扑蝶静夜独闻鹂粉细梨全澹丝
轻柳乍低风烟忘冀北景物拟瀼西艳唱朝回雪仙裳夜舞霓红陰纷广院碧影照清溪客意
耽幽选余心托简栖吹箫思旧里撒烛过平畦未尽徘徊兴频将素手携

寄上大司马公百韵

紫纬鍾金斗苍灵协宝符自天昭世德维岳诞真儒吐篆游麟异徵休集凤殊赋棋夸李泌与
字姜阳乌入梦尝探锦临关即弃繻才名高贾董物望起韩苏鴈塔年如玉鸡林价比瑜人争
看一卫户尽诵三都早合台登骏聊将舄化鳧绿杨眠晓月红杏润春酥糗备千军饱城当百
战孤萑苻逃境外桃李粲庭隅眷注隆青琐风流艳紫衢吹箫秦凤叶捧饌谢螺俱淑女逢之
子文人悦彼姝牛衣多涕泪马仗肯含糊弹事闻修竹筹边见伏蒲攀裾谈禁密借剑斥奸谀
戇竟忘投鼠豪应欲射狐九歌逢彼怒百折咏叩须不幸言终验无端口卒瘁塞穷还失马巢
覆尚探雏北寺悲囊首南冠悔剥肤旻天留彦博

圣代得夷吾画省藏余藁清卿足美醪笙镛賡

帝载琮璧会王图履尾旋遭忌?心岂自渝娄公甘拭面元相已衔须宠拟三专渥寬先五教敷
度支权益重版部眷恒紆弄印无尧者垂绅似绦乎神羊威巖嶮驄马步踟蹰色正人难继言
危道似迂驹知清德减楼畏直声涂无礼严鷹隼多谗畏虎羆到天松愈劲涉浪梗堪虞保护
烦

英主迁延过险途先生官独冷短簿职空劬度岭吴丞相浮湘楚大夫睨消臣节显郇郤

睿情孚葱佩心仍简兰台迹未逋平民邦用典作士帝称俞赤子皆求活苍生久茹荼囚知无死法公每向人吁漉酒消秦沴封章赐汉酺鸡竿频执奏犴户鲜号呼喜气腾丹棘

恩光动白榆爽鸠增上秩司马晋中枢太乙轩皇阵文昌上将谟律惟张九伐邑不诚三驱

王者方居正宵人敢负嵎乱因长孺戢情待武侯输海蜃销金铎星狼靖玉弧丹宸冰监捧黄阁火城趋御李思偕楚班荆忆在吴隋堤攀柳树湾水泛茱萸有道门庭广无媒径路芜仙舟来李郭甲第啓崔卢雪苑招奇彦星房及下鸳金丸公子弹绣被越人舡赵氏交羣纪孙郎列顾厨少瑜诚卓犖端礼本华腴文爱香山俊诗称邓尉臞梁生能授简杜老善操觚湖海皆词客江山半酒徒杯倾红玛瑙笔架紫珊瑚梅岭衣香散桐楼舞席铺钗光摇翡翠灯影醉 璩大令过桃叶嵇康就柳株时时陪胜赏处处得欢娱日月曾无几云泥竟自辜数奇嗟李广歧路泣杨朱入雒年非昔游梁计转愚扣门人走避撒烛鬼揶揄再进孙弘阁还分谢朓襦吟囊长傍鹤游杖或悬蚨说项忘踈贱依刘振槁枯清言偕上客故态恕狂奴剑割东方肉裘沾卓女酤校书怜鲁字执戟滥齐竽光逸寒门累冯唐薄宦拘身因酬遇重腑为感恩镂厚谊真千古浮踪又五湖还乡怀彩绶到郡合银菟善釀无中若空城有下菰南阳豪莫问东海狱多诬辛苦存姜桂艰难事牧豕哀鸣飞泽鴈局促耻辕驹羊子书三篋龐参水一盂簣簣惟鬪玉薏苡欲疑珠夜月恒歌鹄秋风但忆鲈忧深防灌莽贫彻媿葭莩未识于谁止仍须赖给扶新恩瞻赤舄旧好感黄垆失道凭双炬乘流借一壶宠知垂素手荣冀转青驢四岳云将起三生露共濡勲名传汉册谣颂托吴歔衔玉酬杨宝熔金顾孔愉愿言回黍律长恃济川桴

奉答梅村先生即次原韵

人伦重镇海祖德共延陵慧探金环协祥符玉燕徵梗楠当世用兰蕙早年称经术师中垒篇章过右丞几回攀赤帙第一啖红绫逸足宁超骥奇毛总让鹰宴游初日炤牖唱霏华升锦有盘鵬锡盃将御脰承中涓颁露掌天子赐云仍宝钿酬宵咏金莲炤凤兴魏徵真斌媚李沆果端凝斩马除奸谀燃犀破暗蒸只知词赋贵岂识谏书增秉铎家为矩观碑路拥乘毫端生绡蕊纸色点朱菱铸剑开洪冶程弓释巨棚鴈投衡岫网蛟入楚潭罾桃李荣夸狄蓬麻直比兢臣心无所党士口自多憎负米春山路歌骚夜雨灯周原虽板荡鲁殿独觚棱暂出东山驾旋耕南亩塍每横高士麈长谢弋人矰局为苍生斂羹因赤手惩龄曾呼小友嵩忝预文朋玉署辞三载瑶台望九层别离思郑縞展轴爱吴绡邻烛初分耀邮函再啓滕果蒙回棹访不觉扣门应梁客随枚马姬宗备鲁滕深情知不忝乐事已难胜坐爱衣香满题看纸价腾耽幽陪谢屐选胜荷虞簦四水春罗滑千峰晓碧嶂笏逢山自挂几对月长凭急舞摇珠络清歌坠玉绳寻花邀杜牧倚树媿毛曾梓泽诚何有兰亭获共登文章君迭霸粥饭我如僧自笑诗城破还惊笔阵崩钞从鸾掖重游许兔园矜衆垤恒宗岱凡流敢混渥序传皇甫谧刻美李阳冰人谓真稀有吾言得未曾效顰徒见丑学步转难凭但爱朱丝暖仍怜绿酒澄写辞烧径竹插架引溪藤赋拟三都左书贤十部弘肩堪栖白凤尾合附苍蝇不识千秋後谁知二谢能

奉酬荔裳先生见赠即次原韵

清远称名胜登临尽大贤每生鱼鸟兴多在水云边震泽当吴会菰城向楚偏溪声诸派合山色六城专自古丛葭莢于今茂梓梗右军初领郡崔亮後登仙酒爱程家釀茶从陆羽煎何期来画乃得奉华鞵忘分车频降推心席屡前九歌夸宋玉三影共张先邨苑恒分简淮阳未暇眠红灯争饮户碧草坠吟鞭烂醉三千笋轻拢十五弦间阶调睡鹤深夜响寒鸂语爱中边润行看左右平浓霜飞菊圃翠粉落荷田绕树谁怜鹊添衣欲御豨双南金错赠七札墨痕穿典博刘公干清华孟浩然别成杼与轴罕步陌和阡笔阵新悬帜诗城早破坚写凭鸡贾贵谱让雪儿怜羣纪怀当世卢杨忆竝肩梅花广平赋绣被鄂君船声艷鸣珂里才雄射策年东墙人自望中禁句争传覆锦调元气持衡别衆川官曹消害马相业兆鸣?遂有蜚言至徒劳

睿意牵乘轺疑象纬布政佐旬宣雨润萝村路春生镜水偏臣躬方蹇蹇帝简更拳拳酌酒消秦狱悬旄震越天八门才耸翼九仞竟踰颠谣啄青蝇羽烦冤白鹭聯忧传夏侯册泣寄子由笺暗蛻藏深窞狂蛇试老禅九阁开斗沫一笑过云烟颺起蓴鲈思聊将兰杜搴三花开宝树五色产嬰莲问古临苕霅寻幽趣笋簴精神同卓荦眉宇两?娟欲绣平原像言倾下若泉江山添赋力歌管夺愁权坐拂洼樽石偕搜韵海编礼非因我设言岂待人詮住订登台嬉游寻傍水缘子猷惟看竹夷甫不言钱异彩文相焕同官律互旋千秋宁偶尔一代岂徒焉媿我称疎慢逢君快赏延塵头腰自折纸尾字空填有畏慙惊鼠无成叹坠鸢寻花空着屐烧笋不成筵昌谷囊裁锦柯亭笛用椽深情何郑重奇藻更芊绵忍听歌三叠相思月一弦河梁衣共把湘水佩同捐远道思投辖荣名各勉旃长留白雪唱高映紫薇躔

怀汉高士梁鸿

时微思介节道否重幽人凤览辉常下龙潜德始神交从异代合志向屈时伸养癖存孤性含贞保大伦独留心迹在长使道风新汉代曾遗俗梁生本絶尘着书高自许灭竈介难亲椎髻闺中友耕田谷口身行歌原有托名姓或非真直欲同园夏宁惟似井春明王生见忌烈士死相隣举世方趋热千秋只爱贫高宗行遯久旧史展看频笑我同为客如君竟未臣弋徒翔远鹄网不絀祥麇越叟空思越秦人忽去秦伤时思往事望远属良辰古道谁能许遐心未易陈緬思千载上啸咏五湖滨谁复能逃世吾其欲问津

无题用韩致光韵

檐凤承初日帘犀辟暗尘鑪香双穗夜镜影百花晨但惜欢情渺宁知别恨新魂离张好好肠断沈真真梦醒惟三叹愁多岂一顰垂杨难冒马芳草不回轮燕嫩还矜羽鱼劳转惜鳞只伤飞絮早轻度小桃春炊玉悲游楚弹箏忆向秦珠分沧海岸星隔绦河津但觉情如醉都忘味有珍颊羞红不妥眉薄翠难匀密语应忘婢凝妆或怨人长怜屏曲曲误听车辚辚

瑞麦

仁爱天心厚艰难帝道光圣朝宁待瑞丰岁即为祥两社占神应中牟卜世昌八三时不爽五
七种非常夏已先秋盛金仍得火禳本同知共朔衆附兆归王浪欲侵隋柳陰堪映召棠荃看
连理并疑似木兰长致此宁无故从兹可渐康王师虽未偃吏治早徵良信有中和具能将水
旱偿愿言羞寝庙持以示遐荒

病足十二韵

老至方多患春来旧疾?半才如凿齿全欲似渊明未可扶藜拜难为倒屣迎终朝横几榻竟日
掩柴荆岂少飞扬意何堪纂蹶名此中宁有鬼得住且由卿抱膝闻孤咏咸腓笑彙征拳长如
鹭宿跳不与夔争身静奔趋少心空险阻平岐途知免累捷径岂关情痺许王徽让忧怜乐子
诚以兹甘郁郁长得谢营营

春日闲居

岁序青阳好幽栖览物情才疎甘皂?命薄谢朱纓稼圃聊安分樵渔不近名卧闻双蚁鬪梦破
百禽声独起惟携筱闲行或抱罌灌花成晓课蒔菊代春耕客至凭莺报僧来遣鹤迎苾袍随
体便纱幘着头轻麻熟青精饭葵香锦带羹有时摊卷轴尽日对棋枰枚马梁园赋求羊蒋径
行句从无意得杯爱不时倾挥麈餐常费谈经席屡横伶玄曾作史子墨旧为卿水任鳬鸥戏
岩无猿鹤惊淳于谈每絶辅嗣论偏精意气由时辈文章付後生阳秋非所事月旦岂容评櫻
笋厨方盛蒲荷水渐平吾侪今已老犹幸见河清

小集克敏堂遇雪分得六麻

春来不择地昨日到山家莫已开双甲梅才吐一葩幽人高齿屐词客短辕车坐密毡炉煖谈
深蜡炬斜醇醪浮栢叶生菜饌芹芽得岁云初合迎年霰转加影高都着树点急不成花郢国
歌同发梁园简未遐光应迷上下韵各鬪尖义应自同欣赏宁为玩物华

苦雨二十六韵

未省苍穹怒如将赤庶嗔愁霖真有客旭日竟谁宾屡见商羊舞难教石燕驯水行将木毁陰
德致阳屯淅沥初逾岁滂沱忽累旬人情空向晓天运欲无春檐溜时时乱堦痕处处湮连墙
多坏屋隔巷少停轮苔蘚红侵席蓬蒿绿满邻但闻泥滑滑罕见石磷磷婢怨嗟沈釜樵归抱
湿薪柱欹还长茵池漫不生苹是漏难为补如波不易堙自冬将及夏彻夜更兼晨入市乘商
筏当门插钓纶溪流迷旧岸田畔入通津未可同甘泽徒能虐贱贫两岐应失望五德适逢迤
墨吏谁能觉青皇似不仁嗟余恒独息对妇共长颺南亩忧方大西窗听已频余寒憎绣被新
顰展罗巾弦润琴慵理书沾帙懒陈不歌应可笑无病转堪呻得意怜蛙黾潜踪叹凤麟会当
逢阳谷终免笑波臣

閱江楼晚眺

端州江海滙一水贯遐区奇相承坤德危楼瞰震隅缘梯情已爽倚檻眺还纡况值清辉澹兼逢暮景徂千帆过远树万井出寒芜发鼓鸣官舫连檣集市舫依依投晚浦渺渺泛修途共指层城壮同看杰构孤东溪分白管西郡接苍梧峰束羚羊峡潮通大鰐湖古今形自胜昏旦候常渝海近残霞变波寛夕照铺野云生灌莽村火杂菰蒲蛮舶高山岳渔舟小鴈鳬客心悲日夜旅望极川涂寒汐声来去层峦色有无几回空徙倚独立转踟蹰荒拱藤空老残碑薜欲枯可怜兵甫息终赖力能扶拟作滕王序阎公兴本殊

七言排律

秋日大猎

白露凉风转素商紫微星宿动文昌戎车吉日周王制羽士期门汉蹶张天外金钲屯细柳花间玉辂动长杨三驱共仰飞龙驾七萃新开射雉塲武库神兵通太乙天闲上驷映东房鍾山建翮多贞白楚泽修髯有茹黄都护戈矛森鹤膝将军弩矢号鱼肠翔乌始见征尘溢搏虎仍观列炬扬武帝輿徒连灞滻荆人罗爵徧衡湘云霞乱杂旌旗色山水平分剑戟光木落银縑堪纵击沙平珠络好腾骧执殳猛气曾无敌出穀雄威定莫当并美驺虞能赴节早惊鼋兔已迷方丹毛洒坠雕弧下綉翅离披翠輦傍遂使龙颜轻一笑转怜猿臂擅诸长止綏任骇公孙鴈饮至还羞穆满狼亲向璇宫调玉膳重临宝幄赐三浆中林貔虎吞云梦後乘熊罴托渭阳再见镐京歌燕喜宁烦洛汭刺禽荒相如諫牍空千古虞舜垂裳自九章

壽留村制府

地天景命昌乾统河雒祯符诞晋侯禹甸衣冠王会盛延陵礼乐祖功悠子顔壮业超伦辈处默清操絶等俦武本用文成胜略才原藉德具弘猷花封几处棠陰满蓉沚多年黍泽稠洁可字民非枉誉诚能格主岂虚求八阶特进恩踰次三锡频加宠独优丹笔含薰吹牋尾朱干竟夜指旄头漳滨万弩救乌石岭表双旌启碧油雷动更兼风以散火刚还济水之柔传刀肯使狐妖响破柱常将害马搜楫鼓鲸涛消戍垒楼高象峽裕边筹庭虽有璧何烦运篋自无香岂待投孟获皈心钦秘算尉佗稽首服神谋白狼远贡金城晓翠凤斜飞玉帐秋客聚兰台欣再见宾依莲幕庆陪游如山未许齐隆岳似海惟应纳衆流谢傳棋枰谁与敌燕公诗句孰堪酬生申此日方歌雅建子当时早演畴黄老五千宁慢学苍黎百万正欢讴孤踪幸共绵瓜?积愆徒怀献藿羞北斗挹浆分相鼎东华添籙翊宸旒

五言絶句

鸳鸯

朝上芙蓉渚宵归菡萏池生来便同宿不解有相思

怨诗

朝来粧阁下不复画眉湾为恨郎行日遮郎是远山

又

种荷塘水里莫种小桥前花开同一藕分作两边莲

题画

茆屋净无尘溪树青疑雨中有卷书人坐与春山语

美人览镜

对影照微红含愁锁双翠却怪镜中人如何亦垂泪

美人骑马

髻整抛缰处裙钩上镫时停鞭问阿姊何处不男儿

远望

波远鱼难渡风高鴈不行故园秋草外一半是斜阳

长安一片月

车马尘初歇笙歌响又新长安好明月却照利名人

酒醒後枕上闻鴈

月斜将雪影并作客窗明孤枕横残醉萧萧度鴈声

空山读异书题黄皆令画扇

翠壁疑无路晴谿絶世尘窗前留古册恐是避秦人

落花

红颜原自好经雨作香尘独羨衔泥燕高悬一片春

雪望

一夜江南雪高楼独闭关兴亡天不管埋尽六朝山

寻文游台不得

旷野低残日高云没乱榛不知江海内何处着词人

子夜四时歌

花里红窗静东风吹欲开却嗔芳草色不趁马蹄来

又

人爱莲花好莲心只自知生来多苦意却为藕中丝

又

小院秋逾寂凄凉不可禁愁心如落叶一夜一堦深

又

无罅风偏入灯寒影更摇恨应难比雪能积不能消

岭南四时旅怀

江南亦有花岭外花开早辛苦看春风是处王孙草

又

南海苦炎蒸终岁亦如夏安得北窗眠共说羲皇话

又

得雨始为秋秋来不得雨始知宋玉悲不为秋风赋

又

历尽不曾寒得寒反为异独怜流落人有裘不嫌敝

菩提叶笠子

云何一片片遮得斜阳住向上亦何为由来本无树

？团

不锦复不缦何时乃能破试语行脚人且在此间坐

方竹杖

未遭规与漆留得觚棱在以此孤直心登高幸无殆

瘦木如意

意亦安能如如意亦何许轮囷本无材莫作王戎舞

马当山

一夜风帆驶挥毫动世人不因王勃序谁信马当神

六言絕句

归云庵次吴白雪四首

过岭又逢僧舍沿溪都住渔家高士丰碑何处隔林遥认梅花

又

木落更知山静天空益觉云闲但使欲归便得何须廉让之间

又

山与波光相近冬将秋序初分消得樊川佳句湖田尽卧黄云

又

倚杖聊听秋涧回飏却趣轻风莫讶山公未醉酒人犹坐船中

林蕙堂全集卷二十一

卷二十二

<集部,别集类,清代,林蕙堂全集

钦定四库全书

林蕙堂全集卷二十二

湖州府知府吴绮撰

亭皋诗集

七言絕句

采菱曲

新妇矶头蘸绿波采莲何似采菱多莲心有味郎嫌苦菱刺鈎衣郎奈何

又

浊水菱肥清水鲜就中清浊任郎牵无端惊起鸳鸯睡冲破侬家镜里天

韩信

一饭萧条楚水滨功成钟室竟亡身英雄事业轻刘项成败无端属妇人

明妃

莫怨妍媸向画中明妃薄命在和戎便教写得倾城貌未必君恩冠後宫

文君

解妬从来属赏音阿娇徒自费黄金独怜一首长门赋不及文君几字吟

汉宫秋水图

红衣落尽冷青苹太液秋风起碧鳞惆怅永和香辇散白头宫监更何人

题谿山图

万山深处乱泉流土室茅亭事事幽絕似故乡全盛日任公溪上荡扁舟

七夕前一日为织女催粧

银汉迢迢一道斜青牛待驾紫云车明朝便是经年别莫误风前吉庆花

题蓉江女子所书碧桃

露井东风拂素罗一枝檐畔粉香多自从误赚渔郎後净洗春红学素娥

题李夫人画芙蓉

江上晴波望若空芙蓉含笑颭秋风等闲输与鸳鸯鸟卧看明粧晚镜中

玫瑰

一丛深艳傍回廊偏称鸾钗堕马粧珊枕睡残红雨落为郎还作紫罗囊

茉莉

香清粉淡海南来夏晚争持傍镜台摘得含苞郎最爱向侬头上看花开

明妃

深宫岁岁闭容辉一出榆关便不归不为无金买图画至今谁更识明妃

友人赋磁盃鞋者戏作二首

谁把缥磁代藕丝凤尖长惹露华滋就中最有相如渴忆杀当垆小立时

又

掌中传送几摩挲絕胜陈王见袜罗不是定州新制巧风流原在醉乡多

赵孟迁自题小像曰方朔再见之图为书断句

七十骑驴上帝台朗吟长啸口常开奚奴辟易惊狂客知是先生岸帻来

纪事

寒鸟惊飞月影昏土牀孤枕欲销魂梦中不识相思路又逐西风过里门

见人扇头是友沂絕句怆然和之

更谁红泪掩蝉纱公子埋香隔岁华今日临风展遗墨教人肠断刺桐花

又

歌板当年出绛纱绿腰红袖尽铅华只留便面春风在曾向章台拂柳花

友人纳姬戏为催粧姬汪姓南人也

蛱蝶轻罗押蒜金灯前小立倚瑶琴桃花潭水儿家住只问郎情深不深

又

别样双蛾柳叶匀轻回蝉翼掩罗巾柔条一样江南种北地逢春更着人

又

碧天何处是明河灵鹊差排此夜过低囑侍儿休索问古来司马自情多

又

新粧绰约下鸣机夫壻东方世所稀依自有香名意可不烦小玉护朝衣

题画

密筱千竿翠绕篱草堂清昼篆香迟残书未了秋声动正是前山欲雨时

又

怪石颓云势不平西风卷出大江声渔郎醉卧芦花里笑指鱼龙触浪行

入署偶吟

新换头衔骑省郎终朝驱马看人忙鍊花绣尽黄金钥羸取残书叠印牀

又

平明初下紫宸班锦署无营昼掩关闭拂案尘摊好句一杯凉雪祭椒山

快雪堂观剧

鱼藻池边秋夜清玉船徐引烛花明不知何处春风起吹出雏莺百啭声

又

西园清燕好留连翠管红弦不曙天看到舞腰低转处不妨人唤柘枝颠

犹记

犹记香风起栢梁?裾高会有篇章无端赋就神仙事空指红云拜玉皇

又

太液波通瀛海潮灵鲛行处御香飘一从画楫无人倚荷叶高平玉螭桥

又

兽环金蚀绣苔班头白监门尽日闲零落上阳花满地宫莺衔不到人间

又

孝武雄才自古今朱旗常绕碧山岑年来不见秋鹰出肠断相如在上林

又

甲夜犹传驻御幢一朝芸帙冷明缸蛛丝似也知人事网徧金泥闪电牕

又

鬼神清问夜徘徊前席曾闻访异才宣室可怜秋雨暗凭谁教唤贾生来

题杨龙友山水

不见杨公二十年画中崖壁尚依然当时若有扁舟在呼出人间郭恕先

题画栗

实如张放林中弹皮绕桓公面上髭不是写生容易得拾来将疗杜陵饥

题查匡来像

入雒当年眼共青双鬟记曲满旗亭无端却渡松花水皂?藜牀忆管宁

又

丁鹤重归渐有须柳风桐露照水壶吴生解写多情貌何不崔徽共一图

又

倚玉风裁镜里开四筵惊道孟公来凭教倩得添毫笔难画东阿八斗才

上已梅花

本是东风第一枝为怜春老独开迟好将逸少兰亭体写出何郎阁上诗

水仙

乌几红牕小贮春盈盈罗袜净无尘不知子建缘何事却向烟波赋洛神

梦月中游二十四桥

长乐钟声入梦闻梦中犹自逐梨云采菱船上西风急一曲红箫月二分

题范双玉画梅册

鹤飞湖上已年年老?犹从笔底妍冰雪不须疑绰约前身原是藐姑仙

夹山漾

青帘白舫画中开短笛横箫晚更催一曲新词吟未稳两山飞翠入船来

杂感

莺脰湖边树欲红长年倚楫听晨钟苕川多少浮家处何日来寻桑苎翁

夏夜偶泊西子湖戏赠笑公

修竹高梧半榻前老僧白髮影萧然十年着眼南屏路看尽西湖歌舞船

又

影落雷峯月上天一池荷叶露痕鲜新凉夜半香风起悟得涪翁不隐禅

过友人斋头看竹

北郭东门访隐沦琅玕万个碧无尘隣家莫把王猷拟看竹还应为主人

为鍊崖题画

无数羣峰蘸墨池白云如絮拥茅茨絕似郡楼斜日後道場山北雨来时

为灵岩和尚题画册

门对平湖碧树齐木鱼清磬石桥西他年得遂渊明志不复烦君过虎溪

赠僧

鸟道千盘入翠微真僧皓首见人稀昨宵直上莲花顶剪取山云补衲衣

又

一鉢胡麻 玉泉鹿麋相伴不知年远公犹有名心在苦向匡山种白莲

又

老衲惟存鉢与瓶禅牀趺坐藓痕青深林不是长多雨为有天龙来听经

泛太湖

欲上金庭苦未能夕阳明灭晚波澄不知万顷琉璃国何处清歌唱采菱

过石门有感

三十年前共月明玉箫吹作风皇声而今携手同苍髮懒向桃花说姓名

又

乐令清言事未遥山丘华屋恨难消凭将醉後羊昙泪弹向春江作晚潮

嘉禾

淼淼寒波动画船南湖春雨细如烟不知修竹弹何事冷落鸳鸯一万年

客有谈醉李者戏成一絕

歌舞无端失旧恩苏台响屐总消魂多情只有王戎李犹带东窗指甲痕

平望戏成

谢安手板自无聊又趁东风送短桡沙上白鸥应笑我年年身到画眉桥

浔溪泛舟

七月新凉暑渐微荷花深处钓船归五湖鱼鸟犹相识争傍兰桡不忍飞

语溪道中

草青回二月初语儿溪水碧何如扁舟十里垂杨路消得齐谐一卷书

题画枕

十八年来一欠伸而今稳向钓鱼津扁舟仰睡桃花下不怕槐安告密人

题周天随祖香堂

罨画溪头木叶黄手持诗卷见周郎烽烟匝地乾坤小不及君家旧草堂

文信国公像【以下二十首咏蓀圃长物为姜仲子学在作】

崎岖江海几间关柴市招魂竟不还今日何人解惶恐也应无面见文山

苏文忠公像

金莲影里唤奇才瘴海颠连老始回笑我也同鱼鸟性忆君曾上爱山台

唾壶

烈士高歌志颇雄石头东下竟无功笑他处仲诚多事何必敲残败乃公

隐囊

五色斑丝自陆离齐梁子弟坐弹棋匡牀此日须珍重鍼线唐宫旧所遗

笔牀

玉台翡翠艳当时三品今传宝相枝独怪中书老而秃只宜高卧谢乌丝

宋搨阁帖

澄心堂纸廷珪墨旧搨于今不可求何事宜和遗恨在一时还说太清楼

宣德窑脂粉箱

景陵制作重当时传看真同大邑瓷不识昭阳谁最宠晓来妆就赐香脂

瓦灯

午夜荧荧对短檠清瑶屿里报寒更谁知得意高吟处万树秋声一点明

匏尊

吾岂匏瓜事可知一尊闲卧夕阳时人间只有槐安好便是蚍蜉也不辞

开元石幢

智慧高幢刼屡经石台犹剩藓痕青时人若欲知年代上有欧阳小字铭

蒲团

谁能坚坐学枯禅一片蒲团古壁前识得西来无语意只应抛向大江边

博山炉

几树高桐绿影深归来堂里对牀吟一炉活火心烟袅且向花前试水沈

蓄草瓶

缥青粉白自非常旋汲清泉插海棠最是护花须圣主想来青帝即羲皇

乌皮几

琉璃窗扇护书城掩映寒蕉碧影清静拭飞尘间纵笔刺桐花下又诗成

漆园榻

栩栩初回夕照斜庄周何意着南华人生只合如蝴蝶睡尽江城万树花

达摩衣

叶响寒斋夜雪深番驼高拥正闲吟遥怜此夕鸡窗意肯负西来面壁心

管夫人砚

秘阁才人管仲姬琉璃砚匣玉珪携看来尚作连环样未破当年一块泥

日本藤笠

风雪骑驴太瘦身横欹同笑?檐新鲸鱼目射波光紫谁念当时渡海人

黄州竹笔筒

毛颖空为狡兔俦此君坦腹坐相收当年若使元之见应入黄州古竹楼

书籤

食尽神仙老蠹鱼百城高拥水云居劝君甲乙无烦别举世谁知四库书

游北山赠性空上人

古木陰森翠影稠乱香随屐不知休山僧相引过溪去一片白云教我留

过二峰庵

春半看花取次忙晚来烧笋饭簪簪清贫太守闲经过又费山僧几日粮

步韵

何处行云不肯飞夜深香冢镂金衣凭将苔上千峯色写入蛾眉送客归

又

响屧空传下玉楼翠烟珠雾态难收当场错认何郎粉匿笑花前不转头

又

枉杀陈思赋洛神三年辜负镜湖春东方莫漫窥千骑旧是青楼薄幸人

赠陆文孙

莺脰湖边杨柳春相逢倚楫暗伤神鄂君绣被知何处肠断何戡是旧人

赵尚书故姬

舞队歌筵盛德新芳姿曾掩翠蛾颦宁知华屋伤心处不负尚书是此人

又

瞥眼繁华不掉头药炉经卷度清秋春申珠履应无数莫过张家燕子楼

蠡山题壁

千桃万柳上嶙峋石室犹传霸越臣不是五湖归较晚此中应少芡蓼人

虎丘竹枝词

虎丘山下水平堤堤上春来碧草齐分付画船诸女伴莫抛红豆打黄鹂

又

短簿祠傍泊画船吴王墓下草芊芊何能覓得鱼肠剑割断离愁向两边

又

红红白白满桐桥买得花枝别样娇依意只怜梔子树阿郎偏爱美人蕉

又

閤扫梳头向水窗真娘坟畔水淙淙当时岂少同心侣何不鸳鸯葬一双

题辰六借书图

吾家逸少本奇才旅舍缥緲手自裁三载骑驴燕市里只知原是读书来

游虞山得絕句八首

东风吹得燕莺忙花底船回一水香杨柳长条正无赖赤阑干畔鬪鹅黄

又

鸭头新水碧连空芳草裙腰晚望中多少楼台烟雨後一时闲倚夕阳红

又

篮輿晓出为看山鸟道纡回未便还何处衣香吹不断蛾眉人在白云间

又

峭壁千寻出世尘下看烟火碧无垠而今始笑黄公望画得虞山却赠人

又

絕顶天风吹客衣沧茫湖海是耶非青螺认得乡山影苦爱桃花未肯归

又

黄?青帘十里余酒人争就水云居那知东海风流客尽把沙棠载异书

又

绣被无香烛影青玉波深处话平生无端唱出河梁曲红泪抛残为子卿

又

细雨何堪归思侵玉箫金管阁春陰破山寺里花深处犹剩词人一片心

过亡友故居有感

朱楼一带映揉蓝曾见藏书话玉潭词赋可怜萧瑟尽不留红豆在江南

又

一代声名世罕俦西园狎客旧同游如何剑履尘埋後难保张家燕子楼

又

舞散歌消碧树层遗棺空自冒枯藤画船不少如澠酒一滴谁浇下马陵

又

黄 难寻事可嗟平原空剩夕阳斜行人莫漫伤零落故国全无玉树花

无题次六益韵

珠箔无风花自摇鸦黄蛾绿弄春娇依稀记得垂鞭处亚字青墙宛转桥

又

临邛别馆见相如小院桐陰绣榻虚为问间愁看腰带不知偷坠一金鱼

又

回眸一笑下帘迟别後音容细细思底事梳头春较懒恼人花气燕归时

又

紫栈熏残碧篆浓轻罗衫子画芙蓉粧成欲报王昌信独背鹦哥小字封

又

齐纨四月荐招凉鱼缬珠兰渐吐香为共萧郎谈旧梦等闲抛却绣鸳鸯

又

麝香罗褶叠宫衣薄幸羞他杜紫薇从此画帘长不卷莫教燕子又双飞

又

缥缈青霞忆凤箫浅深更漏短长宵愁心只似吴淞水黄歇祠边早晚潮

贾谊【以下十首咏史】

谪去长沙更不回贾生空负汉廷材当时绦灌多英略何处容君恸哭来

张敞

循良京兆世咸推帷薄何烦帝问为但使长安枹鼓绝不嫌终日画蛾眉

东方朔

岂有神仙骨绝羣阿娇前事不堪闻东方甘向金门饿割肉犹然遗细君

司马相如

一曲求凰向酒罍世人争薄马相如不知鬓影春风畔肯上长杨谏猎书

任昉

宾客兰台一代稀桃花载米亦空归而今茂灌寻常见不负西华有葛衣

李白

才子从来定异常天教供奉救汾阳可怜酒醒沈香後独自崎岖向夜郎

杜牧

司勳才气迥难俦寄托寻花作冶游十六卫原无识者直须明月梦青楼

白居易

江上秋来月满林香山送客为沾襟同归白首须臾事一曲琵琶独至今

苏轼

怒骂能将嬉笑侔子瞻千古擅风流奇才但得君王叹饱饭何妨到惠州

陆游

壮气雄才不易删渭南词客老投间平生多少凄凉志铁骑西风大散关

访鲈香亭不得

遗亭无迹暮烟空钓叟收纶看落鸿不是近来鲈膾少阿谁冷眼向秋风

和龐大家香奁琐事杂咏

春入鸾纱日较迟白梅花下立多时无端拘取高枝戴惹得东风上鬓丝

又

昨夜红薇一朵开胆瓶新筑避风台殷懃更放泥金幔恐有寻香凤子来

又

粧次传书特地忙嗔他小玉恋迷藏错将京兆修眉管并卧湘妃翡翠牀

又

生性天然淡冶中羞将顔色鬪春风新来不着灯笼锦一色文罗染退红

又

检点珠奁似少欢钗梁擎出要郎看昨宵嗔唤收粧急误损金丝九子鸾

又

绡编偷把背花吟脂印犹嫌玉甲侵读到白头山上雪一时弹泪为关心

又

戌字初传报夜牌卸头犹未下瑶钗不知夫婿轻狂甚倚醉偷量独见鞋

又

夜展 偷坐绮窗尽烧椽烛换明缸谁堪暖手偎红袖拂乱宫牙十六双

又

敛眉深坐费深思一着文楸局两持赌取玉钗浑细事就中黑白要郎知

又

江草湘花展卷看春风随手拂雕栏赵家公子归来日莫买徐熙墨牡丹

又

稻畦衫子映花明绣佛幢前礼拜轻传语八关今日是厨娘莫费鲤鱼羹

又

尽卸鸾鬟向凤窠蔷薇汤里学凌波窥人怕有多情月绣幕层遮脱绦罗

又

暗香中夜吐金花漫道红窗少伯牙一寸眼波横两黛高山流水是儿家

又

紫栈偏宜静处焚金炉银叶共郎薰请看心字成灰後尽作巫山缕缕云

又

好日新将绣帖开合欢罗胜一双裁雏鬟不识春犹浅已讶钗头燕子来

又

锦带银球次第悬手丸琼粉拜郎前灯边好语凭谁道愿似花糍个个圆

又

绣罽红茵别样娇衔蝉晓食每亲调爱他生小多凭准一线圆睛两度潮

又

亚字青墙柳带斜春来间事有些些嗔他小玉无聊赖惯上江楼唤卖花

又

念得新诗教雪衣水晶帘外语依稀春来渐喜相偎熟纵解金縢也不飞

又

近风来处着红缣小拜花前愿蜜添身是百花原任采不知何处使人甜

又

寒食今朝春事賸釀成仙液似飞霞杯中更按桃花汁只要郎身总是花

又

春驹轻粉尚沾香浪惹轻罗已自伤还向海棠深处放莫教孤影宿红房

又

荷芰风清薤叶凉轻雷一震隐横塘生憎帘幙斜阳色半是儿家额上黄

又

宝镜盘龙影簌空猛然惊见下帘枕凭谁得向江心铸先着倾城在此中

又

填鹊灵期正早秋家家瓜果坐针楼生怜银汉难为别却替双星夜半愁

又

寒到深闺要绮襦窗前札札弄机杼而今织素浑无用花样随时问小姑

又

花压重檐影渐偏贪看灵兔不成眠嫦娥既有长生药何不将人并上天

又

翅拍晨霜未稳栖晓来窗下打笼鸡怪他只唤相思梦不向侯家枕畔啼

又

养得金鱼近绣窗锦鳞朱鬣一双双夜深忽怕琉璃冻自撒重茵裹玉缸

又

天涯着处舞杨花剪剪轻风透碧纱鬪鸭阑边寒未减红泥长护郁金香

又

银墙东畔画栏低斑笋新抽尚带泥煮得青梅同下酒合欢花上画眉啼

又

菖蒲新绿细堪梳崑石玲珑嵌碧虚一研冷云花影下鲍娘新折大雷书

又

人间何处有琼霜倚槛微吟只淡粧百尺小楼双燕子谢家春色在斜阳

水邨春晓图

水竹平生少定居每看烟树兴萧疎无端偶逐轻风去长忆桃花好鳊鱼

梅花书屋图

漠漠寒林影不分啁啾么凤晓来闻梅花万树香多少薰透前山岭上云

京口即事

江风江雨独登台听罢琵琶首重回不使客囊留一物也知原为看山来

又

木叶萧萧秋气新江声直上更无尘平生来往谁能识只有金焦是故人

梅旅度曲用秋宵闻歌四字为韵

高馆衔觞散客愁重来杜牧忆青楼无端一曲江南弄庭树萧萧不忍秋

又

作计支吾夜漏遥红弦碧管韵争调吹残二十四桥月不负扬州是此宵

又

空庭落叶夜纷纷车子清讴遏彩云醉里醒来还复醉就中孤客最难闻

又

曲巷相呼夜更过何戡白发老婆娑漫天风雨愁归路如此乾坤肯不歌

春寒

何处春寒入谢家春衣绵薄又重加无端一夜东园雨迟放海棠三日花

补种平山堂杨柳

何人新种绿阴齐六一堂高古竹西却笑隋堤千万树近来无处着莺啼

竹西春游曲

花柳千枝拂路行大家车马趁新晴那知九曲池边水流尽当年歌吹声

又

紫幘车中额画黄软尘飞过认衣香怪他醉客眠芳草元是陈隋旧战塲

又

金衔骄马锦帆舟簇簇笙歌楚水头最是江南好山色春来都在十三楼

又

鬪鸡台畔草痕青结束新粧肯暂停可惜隋宫清夜曲至今留与健儿听

题吴孟举黄叶村庄图

闻道藏书别起楼西园名士几同游十年梦到何年到烂醉鸳湖万树秋

又

昔年曾泛语儿溪最爱斜阳绿影迷今日画图闲指点草堂深处碧山齐
书屋中双燕新来垒巢未定特以招之

花底交飞绿影开衔泥欲定更徘徊昭阳宫里多猜忌莫为茅檐不肯来

又

柳影梧陰映画梁芹泥何事为衔将天边不少连云厦认取先生旧草堂
红桥絶句四首

城北风光絶点尘垂杨个个鬬腰身榆钱飞尽荷钱出买断扬州十里春

又

金谷园西倚赤栏内家妆裹任人看就中独有鸦鬟子学得银箏不肯弹

又

水檻回环抱小楼人家排住藕花洲锦鞦画桨知多少输却闲情付白鸥

又

海会山前走钿车王郎题字尚笼纱谁怜杜牧轻狂甚夜半烧灯为看花
游清凉寺

踏徧金莲战血腥秋山未了六朝青松陰一带斋钟午不是春风九子铃

又

老树槎枒覆废池苔生玉甃绿参差逢人欲问胭脂井头白山僧总不知
吉祥寺看梅

尘满空廊日影斜壁间无字可龙蛇肩輿十里秋山晚独为寒梅一树花

旅怀

菱荐藜牀夜不眠客心如火向秋然窗前为傍乌啼树长有西风在枕边

又

秋雨淒淒不肯晴搅和梧叶作秋声寒蛩本是离魂化夜夜长啼到五更

又

一线长江未易归离鸿偏向客边飞清霜不为穷途缓先送新寒透葛衣

又

挥扇前朝暑未还一宵寒雨遍青山苍天也似人情改容易炎凉顷刻间

俞锦泉招观女乐席间得断句十首

明月曾传醉二分玉箫清响遏行云而今又买吴陵酒颠倒樊川是舞裙

又

流香小阁影参差十样蛾眉鬪一时就里拏帘能巧笑不知谁合比红儿

又

绿珠长笛妙隆箏不作人间第二声若使谢公曾入耳肯抛心事为苍生

又

嫋嫋骊珠淡淡粧天然无复换鹅黄人生只有情堪死莫把伤心问丽娘

又

绦蜡摇光酒气春小红来去逞腰身生怜薄幸元丞相肠断东风记会真

又

芙蓉双靥向秋鲜何粉轻沾分外妍赚得红楼人爱煞不知原是小婵娟

又

佩玉钗金见未曾领巾题字我犹能当筵不用求凰操才子由来在茂陵

又

欢场何处有旄头一夜樽前鼓未休猿臂只今无用处温柔乡里暂封侯

又

紫云一笑定如何老去参军兴未磨探取江南红豆在一宵惆怅为情多

又

公瑾知音一代稀美人都唱缕金衣牡丹会上能重到压?狂花不忍飞

除夕前一日哭长儿参成十首

华筵心动便归来鵬下宁知事可哀风雪漫天灯火暗苍天有意虐多才

又

心伤负米志终违俯枕长吁涕更垂只为高堂双白髮曾无一语及妻儿

又

词赋安能动帝阍玉楼偏召李王孙平生何事应天谴破柱当年似寡恩

又

少小多愁只为贫频年憔悴向关津可怜廉吏终何益清白翻能累後人

又

当年才调拟相如岂意无端赋子虚呕尽血痕何处覓丹黄犹剩半牀书

又

诗馥空传句足怜那知未别已迤邐长沙自是伤心地惯向秋风哭少年

又

一雨何期八十朝
哀哀嫠妇哭寒宵
东皇似有怜才意
落尽春红不自聊

又

年年珠树镇相携
谁信慈明运不齐
空有茂陵遗稿在
三芝无复旧时题

又

空房夜夜听啼乌
肠断东风泣凤雏
一对麻衣小儿女
有谁还信掌中珠

又

沈疴难起为儒冠
三上无成泪眼酸
曾似东陵樵牧?不教识字且团圞

芜关观竞渡作竹枝词

青帘一片水中央
摇漾晴波映额黄
就里何人似桃叶
漫将团扇赚王郎

又

木兰双桨逐时新
玉箸金盘饌锦鳞
坐上琵琶浑未解
可怜都是贩茶人

又

文鳞朱鬣怒如雷
欸乃齐声去复回
多少阑干人注目
不知谁夺锦标来

又

谁将歌吹说扬州
此地从来据上游
却笑小姑春态好
新粧閒扫按箜篌

彭泽县絶句

折腰兴懒赋归来
元亮平生一酒杯
只怪黄花无种子
不曾留与後人栽

又

古人谁比复谁传
宦海浮踪絶可怜
笑我官应胜彭泽
归来种秫竟无田

女儿港二首

遥山隐隐带波光欲画蛾眉未便长只合小姑相伴住莫教容易嫁彭郎

又

芙蓉插镜学梳头一派横波入眼流为识洞庭曾错配盈盈珠佩尚含羞

舟中卧月

竹舍人稀晚柝残沙笏月色照波寒今宵一样婵娟影三处人应各样看

又

西江日夜水争流一片清光欲向秋犹是隋桥好明月可怜欹枕在扁舟

登八境台和东坡韵

遥睇丹霞接蜃楼江城如画坐销忧凭栏竟日无人识倦客由来是醉侯

又

浮踪汗漫未知还庾岭梅花待雪寒十幅蒲帆何处泊碧云无尽是南安

又

西江环涌雪成堆水国苍茫八境开我较东坡身已隐不妨鸥鸟共频来

又

迢嶢画阁夕阳明万里天风吹酒醒欲梦扬州是何日垂杨青绕竹西亭

又

悔不求仙与坐禅半生踪迹尚凄然章江不少桃花水输与渔郎返棹先

又

一派江山杳霭中欲将图画问王蒙无端更向羊城去遥指红云出海东

又

朗吟终日坐高台恨不新丰酒瓮开禅客莫须频问取先生原是旧吴莱

又

沙边烟水碧差差秋到人间客早知一卷离骚浑未了不堪重作断肠诗

夜雨

潺潺檐溜响空亭半枕新寒酒乍醒妬杀鸳鸯梦中客五更同雨不同听

新妇石

嫁得南康未即回临流岂为望夫来只愁粧裹非时世暂借秋江作镜台

又

新簇山花绣锦襦何来水畔采靡芜尝羹要得慈姑性为学龐家覓鲤鱼

席中偶谈罗浮神蝶赋以纪之

闻说仙姑有绣衣化成神蝶世应稀横身金翠人难见独向梅花香处飞

又

神卵探来亦偶然蜕成逐伴更翩跹仙霞片片随风起五色宁教浊世怜

题天宁禅院示自参上人絕句三首

浪迹天涯欲暮年远公相遇共逃禅学书自有菩提叶不用芭蕉号绿天

又

乱後珠宫尽荆灰空余斗室掩苍苔健儿系马千羣在敢为支公爱骏来

又

闲云一片偶来迟梦破绳床有所思彻夜悲歌喧戍客不须重咏皎然诗

赠维清

追随千里更踟蹰潭水桃花意有余醉後片言君记取镜湖春雨一床书

入宜章界

两载栖迟越水滨无端流转又关津平生爱写离骚读今日身为楚国人

舟阻磊石作唐多令一阕焚祷于洞庭君是夜得南风以济因作小诗以昭神贶

新词一阕化湖滨夜半惊涛似有因安得神明长借力尽吹天下欲归人

过武侯祭风台

崔巍一片撼江隈百万雄师竟未回吴蜀祇缘分王气东风宁必待登台

琵琶亭

芦花枫叶雨萧森寂寞空亭遂至今自是逐臣双泪尽不关商妇少知音

为友人催粧

鸾钗偏爱辟寒金十斛明珠覓赏心拣得一枝红芍药春风鬓影对弹琴

又

平阳公子剧多情选取眉山两黛横南国有香销未尽月明重听玉箫声

又

渡江曾说有琅琊桃叶如侬亦未賒但把郎心比潭水可能深得似桃花

又

青菱光映带初拈腮半红斜晓意恹恹却怪牕前看未足梳头还下水晶帘

题汪丈冶荷锄图

倦归拟老汉陰身美尔先为荷锄人异日图成向桑苎不妨添画葛天民

种字林闲居杂咏三十首

避人尝拟似君公新得茅堂郡郭东买宅莫论多少值满庭寒碧是新桐

又

酒醺茶竈日从容此地幽偏足养慵万缕垂杨三亩菊雨窗无梦到临邛

又

木榻斜支对石幢药铛经卷傍西牕水田莫讶裁官茧我已全家学老龐

又

新开小径绿参差尽种琅玕为竹痴不是王猷偏爱看此君孤直最相知

又

长红小白露华肥雨过山房拥翠微几日掩关无客到春风鬓影对金徽

又

扪腹徐行午饭余松陰百尺共萧疎朝簪抛後应何事不是穷愁也着书

又

今年准拟学潜夫酒碗诗篇泛五湖昨为看山才一出被人偷画醉翁图

又

桃李无言自作蹊垂杨舞罢绿云低儿童未许轻攀折借与黄莺尽意啼

又

爱客平生是素怀那能独坐掩茅斋昨宵贪与公荣饮又典香奁一股钗

又

寂寂林陰扫绿苔元龙湖海气难灰夕阳欲下淳于醒笑看蚍蜉入大槐

又

门巷全无车马尘梅花香处着纶巾却嫌剥啄惊栖鹤犹有文园买赋人

又

写罢羊欣白练裙竹烟花雾坐氤氲那消天下三分月且贮山中几片云

又

为访罗浮雪里村归来长物已无存惟留陆贾南游剑欲报夷门一顾恩

又

初夏犹余麦秀寒布袍雅称竹皮冠五陵裘马多轻薄一笑何劳洗眼看

又

封侯无骨只宜闲未学神仙且学顽莫怪嵇康情太懒家人都爱住青山

又

夷甫从来耻道钱长门何必汉金传而今润笔尤非易一树名花字一篇

又

萧郎楼傍月明桥步履相过亦未遥正是五陵裘马地不妨闲处着渔樵

又

占得隋堤一把茅绿毛么凤挂林梢平生知己惟冰雪欲取梅花种作巢

又

风舞虬松日怒号移家如傍广陵涛此中合署清凉国好取离骚下浊醪

又

宾客频年已不过翟公无用更张罗留他瓦雀陰晴噪听作南山种豆歌

又

石磴临风自煮茶元卿三径绿云遮平生为有栽花癖不爱东陵五色瓜

又

青簟疎帘白昼长杜陵初有浣花堂东墙更欲添茅阁选个青山看夕阳

又

蛩触宁堪日鬪争灌花锄菜了余生也知管乐成何事不是南阳未易耕

又

露叶烟条一小亭无人相对眼常青不知五百余年後谁识扬云一卷经

又

一曲新词酒一升夜来清梦亦何曾谁教种得芭蕉树烧尽南牕听雨灯

又

卧起高斋总自由尽教匝月不梳头山中那识人间贵翻笑云谿号醉侯

又

一方竹簟一张琴醉後还为梁父吟莫讶衣裳多翠色草龙珠帐正垂陰

又

蔬食常将玉版参麈毛挥落只清谈却慚米汁犹难断弥勒原须共一龕

又

读罢残经更下籤赋心萧瑟老江淹三更犹自耽孤坐花影浑身月一檐

又

万里归来落布帆东园花竹似苍崑北山莫把移文诵已剪芙蓉处士衫

倚栏

声声晓雨送春寒早起花前独倚栏只恐东君少怜惜待他雨止已花残

种字林杂诗

去年栽竹遶茅堂春後俄看锦箨长忍得老饕才半月千竿碧玉已过墙

和毕正持夏夜书事

谁向南来鞭火龙隙光愁见午云红我家独有松千尺不待弹琴已有风

又

轻云一霎午来过满院清陰散薜萝新竹绕檐桐绕砌已晴偏觉雨声多

又

门外朱轩袞乱尘北窗跂足梦初伸炎蒸那用玄冰散我是人间不热人

又

静夜科头倚曲廊桃笙不卷竹方牀独支如意无人见满地桐花月影香

又

曲径斜连一小亭满檐寒碧昼青冥几株老树千竿竹尽作西窗夜雨听

又

静掩疎帘罢奕棋日长偏与黑甜宜蝉声一枕桐陰午正是槐安尚主时

次孝威闻玮原韵

知己关心四十年论文莫向百花前独怜零落羊碑後谁作孤寒尺五天

又

朋旧分飞年复年人间何事可如前请看琴酒当时客明月谁能共一天

又

河梁苏李已经年霜鬓萧疎觉胜前百尺楼头诗一卷碧云何似在吴天

又

曾和香奁只几年安仁憔悴不如前玉台一片文心在合向烟霞小有天

午日至淮陰次家文仲侄

叠鼓惊笳两岸闻锦标争夺浪花纷浊醪自引蓍腾睡善读离骚只有君

又

佳节萧斋忽叩门小花蛮榼送芳樽更探古锦囊中句唤醒江潭屈子魂

白髮伤春二絕句次广霞韵

秋千红飏夕阳旗莺语丁宁是此时一日乍晴还乍雨东风无奈小桃枝

又

闻道横塘走钿车玉鞭相趁?檐斜无端一阵轻狂雨惊落满堤杨白花

次自远韵奉挽蛟门

才占大衍过归奇厄遇龙蛇忽此期惆怅平泉花正发新词一曲更何时

又

拂衣归卧掩书堂一咏随君更一觞今日玉京高处去何如世路有羊肠

又

如此英华竟不留人间轻薄岂无由老天自不容才俊狙猿从来易白头

又

去秋分手菊花前妖梦新传或未然可奈蓬莱无近信一回小别又千年

扬州柳枝词十首

杨柳青青覆大堤花开那复问高低无端嫁与春风去一点东来一点西

又

隋堤柳下绿窗疎碧玉何曾驾钿车自逐刘家旧鸡犬尽从时世鬪妆梳

又

水东来碧似油垂杨一带起朱楼谁将当日隋宫地改作山塘半日游

又

欲向郎前事事谙一时装裹薄吴蚕春衣裁得从人看花样新来出海南

又

玉钩斜畔草萧萧賸有新粧倚画桡金管不须船送酒一行青紵小红桥

又

春到平山事若何香车宝马日经过送生堂里鞋儿好竹院何曾拜普陀

又

怒马鲜衣滚陌尘一番烽火一番新凌云但有黄罗盖何必相如赋大人

又

灼灼高冠灿灿裳乌衣门巷好儿郎横肩十里重城内街卒难容杜牧狂

又

义济桥横郡郭边金炉宝鼎杂龙涎如何秦掾红楼下姹女妆成惯数钱

又

竹西歌吹几人闻明月凭谁说二分我是参军徒有赋不堪城上看斜曛

梦健庵

布?笼头不出迎故人相见眼重明蓬窗一片三更月犹喜春江不世情

喜晤火传

萧萧白髮不堪?二十年来一再寻此日归耕无寸土应怜苔水旧时新

题郑超宗九峯雪霁图

茱阳当日顾厨间点染云溪意独闲一自影园花落尽更无名士爱青山

题黄荃画三生石上图

瞿塘烟水自??石上闻歌迹已陈只有西泠桥畔月夜来犹似照情人

又

改面回头日渐非多生心事此生违葛洪井畔无相识手指长松一笑归

题抚松图

傲骨生怜本共殊时时灵壽为君扶看看渐长苍龙甲莫爱秦家五大夫

八月梅花

遥望罗浮木叶黄南枝蓦地见春光美人自爱秋来月肯让金鵝第一香

八月海棠

白帝穷秋絶可怜花中何意见神仙碧鸡坊里凄凉客猛向西风又作颠

八月梨花

月色溶溶夜正凉一枝宫粉出瑶房青旗不用重相趣玉露今能为洗粧

八月桃花

露井风高木渐雕岂知红艳转夭娆但教人面能长在那有悲秋恨不消

拟寄江夏君

泛泛兰舟晚更横凤皇城下走滩声炎州秋尽犹余暑莫取寒砧捣月明

又

万里章江雪浪催聂都山畔首重回游人不似章江水更过梅花国里来

江雨

秋江水涸木兰横齿齿沙中自有声多谢始兴连夜雨寒潮添尺送人行

无裘

鷓鴣典酒度残春海国新寒苦殢人却笑游秦苏季子黑貂犹在未为贫

班婕妤

舞袖歌弦易惹尘从来恩宠日相亲无端一下黄金輶便有推排团扇人

九日登学士山题石

萧萧木叶下晴沙塞雁横天带晚霞满目河山闻战鼓不知何处种黄花

与楚云

偶然乘兴泛仙槎一啜胡麻便忆家恹煞刘郎归去速至今犹在误桃花

又

一笑花前意自亲乞诗还脱紫罗巾从来莫问扬州杜旧是青楼薄幸人

林蕙堂全集卷二十二

卷二十三

<集部,别集类,清代,林蕙堂全集

钦定四库全书

林蕙堂全集卷二十三

湖州府知府吴绮撰

艺香词

小令

明月斜

春情

月华春风光夜乳燕寻花不肯归玉奴背面珠帘下

忆王孙

寒夜

昨宵冻合水晶宫鹦鹉嫌寒骂玉笼鸳锦衾窝晓起慵小牕封雪在山茶树上红

白苹

白苹香里鹭鸶飞一片青帘挂夕晖江上西风客未归小蛾眉倚徧阑干紫袖垂

桂殿秋

秋宵

梧桐冷柳陰斜新月横拖一缕霞青天亦有嬾娥怨独恨狂夫不忆家

花院月

花院月柳桥风春来飘泊笑吴侬情人偏向欢时去怨句徒怜别後工

转应曲

蟋蟀

蟋蟀蟋蟀啼向兰闺声急泰娘初解离情悄拥鸾衾梦惊惊梦惊梦斜月压帘霜重

鹦鹉

鹦鹉鹦鹉花底时梳翠羽见人学道相思却忆关山别离离别离别万里秦天陇雪

捣练子

秋夜

声淅淅影萧萧白雁南归入夜高别梦路常迷菡萏愁人牕怕种芭蕉

离绪

秋渐晚不归家又见青天月一芽愁煞银箏无意绪有人和泪剪灯花

如梦令

金陵旧感

杨柳白门春树燕子满城风絮看尽六朝花人在画楼深处烟雨烟雨萧瑟江关如许

忆旧

犹忆泰娘初见匿笑佯回金钿飘泊损红颜痛煞巫山影现谁怨谁怨泪洒犀帘一片

望江南

扬州

扬州路人醉竹西亭画桨船头荷叶大玉箫桥上柳花轻山送过江青

又

扬州夜花月拥?关锦瑟两行倾玉盃红灯千影照珠鬟春漏不曾寒

溪南杂咏【选七首】

溪南好水阁对斜曛滩响声流三伏雪画栏闲倚一秋云客到可论文【高雨阁】

溪南好十二有高楼碧檻暗随朱阁转红灯遥映绿牕幽花底夜藏鈎【十二楼】

溪南好曲水旧名园老树阴连看奕馆藕花香绕读书轩元龙榻自眠【曲水园】

溪南好松云带翠微百尺帘栊红日早四窗屏障碧山围遍倚欲忘归【松云馆】

溪南好新桥一道通雁齿溪边飞宿鹭鱼鳞花下偃垂虹画檻正当中【新桥】

溪南好薈卜欲成林砖上金留奇树影壁间波动海潮音松古一亭深【仁义寺】

溪南好桂树一厅多天上夜寒生玉兔人间秋老发金鹅仙斧莫轻磨【桂园】

江南春

春情

情脉脉恨依依烟归花影直风到柳条知红闺春尽无人觉鸚鵡笼香睡欲痴

摘得新

月渐残

月渐残花阴压玉栏灯前金屈戌小屏山山外有人频入梦未曾还

一叶落

秋闺

一叶落粘珠箔青蛾夜半伤离索叶离春更生人离尽虚约尽虚约前事思量错

鸳鸯绮

早春

小栏干倚近百花寒只被东风觉吹人衣袖单

梧桐影

人未归

人未归春将半小玉娇憨妒燕儿押帘早放黄金蒜

西楼梦

粧懒

粧懒粧懒拥髻慵开镜楼前花发双枕闲玉儿只为春寒病

明月

明月明月直入秦楼里蛾眉夜半不能眠开窗坐把银筝倚

斜照

斜照斜照一半红珠幌归来双燕语黄昏离愁又在江楼上

又明月

明月明月一片多情影当楼照入碧纱厨美人微醉才微醒

凭栏人

陌上

陌上花开烟景稠折得花枝红在手将花却自羞惹东风吹不休

本意

何处江帆载夕阳十幅蒲帆一半黄高楼倚暮粧望天涯云水长

碧牕梦

杨柳

杨柳将烟细梨花着月明玉人忍泪按银箏絕似小窗低语没人听

十六字令

春情二首

春才到深闺便泥人花知道一点要温存

情不识他从何处生相逢处但觉惹人疼

花非花

离情

月方沉天将曙梦不成留莫住楼中无数可怜人江南尽种相思树

解红儿

忆别

白项鸦花冠鷄未明都向枕边啼为报东风太狼籍花落尽玉窗西

喜春来

有见

一湾绿水花遮路朱栏人倚楼娇憨不肯下帘鈎莫转头新月半天愁

归自謠

闺忆

深院静风颭落花红不定墙东月下秋千映玉骢一去成孤另愁谁证说来但与鸚哥听

寒食

一百五多少龙蛇原上土棠梨风急红无主朝来寂寞轻烟缕垂杨舞秋千挂在莺啼处

相见欢

春闺

垂杨绿到阑干又春残看尽一庭花雨小红慳 凭画槛抛绣帖梦无闲检取近来双袖泪痕斑

吴兴感事

西风落日登台眼重开无数绕城山色送青来 古今事吴越地几雄才一片项王马埒乱云堆

去来

去来来去匆匆可怜依惆怅谢家明月小亭中 何处见谁为辨梦无踪那得燕儿衔出一春红

别梦

半窗残月朦胧画桥东梦里那人愁坐小屏风 空惹恨难覓信恨匆匆待把别情珍重托归鸿

长相思

夜坐

花一牕月一牕酒醒西斋闻暗香黄梅初破霜 琴声长漏声长绿浅庭莎鹤梦凉怀人字半囊

平望舟中

春春波秋秋波锦缆牙樯似掷梭青山奈客何 官船过估船过不及渔翁自唱歌斜阳晒绿蓑

舟夜

盼行程数行程秋满江湖客自惊滩声杂雨声 话难凭梦难凭水驿人稀错报更荒鸡不肯鸣

醉太平

悠然阁偶题

波光半城花阴一庭秋山万朵青青作南牕画屏
颠狂酒兵萧疎墨卿吾师只爱渊明采东篱菊英

吴兴

空亭鹤雏空牀蠹鱼诗瓢酒碇茶炉是湖中簿书
郎真漫乎翁真醉欵樊川逸少眉苏结烟波钓徒

题醉仙图为念因壽

颠耶其仙圣耶其贤人间齷齪堪怜向醉乡且眠
歌乎有弦吟乎有笺糟丘长据千年其谁曰不然

放歌

灯前翠蛾花前綠螺人间明月无多任先生去波
翟家雀罗张家凤窠生平得失如何和香山放歌

偶作

相思可怜离情漫传断肠准拟今年在云边水边
青帘画船红灯翠弦半生潦倒依然为花颠酒颠

题抱膝看云图

河山眼前云霞足边故乡一望依然彼黄冠者仙
匆匆两丸苍苍九烟白衣变幻堪怜向南阳且眠

感恩多

看美人卧

霞斂红牕晓屈戌黄金小鸚鵡莫惊猜报人来
偷覷屏山深处有人眠有人眠倦眼惺忪压衾花半边

春光好

茗川偶题

随柳絮拂榆钱冶游天欲问水嬉何处五湖边
醉里题将罗扇归来拾得金钿走马碧鸡人莫笑海棠颠

迎春

春来也是何时没人知先到玉儿头上裛花枝
十二画楼帘卷红粧笑语参差争向彩幡成队处看朱衣

立春

朱阁丽彩幡轻好风生万树梅花一夜明晓来晴
锦爆抛残寒色瑶笙吹出新声画屐印将琼屑碎满江城

生查子

同顾庵次澹心韵

淼淼白苹洲认得吴兴路不见水嬉人密叶青如雨行春复几时紫马寻花去谁有惜春心寒食随侬住

一?沙

元宵感事

记得去年时节烂醉红灯白雪今日又离家见梅花无限西州旧事独剩江山如是老却眼中人奈何春

记事

记得鹊桥时候小饮绿牕红瘦旧约忽蹉跎泪?多三十六陂秋色何处问他消息两地好相思没人知

广陵怀古

满地西风黄叶冷却二分明月可惜好雷塘任牛羊飞尽隋堤柳絮歌吹不知何处闲煞古扬州梦青楼

惠山有见

可是天台伴侣家住碧云深处一笑出鸾纱认桃花怕被罡风吹着仙帔香笼红药郎是几时来绣帘开

太平时

无题

罗衾横裹一牀痴枕痕知些些情事费寻思暖香时五鼓衣裳三鼓月去来迟伤心休唱竹枝词比红儿

题前山欲雨图

江南春到柳花多麴尘波刘郎浦口唱渔歌好婆娑一片前山刚泼墨晚云拖呼儿料理旧青蓑看如何

点绛唇

春情

几度鶯啼垂杨绿了千千缕玉骢人去滴尽西牕雨扑损菱花金粉都无绪相思处无情山色遮却多情路

烟雨楼次史邦卿过西泠桥韵

烟水无情当年曾照朱楼影鸳鸯飞尽有梦如天迴红藕花残桃叶歌声冷萍无定萧萧短鬓白髮羞明镜

咏蝶次弘载韵

柳雨花烟英台尚记生前景去来相并艳杀罗裙影絮粉茸金眉眼从来靚红珠冷花房睡醒相逐过金井

咏蝉

素綏高嘶半生赢得风和露槐朝柳暮占断江头树抱叶吟条似向行人诉愁无数不堪听处六代斜阳路

咏蟋蟀

秋到庭除不知何事须频说做成悲切诉向凄凉月断础颓垣似为愁铺设声无歇苔花如雪点点秋棠血

南昌寓楼见周杞公题壁依韵和之

一派波声片帆吹过鄱阳雨晚霞收暑是我登楼处浪迹天涯事事浑无绪何时去往年西浦
酹酒同怀古

老梅根

诘屈虬根暗香疎影何年得广平铁石先有春消息几点寒英用尽东风力谁曾识冶传南国
雪老梅苔碧

咏素馨花灯

春散蛮天珠江处处都如雪彩丝谁纈砌作团圆月凤蜡高悬熏得浓香彻罗帏揭芳心犹热
情在香难歇

醉花间

春闺

思时候忆时候时与春相凑把酒嘱东风种出双红豆鸦啼门外柳逐渐教人瘦花影暗牕纱
最怕黄昏又

望家信不至

扬州水蕲州水雪浪千千里鱼不解衔书空跃黄金尾灵氛虚报喜许我平安纸寒灯亦见欺
花颤鹦哥嘴

浣溪沙

有感

吴苑青苔锁画廊汉宫垂柳映红墙教人愁杀是斜阳天上无端催晓暮人间何事有兴亡可
怜燕子只寻

常

春情

南浦轻烟蘸碧波西泠油壁少经过锁牕独自画青蛾泪点渐同花片落情丝长似柳条多镜
中金翠奈春

何

客怀

摇落关河懒问津扁舟万里送孤身乱山秋色又斜曛江上泊逢吹笛客月中难作倚楼人可
怜愁杀鲍参

军

无题次友人韵

欲起偏生恰坠钗临行那得更兜鞋教人怜处且徘徊江水无情桃叶去春风有约柳枝来漫
抛江泪被人

猜

霜天晓角

雪後夜登爱山台

孤台雪霁雪月光相泥把似大罗天阙天上全无地此时双鹤唳弄花梅吐气明日头衔须换
直写水晶宫吏

偶吟

诗愁酒病不改耽花性独怪秋来山色都砌做江淹恨西风黄叶阵霜寒归雁信料想玉楼人
眼望不得斜

阳尽

酒泉子

春夜

花影天邪晴月照人今夜罗窗半展泪痕斜有些些巫山欲梦楚云遮绣被香寒宫麝隔墙闻
响七香车是谁耶

纱窗恨

离绪

桃花一片春轻薄
误东风有人独坐红珠落
小牕中凭谁事陡生离恨凄凉煞
钗上金虫央及青鸾去问临邛

减字木兰花

忆远

天涯何处芳草砌成肠断路
欲寄离愁怕听征鸿不倚楼
琴慵酒懒柳絮榆钱春渐晚
是凄凉夜夜灯花瘦影长

题谷永新园

车门清雅小构楼台成罨画
花竹扶疎夜半荷香绕异书
起来微醉月照斜阳人影翠
映彻雕阑烟尽遥山似绿鬟

湖光

湖光夜彻飞上小楼都化月
人似梅花烂醉孤山处士家
梦云缥缈起傍玉兰花影悄
燕子多情偷得纱?细语声

饮家伯成署中

官斋清暇容我疎狂倾翠斚
晴月如霜晒破檀梅一萼黄
烧残画烛把酒清谈人似玉
来日扬舲回首龙山眼共青

赠彭爰琴

燕山匹马携手河梁人去也
此地相逢隋苑秋声百尺桐
绿么红豆一曲新词花影瘦
自是彭宣曾向扶风听管弦

题何奕美小照

传神阿堵此是何郎须认取
莫浣征衫嵇绍当年血尚斑
树犹如此百尺亭亭谁可拟
赋就新诗东阁梅花又一枝

题家介兹照

五都惊见李白轩轩霞一片季重何人风雅如髯果絶伦
萧萧黄叶此际幽怀谁可说同是延陵相对还须酒数升

题尤悔庵清平调杂剧

仙才供奉岂藉寻常科第重失却珊瑚只笑唐家结网疎
知君寄托扫尽里儿容做作烂醉沉香此後谁堪七宝牀

凤条清露

凤条清露满地绿云苍蘚护若有人兮冰雪文章手自携
玉山如照此日洛阳人正少夜梦凌风好入天门第八重

树兰

家原幽谷自别湘沅非旧族叶叶枝枝婀娜江城玉露时
灵均漫采根蒂虽殊香未改金粟全身那用朝衣侍女薰

鷓鴣

玄黄绣羽未到炎荒先见汝与汝何干闻道飞时自向南
鈎輶不息人自欲行空费力叫断江风细雨寒烟苦竹寒

添字昭君怨

感事

闻道青溪歌院只剩兔葵一片五更还响落花风景阳钟
寂寞白门杨柳春思浑如中酒鸳鸯飞尽莫愁湖可怜无

春寒

落尽梨花时候寒到将残更陡添衣偏觉画罗单是今番
几夜睡来难稳却恨东皇心狠明欺绣被半牀空是东风

菩萨蛮

无题次後主韵

月带烟霜花带雾巫山只合愁人去携手下瑶堦心忙褪绣鞋
语低防听见触手心先颤应知离别难未离多少怜

乍遇 咏青溪遗事画册和程邨韵

落花欲定风吹起惜花人在东风里飘扬金缕衣相逢燕子飞
脸儿才半见恨煞齐纨扇绀蝶与黄莺输他春一双

奕棋

碧阑干外安榴吐金笼午倦呼鹦鹉光景剧争棋一枰花影迟
小姑旁袖手夺角防开口赌却玉钗儿嗔输半子时

私语

空庭落尽梨花雪同行最怕分明月眉蹙翠连娟含情悄并肩
盟深宵未倦香吐唇脂茜低嘱莫教闻鹦哥解语人

迷藏

招邀女伴东邻近小家碧玉初拢鬓作弄各潜藏银牀花影凉
钗防珠网逻深向湖山躲惊鸟动花枝拖将綉藕丝

弹琴

晴蟾绿浸梧桐叶微风午夜消寒热双璫对人弹冰香袖口寒
金花明宝串一曲离骚怨有客本浮湘今宵觉漏长

读书

萧萧夜静鸣窗竹翻书爱与郎同读难字故撩人红丝记问频
娇羞郎对面句澁佯遮扇把卷一回头茶倾笑未休

潜窥

梅花千树围香雪水晶窗掩多情月烛影坐羈雌谁知郎暗窥
饼金应用惯赢得红绡看羞颊动春潮低头堕凤翘

秘戏

龙须方锦鞦香玉鹧鸪枕侧云鬟绿金蒜不能垂巫山匿笑时
屏摇金屈戌那得双眸覷老此乡中温柔伴小红

偶赋

沧浪亭下波光碧春来又作鹅儿色尽日把纶垂无鱼且自归
携蒲聊一戏宁道无休势骄马脱金衔思量已再三

又

梦中犹记开鸾镜时新鬔扫梳双鬟枉道没人同巫阳隔万重
春光看渐晚心绪杨花满憔悴老徐娘曾经事玉皇

又

花前偶把清平赋沉香酒醒知何处贱卖十眉图嫦娥画得无
九天歌吹断雨露何时见鸚鵡事全非凄凉旧羽衣

又

十年寥落空弹剑子云阁上谁相盼垂翼更何云天高第八门
乌程谁贯酒瓶罄终难有春去忽闻蝉水嬉人可怜

又

宵来白鸟如雷鼓露筋那顾贞娥苦披髮漫狂呼离骚熟读无
门东儿自哭茅卷秋风屋浇酒向蜗庐长歌吊伍胥

又

人情反覆宁须道英雄眼底吾将老长剑日摩娑人间怪事多
夜阑空耳热鬼笑灯将灭长揖问燕丹田生值几钱

又

秋来醉倒黄花下渊明不是甘田舍击碎案头壶能消猛气无
青山双蜡屐去去寻烟客谁许辦装钱横眸欲问天

又

古今胜负如棋耳欲怜欲杀谁为此世事总苍茫何堪鼠易肠
百年宁有错几日何堪络诗酒过残年狂来不上天

离心

离心夜共灯花碎罗衾倒盖何曾睡不肯过西窗空楼月影黄
分明曾梦见犹自相偎恋猛地被风惊吹来雁一声

和悔庵

江都不似开皇好牛羊横卧雷塘草伍员但吹箫霜痕断板桥
田家无幸舍踟躅秋蓬下服食学淮南水精何用盐

又

西风吹醒春婆梦无端又作参军弄朱户倚云高藜羹似七牢
占蓍同得履北道谁为主买骏用金时宁须谢眺诗

卜算子

不寐次西樵

夜半雪花深冻醒梅枝雀蝴蝶思春不肯来香瘦何郎阁
宿酒避鸡声梦怕忧相索闻道图南有睡方只少无愁药

巫山一段云

忆旧次弘载韵

密意珊瑚带深情翡翠卮人前隐笑动蛾眉娇多语故迟
为有愁中态都成梦里思当初错处也相宜何况总宜时

大孤山

万顷明波碧千寻夕照红灵旗隐约在云中凌波翠一弓
莫把彭郎倚谁将宓女通大乔何事不从容容易嫁江东

题倚梅美人图

影静知春早情多耐晓寒亭亭嫋嫋怕成残肯去倚阑干
独爱香无那同怜瘦欲删黄昏只许月平安蜂蝶不教看

采桑子

秋闺

西风不管梧桐叶乱落秋光跌碎斜阳犹剩纱窗一半黄
新寒陡入罗衣薄睡尽残缸锁却余香昨夜南来雁带霜

题悔庵读离骚杂剧

潇湘千古伤心地歌也谁闻怨也谁闻我亦江边憔悴人
青山剪纸归来晚几度招?几度销?不及高唐一片云

玉树後庭花

画寄亭作

槐根幻出南柯郡梦凭谁问蜂巢燕垒劳安顿暂排春闷
幽栏曲径花传信柳疎梧嫩仙鹤一双苔迹印落些风韵

好事近

戏柬坦夫

绿叶已成阴只剩广寒一树昨夜月中香坠被流莺衔去
谁言金嫩未胜鸦渐有芳心露却怪苏门仙客劝春光不住

戏答

把酒问东风何事便都春去莫遣鹦哥知道劝桃花且住
年年强半为花疼花有疼人处难道东风不晓把啼莺分付

闺情和正持松涛词韵

金斗熬沉香难熨离肠愁结强向人前欢喜恨眉痕暗泄
今年心事更重重较与去年别昨夜空牀孤影睡蟾光清彻

归思

一片故乡心猛被角声吹破酒薄不如愁酹怕今宵难过
漫将离恨诉青天天有许多大泪湿枕痕难热共梅花清坐

柳含烟

咏柳

江南路柳丝垂多少齐梁旧事玉蛾金茧只霏霏挂斜晖
眼眼眉眉都是恨人去灵和莫问谁堪眠起对红闺晚风吹

渔父家风

过西塞山访张志和旧隐不得

鳊鱼春水旧迢迢有客泛兰舸而今事往无人问花落大夫桥
新月小暮山高古风遥樵青何处欸乃声声如意频敲

谒金门

雨後

朝雨沐小阁翠阴如幄阁外白云飞去速乱峰添意绿灵鹊喜声相续新笋看看成竹满迳落
红无管东燕

儿衾补屋

秋夜

真堪忆江上乱峰堆碧高处乘风横鋏笛笑人间不直千古鬪奇角力不了砌蛩啾唧天上神
仙何寂寂桂

花闻叹息

夜思

天欲雪客里冻僵蝴蝶一介断鸿声哽咽影寒灯半灭独抱幽情谁说不睡翻嫌明月梦里家
山青几叠那

人何处歇

春情

春欲老雨雨风风昏晓枝上残红堦下草扫应还更扫何事最伤怀抱芍药开迟谢早独倚阑干添懊恼钗

鸾欹鬟小

留客

春将去燕子留春不住分付落花飞满路隔将春去处毕竟春光难诉转怨乱红催取我问落花谁误汝莫

嗔风共雨

送春

春归决半夜起和春别窗外落花堆似雪送春惟有月恹煞杜鹃啼彻月也和春休歇窃药嫦娥空有诀春

难再接

更漏子

和阮亭与友人话秦淮旧事

柳遮楼花拂地金粉六朝争丽歌槛里舞阑中鸾笙醉软红燕飞忙莺语咽天宝何堪再说愁黯黯泪潇潇孤灯白下桥

夜情

被慵薰钗懒卸愁到天涯今夜欹绣枕对银缸相思月半牀有谁知无处问燕子不传芳信花点点柳丝丝无聊是此时

离情

岭头花桥上月记得个时离别孺子榻仲宣楼无端又一秋五更心千里梦只把鬓丝搬弄空寂寞好思量篱边菊蕊黄

又

梦扬州题雪馆杜牧寻春较晚忧莫解病谁知愁多变作痴
一江波千里路只辨梦儿来去怜薄幸恨多情斜阳隔岸筝

清平乐

太湖

乱山青接粘住吴和越万顷琉璃秋映彻做作苹风柳月
烟波谁是吾徒西风吹出鲈鱼斜日荡将艇子醉教桃叶相扶

题悔庵醉桃源杂剧

山空石古遮断桃花橹采菊东篱杯自举独把义熙留取
门生儿子篮舆有时直上匡庐人道贤哉隐者不知禅也仙乎

误佳期

嘲友人

金井初堆飞雪松栢有人堪结紫绶半臂记当时别樣多疼热
锦带托纏绵脂粉翻嫌湮五湖载去听黄鹂自是相思切

忆秦娥

次梅村韵

情脉脉兰成本是江南客江南客乌啼门外断肠横笛秦淮十里杨花白蒙蒙细草春烟湿春
烟湿板桥人

散月明骚瑟

客中生日戏示陶姬

今何夕年年苦被霜华逼霜华逼十三楼上几番吹笛山河满目斜阳急阑干醉倚蛾眉碧蛾
眉碧英雄老

矣壮心犹昔

玉联环

夏景

梧桐密处清阴重碧纱风弄落花帘外舞轻红又与苍苔补空
雪藕调水佳兴有谁堪共日长纵得綉工夫不彀将愁将梦

画堂春

画寄亭雨中移花次韵

垂帘日午不啼莺雨声遥应棋声吴儿恰到载花舡惹起多情
闲着池边蜡屐还来竹下红亭种花不是为花疼花为情生

西湖偶作次辰六韵

小楼一望暮山横山光飞上层城西湖深夏绿波平荷叶风清
芳渚半生花气画船时送歌声鄂王祠树白公亭今古关情

八月梅花

人间珠露欲为霜画屏那得春光刘郎蓦地共何郎并艳争芳
鬓上红娇天宝额边粉缀含章当年剪彩忆家乡笑杀隋皇

阮郎归

雨後坐听小奚度曲次子壽韵

清和时候雨初晴鸠欢急妇声夜来凉影月华明花阴绿一亭
云淡淡露英英有人吹玉笙金衣一曲漏三更天空星自青

西湖立秋

田田叶上晚珠圆秋从荷气传红衣欲动笑轻烟真真似绦仙
霞彩媚月华鲜两峯青对眠倚楼人静影相连吹箫劝玉船

松陵道中

西风吹老几斜阳鲈鱼坠钓香蜻蜓艇子下金昌花开七里塘

荷作屋菊为裳离骚歌一章锦袍醉遇谪仙狂同骑白凤凰

倦圃看桂席上赠徐姬

南园仙蕊绽金鹅天香点袖罗凭栏小影漾横波情多因病多有宛转漫腾那回头双翠蛾怜怜惜惜簌心窝可怜真奈何

雁水昆仲过曾波阁小集分赋

南池烟景似潇湘荷风面面凉山公走马兴非常衔杯月一牀凭画槛浮瑶浆团圞夜未央沙边美杀白鸥双浑身红藕香

眉峯碧

立春

镜里韶光早彩胜钗梁袅卷帘都是惜春人争道是来年好生怕东风小央及庭前草玉堦先自送青来莫教惹得芳心恼

旅夜次上若韵

烛地啼无歇漏断声还咽一缕春蚕丝不了都打做心头结泪点红冰叠罗袖熏难热仙鸾虽自有灵胶离肠已断何堪接

有忆

一点灯花静扫梦浑难定一夜相思一夜愁更忍说黄花病酒薄孤衾冷其奈双眸醒央及寒鸡不肯啼分明要把愁支领

旅思

霜皎银蟾烂风急灯花颤夜夜寒更独自听怎奈得人长叹忆了千千万苦把梅花绊试验青衫尽泪痕也应不是归心慢

海棠春

西湖月下次子壽

年年似与西湖约道此日荷花有诺月转露华开酒醒风香作

苏堤十里烟销幕任客梦画船飘泊清极自生凉月照林逋鹤

晓妆 次王阮亭闺情四首

卖花声入红楼响看檐角霞销珠网扶倦启香奁一镜柔情漾
郁金梳掠同心样一只金鸾给赏好极转生疑更把帘旌敞

午睡

狸奴花底金眸足卷绣帖碧阑干曲红困一枝花驺向茱萸褥
枕纹香印胭脂肉鹦鹉唤茶擎小玉只剩半牀慵抛却丝和竹

晚浴

春波欲浸桃花影试荳蔻倦眸初醒绡解下裳红壶泻珍珠冷
藏羞移却粧台镜下绣幄鞋弓慢整展转出来迟月上悬金饼

夜坐

愁多懒说巫山雨那更理玫砧香杵拥髻向灯花碎滴红如语
江关梦远难去耐不过几声街鼓呼婢学郎谈戏折花为麈

桃源忆故人

记事

雪花如掌深三尺高卧袁安未识侵晓叩门何急一鹤如人立
老梅横卧孤亭侧香折玉虬无力呼酒酌花花惜辜负林逋屐

春月

杏梁高处栖双燕十二玉楼寒浅人把潇湘帘卷恰对嫦娥面
赤阑干外光如练凉影平铺碧藓春在枝头如见一一桃花片

上巳

兰亭旧事成千古剩得青山如许今日相携何处柳色西陵雨
祓除若果灾能去何不将愁前取醉後绣帘朱户芳草裙腰路

夹竹桃

韶光流向西风候谁道红顔不久人面可怜如旧翠倚天寒袖
黛眉画得初酣酒直似湘娥清瘦自到天台洞口节操君知否

诉衷情

用刘随州句

菊花能醉去官人出岫笑闲云从来世上豪杰颠倒信乾坤
成往事付前因总休论五湖虾菜三泖蓴鲈随地君恩

寒夜

无端剡雪阻回舟香梦隔秦篝今宵玉楼寒重鹦鹉可知愁
思作客话封侯总须休鸳鸯度曲鸂鶒买酒且种忘忧

秋波媚

雨中新柳

搓就鹅儿绿尚迟都未使莺知东风无赖教他细雨一様丝丝
和烟搭在阑干上约略浅黄时断人肠处才成眉眼泪软腰肢

旅怀

南浦轻风落藕花秋色老京华一窗凉月三更细雨倦客思家
陡来心事香残後清泪滴琵琶凭谁问取秦楼过雁汉阙归鸦

女儿港

彭蠡湖中水拖烟嫋嫋更娟娟眉山待画眼波才溜未嫁当年
鸾鑊夺向镜台前消息上头边谁能更学大姑晓望新妇春眠

秋夜

阁外啼乌月晓天人上鸭头船几番回顾一声珍重杨柳门前
绣牀安在东风里离别自年年今春何事嵌将心上陡地情牵

阳台梦

闻友人?杭姬沈姓戏之

青帘画浆浮残雪王郎夜半迎桃叶个人翻似瘦休文身轻那用楫
钱塘依旧住看尽六桥周折今宵巫峡在苕川可似西陵月

春晓

绿鬟风动烟丝袅碧纱如雾窗开早杨花蓦地扑人来舞东风不了
伤心无限事渐觉蛾眉翠少十分消瘦百分慵只镜中人老

太常引

春半

小楼丝雨碧桃松黄入柳条风拾得半春慵生小惯纱窗个依
羞弹绿绮懒裁白紵无奈是惺忪?不画眉峯便有恨能藏几重

霜溪鹤问汲山过集寓楼

隐囊闲侧?檐纱春色徧天涯小阁夕阳斜梦只在临邛酒家
当年嵇阮依然重聚颠倒醉流霞寄语报莺花肯说道潘郎鬓华

曾波阁玩月同雁水诸君用稼轩韵

桂华清影漾曾波月借水光磨孤宿笑嫦娥算耐得长宵几何
今年作客中秋又过不见旧银河金碗共摩娑三百盞倾将未多

隋宫吊古

鬪鸡台下草如丝吹断玉参差春到野田迟有大业垂杨几枝
同来载酒伤情词客惆怅落花时苔蘚绿遗碑访徧了雷塘未知

惜分飞

寒夜

昨晚西牕风料峭又把黄梅瘦了人被花香恼起看天共青山老

鹤叫空庭霜月小夜来冻云如晓谁信多情道相思渐觉诗狂少

望夫矶

岁岁江干愁竚立看遍古今秋色多少归帆疾如何不见当年客
莓苔改尽罗衫碧莫道重逢不识但说归来得石头曾有能言日

寒夜闻雁

霜逼寒衾孤梦断梦里归期难算夜夜无人管醒来只有灯相伴
山枕斜欹浑欲倦何处飞来只雁叫得霜云乱声声多是江南怨

燕归梁

新制暖室名曰念寒

韵海楼西竹径斜恰似仙家新来别构小牕纱阑干曲护梅花
雪中剩有胡牀挂地炉兽炭频加只愁无襦有人嗟寒较似去年些

意中

酒散西园卧翠茵灯已昏昏一轮晴月破凉云窻眼里照愁身
双眸欲睡翻成醒无奈得自家嗔十年衣惹洛阳尘空负了意中人

朝中措

北园偶作

小园一雨便成幽独自倚西楼六六陂边水满三三径里花稠
清狂似旧春来放眼尽日闲游白袷长因酒染画船偏为诗留

用刘随州句

菊花能醉去官人金粟记前身半世难忘酒德一年长祭诗神
奚为惆怅聊将旷逵且养嶙峋稳住半峯山茨饱餐千里湖蓴

平山堂和欧阳公

画楼秋色映遥空人在白云中一片青山斜日几株黄叶西风

生平得意耳因酒热情为诗鍾试问看花帝子何如种柳仙翁

西江月

咏别次梅村

桃叶流将旧怨柳丝不绾闲愁无情春水泛螺舟记得画帘招手
帐里绡封红泪灯前扇掩青眸一帆别恨倩谁收心事浑如中酒

广陵记忆

醉後猶翻棋局醒来鹄语檐牙盈盈十五掩团纱最忆鸾钗初下
几日离情离恨一江春水春花芙蓉欲采梦无涯怨煞鸳鸯今夜

有见

小玉梳成鬔扫善师教就琵琶恼人春着杏儿纱绣带临风一把
红阁画将萱草青墙映出梨花鬪鸡坊下认儿家拣取垂杨系马

月中行

用刘随州句

菊花能醉去官人鱼鸟足情亲吴江烟雨绿生鳞风起暂收纶
闻鸡夜舞非吾事心长在古柏寒筠刘伶山简共朝昏休更诵移文

少年游

丁未三月苕中送春

草香叶嫩乍晴天箫鼓放归船翠眉山黛绿罗波穀春去不留连
情多欲劝春还住春也道闰今年人散旗亭嫩红无恙犹自待樊川

清明前一日家宴爱山台

一家多解爱青山终日翠微间并坐衣香扑帘花气明月况无端
芳尊占得沙鸥席强饮食犹寒觅镜分桃停杯劝柳红袖与云间

醉後贈歌者

春来燕市解金貂取酒听红箫银烛残时玉山颓也一曲转无聊
刚到销魂已断人似柳条条鲛袖裁香鸾镜卧月休说郑樱桃

用刘随州句

菊花能醉去官人风月是天真酒国多情麴生无罪灭独好留髭
玉钗罗袖浑闲事销尽杜郎半世羁愁一生醒眼笑煞楚灵均

金凤钩

有感

乱山雨余青翠被一片夕阳红砌登楼有客凭高思远老眼横天欲醉
萧萧华髮归无计便熟读楚骚何济月生江树举头长啸纱窗忽然而坠

闺情

帘前柳丝千万数不勾别愁多半月来楼角倚阑红袖忽对海棠长叹
笼中鹦鹉梁间燕难劝得东风方便凤衾空设欲眠还懒坐瘦灯光一点

独见鞋

真堪在掌儿上又只合玉肩斜傍这般些小怎将偷换犹自暗垂绣帐
行行惟恐纤尘漾长只向枕边安放笑他邻女藕花池畔先已巧偷新样

南歌子

闺情

银甲调新火珠帘卷晓霞辟寒初着杏儿纱正是恼人时节不归家
莺坐浑身柳蜂归两股花一弦春怨语琵琶昨夜鸳鸯买卦又须差

别怨

欲笑宁能笑相看懒更看背人哀怨有般般不道大家一样枕儿寒
花底情无限灯前影乍单休言别後泪长弹何似当初未别尽依欢

最忆

最忆愁时面难为别後心梦牵红袖玉楼阴却是醒来原自挽罗衿
香冷鸳鸯带寒轻翡翠衾一生难负是知音何况蛾眉相望到而今

初秋闺怨

鳧藻才宜火桃笙不耐香朝来无语暗思量只恐莲壶银箭夜须长
梦断惟含笑啼残懒更粧龙须六尺锦匡牀怎奈好天辜负是新凉

醉红粧

咏萤次辕文

个依何事学疎星向纱窻暗处生玉儿相见眼偏明花影下扇罗轻
避人还故傍人行一些子最关情飞绕银牀休更扑残月白露华清

劝酒

绣帘初下曲廊西照垂杨月影齐有人年少好蛾眉歌金缕劝玻璃
就中掷眼怕人疑佯低面整红衣悄语玉郎须尽醉郎不饮又花飞

用刘随州句

菊花能醉去官人对鸿妻引鹤孙颠狂不怕大官嗔吾眠矣任诸君
前山过雨黛初匀晚犹带断霞痕金管玉箫堪载酒明日访莫愁村

凉月

一天凉月弄晴辉带清霜白雁飞故人煮酒送将归红烛下有蛾眉
白梅花底雪垂垂歌金缕劝醪醑笑问青楼曾薄幸如杜牧是为谁

醉花阴

与诗堂纳凉次弘载

月照红墙银汉皎云去青山小别院晚追凉弄彻瑶笙越觉花阴悄
琼浆满酌开怀抱醉里乾坤好暗麝夜香清宝髻逢迎暑向冰纨少

初夏集程山尊寓斋

杨柳花残隋苑树明月无寻处此夜集幽人煮酒西园酒送江声去
平生意气浑难据踏碎邯郸路拔剑且高歌醉语诸君莫似狂夫误

答人

客里风光难到夜夜更如何也难道不相思酒熟香温一个灯花下
秋棠红点苍苔罅惹得寒蛩骂莫说少年狂老去休文较为情多怕

虎丘看梅

十里莺花山压翠容易留人醉今古不多时几度笙歌浪把东风费
画船载酒文章会替却繁华累一树一倾杯花落杯中细嚼春冰味

书云招饮看花时庭前芍药罌粟荼蘼争艳即席漫赋

万朵千阴同一艳色色层层见白首入名园雾里看花雾里红成片
枝枝欲把琼浆劝醉也应难辨花欲赛人娇三种名葩三个蛾眉伴

璧园分赋

章贡江边舟一叶怒浪喷银雪留客有平原入坐清风解尽人间热
移牀共就南楼月谈笑都全别莫道是寻常邺苑才华寥落谁重接

咏翡翠

细羽翩翩生岭外珠树巢南海来去自双双绀袂青裳总把轻盈赛
奇毛一片多情在惯得红儿爱何处惹相思钗股衾窝点点留光彩

江月晃重山

平望舟中次弘载

淼淼玻璃千顷天教吴越粘连三秋风露好山川今宵也沽酒白云边
何处支机可问直须秉烛无眠醉中狂啸欲骖鸾新诗就吟向玉婵娟

秋思

蟋蟀声中微叹芙蓉花下无眠泥金帘幙雨残天多生受鸚鵡解周旋
梦记君恩似月离来客思如烟灯花笑处转凄然无聊赖故故拨红弦

卧霞阁对月

画阁正当江口朱栏斜向山腰三更醉舞露华高青天上吹碎玉人箫直把兰觞倒尽不须桦
烛频烧蕊珠宫里夜蟾娇回头处银汉接红桥

红窗睡

幽情

不煖不寒有煖无寒酒乍醒似闻花发神鸡枕上香鬟撒把玉郎偷掐
浅笑低嚬无应答昵人时金钗敲戛屏回龟甲梨云梦软被鹦哥惊煞

红窗听

有寄

水上 裙年纪小偏自有温柔腔调离鸿忽写西风字道黄花瘦了
烟波拟买松陵棹谁知被浮云羁绊些儿懊恼梦中如见劝心儿休躁

浪淘沙

吴女采菱

三十六鸳鸯睡损秋光个依贪耍未成粧借得邻家新艇子荡桨横塘
莲子怕空房绿扇凋伤纖纖偏爱小红香说道菱花能向日且弄斜阳

自题收纶图扇头小影

钓罢且归欵拂取珊瑚欲将不义饵鳌鱼满眼风波皆若辈坏了江湖
留着淨菰蒲稳啖蓴鲈从今不去踏泥污笑问客星伸足夜醒後何如

和毕正持过北郊遇谢山人谈隋宫故事

萤火散空塘老树青苍李花开遍柳花亡凤艗龙舟才一瞬直恁荒凉
残照绕红墙秃了垂杨两丸飞处六朝忙只有玉鈎斜上燕犹记昭阳

姑苏吊古

麋鹿只寻常台草全荒馆娃何处说兴亡一片藕花红不了日日斜阳

往事漫成伤蝶怨横塘吴宫脂粉尚流香试看越弓藏尽後更自凄凉

鹧鸪天

南园雅集

门对寒城榻对池元卿三迳竹参差梅花破雪犹含蜡杨柳知春渐放丝
楼再上席频支满帘山翠晚晴时归来走马长堤路笑煞襄阳拍手儿

戏柬伯成索酒

生计无端付醉乡虞卿归後更荒唐贤人未拟酬诗渴圣主曾知是酒狂
霜满?月盈航香山何处可能忘愿分一瓮椒花雨长对江东顾建康

南乡子

和子壽独夜杂忆

乡路碧山遥月暗吴天夜沈寥瘦尽灯花红不语长宵风弄琅玕影自敲
莫看沈郎腰一?秋霜着镜描欲梦封侯浑未就连朝愁似胥江日两潮

赠汤清侯

庭叶展新荷雨後春灯照薜萝病起心情逢客到清歌一曲红么唤奈何
莫漫唱回波憔悴东阳髯欲皤独有柔肠消未尽婆娑颠倒山公白鹭蓑

鹤问红聘

茗月惯情痴肠断寻春杜牧之同看水嬉君较胜非迟拣得东风第一枝
绿绮七条丝引惹春山翠不支準取鸂鶒将贳酒相思醉拥芙蓉是几时

又

仙李岂寻常曾酿金壶换骨香今日阮郎花里过亲尝醉倒南湖碧落堂
玉镜试新粧从此双蛾不姓张独怕郎心如柳絮飘扬到处沾泥似旧狂

为人赠别

曲宴到樱桃画栋泥香燕垒巢只有愁人偏欲去潇潇细雨红亭柳万条

独自上兰桡泪洒春江作晚潮从此凤楼明月夜迢迢一样离?两处招

秋怀

秋半井梧稀碎杵零砧?客衣一榻流黄眠不稳花迷梦到红桥月正低
酒薄被愁欺许大心儿万感齐滴尽铜莲天未晓墙西多谢花冠尽力啼

鹊桥仙

七夕用乱仙韵

云帷秋订霞舆宵发鹊羽无端遭轧相思正自为黄姑又忍听邻吹尺八
瓜陈绮席花生绦蜡心字香焚睡鸭漫须乞巧向天孙怕巧尽难为收煞

闰七夕再用前韵

灵期新展仙踪再遇玉轴还停伊轧若非桐叶十三枝明日是仲秋重八
花增吉庆线添连爱瓜果筵开射鸭天孙自要两填河把乾鹊无端忙煞

题嵇留山抱犊图

南阳禾黍汉川桑柘多少英雄狼藉歌残白石荷锄归如此客何为田舍
一笛吟龙双鬓飘麝挂角汉书初卸青山斜对玉山颓须认取而叔夜

闺恨

帐天云薄被池香浅昨夜余凉成冷梧桐堆恨满银墙竟碍住辘轳朝绠
慵调宝瑟懒拈金管事到断肠难省芙蓉还怕着新霜便睡似鸳鸯易醒

为蔡少君寿

珊瑚插架芙蓉擘纸共把文姬再换谁知浴佛向红窗又占取莲花一瓣
当年笔虎前身梦鸟消得梁家玉案紫绶图就满巾箱那不许刘郎偷看

秋夜不寐

愁心易熬倦眸难合照影看看红瘦残秋未是病偏多耐不过迢迢银漏
邻鸡懒唱镜鸾羞舞恨杀司天空寥猛 夜半起吹灯匀几刻补添清画

虞美人

春雨次李舒章

红绒冷落秋千架人约西陵罢梨花和泪闭重门却似玉儿憔悴忆东昏
孟婆苦把东君妬做作催春暮愁春人正在朱楼听尽丝丝点点倚香篝

离情

无情最是楼头鼓不信离人苦声声敲得梦云开又把湘愁峡恨送将来
屏山画出还家路其奈归期暮大江风雪棹歌迟正是银筝小妇倚阑时

明月棹孤舟

本意

荡漾晴霞茗水暮行人在乱山青处隐约渔灯参差蟹舍尽是菱烟荷雾
画舫朱帘红粉露记昔日灵槎曾渡一曲歌清双镡剑老惊起鱼龙无数

江上

黄叶几枝横酒舍摆西风酒旗低亚醉不成欢心难与问谁是芦中人也
万里江声潮欲泻似当年雷轰万马两眼秋云一身斜日长啸佛狸祠下

一斛珠

踏青

啼莺不断垂杨叫得青撩乱云烘晓色阴晴半正好闲游油壁西陵畔
园亭鬪草闲招伴藕丝斜露黄金蒜踏青鞋子遮人换猛避儿郎错教桃花绊

感兴

美人何处归来独立青山渡离骚欲卖无堪与奇字零星错剪云霞补
楼船尽载斜阳去芦花瑟瑟鸣秋橹丈夫飘泊今如许搔首西风只共离鸿语

踏莎行

次韵答杜茶村杜适行二

雁送霜愁蛩添雨思苔生卧阁浑无事柴桑处士正饥驱白衣惭媿江州刺
句冷吴枫题残永柿杜家又让君行二买山自是故人心何须咄咄频书字

湖上

镜影平湖裙腰芳草一般春树西陵好今年更自觉撩人画船系处垂杨裊
那得身闲空怜鬓老沈郎清瘦谁知道拟将愁绪诉东风东风又怕花枝恼

登章贡台七姑祠下

二水交环一亭孤峙飞鸿数尽斜阳里蛾眉何处问残碑金炉篆冷飘香地
豆架藤荒瓜棚竹倚闲行暂遣羈情耳无端高处转生愁归帆不把乡心寄

端江闻笛

云净天青波平岸绿寒江月上双鸥浴一声嫋嫋是谁家胡牀夜半吹横竹
万里登楼三更剪烛关山梦断初闻曲凭谁反得广陵潮趁他潮去归应速

小重山

游壑庵

苏小堤边东复东啼莺声不住百花中断桥无路倩云通人过处又被碧云封
鸥鹭莫回踪胡牀清兴剧与君同接?颠倒玉鉶空人醉也卧占翠芙蓉

忆昔次卧子

十里珠帘金凤鈎大堤堤上路旧时游枇杷花下不知愁青溪月夜夜照风流
往事但悠悠鸳鸯飞尽处白苹洲兰成萧瑟倚江楼伤情也一曲旧伊州

旅思

悞访西陵油壁车飘零随落絮几年华归来垂柳带霜斜青衫湿何处问琵琶
别恨正无涯无端归梦里又离家五更不睡共梅花残灯影一点映红纱

小孤山

滚滚江声万里长雄风留不住下浔阳蛾眉独立水中央波涛涌冰雪素肌凉
絶壁倚青苍年华小谁拟许彭郎生怜阿姊妬新粧孙家妹结伴采红芳

惜分钗

闺忆

春初到寒犹峭碧窗人向东风笑花千枝柳千丝燕子莺儿相见何时迟迟
人难料情空抱愁来玉镜先知道话长疑梦长啼月照红廊独坐颦眉痴痴

忆别

横塘路西陵渡柳丝遮断凭楼处晓风清早潮平一幅轻帆十里长亭行行
留难住愁无数刘郎自为桃花误炙银笙弄瑶箏三生旧约半晌离情停停

离绪

星初渡月乍吐闷酒斟残留不住语声低泪痕齐几回欲别此际难离依依
行不免情何遣衣带长江天样远百般忧两边愁无聊夜月有恨清秋休休

七娘子

有忆

丝丝小雨桃花病鹦哥说道清明近醉也成慵吟还添闷檀香罗薄春寒剩
倚楼望断飞奴信东风影里文君髻泪湿琴丝枕寒香印归时留作相思证

七夕

年年客里今年远红墙坐见银湾浅两水家遥双星夜短人天总为情难免
蕊珠深处新凉满鳧花懒醉黄金枕雨作啼痕云遮梦眼神仙转被人消遣

昭君怨

疎竹

疎竹谁教绕舍敲乱乡心中夜偏是客中寒不还山一片痴情未了断送愁人昏晓霜重冷无
声可怜生

探春令

次上若红桥春泛

年年芳草似裙腰见兴亡无数倩垂杨留得黄莺住正歌吹扬州路
兰州醉读参军赋向芜城东去看雁齿桥边倚栏人在莫认红楼误

迎春乐

灯夜

东风着意催弦管先送与梅花暖参军岁岁逢春懒怎耐得看灯眼
无赖是玉轮高辗都照向红楼人面一个扬州杜牧早为迷香软

孤馆深沉

赠钱青瑟较书

寻常梳掠双红晕午起心情犹困生怕有人来分付鹦哥口儿稳
摊书小阁闲相并笑把紫微低问闻道也遭嗔何事依旧耽花恁

茅山逢故人

醉题

满目乱山无数一片寒潮来去故业何存故人何在故乡何处
离骚一卷长怀莫向西风空诉才子无时美人无对英雄无路

忆汉月

登楼

最是阑干高处望见斜阳烟树青山围绕似相留又倩江声拦住
也知秋正好只恐被黄花催去醉横老眼对西风曾见兴亡无数

武陵春

江月

月照大江流不断一片好清秋摇落江关是处愁与客且登楼
侧?参军今已老那得更风流玉箫憔悴画桥头莫问旧扬州

应天长

春思

杨花一片飞如雪
鸚鵡睡残花底月
梦还惊心转怯
鼠弄金荷灯穗折
意中愁眉上结
瘦比前春较别
记取绣罗裙褶又宽
双蛱蝶

忆萝月

秋闺听雨

拂罢红珠斗帐
两叶宫眉相向
宝奁频展不成粧
懒照秋来模样
更头孤雁到
拖带过雨声一晌
凄凄戚戚是侬心
冤煞败荷残响

镜中人

梦难成

梦难成声转急
一夜灯花红湿
添得春潮几尺
尽是啼痕滴
处处江山还作客
冷落西泠油壁
一片痴情消不得
谁使秋娘识

别绪

绿杨花乌桕树
日日门前来去
别後浮踪无据
梦绕西陵渡
是处乱山啼杜宇
黄蘗难言心苦
疑煞楚云和楚雨
悔被诗情误

本意

凤衔花鸾舞月
谁使乌菱莹彻
才到晓霞时节
里面藏娇怯
颊晕霜花眉两叶
恰与个侬无别
依只让他他让妾
他却无言说

木兰花令

咏六月玉兰【有序】

槐云垂?爱夏木之初森
榴火舒炎怅春华于已谢
忽看瑶圃茁郑宫梦里之灵姿
爰有琪葩是楚泽赋中之异种
玉杯擎露在此日而偏奇
宝蕊凝霜以非时而独艳
面原无汗拭则愈鲜肌欲生凉
蒸而不热岂云操成幽谷方同王者之香
实则歌叶皇都良应大人之瑞
适逢对酒敢为抽毫赋得木兰花一阕

芰翻风梅送雨
几朵琼华惊带暑
沾宴粉借荀香汗落
九英原是露

夏将徂春向住玉杯擎向瑶台处云母幃雪儿歌不数王家珠几树

山花子

灵山池上听雨用李後主韵

厌听江声客兴残西风催送白云间高卧小窗闲对雨镜休看
锦石池塘秋潋灩蕊珠宫殿夜清寒梦起偶思前岁事似长干

卖花声

秋梦

秋雨夜穿窻玉簟初凉梦儿轻薄不寻常偷趁离人新睡觉先返家乡
来去总荒唐烟水迷茫一声鸚鵡唤归牀空赚闲愁千万种红泪淋浪

罗敷媚

树兰盛开同韜汝花下小饮

疎帘冰簟溪堂静客到羊求闲共沙鸥坐看香兰笑素秋
鸡虫得失何堪问倚檻凝眸碧树烟收一片斜阳隔水楼

春日苦雨

东皇故把春狼藉做尽无聊镇日连朝不让黄鹂上柳条
香泥阻断王孙路莫问吹箫一夜春潮已过红楼第二桥

恋绣衾

美人春睡

花映纱帟眼倦睽欹珊瑚云髻一綰似有浅顰低笑梦儿中情事若何
轻翻略把腰肢袅奈朦胧娇困怎那强觉把雏鬟问问郎来曾见甚麽

醉垂鞭

美人戏马图

扶上翠鬟松风吹处衣香度频取绣裙笼红遮玉一弓金鞭休更打和衫把过花丛莫便系青
骢行云向楚

峯

朝玉阶

秋日

秋老江关未易晴芙蓉花发处縠纹明白鸥无数总身轻都来花影下啄浮萍
暮年萧瑟笑兰成闲义词赋手没心情倚阑惟看月华生三更还弄笛倒银瓶

拨香灰

本意

红珠夜冷流酥卷小胆向空房较懒紫栈重将心字添奈似雪情灰满
手持金箸心频转愿密意篆烟难断只恐心情转眼寒怎得似金炉煖

秋蕊香

丁观察署斋看桂

正是黯然情绪秋满月中仙树故人留我倾芳醕盏内花飞无数
天香暗向筵前度薰衣紵直教别後思欢聚徒望广寒高处

合欢罗胜

史蕉饮邀同书云舟次蛟门木庵昼公诸辈小集西园即席漫赋

雨过郊原沙路净绕城绿水才通良朋有约在灊东衔杯荷叶露却扇柳条风
草就新词刚半醉斜阳未了残红画船箫鼓莫匆匆清歌人似玉遥望月如弓

杏园芳

雨愁

虾蟆更报将明画檐一阵春声玉儿残梦未全醒为花惊
昨夜牡丹初放足东皇怎不心疼下牀悄倚楚山屏几回听

武陵春

题扇面小景

罨画溪头春事好烟雨绿无边
若有人兮或似仙仰卧看青天
□耐乱山都送翠堆满鸭儿船
载向城中换酒钱人笑老渔颠

眼儿媚

赠钱楚梦

垂柳依依又经年离恨记钱钱
斜眸不语低头欲笑幽意谁传
云英未嫁还重见含睇菊花边
檀香袖口郁金裙褶不似从前

林蕙堂全集卷二十三

卷二十四

<集部,别集类,清代,林蕙堂全集

钦定四库全书

林蕙堂全集卷二十四

湖州府知府吴绮撰

艺香词【中调】

临江仙

过循蜚别墅未入示子壽鹤问

曲榭翠通竹迳小庭红照花枝沦涟真似习家池葛疆空解事杜牧怕情痴
谁向西园高会还传南国清姿片云非是为催诗殷勤劳燕子惆怅谢莺儿

赠江夏君

一自语溪同跨凤人间多少崎嶇不关红粉是知音典衣春贯酒烧烛夜调琴
记得黔娄当日却怜司马而今夜香台上两情深手持鸾鹊纸心爱凤凰簪

赠扶风

歌舞筵前曾一笑当年错认红红画眉今让白眉工暮行巫峡雨雌拂楚台风
自爱钗痕济楚偏怜裙褶惺忪几回鹦鹉骂雕笼星嗔人唤小月怕梦疑空

乙卯九月集秋岳先生斋中

隔岁离羣还此夜酒声声杂茶声黄柑三寸大於瓶湖山犹在眼今古自关情
座上高谈同扪蝨灯前?影偏横凄凉时候壮心生住须偕客去醉且胜人醒

武陵

廿四桥边寻夜月洞中忽泛桃花沧洲画壁是儿家玉环新体态锦瑟好年华
惆怅碧云春暮一弦红语琵琶望夫山上掩团纱误看帘影动不觉绣纹差

忆昔

忆昔茂陵犹覆发相逢碧玉亭亭十年飘泊共瑶京彩云徒入梦白月太无情
枕膝空留一语招魂已隔三生可怜来去未分明纸衣悲大妇画扇泣遗婴

又赠江夏君

庠下行歌我共汝几年同采瑶芝玉京犹喜不参差花开携手路酒熟画眉时
漂泊红颜应未损潘郎已着霜髭薄情真笑白头时秦嘉书两卷苏蕙锦千丝

秋雨次辰六

岁岁江山愁宋玉天涯着处秋风黄花时节雨蒙蒙一灯啼蟋蟀四壁打梧桐
竹屋纸窗人语寂声声敲入帘栊酒酣无计问苍翁剑应同我冷琴已向人慵

秋岳招同山隐夜集闻雨

一夜天涯灯影下几人同听秋声玉缸新酿泻银铤黄花如有约红豆不胜情
明日江边还折柳五更离绪纵横鸥波麟阁总平生为君重起舞似我不须醒
题睡起宛然成独笑数声渔笛在沧浪图

世事大都堪洗耳只须枕向清流茅亭竹户小如舟北窗无一事睡足五湖秋
看尽风波心转定梦随山雨初收笛声何处起羣鸥渔郎还笑指斜日乱山头

蝶恋花

咏瓶内红梅

罗浮梦断明璫小一点唇酥吐出春光早和靖不须夸树绕孤山却比桃源好
翠羽啁啾帘押晓瓶里疎枝似向吴侬笑把酒对花花也道莫教容易朱颜老

人日次辰六

春到人间刚半月才过新年又是题诗节麝茧满盘堆画缣探来恰得宜官帖
彩树银幡纖手设钗上风轻颤煞双蝴蝶椒酒弄潮红两颊笑看梅蕊横香雪

春情

昨夜杏烟娇暮雨一带垂杨綠到春申浦翠袖倚栏凝不语啼莺劝得东风住

帘外卖花声欲度画桨双双燕尾分波去载酒前溪人按舞鸳鸯飞上相思树

夜集擲笔精舍

鹿苑浮踪聊且住买酒留宾暂遣羈情绪刻烛飞觞过夜午人间几见兰台聚
晨夕但教同旧雨莫恨蓬飘此事由来古岸幘灯前重起舞银墙月到蕉红处

寒夜和上若韵

许大牀儿难放枕火焰金炉不救空房冷鸦梦未成人梦醒重檐半夜霜华滚
每到离家偏夜永緑绮无情不作思归引欲地孤灯还自炯残花更弄帘前影

香在庵

垂柳深深尘不到十亩荷田香颤红衣笑羽扇葛巾闲打照荷田缺处青山倒
胜侣高阳同坐啸一局文楸鹤步松陰小雨过半亭残日了月明又放西冷棹

丁雁水昆仲过集寓中水阁分赋

客里偏能逢上客一片清光肯放人岑寂桥上飞觞沙上笛此池自合名瑶席
七子重来今又一往代风流何事人难及俯仰乾坤增太息露华应共长鲸吸

後庭宴

同闺人登爱山台

春到庭闲台高径曲新橙嫩破纖纖玉携将彩袖一凭栏南山雪淨青初足
楼开罨画风吹巧笑酒炉才熟杯香琴静小鬪蛾眉緑语细怕莺知肠断凭花续

钗头凤

冬闺

灯花滴炉香熄屏风静掩遥山碧箫谁弄袞长空五更帘幙月和霜重冻冻冻
闲寻覓无消息泪痕冰惹红绵湿愁难送情还种巫云昨夜同骑双凤梦梦梦

唐多令

初秋

凉入葛衣松斜阳叠乱虹帘影外蝉语匆匆乾鹊排桥看又过零落尽藕花红
愁极转成慵黄花怕与逢旧江山犹对吴依巷口乌衣城上柳能几日是西风

旗亭小饮有赠

霜柳挂寒塘阑干晚照黄小旗亭飞过鸳鸯高李旧游都寂寞肠欲断杜韦娘
红袖一双双吴依试浅粧问相逢恐是同乡安顿英雄何处老须醉倒酒罍傍

舟夜晚风

黄雀晚风时兰篙入溜迟恨高城偏自参差红藕花中人不見晴月上水仙祠
红豆两情痴前缘数首诗是人间別樣相思只为无情情转甚难说与布帆知

包二允广文招饮次日简之

冒雨过西窗留宾倒翠缸爱郇公珍饈非常烹出江鳞江味美浑忘却在他乡
就里百花香琼霜印蔗浆似嶰山甜雪堪尝自是玉盘传玉手应不比小厨娘

曾波阁玩月同雁水诸君用稼轩韵

双鹤下缙山青天月未残对澄波共倚朱阑秋气着人罗袂爽清露冷不知寒
作客几时还相逢且尽欢况芙蓉正耐人看起舞花前仍大笑谁似我与君闲

将归感旧

水阁带春城桃花骂小莺二十年重到红亭多少烟云都过眼山只对故人青
往事慢伤情扬州旧月明算吾侪酒恋诗萦今夜不将鸚鵡醉明月里片帆轻

犹记

犹记别离时梳头病起迟向西窗细问归期弹指黄花都过了春又上蜡梅枝
一雁寄相思红笺小字诗料匆忙倒写乌丝满纸春愁谁可数算只有杜鹃知

寒夜

斜月射回廊无凭更漏长笑归来反是他乡昨夜绣衾浑似水应不为五更霜
一事恁凄凉朝来断客肠待相逢说向萧娘蜡烛成灰犹不了原化作泪千行

鬓云松

春雨

烛花残香篆细一阵轻寒送入鸳鸯被滴尽红檐声欲碎点点丝丝学做离人泪
草边浮枝上缀不放青苔松泛东风地何处玉骢垂柳繫重门不为梨花闭

过汲山寓感旧

采莲陂垂柳院旧梦重寻不是闲莺燕华发满头将已倦刘阮风流记得桃花见
酒千觴珠一串剪烛西窗细语红灯颤谢傅不归棋局换只爱青山不改当时面

次上若美人折秋海棠

洛川波巫峡岫种得情根肠断还依旧泪洒西墙苔似绣几点疎红较比春来瘦
粉沾衣香惹袖移向窗纱不怕寒蛩咒霜落玉阶寒未透伴取花枝今夜灯儿後

锦帐春

画眉次宋辕文先生

翠幄鈎新玉匳开早刚照面凤巢苏小乍添檀还渲黛怕新粧易了是愁难扫
向月分图将山传稿长爱煞莹娘才调晓蛾春茧细问垂杨碧绕较人多少

一剪梅

理绣

碧烟窗下绣牀支情也丝丝线也丝丝最难匀染在春时红是花枝白是花枝
沉吟几度费嗟咨莺一双儿燕一双儿吐绒湿却淡胭脂谁待相思谁解相思

春情

红楼十五沈真真昏也含顰晓也含顰无端弹泪坐芳茵乾了罗巾湿了罗巾
最无聊赖是初春花弄尖新草弄尖新个中垂柳更伤神腰也如人眉也如人

系裙腰

春情

春风逗出小花枝柔肠断早春时罗窗睡起红情黯梦後堪思愁似此几分儿

杨柳腰围才半捻裙褶浅瘦难支便教出落能如旧谁爱芳姿春蚕到死只留丝

渔家傲

莺脰湖次子壽

金羽何时飞去早平波台上秋烟渺野水傍天天傍草青不了越山断处吴山好
采菱舟并渔郎棹渔郎却顾吴姬笑翻网得鱼多白小诗句巧浣花溪上人将老

汪园

门对琉璃千万顷莺花十亩连幽径小阁正当花絕顶青无定春山碎叠斜阳影
得酒偶忘前日病凭阑又被风吹醒挑叶谁人来画艇歌声冷鸳鸯惊破湖烟暝

明月逐人来

元夜灯船次燕孙

楼开金粉山堆罗绮灯和月尽遮春水暖香影里人似槐安蚁那辨笙歌起止
最喜银莲倒映兰舫接尾嬉游处穠桃艷李珠烟绣雾未尽东风意正是昇平天气

定风波

六客堂和东坡原韵

紫菊含霜对郡堂縣披黄雀蟹输芒胜客重来秋色里前事忍教踪迹付苍凉
今古湖山三度醉还是六人吟笑白苹乡便较竹溪谁得似何取寻常歌舞在金张

破阵子

放歌

少小曾工击剑从前爱读离骚五色文章修凤阁十载郎官困马曹而今悞宝刀
衣上未弹尘蹟镜中赢得霜毛事业漫夸能渡虎意气犹能拟钓鳌醉来时自豪

寄友次稼轩赠同父韵

直向湖山放诞长为鱼鸟经营上客座头横槃舞小妇灯边击缶声颠狂阮步兵
世事无凭莫叹年华欲去堪惊怀旧白门徒作赋薄幸青楼最得名相逢太瘦生

醉春风

春情

春到谁宁耐羞结泥金带香篝倚处独含颦
暧暧满院苔圆半檐榆小有愁难卖
密约劳担待鸚鵡多无赖隔帘小玉悄声传
咳咳咳花影频摇月纹如动那人帘外

行香子

自题小像

乌帽华颠酒眼诗肩这形容不称貂蝉何须计较且自随缘去登弁岭过霅水泛苕川
平生放宕都无系恋只难忘红袖风前春来结伴谁与流连且同侠少寻醉叟学顽仙

苕中新岁

水上山前柳底梅边啓衙斋只似荒园问君行部管领谁偏有一湖月千岭雪万家烟
客堂人散胡牀独自看春风又入新年都来几夕甚事堪传只连宵咏前日醉昨朝眠

西禅寺分韵

鹤市南头鹫岭清幽有真观兰若重修初春乘兴蜡屐同游是晋陶令唐贺监释汤休
高楼曲檻偏宜结夏问闲云可肯相留支郎如许来伴羊求办棋一局书几卷茗千瓯

又题读易图

西府中枢剖竹分符春梦後一事都无传神阿堵似者谁欤是少狂客中傲吏老潜夫
一曲红么三生翠袖天知道诗酒吾徒晚年学易懺悔消除有遯之六渐之二履之初

凤凰阁

春晴

听朝来窗下几声灵鹊晓霞影透真珠幕最喜梅花台榭?生红萼把燕子芹泥乾却
佳人呵手镜里尽情梳掠还教安顿千秋索思昨日雨和风何等轻薄怎忍将春闲着

青玉案

紫云洞次辰六韵

遥看鸟道浑无路但一涧沿花去涧尽忽逢云宿处藤萝日月莓苔今古撑得娲天住
陰陰石磴鸣仙鼠百状虬龙向人舞足下分明闻客语沾衣空翠蒙蒙烟雾忽作山中雨

两同心

新燕次宗梅岑

舞煞东风一春无尽恨芹泥未稳云廊见柳絮才经露井怎不记王谢堂前夕阳红冷
小院窗纱綠静翻?自引喜双双剪股花分忆两两钗梁玉并更谁知汉殿留仙那人孤影

又和梅岑鸳鸯原韵

襞翠裁朱梳襟弄羽才经过谢客池塘又垂足湘娥激浦尽教他红藕香中一双飞舞
别有绣牀妖女挑残金缕描难就颈上纏绵忘不了梦边娇妩刚刺到綠叶田田停针无语

天仙子

吊古梅为雪所折次楚畹

昨夜红亭三尺雪斜压老梅苔翠裂玉鳞千点卧东风相思切情难歇古香夜半生寒铁
把酒花前愁不彻一笛临风徒怨别何郎阁上祝花神春未絕花重接罗浮梦醒黄昏月

殢人娇

无题

花压红檐缥缈梨云千缕睡不尽画楼春雨翠鬟安妥怕鹦哥传语谁解道情在暖香深处
巫峡朝行洛波晓渡算难得柔怀如许桃慵柳困细把眉峰数人待起又被眼波留住

月上海棠

春夜闺思

啼鸦归到垂杨树弄晴霞楼角凉蟾吐青粉墙东映秋千乱花红处蛾眉悄闲倚雕阑不语
香浮鹤鼎留残炷小屏山照出萧郎路一片青青是何人玉骢留住向孀娥待把闲情深诉

千秋岁

春情次少游韵

春风帘外不放春愁退?欲断肠先碎金钗留宝钿锦字萦罗带人去也鸳鸯六六空成对
梦向西楼会醒剩衾花盖山枕畔言犹在丁香枝自结松柏情难改君不见南山帝女能填海

金人捧露盘

怀旧

忆当年全盛日在江南有英豪鹤盖鸾骖红楼十二鸳鸯结队舞春衫欢游处铜沟金埒燕姁
莺酣到今朝思前事花黯黯柳毵毵胭脂蹙芳草生惭鸡鸣人散六朝金粉付云岚东风憔悴
兰成老痛醉双柑

蓦山溪

春日登道场山

南山耸翠官阁长相望乘兴选春云订羊求千峰直上盘旋石磴积雪尚高寒频着屐还拖杖
双眼随天放磊砢伏虎苔草留孤嶂瑶席记高踪想当年苏髯清旷临池一啸竹树共阴森梅
蕊绽松风响归路银蟾漾

柳腰轻

嘉树堂席上赠刘姬

梅红帘箔霜风软开樽鹤摇钗燕甚时曾遇此宵同宴第一镜湖春选大垂手绣袜莲移小回
头玉梁花颤况有清歌哨遍向欢场翠箫金板娇莺低语长鲸轻吸潮颊芙蓉三变笑分司刚
得眸回问苏州可曾肠断

洞仙歌

集寄畅园听小溪度曲

雨余双屐过画楼花畔要与梅花诉离怨煮山泉索取银瓮葡萄将傀儡且付温柔排遣古今
堪恨处红粉飘零都似飞英落帘幔只对酒当歌绛烛樽前长消受凤弦檀串又休道伤心是
东风看燕颌英雄鬓丝曾染

愁春未醒

春夜闻邻家度曲次文友赠青儿韵

梨云犹冻鹤梦难成是东风无赖隔墙吹送六么声管急弦繁子夜情教蜡炬生仆原多恨奈何频唤不醉如醒莫问娇娆料他扇底自是盈盈想渡江当年桃叶嗔比莺轻此际凄凉谢家月色满空庭堪怜杜牧青楼何处薄幸留名

鹊踏花翻

赠江夏君用文友语内韵

嫁与黔娄怜他道韞红窗茶共抽书赌便教入洛当时适越而今不曾分却鸾钗股闲来弹尽马卿琴愁中爱煞刘郎舞东楚浪说符分铜虎遮道钿车人似堵共说东方千骑此间携手不数微之妇凭卿莫赋白头吟彩毫拟把青蛾补

离绪

剩雪妨花零烟着草春寒尚把游心怯新来少喜多嗔憔悴荀香天涯是处多离别阁边应已误梅花江头莫更歌桃叶打叠取罗衣宽褶无端似打相思结分得两处凄凉中间一个凑合成悲咽平生不肯负蛾眉请君试看西陵月

苏幙遮

次上若韵

绣帘闲金锁澁一片青苔只许离人立何处紫骝归未得数尽东风三月将三日没商量无信息恨煞双蛾不放春愁出楼下落花红更急鸚鵡欺人错报门前客

又

小桃慵垂柳细检点斜阳正在销际比翼在天花并蒂谎现天台悞中刘郎计日空长春忒易小玉无愁不解将人替裙褶无多还更系锦带松时认得相思意

百媚娘

本意

十里春风楼阁一様晓云梳掠为甚相逢难放却兜的心儿嵌着八斗才华空付洛笑煞陈王错多少柳穠花弱只恨云犹雨阁尽意风流无做作真色果然难学风雪漫山梅破萼何处容轻薄

连理枝

离情

恨煞兰舟荡轻许罗衫放胆怯空房愁添满镜是何离况看牀儿犹是向时铺怎今宵难上
犹记临行样难把游踪望落叶轻狂残花冷淡总成抛漾只堦前蟋蟀忒多情到更深相傍

同丁韬汝饮花下忆令兄雁水先生不至

客里西风早檻外烟波绕好句频传美人何处碧云秋杳听花间屐齿破莓苔是谢池春早
莫把桐陰扫共取金蕉香朗月华灯南皮人散几时重到望东来飞盖过红桥待芙蓉开了

风入松

丁韬汝雨中过访曾波阁

寥阳仙院泻红泉偶住画桥偏冲泥忽有元珍到挥松麈溜折波圆小子凡应题凤先生高比
栖禅 遶池芳树似斜川秋色老湘烟相留且共奇文赏怕归骢锦湿连钱旧雨何如今雨余年
幸值忘年

林蕙堂全集卷二十四

卷二十五

钦定四库全书

林蕙堂全集卷二十五

湖州府知府吴绮撰

艺香词【长调】

满江红

和孝威韵

春雨桃花见前夜苕溪初涨喜良友东来双桨布帆无恙白雪诗歌行笈里青霞笑语吹台上
更举杯邀月有江鲈樽堪饷樊川梦情难漾旗亭句人空唱看游蜂扰扰蜜为谁酿燕市漫弹
高士筑邓林本是仙人杖问何年乞得监湖归臣无状

赠鹤问用刘後邨韵

我友如君到此日面无寒色空几载燕台奏赋大梁为客定远侯宁因燕颌景纯贵岂凭龙脉
向西亭握手且欢然歌金石行乐地螺痕碧对酒处蟾光白把奇书相赏子瞻鲁直用世正须
长着眼买山未便求容膝美文园新有鸛鷖裘非徒壁

再次韵赠季默

海内论交二十载依然壮色信此日如髯絕少可称狂客撒手黄金身似胆关情翠黛愁无脉
把风涛历尽总平常心如石少年場衣拖碧豪士坐樽浮白但论兵慷慨虬须都直不为听莺
长洗耳岂须骑鹤方横膝待明年棹雪访君来开萝壁

再次韵赠子壽

聚首苕溪看明月照君顔色最喜是徽之非主龐公非客草檄常怜胥乞腕论诗却类医探脉
共时时赌酒在花前吞千石赋思元豪镂碧牀上下眸青白问与其钢绕何如鈎直遇寡莫看
童仆面金多自屈妻儿膝且从容携手仲宣楼书题壁

再次韵赠丁翁

汝叟何来年八十顔如童色又几载秦淮不见尚来为客楼护鲭分元狩味何戡曲认龟兹脉
记当时桃叶小居停分花石 瞳子里看成碧颠毛上全非白是诗酒都官燕莺司直人化云烟
齐过眼儿争花药才依膝叹虞山老句尚笼纱空留壁

和茶村来韵

秋老茗川故人来雨窗横膝念往日欢塲胜事而今非昔阮叟尚能矜旷達卢郎未便称荣适
但锦囊佳句字频探金壶漆 诗酒计谁能得山水约应无失想心期有素亮予非饰剡雪且须
留棹住杜陵不碍将丝乞看亭臯落木乱离惊真堪惜

次韵赠雪舟时茗村过茗

好友经过客同在萧斋促膝更羨是殷勤投赠慰予从昔名士谁能过卫玠诗人偏爱随高适
较当年杜父更何如晴如漆 倾盖处君相得棹舟来吾未失信风流蕴藉无烦修饰狂草直须
裙练写新词不用巾绡乞想五陵裘马正当时时应惜

岳坟次武穆原韵

南渡杨刘到此日功名销歇只今有西陵华表标题忠烈三字冤沉犴室土两宫泪洒龙城月
笑玉环脑後是何人情非切 一湖水千峯雪身纵死名难灭把椒浆浇奠唾壶堪缺道上金牌
人有口阶前铁像心无血只荒祠犹自对遗宫神依阙

次楚畹韵赠元玉

李下无蹊问当代谁为逋峭最爱是文章高处尽君嘻笑世事漫须真实相家传自擅清平调
便扣门报有俗人来唯长啸 林下酌溪边钓约羊求偕德耀把顽仙骇叟任他猜料公瑾当筵
曾顾误小红倚笛偏能妙看浮云富贵只寻常头宁掉

送家伯成赴闽臬任

棠?成陰十余载种花潘县羨募地擢司邦纪仰承天眷八座慈明时所少三公卓茂今重见信
丈夫遭际不寻常风云便 文与武才真贍功与业时当建但江南父老挽车留恋青海渐平应
有日苍生望活须频念待幔亭峰下荔枝香开尊劝

金山

一点青青是娲后补残余石向此处洪流独砥崑然千尺纵步欲凌鹰隼背蟠根直下蛟龙宅
问当年留带旧风流空陈迹 山两岸分南北水一派流今昔把天风海月尽教收拾孤磬声摇
残照紫乱帆影挂秋云碧上危楼极目送归鸿吹横笛

鍾偉駉邀泛画溪賦贈

丁鶴重游恰正遇水曹詩客更相携斜陽溪上鷺鷥分席十里輕烟桃葉舫一橋涼雨梅花笛
只錢郎宅畔數江峯依然碧庾公扇謝公屐追勝賞俱陳迹念金門待漏不堪重憶春樹暮云
還惜別高山流水誰相識倘長安親舊問狂夫添吟癖

送曹秋岳司農赴西川軍府

四海傳烽問時事何堪太息公此去偏能慷慨氣凌邊隘吾急而求應恨晚天方待治何憂敵
想鳴鞭萬里過蚕丛旌旗易景略坐常扞蝨安石墅曾同奕但河梁挽袂黯然送客八陣河山
斜日影兩川旗鼓清秋色愿詩篇頻與捷書來長相憶

又

江左夷吾直应在槐堂坐理誰遣作北門鎖钥杜鵑聲里此日山公寧不悞當年謝傅原須起
料狂瀾砥柱已無人惟公倚時與勢今如此去與住應難已見當前曲突有薪莫徙兒女何关
軍國事英雄要雪書生耻得平淮重拟旧韓碑君行矣

偕余澹心過飲陳集生齋中喜周子俶秦留仙顧梁汾繼集

多少朱門都不見開樽延客陳孺子貧居委巷偏為設食姿護已無鯖可飽季鷹只有鮓堪憶
便盤飧直足勝華筵歡相得橙已熟香同擘梅漸放花還摘更南皮飛蓋不期而集醉我傾將
瓶几个泥誰典却釵雙只想明朝佳事好喧傳今何夕

次其年韻

四海論交問當代誰為齧齒喜今日倡予和汝入林伊始老子直須牀上卧先生且向山中起
盡人間下士笑如雷蒼蠅耳嗟肉食原堪鄙便蓬華寧不喜但酒酣击缶壯心難已坐井笑他
蛙自大讀書乾得螢將死待縱橫羽獵向長楊从吾子

芭蕉

秋色淒其動愁處一庭蕉葉猛可里攪和風雨無端悲切半夜不堪初夢覺几時却似將離別
况天涯又是雁聲來情難說看不到身邊節放不盡心中摺只閑窗綠影交加重疊智永堦前
留作紙王維画里添些雪听當年修竹讀彈文真奇絕

社集臧介子園

秋色佳哉正時在楓前菊後更喜遇楊亭勝侶移樽相就月下橫牀依碧樹花間記曲添紅豆

问今宵乐事定谁同西园又真不夜浑如昼吹玉笛传金斗任酒和清露共沾罗袖鱼鸟岂知
家国事盘觞且老英雄手把浮云指点向诸君吾何有

集开美堂再用前韵

杯酒留连人来向鹤归之後还共到黄花开处纷纷相就世上文章谁似锦人间眼孔才如豆
叹当年磨蝎有眉山吾今又且莫论宵和昼也莫看参和斗只旗亭高李醉牵衫袖北海仍逢
盈坐客东山且罢围棋手问平生得意是何时曰乌有

三叠前韵酬余澹心

岸帻相逢正浯叟弃官之後最喜是平生落落荷天成就篱采三秋陶令菊田荒一顷杨家豆
算古今得失总寻常非吾又时易过昏还昼事难料箕共斗看筵前鲍老郎当双袖抹月披风
高士腕翻云覆雨诸公手问新词谁付雪儿歌吾还有

醉吟

海上闲云缘底事误来京洛向金门索米玉阶持橐髀肉晚销燕市马乡心秋冷扬州鹤问英
雄广武近何如浑闲却鷄一肋蜗双角空兢逐终消索尽浮沉诗酒任天安着海上文章苏玉
局人间游戏东方朔看儿曹得意不寻常非吾乐

疎影

虎丘看梅

芳原雨歇白公堤下水碧浮绦纈燕尾苹香无数莺花依然六朝蜂蝶孤山不入繁华梦爱小
圃尚堆晴雪只美人何处霜空翠羽可怜时节曲径短篱幽胜昔年曾採取为他愁絶今日重
寻宫闕垂垂几树苔生横铁也应笑我多离别那更问相思枝叶且暂将酒琰诗瓢消得玉鳞
春月

水调歌头

听丁翁弹南曲旧事

天宝当全盛犹记旧宜春繁华最称南国花柳鬪尖新歌舞六朝门巷金粉千家烟雨楚润好
精神我始欲愁矣何事近黄昏秋风起人世改换朱门後庭一曲不应恰向我时闻重见白头
遗老细数新亭旧事此际黯消魂仆本恨人耳掩泪对青樽

与诗堂偶赋

问此传舍耳宁用叠鸠巢一时尚须洒扫何况寄鷓鴣装砌疎栏曲檻点缀高梧修竹结夏小
团瓢恰似槐安国龟岭赋迢嶢诗成也酒熟矣共逍遥傥来富贵凭教造物付儿曹且顾吾生
行乐任取後人笑拙难辨鹿和蕉起舞向明月一笛碧云高

别其年次澹心韵

如尔才华好天意岂徒然如何湖海漂泊无处问苍天十载武昌寒月一夜文园秋雨灯下舞
龙泉言别河梁上泪落酒尊前贫孺子寒范叔漫求怜丈夫豪气自应举步有云烟谁似长卿
词赋领取邺侯宰相好向古今传君去莫复问吾道定逢年

题汪蛟门舍人少壮三好图

世事偶然耳郁郁亦奚为只须如此行乐美酒与蛾眉更有奇书千卷自谱新词一曲宁问古
人谁吾愿聊尔尔君且待迟迟槐堂上薇省里暇应稀平生嗜好安得终日不相违事业已输
公等诗酒应还我辈此论未全非请并抛绡帙醉拥雪儿归

满庭芳

六客堂

绮阁东偏红亭中峙重经六客停骖庭前松柏曾听主宾谈南极光芒不见重逢处緑鬢氍毹
今朝也茗溪月满此会已成三坐中词客在张华冀北庾信江南把玉壶再酌锦字还探独有
枯槎入画星纒里醉倒双柑东风起檐花落井红影笑春酣

题卓火传传经堂

跨虎英风雕龙华胄西河代有雄才杨乌寄字得自蕊渊来多少经纶心事向寒塘暂葺茅斋
梅花里牙籤万轴长啸独登台舒怀今古际谁为管乐谁是邹枚只孔家残壁不受秦灰但得
一编牛角朗吟处奔走风雷功名事青箱满贮玉树况盈阶

壽姚东只

马去金台鸿飞玉塞昔曾燕市经过青楼醉卧满眼酒人多忽地星分湖海残梦醒蚁散槐柯
归来後相逢渐老华发对山河婆娑当此际漫言学易且自高歌况杯浮药玉箏倚裙罗笑问
神仙富贵吾侪事肯自蹉跎君知否当年陶侃壁有化龙梭

凤凰台上忆吹箫

和漱玉词

镜翠封奁炉香减篆晚山青
簌眉头记灯边题扇花底藏钩
寂寞萧关人远千万事总合长休
无聊是早春天气心绪如秋
羞羞玉台孤影便梦入巫阳好
更难留想紫箫吹共袖倚红楼当
日画阑杨柳曾亲见两地情眸而
今也闲亭萱草不解销愁

烛影摇红

墨妙亭怀古

曲径斜通逍遥堂外多春树
小亭深翠挂檐花旧是藏书处
莘老昔年来往向公余搜奇好古
龟趺螭壁燕瘦环肥大苏曾许
岁月迁流溪藤也有屯阳数
蛟龙奔走赴秦灰那论鱼和蠹到
此不堪延伫笑眉山空题好句
美人名士奇字雄文彼苍应妒

汉宫春

赠楚畹生日楚畹後余三日也

京洛论交媿林宗邂逅季伟英豪
便喜长留一榻伴梦三刀水嬉胜事
又追随共泛清苕屈指处
蓬非已识多君十载为遥
七日初逢来复恰门悬蓬矢
後我三朝丈夫有意封侯时想云霄
唾壶击碎嚼梅花细送春醪且
验取鬓丝未老功名宁羡儿曹

瑶台第一层

登碧岩絶顶次燕孙

放眼吴峰越峤爱苍岩似赤城
栢凝峰雪茶香溪雨仙磴云平
早春游屐勇谢客来共蹋峻嶒
最高处有浴龙双沼放鹤孤亭
凭陵紫崖东畔飞泉百尺界空青
蕊珠天濶琉璃波静两洞初晴
振衣聊一啸问玉鸾甚地蓬瀛
举瑶觥看霞生古木月上寒藤

醉蓬莱

坐韵海楼为顔鲁公旧址

问南朝多少朱户雕梁乱蓬残
甃此阁巍然记平原遗迹惜赏高云
留欢晴月好句莓苔碧销夜图书试
春帘幙坐人百尺晨鼓初阑葛巾无
事纵览湖山盱衡今昔鲁国当年未
骂淮西贼韵海新繙镜源初就慷慨
尚书笔大节千秋危楼几代倚阑长
息

黄鹂遶碧树

春晴

丽景逢初霁烟收楼阁雪销庭院砌柳宫梅正苏红萼破淡黄丝软凤城挑菜早人与东风相见看又是几个迷香嫩蝶窥帘轻燕渐觉罗窗手煖试裁缝袖温金钏记前事有笼灯密约寻花娇啭惆怅欢情似梦空叹惜韶华变教人闷倚银篝暗低纨扇

月下笛

游圆证归夜饮青塘桥看月次燕孙

谢氏诸昆梁园胜侣莺时俱集花舆锦辔蹋遍春山晴碧问湖边烟雨楼台乱峯犹认南朝迹正寻芳未倦绿杨桥畔宝蟾初窥鹊炉拥道看清光如水水光还射坐列璚觥共把瑶觥欢吸笑庾公楼上横牀爱子野风前弄笛待归来还怕杏园客散花叹息

八节长欢

戊申元旦

荔粉桃符钱将残腊催送新年晴霞千岭树藻日五湖烟苹洲何在登台远眺一城画鼓红弦唤起汀花陌柳尽要争先寻春犹记樊川当时有水嬉胜事堪传雪馆更题笺行乐处黄云曾满秋田喜今日恰又逢霁景暄妍也应是太平有象溪山莫负樽前

金菊对芙蓉

初冬集爱山台听雨和澹心尖韵

雁背云低鹭肩风冷新寒初压晶帘正花残短径叶打空檐登高已在重阳後况潇潇暮雨愁添凭栏处峯迷螺影月暗犀尖客有鲁直文潜向芭蕉声里捻断吟髭念小山人散桂老淮南水嬉旧事浑难问笑韩郎句剩香奁今宵醉把彩笺同擘金碗频拈

新雁过粧楼

西湖见倚楼者

水蘸鹅黄苏堤畔垂杨尽染波光画帘青粉刚靠宋玉东墙小阁亭亭人独立碧阑红袖倚斜阳无言处低眸掠髻似有思量知他因何独自向杏花影里尽意凄凉不疑客在兰叶艇上端详晴湖巧开一镜便照出青蛾双黛长寻春去怕绿阴成幄难比伊行

高阳台

爱山台看月【宋郡丞汪泰亨因东坡诗句建在吴兴署中】

坡老归欤汪丞去矣湖山我又重来明月今霄多情飞上层台碧云万里无些翳把乱峯青送衙斋看千家积水空明人在崔巍画栏与客徘徊爱竹阴树色影落莓苔苕藻交横鱼龙奋甲鼙鼓水晶宫殿三更後笑庾郎逸兴难裁问黄楼谁是闲人且醉金罍

丁雁水招同观庄纬云目天卫公韬汝及仲儿集八境台分韵

霜柚垂金烟葭泛碧人间又满清秋怀古登高一时身在他州逋臣望阙肠应断叹眉山老泪难收向西风搔首而今白髮盈头何当飞盖偕游有建安才子正始英流欲采芙蓉徒怜渺渺芳洲江关岭海皆陈迹算还输沙际双鸥且同教倚醉凭栏长啸登楼

五福降中天

丁未除夕示内

牛衣夜半啼寒雪犹记霸陵憔悴司马羆裘少君鹿轂岂意行歌馘佩年华欲换笑五十明朝买臣非贵夫壻东方莫美此际且相慰緑水青山作吏一家图画里欢成队蜡凤宵嬉青箱付与天意凭教儿辈杯从幼起暖向春归况当良会放却眉稍陶然须共醉

万年欢

次韵壽弘载

坐啸湖山笑痴顽似我老宁知至一鹤南飞前後屡闻横吹论序君年称弟美笔吐凌云壮气每掀髯捧手清谈萧然竟尔长醉霜空雁唳抱奇文东方客难班固宾戏吊古衡今慷慨槐安天地试问临邛涤器会时见题桥车骑且收拾明月虹霓钓鳌海上为饵

东风第一枝

栖贤看梅次龚芝麓先生

螺碧遥峰鹅黄新柳大堤烟草初紫骝斜袅金鞭十里笑花风浅琼清粉淡抵多少梦云憨软只容他双鹤栖迟不许美人莺燕凝睇处雪迷诗眼坐久地香吹酒面漫夸点额含章那数緑林隋苑金樽檀板逗春心串摇珠线问此时陇上参差可似何郎重见

春夏两相期

将往西溪看梅夜闻风雨

问西陵有谁来往南枝约略初放懊恨风姨抛下一天惆怅镂金不作护花铃剪绣难成留春

障整整斜斜声声点点冷来心上 衔泥燕子谁傍料玉奴今夜榻闲衾浪两叶眉痕相向碧愁红快罗浮梦为晓云惊苧萝人被东风葬翠幙灯昏紫陌杯寒个侬同况

换巢鸾凤

有遗予诗者不敢答且不忍答用史邦卿韵

天妒人娇正鸾羞覓渡鹊嬾填桥忽来灯下句如听雨中箫遥知堪瘦倚阑腰病因影起香随梦销孤眠起想只有玉楼花照清悄鸿缥缈门掩苧萝空把灵犀抱?尽寒枝压残金线幽怨寄怀香草频展乌丝断离肠奈何欲唤青天老而今情绪凭谁问取分晓

念奴娇

送孙无言归黄山次曹顾庵

苏门鸾啸尽东华尘坳离魂凄絶手把琼箫明月下一笛又吹横铁练水鱼肥黄山鹤瘦溪树饶莺舌北窗高卧长卿已倦游辙试看眼底纷纭几年人事花樣都全别何似钓台烟水上不问蜗蝇喧热陇首长鑱牀头浊酒谁巧谁为拙送君归矣柳花正似飞雪

社集吴山望西子湖

西子娇憨把两峰山色偷将眉妩做雨弄晴犹未了又被白苏收取桂子多情荷香无赖分付间鸥鹭兰亭今日怆然俯仰千古况是如云胜友超然台上立马图中处慷慨乾坤无限事肠断画船歌舞葛岭烟霞段桥花柳依旧西陵树笑倾綠醕钱郎今在何许

孝威以予修岷山祠赋词为赠即次来韵

江湖鱼鸟笑年来浪寄余不溪澳白鹿行春烟水上难继亭臯华躅岷首寻碑桐乡拜主羞见寒蓬綠采苹秋荐偶然为禁樵牧却喜邓尉来游登高怀古正值朱櫻熟王谢顏苏山水在一放横天遥瞩风雨前川云烟往代冷入西窗烛洞箫声倚为君举酒相属

夜饮悠然阁分得子字同子壽弘载辰六

官斋良夜论心处旧雨依然诸子阁外寒新窗影上篱菊尚余霜紫浅酌消愁狂歌遣兴墨洒云蓝纸乌乌击缶醉中双热吾耳试看满目湖山秋光初过也越添深翠闲倚画屏搔短发说甚功名文史富贵神仙邺侯俱有分何堪尔尔仰天长啸古今多是如此

西湖坐雨和韵

臯亭云靄似愁痴一段忽添娇妩镜里明眸浑似睡又是烟迷南浦柳剩慵腰桃含泪靨红困
蜻蜓舞金乌不见无端却恨夸父人在庾亮楼头闲吟倚檻空把寒鸥数密约西陵应误了拟
待来朝晴补影断香车泥封蜡屐其奈而今苦两山钟打方知日影分午

初晴湖上即事

晓霞红彻倩羲和持取彤轮初沐林外鸣鸠催妇急不顾鸚哥睡熟暖入棠梨轻松柳絮渐看
花魂续倚阑一睇南屏青翠遥矗别有宝马鞭柔钿车路软芳草裙腰蹙粉色衣香春不管尽
占明湖几曲掷眼兜鞋凭肩稳髻处处穿花竹天应不负韶光一百零六

四十九自壽次澹心

次公狂甚只终朝独坐爱山台上鱼鸟江湖聊自得怕学市儿官樣衙散栽花公余放鹤忘却
称州将开楼一啸此身如在图障遥想张赵当年埋轮破柱意气真何壮欲效前人犹未可空
忆牛衣相向塞马功名海鸥时世宁必分欣怅月明高兴笑予何遽非亮

次閔文长歌韵

划然长啸看千秋史册不堪零碎世事茫茫无一据只爱挂冠梅尉十载冰曹一麾水国惟与
山神醉虚名何益莫夸黄霸龚遂多少江干车马故人厚意访我枯鱼肆欲画荔枝难作赠说
甚金螯玉脍拟作经营羞称磊落笑杀刘家鬼黄紬被暖衙鼓漫惊鼾睡

过靖南侯旧垒用东坡韵

笑天如戏把世界翻覆竟成何物一霎楼台花草过谁管神州半壁处仲东来佛狸南下有耻
谁能雪中流支柱独称公覆奇杰霸图应是天王将星宵坠募地金鑕发许大乾坤都断送只
有忠魂难灭怒浪翻银危矶横碧犹似冲冠发无情烟水渺然惟浸凉月

偕胡循蜚徐野君集陆荅思高仲斋头分得鸭字

碧毡飘雪正窗前梅蕊又开新腊人有机云同载酒倾倒小花蛮榼醉眼横天雄心问世笑把
刘伶锺乌乌耳热筑声夜半相答更有秋浦文豪南州高士拈韵朱丝鞞一曲旗亭成絕调谁
许浪称荀鸭身外浮名眼中恠事总付风前蜡月明横笛为予还扫陈榻

桂枝香

四十九自壽次澹心

青眸如旧把世路羊肠等闲参透可笑小儿造物种禾生豆知非不觉年华骤只消磨沈郎腰

瘦金门方朔玉阶颜驷几番生受 向此地一麾还又叹湖海凄凉雨云翻覆震泽西风吹满浮丘双袖雪馆秋灯堪琢句是衔觴去年时候新醅出瓮好山当坐且娱清昼

饮李书云黄门斋中观剧

重归丁鹤正雪霁蓬壶腊舒梅萼人向西园对酒酒酣歌作山香初试花奴舞更催齐念奴弦索玉箫吹凤瑶箏排雁串珠摇落 美顾曲周郎如昨料记拍红红应自非错响彻凉州一夜飞云停阁英雄儿女俱陈迹算人生惟须行乐此时耳热乌乌击缶古今谁若

水龙吟

送张菊人

绕城多少楼台一春闷锁桃花雨灵和新柳风流重见故人张绪剪烛窗深抱琴台敞同倾芳醕笑华阳白鹤陡催离恨又分手蒲帆渚 回忆青溪旧处两狂生酒歌诗舞无端小草心旌马上鬢丝吴楚梁苑闻鷄王家赋燕尽成飞絮把相思付与欧余山色送君归去

吴兴放歌

六朝一片湖光苏顔柳谢皆先辈槐安出守南柯分郡淳于堪睡手板车前飞尘马首奈为形累问乌程酒美徒怜独醒且莫道翁真醉 咄咄长书恠事对青樽烛堆红泪狂歌击缶酣余耳热笑他清悴彩笔题诗青鞵吊古未除豪气约洪厓俯看齐烟九点借骑鹏背

绮罗香

西湖清明

风报桐花雨吹榆片春事三分啼鳩人在湖头正值禁烟初爇看十里入眼风光是一岁销魂时节又谁禁南北峰头纸钱却化孤山蝶 楼边红袖徙倚听卖饧人过玉笙吹彻笑指西陵松柏何年堪结莫等待泼火霏微却做作打球周折且分付箫鼓楼船载多情夜月

喜迁莺

次原韵送闾文归里

池塘句得正谢客相思月梁顔色剡水拏舟苕溪载酒才喜痴人相惜一曲骊歌夜唱又作雪鸿残迹回首处是金门索米凤池聯翼 叹息当日里楚尾吴头卯酉难相值马上谈兵灯前草制十载只如朝夕冷落延津双剑心事不堪重忆君归也且为余料理故园松石

永遇乐

和澹心

韵海书成亭臯咏罢有人于此公事湖中胡牀月下兼署莺花使白头有分青编无据中夜壮心频起赖相看风尘慰藉尚有鸿妻霸子鄣山乔木隋堤芳草何处燕巢鸠垒半百将过五十徒读莫辨臧三耳谢公功业杜郎词赋付与春婆梦里念衡山懒残煨芋急流将已

春从天上来

重登超然台

雨过知春把万壑千岩尽满晴云旧游重到携取芳樽班荆共坐嶙峋爱朝来风日较往昔益觉清芬但开眸有春山如髻春水如鳞依然去年醉处听碧管红弦已换闲人雪牕梅须金舒柳带江湖着意翻新问风流苏白今如在画里乾坤酒微醺振衣一啸烟霭纷纷

花园春

无题

艷极生愁娇深成歉恨人恨事长有云英未嫁道韞无聊岂料一时都近柔肠点点怎奈取多般禁受把几许剑啸书慵平分花憔香瘦况复才华辐辏更笈裁涛樣字临漪手封销托雁制锦凭鱼总是痛花伤柳三生石老何处可种莲成藕只应也影里人儿梦中相见巫岫

飞雪满羣山

爱山台对雪次韵

四水揉蓝千峰罨画烂银昨夜光铺絮飞雕榭花沾绮袖庾郎树未全枯倚阑人叫絶莫辜负诗瓢酒壶登高骋望骑驴寂寞谁写灞桥图遥见有同云横雉堞是晓林青断天映晴湖寒生肌粟雄心激发摩娑鹊尾薰炉醉来还泼墨频呵冻中山褐徒水晶宫近高寒玉宇何复殊

望湘人

赠杜茶邨次邓孝威韵

忆曹刘并驾吴楚连横狎盟曾推时语邓尉凄凉杜陵飘泊中道离羣谁与十载分襟一朝连袂依然尔汝念终袍范叔生平揽赠翻成凝伫此地顔苏旧处有文章宾客留欢林淑肯胜迹而今车笠顿忘缟紵好将烟水收成佳句题向城南棋墅且莫令千古湖山轻笑词人归去

五彩结同心

贺鹤问次韵

髯苏较懒小杜怜痴盈盈入画枯槎谁访山陰雪如卿者才调浊世称佳水嬉湖畔寻芳去清狂甚碧缕红牙谁知道琼霜夜杵裁成并蒂兰葩 浅笑九枝灯下看神仙伴侣扇掩鸾纱赌茗书多典裘杯热管领一代风华遥怜丹就玄霜日宁数勾漏云砂且受用青山罨画洞中万树桃花

五日集张带三紫盖山房

葵英铺锦蒲节浮琼光陰又到天中槐砌初过雨占农事今岁料得年丰但看时事惟宜醉而今也醒问谁容堪怜有人来河朔一时尽是英雄 况逢赤松俦侣自婆娑起舞老子犹龙人号三珠地称羣玉挥铦气吐青虹离骚不必将天问天原是依旧鸿蒙且自向芙蕖多处陶然共吸荷筒

过惠山蒋氏酒楼和其年感旧韵

几年湖海飘零都惯犹然百尺高眠傳粉何年客曾同听中夜急雨鸣泉三生石上精灵在空遗恨雪雁风蝉肠断处櫻桃旧梦一时重记难全 堪怜多愁多恨叹樊川杜牧曾断哀弦回首青楼玉箫月冷血书午夜残?伤心忽听离鸾曲盼不到春草芊绵憔悴煞一窗灯暗三更酒冻银船

风流子

西湖

西湖儿女地长堤畔销尽古今魂看两岭送青云偷眉色重波皱碧水学罗纹更谁处莺调白玉管蝶舞郁金裙兰叶舫头翠觥凉月柳丝楼上红袖斜曛 忽风吹尘世再来处已是路阻渔人空记寻香梅市索笑桃门叹霜高水瘦鄂王祠庙渚寒花谢苏小乡邻几度断桥伫立惆怅黄昏

送辰六归广陵

春随人共到春光好人又去匆匆正水涨蒲桃香溪画鷁堤垂杨柳茂苑青骢送君去棹歌回晚雪帆影挂轻虹六代旧愁难留叔宝一篇新赋送别文通 登高还携手繁华地斜阳老尽英雄多少?夷留恨杜宇啼红问玉箫断後谁家夜月乌衣归去何处春风无限凄凉心事唱彻江东

高山流水

戊申二日登学士山次辰六

春城昨夜到东风畅幽怀闲骋花骢千顷绕长堤晴波碧浸芙蓉登临处胜友相从攀萝陟孤
巘偏怜絶顶一片笼嵒笑韩陵解语慷慨念芳踪 茗中名贤有遗迹应不似玉局髯翁官暇却
旌幢啸傲处独扶筇青山无语几英雄酹金鍾云何坡仙姓字尚记高峰问千秋更谁知我与
诸公

沁园春

悠然阁种木芍药

半阁初成正见南山名曰悠然有疎窗六尺低才压帽藏书两架小恰如船芳树檐头晴嵐屋
上放了晨衙即醉眠春深矣且聘红买緑俸里支钱 洛阳佳种争妍想太白清平调可怜把护
花铃索随时安顿移春亭慢着意遮全贯酒酹香教歌试艷?与东皇结胜缘吾还笑笑当年杜
牧也为花颠

四十九自壽次澹心

历数浮生便百余龄几度衔杯况山青水緑时逢岁稔物华天宝节近星回野叟椰壶儿童竹
马逸老同登近水台真天幸幸唐尧帝力於我何哉 称觴漫向官斋怕有霜华两鬓堆念今年
厄闰黄杨短寸昨宵占复葭管成灰磨蝎休嗟南箕漫翕一任黔雷分付来吾今晓晓人间公
辅别是雄才

子壽诞先予一日时正冬至次韵为赠

我友元龙百尺高居在此楼中忆西京春宴同吟芳树东堂晚食共啖油葱草檄花前题诗马
上咄咄徒夸锦字工呼天问问庙堂谁是衮衮诸公 开尊客有涛戎把祝遥看海日红正暖回
宫线梅舒艷雪灰飞缙管葭转和风少长三年争先一日甲子雌雄算已慵吾还笑笑君如陈
亮我愧吴融

述怀

落拓黄衫一帽东风星星髯须只侯羸关畔题诗借笔漂母祠前卖酒骑驴跃马平生当年儿
戏为甚关门独较书花前醉笑古人欺我击缶乌乌 江山何处归欤算且去江边学钓鱼看马
卿才调何年北阙孙郎意气几日东吴三尺玉龙一牀狂梦曾到大槐宫里无呼天语问天生
如此肯老菰芦

想想园为坦夫题【有序】

乐安廷尉新斋先生志托烟霞有怀未遂图为想园聊以寄意也坦夫复作想想园图盖於缥缈之间存堂构之思其为想也益悲而远矣夜雨当杯漫成一阕

金谷楼空玉津园废恨满铜駝记据梧南郭赋成乌有种花西圃乡号无何自谓羲皇不知魏晋此事凭教春梦婆苏门路叹回车腹痛吾又经过翟家雀散空罗生子谁如仲也多向堂中听雨徒怜载酒湖边对月还忆闻歌旧业都非故书犹在若有人兮带女萝仍长慨慨当年结想未遂岩阿

题友人照

夫子为谁曰郑当时抑郑康成向梅花阁上诗同水部菊英篱畔酒似渊明三径长开百城独拥笑倚南轩七尺屏天然处有点苍翠色月白霞青葛陂偶尔闲行问醉踞平泉复几曾爱狮蹲虎伏羣峰耸秀龙衔螭绕九节能轻天与宫商地资丘壑耐久交情画未能吾还笑笑欧公白傅曾主斯盟

赠王秋山秋山工为?画

天壤王郎具天下才而巧若斯向边生腕里撇开彩笔薛娘针下碎襞灵丝缀就成春呼来欲活展卷同惊未有奇真奇也比千秋图画高一分儿相逢别具襟期看湖海风流一笑时笑谈兵席上公髯如戟衔觞烛底人醉如泥技至此乎谁为是者长笑翻疑不是伊何疑尔疑红窗金剪另有蛾眉

题高咏楼

天与才人以千丈峰当百尺楼恰遇吴季重携青镂管见徐孝穆披翠云裘据榻高眠倚阑长啸放眼乾坤复几州真奇絶看朝来爽翠飞上帘钩人间那用埋忧只一片闲云醒醉眸况金门旧隐文章豪迈玉山新筑水石清幽緑野何年赤松谁是巧拙宁论鹄与鳩君无负这麴生风味车子歌謡

洞庭春色

咏鳩柴奇觚困【有序】

雒城朱君羲人盖服道好古之士也筑一室名鳩柴室之中举无凡物其最异者为癭觚觚之属凡十具一日西母觚合之则巨桃故一分之则两様故二之也次日古锦囊曰洞庭波曰监湖冠曰鲸涛曰露珠明曰一卷书形如其名质如其形最次曰醉緑天形肖蕉曰高士觚形则肖梧其他酒筹韵叶匕箸盘具皆取诸竹木自然之质诡譎奇巧语之焉而不信见之焉而始

骇信惟畸人乃有畸物岂区区流俗所能得哉予爱而玩之为赋洞庭春色一章酒酣倚声亦足以乌乌耳热也乎词曰

欢伯频来醉乡无事与竹木居笑彼君子者能用无用有怪物焉曰觚不觚磊砢槎枒惊乍见迨几度摩挲信有夫方才信是山川瓌异絶倒淳于 崑仑料难留种且樽前漫说蕉卷荷舒任锦袍江上频浇丽句黄冠湖畔可了奇书赊取月明同一七向南郭颓然共据梧长须是把花枝笑折击鉢呼卢

贺新郎

次子壽韵送袁两生归娶广陵

似汝真佳客立亭前轻衫侧?品红裁碧醉後偶然歌水调吹碎江头铁笛且莫笑登楼岑寂试问周郎能顾曲向年时赤壁才摧敌君好去图鹏息 蓝桥本是裴航宅况雷塘玉箫明月风流难毕镜阁双眉人待画索笑三生旧石又岂待阮家南北从此临邛沽酒伴羨远山对影肩双立齐拍手称连璧

送邓孝威用辛稼轩赠陈同父韵

去矣无多说记当时英雄细数管予君葛偶出便知成小草辜负剡溪夜雪尽冷落北山曦发此地相逢同浩叹且青尊醉吸苕川月为起舞弄柔瑟 朝来画桨还催别笑年来暮云春树几番离合落落行藏空手板难问圆蓍智骨看柳色红亭凄絶又甚日龙文虎气向延津再会芙蓉铁酒尽也肠堪裂

小集董樗亭濠上分韵

雨緑槐陰偏客窗间莺儿无赖若来呼唤为覓广川过略约笑语梅风香乱恰又遇羊欣白练卢橘黄鱼新荐酒正小开花底梁园宴濠濮兴知非远 人间多少沉湘怨笑年年赚他儿女彩丝罗扇莫问蛟龙明日事且把红牙低按看隔水斜阳一片万点浮萍铺不了被阑干挂在垂杨线吾醉矣君休劝

次顾梁汾寄吴汉槎韵

更有何人否听哀笳秋风泪下断肠千首一出榆关成老大去日儿童非幼叹塞外遣愁无酒纵有酪浆堪痛醉怕冰天冻损雕龙手二十载相思久 毳裘八月霜华透拟将愁填平北海海应难勾总是才华招物忌不信才华偏有这岁月如何消受目断黄云惟一哭待奇人才把奇才救但湿尽青衫袖

又

世态炎凉久幸如君情关患难尚多良友闻道行吟憔悴甚岂尽赋穷诗瘦比自古无斯僇
僇亭伯凄凉应更远便夜郎李白如君否容易把双鱼剖 文章入库逢辰丑算从前几多才子飘
萍断柳我亦生当磨蝎宿半世五穷相守漫说是与才与壽试看君文真絶代问何如江令归
来後同顾况常搔首

江学在清瑶屿中和陈其年韵

屐齿穿苔罅爱君家鱼丝作脍雀锦披鮓坐上须眉人影緑一片空潭微射有数点海鸥常下
尽日狂谈挥玉麈笑人间世路羊肠怕吾醉矣心无挂 闲来泼墨珠泉泻记当年湖边杜牧置
身图画今日飘零江海上游倦临邛司马梦醒後邻钟初打华屋山丘休更叹看乌衣燕子重
来者今古事难凭藉

摸鱼儿

九十自壽次澹心

问苍翁神仙将相甚事可容安住少年爱说封侯好此日茫无凭据君休语且饱啖盘中霜脍
银丝缕痴儿騃女是天公爱惜容他厚福不用离骚句 吾生已四十九年无故宁须别寻旗鼓
丈夫栢沐风与雨终到云阶月户应非暮嗟世上软红十丈东华土芙蓉有主看鸡犬淮南丹
罏只在青桂丛生处

春风袅娜

丘路看桃花

问桃源何处曾赚渔郎沿岭路泛湖光扣兰舫又见苧萝烟雨忽成霞彩飞入蓬窗但有妖红
都无湿翠不辨胭脂深浅粧十里笼将画溪水一身疑上紫云乡 生恐封姨巧妒丝丝点点到
明日步障难藏倾椒醕祝东皇尊前惜取娇靥红裳莫待重寻玄都仙苑且教沉醉濯锦春江
尘缘休恋怕双扉人去题门诗在前度茫茫

玉女摇仙佩

无题

蓬山万里瞥遇仙姿不是 风班缀向月传神将花点靨总有自然佳丽眉黛谁堪比怕遥峰
碧嫩似人非易想应是鸳鸯命合便不相逢料也难已最爱下重帘烛底杯前雨嫣云媚 何况
深怜浅惜箴骨相思忍令白头抛弃荐枕楚台吹箫秦苑未似而今称美紫袖肩同倚雕兰畔
还把红兰香艺愿莫忘长生夜语西陵松栢久长情意如辜誓他年试检双鸳被

多丽

赠内

梦儿中猛唤一声堪惜几年来狂多醉少不逢些好消息又长安杏花红处看他人上马颜色
青草衣袍黄花颜面一牀寒雨愁空滴牛衣冷笼头布帽灯影弄余碧三更後封侯枕上醒来
无迹笑人里平原絶少那有黄金迎客为伊行冷心温熱又重把瑶壶共击碧碗浇愁红衫搵
泪鸂褕裘沾酒陶家壁更怜取歌成五噫同读还同译临邛去秋雨茂陵忍添鸾只

法曲献仙音

虎丘怀古和韵

海涌峰头舞残歌散犹认旧家南国金虎苍茫玉鱼零落短簿何堪收拾只留取荒台下点剩
生公石今何日叹时时醉红低翠尽意把剑铁花磨蚀搔首我重游问何处水犀遗迹霸业销
沉又宁论楼台金碧但画船归後凄然雨钟烟笛

鹤冲天

题钱葆酚舍人小像

采花陆渚客梦来寻处春晚得吟笺相思句山陰挈一叶别馆临秋留住画里人堪侣烟波点
染宛在綠苹苍苳金华早暮起草催君去肯任把白石溪中煮且鸾台凤蜡细数尽铜龙雨监
湖他日许长条繫艇着我共倾幽绪

乳燕飞

五月八日诸子过集听松书屋和东坡韵

老树陰连屋映朱阑碧池新涨燕教雏浴柳外屐声来胜侣善赋都如宋玉试荀香漫煎黄熟
席上檐花清影乱看银蟾正照屏山曲可此际声无竹画罗衫子黄金簇向樽前回眸一笑顿
忘羈独自分樊川甘薄幸礼岂能为我束正恨是春陰成綠况有何戡今白髮把当年公瑾离
愁触歌罢也梁尘簸

百字令

登郁孤台和丁雁水观察韵

颓然高阜独青青揽尽两江江色浪迹偶来频吊古台榭已怜非昔竹树遗墟藤萝夕照不见

当时客凄凉惟有暮云千里凝白 闻说叔子公余季方才妙曾着临川屐我似东坡还过海空
爱韩陵孤石望阙神遥登楼梦杳往事怀邀笛何时归隐草堂山北之北

南浦

鲍子韶邀集莲社庵即送家观庄入粤

参军鲍照爱携蛮榼趁秋光来值芙蓉城主逸兴满潇湘走马大堤沙软到鸡园竹下拥胡牀
把两江烟水尽收金笋点染付奚囊 耐耐荻花枫叶正飕飕凄絕似浔阳肠断河梁分手更卧
病清漳自是旅游无好况人留人别总堪伤赖庾公还把一天风月好平章

金明池

集曾波阁

白鹤珠宫苍龙玉沼司马浮踪暂息砧杵动离心欲冷有今雨旧雨上客过虹桥皂盖飞来总
踏乱几亩寒山秋碧向竹里行盘花间弄笋共道西园重集 可怪双江帆影急把好梦吹残胜
游空忆风中曲琼箫竞响波上月锦灯同色况芙蓉地主情多便折柳旗亭怎生消得且尽衔
杯擘笺分韵莫负清宵瑶瑟

林蕙堂全集卷二十五

卷二十六

钦定四库全书

林蕙堂全集卷二十六

湖州府知府吴绮撰

填词

题情

二郎神

情多少这愁城奈无端缭绕几幅鸾笺辞絶妙偷看灯下反教添害心焦懊恨莺簧搬鬪巧骂东风桃花知道带痕交笑休文翻似恁瘦损宫腰

集贤宾

真真艷影难画描怕因病多娇终不似前春无病好对青天空守长宵嫦娥自老怎耐得双星相笑谁可告这情绪怎凭青鸟

黄莺儿

密意托红绡一丝长一泪抛也知蚕尽丝难了心香自烧心旌自摇文园病渴无人晓把诗敲只怕你庭前咏絮愁侶絮飘飘

琥珀猫儿坠

新词满纸何处问根苗日出当心雨未消黄连哑口暗相嘲迢迢难道是如影儿的云英只会向梦中琼岛

尾声

护花生怕金铃小终日把封姨祝祷你莫要雪里寒梅损半梢

九日泊鸳鸯湖忆内

二郎神

霜花剪叹柔肠与孤帆共卷六尺蓬窗无几扇装来离绪那堪恨万愁千宋玉悲凉骚屈怨都砌就相思一片影凄然洒青衫秋风泪落灯前

集贤宾

秦台跨凤思那年记同到湖边画省金門携手遍向槐安一霎留连俄延月蹇又了却书生前件人不远看泪影模糊双眼

黄莺儿

歌吹恨邻船猛惊回梦不圆鸳帏想你也今宵倦长卿俸钱渊明秫田归来百事愁难遣意悬悬黄花消瘦无计慰金钿

琥珀猫儿坠

三更酒醒拥被不成眠岂是临风泣断猿一生难负是婵娟颠连到不如庀下周旋免教萦牵

前腔

几番惆怅悞我是龙泉一曲商歌起扣舷萧萧红叶舞江烟休怜笑破镜团圞青天难见

尾声

鸳鸯飞去情波满便有酒何人相劝恨只有烟雨楼空莫问天

伤逝

醉扶归

红楼咫尺青天远记当时曾贮小婵娟叹陌上相逢也竟无缘空教影向巫山现崔徽图里拾金钿算认得个春风面

步步娇

误却韶华是莺和燕有约何曾践寻花小杜颠吊下相思春红一片血泪染冰弦向海棠难唤东风转

江儿水

说起题门事重来总枉然看行行墨染是齐纨扇颗颗情圆是明珠串丝丝绣结香囊线赠答徒劳黄犬恨煞罡风猛地把蓝桥波溅

园林好

写红笺千般缱绻掩翠袖一生哀怨道岭外种梅方便谁料取上青天谁料取阻黄泉

五供养

虚名留恋想赌茗描书好事难圆素娥奔夜月紫玉化春烟都是我南柯短促反辜负玉人良愿只索向孤月下百花前红么点字哭飞仙

饶饶令

青衫徒有恨锦字倩谁传欲访鸿都人何在再莫向春山听断猿

尾声

梨花落尽成秋苑扫不断墓门苍藓只恐你一点贞魂学杜?

且歌

中吕粉蝶儿

蚁散槐衙小南柯紫衣归乍感天公赐与烟霞破青衫将血泪随风揩抹为苍生打动嗟呀何曾有别般牵挂

醉春风

当日个说意气傲孙刘论文章高贾马清平三曲醉沉香畅好是傻也傻岂料把半世孤怀一生豪气都做了五湖闲话

普天乐

碧波前苍山下做几件惊天动地衡一味费嘴磨牙甫能得江山色气开鱼鸟儿孙大猛地罡风吹一吓老东方多受波查我本是排场浑家撮空博戏紧遇看个剪绺生涯

醉高歌

听池塘一阵鸣蛙禁得我头皮害怕从今教折盘铃架把狂阮双眸闭煞

十二月

恁狠颠颠鳖来厮踢眼睁睁蟹自横爬因甚的拏三道两空费却浪酒闲茶我只得破春梦一盘剩局趁秋风八月浮槎

尧民歌

呀种些儿彭泽令醉中花栽些子东陵叟卖残瓜有时节正平三弄鼓儿挝有时节乐天江口听琵琶有甚麽兜答兜答聊收笑与啼权用聒和哑

煞尾

算公卿别自有根芽笑平生即世无奸猾向青云传语道干休罢待做个忍辱神仙在世上要

江夏君五十

新水令

半生踪迹不堪题感知心吾家乡里牛衣啼夜雪象服舞仙霓历遍云泥白头的我和你

驻马听

忆许门楣逸少牀边亲见委旋成匹配伯通庑下早思归一朝扶上紫霞梯十年索尽金门米真不意千行兴庆仍千骑

雁儿落

虽则是蕙王章不顾家莽张敞多闲气倦相如早罢官嬾靖节无生计

得胜令

我和你富贵味曾知山水事堪期子有雕龙俊孙多蜡凤奇

川拨棹

今日价算年华两平分百岁矣试看那灯影离离月色依依翠管咿咿彩袖傣傣略做就儿夫
首尾又何惜玉山颓

七兄弟

和伊相携且归兮将清闲权把繁华替鹿门从此和歌随任沧海红尘起

收江南

笑人间万事与心违问何方安稳是渔矶对梅花祝向老来妻再相劝一杯愿年年长把凤箫
吹

苏台怀古

锦纆道

好江山留不住年年艷阳垂柳暗金昌问梧宫当时旧梦难忘百花洲锦帆风香波画桨镇时
时鬪鸡陂走狗横塘彩屨响红廊教六宫人把采莲齐唱东窗白玉牀浑不觉螳螂相傍有多
少水犀君子在三江

普天乐

捕蝉惊游鹿上藕花残梧叶漾馆娃宫飞散鸳鸯枫桥火分付渔郎把歌筵舞場一时儿任青
山冷笑兴亡

古轮台

叹茫茫无端霸业水云荒勾销不尽英雄帐千秋悲怆话到渔樵依旧是繁华一樣燕语朱门
莺啼綉幌一般儿锦缆与牙樯又何曾停歌歇舞向西风洒泪沧桑只落得生公石上要离塚
畔真娘墓下慷慨赋诗章更谁念高台白露欲沾裳

尾声

?夷江上笙箫响镇年来游人玩赏我直要替桂子荷花计久长

赠苏崑生

尾犯序

风雪打貂裘乡思惊梅客心催柳古寺栖迟见白发苏侯如旧最喜是中原故老犹记取霓裳
雅奏相怜处把繁华往事灯下说从头

倾盃序

风流忆少年不解愁游侠争驰骤也曾向麋鹿台前貔貅帐里金谷留连玉箫迤逗把豪情倚
月逸气干云西第南楼都付与漆园蝴蝶老庄周

玉芙蓉

沧桑一转眸云雨双翻手到如今萧萧霜髯如秋那些个五侯池馆争相迓只落得六代莺花
莽不收抛红豆叹知音冷落向齐廷弹瑟好谁投

小桃红

枉湿了浔江袖还剩得兰陵酒尽红牙拍断红珠溜青鞋踏遍青山瘦把黄冠撇却黄金臭管
甚麽蛟龙争鬪无休

尾声

狂歌一曲为君壽同在此伤心时候且劝你放眼乾坤做个汗漫游

旅怀

二郎神

归无计向苍天问年来怎的古寺寒钟催客起鹑裘不暖连朝冻雨凄其火冷秦篝香穗细笑
煞人有身如寄强添衣沈郎腰知他瘦减因谁

换头

休提司马文章元龙意气救不得空囊长似洗叹人情一似堦前雪影霏霏转眼飘零随逝水
只落得凄凉满地把雄心对青觞猛可难羈

集贤宾

平生直性无是非又何事堪悲惆悵青编多破碎赚才人无故低眉酸心冷意受用这梅花滋
味宵梦美醒後道声惭愧

前腔

更残梦短空自知总一味迷离略记封侯孤帐底是依然年少闻鸡彭城古垒问?子成名谁比
吾倦矣呼取緑醕沉醉

黄莺儿

醉眼晚云垂好乾坤战骨堆檐前点滴是新亭泪鼓声儿是砧笛声儿是伊英雄屈指今余几
漫徘徊当年管葛肯自老渔矶

前腔

勉强赋归兮便归来转自疑南阳不是农桑地向东篱举杯看东山着棋兰成赋笔非憔悴看
芳菲无言桃李何处可成蹊

琥珀猫儿坠

人卑人辱何必合时宜得意高云失意泥丈夫何事不雄飞噫嘻有知我龙泉俗眼奚为

前腔

今今古古往事漫含凄猿臂将军独数奇蛾眉女子竟无媒宁迟但舌在何妨归问山妻

尾声

山陰访戴舟还繫休算作刘郎一例我且自扣角南山夜掩扉

四时闺怨

琐南枝

条风动媚景生红嫣粉柔花径明蜂蝶共含情榆钱买难剩我空闺守心暗惊这奈何天教人
怎支领

前腔

新荷展昼渐长莺儿燕儿他自双深緑暗纱窗停针倦还想等得我轻雷过下夕阳只有那小
流萤暂来往

前腔

银河见玉露溥罗衾夜凉香梦单黄叶打阑干哀蛩和长叹正把秦筝抱不忍弹那更度南楼
一声雁

前腔

霜威紧掩绮枕屏山四围香兽红梅月夜朦胧寒生玉钗凤空放着兰陵酒琥珀浓叹这暖金
鳧有谁共

林蕙堂全集卷二十六